

# Puisi Melayu TRADISIONAL

TRADISIONAL

Bersama-sama dengan Penerjemah dan Penulis

NASKHAH CONTOH  
SAMPLE COPY

Dewan Bahasa dan Pustaka  
Kementerian Pendidikan Malaysia  
Jalan Ampang  
NASKHAH PEMELIHARAAN  
PERPUSTAKAAN NEGARA MALAYSIA  
26 DEC 1989

# Puisi Melayu

## TRADISIONAL

---

Satu Pembicaraan Genre dan Fungsi

Harun Mat Piah

Dewan Bahasa dan Pustaka  
Kementerian Pendidikan Malaysia  
Kuala Lumpur  
1989

KK 896-4245 5101  
ISBN 983-62 1042-3

Cetakan Pertama 1989  
© Hakcipta Harun Mat Piah 1989

Hakcipta terpelihara. Tidak dibenarkan mengeluar ulang mana-mana bahagian, artikel, ilustrasi, isi kandungan buku ini dalam apa juga bentuk dan dengan apa cara pun sama ada secara elektronik, fotokopi, mekanik, rakaman atau lain-lain sebelum mendapat izin bertulis daripada Ketua Pengarah, Dewan Bahasa dan Pustaka, Kuala Lumpur. Perundingan ter-takluk kepada perkiraan röyalti atau honorarium.

Diatur Huruf oleh Dewan Bahasa dan Pustaka  
Muka Taip Teks: Times New Roman (Kod 3271)  
Saiz Taip Teks: 10/12 poin

M  
899.231 523780  
HAR APB

Dicetak oleh  
Percetakan Dewan Bahasa dan Pustaka  
Lot 1037, Mukim Perindustrian PKNS  
Ampang/Hulu Kelang  
Selangor Darul Ehsan  
\$25.00

26 FEB. 1990  
Perpustakaan Negara  
Malaysia

## KANDUNGAN

<i>Prakata</i>	vii	
<i>Pendahuluan</i>	ix	
<i>Senarai Singkatan</i>	xxxiii	
<i>Nota Tentang Ejaan dan Penggunaan Istilah</i>	xxxv	
BAB		
I	Puisi Melayu Tradisional: Konsep, Bentuk dan Ciri	1
II	Genre Puisi Melayu Tradisional	37
III	Pantun	105
IV	Syair dan Nazam	209
	<i>Syair</i>	209
	<i>Nazam</i>	282
V	Gurindam, Seloka dan Teka-teki	310
	<i>Gurindam</i>	312
	<i>Seloka</i>	334
	<i>Teka-teki</i>	343
VI	Talibun dan Prosa Berirama	366
	<i>Talibun</i>	366
	<i>Prosa Berirama</i>	400
VII	Teromba dan Peribahasa Berangkap	423
	<i>Teromba</i>	424
	<i>Peribahasa Berangkap</i>	459

KANDUNGAN

VII	Mantera dan Dikir	478
	<i>Mantera</i>	478
	<i>Dikir</i>	526
IX	Kesimpulan	550
	<i>Lampiran</i>	557
	<i>Bibliografi</i>	597
	<i>Indeks</i>	613

## PRAKATA

BUKU *Puisi Melayu Tradisional: Satu Pembicaraan Genre dan Fungsi* adalah berdasarkan disertasi Ph.D. yang diajukan kepada Jabatan Persuratan Melayu, Universiti Kebangsaan Malaysia, 1981, dengan judul yang sama. Selain daripada bahagian Pendahuluannya yang diubahsuai, seluruh kajian tersebut diperturunkan ke dalam buku ini tanpa apa-apa pindaan kecuali pembetulan ejaan dan sedikit susunan isi.

Di sini penulis ingin mengambil kesempatan untuk mengucapkan ribuan terima kasih dan penghargaan yang tinggi kepada Prof. Dr. Muhammad Haji Salleh, Profesor di Jabatan Persuratan Melayu kerana khidmat beliau sebagai penyelia dan penasihat dalam penyelidikan dan penulisan kajian tersebut. Penulis juga mengucapkan terima kasih kepada Universiti Kebangsaan Malaysia, Perpustakaan Tun Seri Lanang, Perpustakaan Universiti Malaya, Dewan Bahasa dan Pustaka, Kementerian Kebudayaan, Belia dan Sukan dan Jabatan-jabatan Kebudayaan, Belia dan Sukan negeri-negeri dan daerah-daerah atas segala bantuan dan kemudahan yang telah diberikan kepada penulis di sepanjang masa penyelidikan tersebut.

Lebih daripada itu penulis mengucapkan ribuan terima kasih kepada ratusan para informan dan pendukung berbagai-bagai kegiatan seni di seluruh pelosok tanahair yang telah memberikan bahan, maklumat dan demonstrasi dengan begitu jujur dan ikhlas. Demikian juga para siswa dan siswi Universiti Kebangsaan Malaysia dari Institut Bahasa, Kesusastraan dan Kebudayaan Melayu dan Jabatan Persuratan Melayu yang telah bersama-sama menyumbangkan bahan, membuat dokumentasi dan catatan. Kepada mereka, mahasiswa dan para informan, penulis memohon izin menggunakan bahan-bahan yang terkumpul, secara langsung atau tidak, sebagai

## PRAKATA

bahan dasar kajian ini.

Akhir sekali, penulis tidak lupa mengucapkan terima kasih kepada Cik Rosenah Mohamad di Universiti Kebangsaan Malaysia atas kesudian beliau mengendalikan penaipan kajian tersebut. Dan seterusnya kepada isteri dan anak-anak penulis yang tidak pernah jemu memberikan galakan dan inspirasi ketika penulis menyiapkan kajian ini.

Semoga semua pihak yang terlibat diberkati Allah selama-lamanya.

Harun Mat Piah  
Universiti Kebangsaan Malaysia  
Bangi, Selangor Darul Ehsan  
1989

## PENDAHULUAN

Matlamat Kajian

MATLAMAT utama kajian ini ialah membincang dan menganalisis puisi Melayu tradisional – atau puisi Melayu lama khususnya dalam masalah genre dan fungsinya. Pengertian genre di sini adalah seperti yang difahami umum, iaitu jenis atau bentuk sastera (*kind, class, a literary species*); dan pendekatan kepada penjenisannya akan memberatkan kategori-kategori kesusasteraan di samping pertimbangan-pertimbangan sosiologi dan psikologi, bilamana diperlukan. Semen-tara fungsi pula akan lebih jelas bermakna kegunaan atau peranan puisi itu dalam kegiatan-kegiatan kesenian dan hubungan-hubungan sosial lainnya dalam kehidupan masyarakat.

Permasalahan genre dan fungsi ini, dalam konteks puisi Melayu tradisional, merupakan bidang pembicaraan yang penting; pertama-nya persoalan itu bukan sahaja masih belum diselesaikan malah dapat dikatakan dalam keadaan yang mengelirukan. Berbagai-bagai istilah dan definisi yang berlainan diberikan pada bentuk yang sama, atau sebaliknya, istilah dan definisi yang sama pada bentuk-bentuk yang berlainan. Huraian dan contoh bagi sesuatu genre juga berbeza-beza antara seorang pengkaji dengan yang lain hingga menimbulkan kesulitan dalam mendapatkan sesuatu konsep yang dasar sebelum memperluaskan bidang kajian yang lebih menyeluruh. Keduanya, dalam waktu yang akhir-akhir ini, hampir tidak ada lagi pembicaraan-pembicaraan yang ilmiah dan saintifik dibuat terhadap puisi Melayu tradisional. Hal ini berlaku bukan sahaja kerana bidang itu tidak begitu menarik minat para pengkaji, tetapi mungkin kerana masih banyak masalah semasa yang lebih penting dalam bidang kemanusiaan dan kemasyarakatan yang perlu diselesaikan, termasuk misalnya mengenai kedudukan dan peranan puisi moden da-

lam konteks perkembangan masyarakat dan kebudayaan Malaysia dewasa ini. Justeru itu persoalan-persoalan yang penting mengenai puisi Melayu tradisional, yang dulunya dibicarakan dengan begitu ghairah oleh para sarjana dan pengkaji yang telah lalu, seolah-olah ditinggalkan begitu sahaja dengan masalahnya yang belum selesai.

Kajian ini mencuba menyelesaikan kesulitan tersebut, khususnya pada menentukan jumlah genre puisinya, mencadangkan istilah yang sesuai untuk sesuatu genre, menentukan garis kasar yang membezakan antara genre, ciri-cirinya yang umum dan seterusnya memberikan seberapa banyak contoh yang sesuai bagi setiap genre. Di samping itu kajian ini juga membincarakan isi dan fungsi sesuatu genre kerana aspek-aspek ini juga membantu ke arah penentuan genre yang dimaksudkan. Daripada tinjauan tentang fungsi juga dapat diperlihatkan tempat dan peranan puisi dalam masyarakatnya, baik dalam masyarakat yang lama maupun yang sezaman. Maklumat dan analisis dalam hal ini mungkin didasarkan kepada bukti-bukti sejarah atau pada konteks yang berkenaan yang ditemui dalam penyelidikan-penyelidikan yang dijalankan. Dari sini mungkin dapat dijelaskan bahawa puisi bukanlah sebagai sumber hiburan dan keseronokan semata-mata tetapi mempunyai fungsi yang lebih penting dalam kehidupan sosial masyarakat yang berkenaan.

Dengan pendekatan terhadap genre dan fungsi ini, diharap kajian ini akan dapat mencapai matlamatnya dalam menentukan jumlah dan pembahagian genre, menentukan definisi dan ciri sesebuah genre dan seterusnya fungsi puisi itu seluruhnya dalam kehidupan masyarakat yang mencipta dan mewarisinya.

### Bahan dan Kaedah

Bahan dasar kajian ini ialah semua bentuk pengucapan yang tergolong sebagai puisi Melayu tradisional atau puisi Melayu lama, sama ada dari yang telah tertulis dan telah dikaji sehingga ini, atau yang masih belum tertulis, iaitu sebagai tradisi lisan yang diabadikan dalam berbagai-bagai kegiatan seni dan budaya masyarakat. Penumpuan kepada bidang yang akhir itu dibuat atas kesedaran bahawa puisi yang dibicarakan ini masih berkembang dan berfungsi dalam masyarakatnya dari dahulu hingga sekarang. Justeru itu tidaklah akan memadai dengan menggunakan bahan-bahan yang telah tertulis yang kebanyakannya merupakan hasil daripada pengumpulan

## PENDAHULUAN

para pengkaji hampir setengah abad yang lalu. Kerana itu sedapat mungkin kajian ini berusaha menggunakan sumber-sumber lisan yang agak baru sama ada yang dikumpulkan khusus untuk kajian ini, atau daripada pengumpulan-pengumpulan yang telah dijalankan oleh institusi-institusi tertentu atau orang-orang perseorangan. Sebahagian besar daripada pengumpulan dan dokumentasi telah dijalankan hampir di semua negeri di Semenanjung Malaysia, termasuk Perlis, Kedah, Pulau Pinang, Perak, Selangor, Negeri Sembilan, Melaka, Johor, Pahang, Kelantan dan Terengganu. Beberapa contoh telah juga digunakan bagi mewakili puisi peribumi Sabah dan Sarawak. Namun begitu, oleh kerana batasan waktu dan kemudahan yang terhad, tinjauan-tinjauan terpaksa dibataskan kepada daerah-daerah yang 'sengaja' dipilih, berdasarkan pengetahuan yang sedia ada dan didapati mengenai daerah-daerah itu. Kerana itu Kampung Gajah di Perak ditinjau untuk permainan-permainan lotah, dabus dan lukah; Kuala Terengganu untuk nazam, rodat, saba dan ulit mayang; Kuala Pilah, Jelebu dan Rembau di Negeri Sembilan untuk bongai dan teromba; Kangar, Perlis untuk canggung dan beduan; Batu Pahat, Johor untuk kempelingan dan hamadolok; Kota Bharu dan Tumpat untuk main puteri, bagih dan lain-lain. Yang agak menyeluruh ialah mantera yang dapat dikumpulkan hampir dari semua negeri di Semenanjung.

Bahan-bahan yang tertulis diperolehi daripada berbagai-bagai sumber. Sumber pertama ialah pembicaraan-pembicaraan mengenai puisi Melayu lama, yang berupa kumpulan-kumpulan puisi – satu atau berbagai-bagai genre – seperti *Pantun Melayu* oleh R.J. Wilkinson dan R.O. Winstedt (1961), *Pantun Melayu* penerbitan Balai Pustaka (1958), dan *Syair Perang Mengkasar* (Skinner 1963); pembicaraan-pembicaraan umum mengenai kesusasteraan Melayu lama, seperti *Ilmu Mengarang Melayu* (Za'ba 1962), *Kesusasteraan Lama Indonesia* (Zuber Usman 1975), *Langgam Sastera Lama* (Gazali Dunia 1969), *A History of Classical Malay Literature* (Winstedt 1969) dan lain-lain.

Oleh kerana puisi Melayu lama itu digunakan juga dalam karangan prosa, perhatian diberikan pula kepada bahan-bahan yang berupa cerita naratif dan penglipur lara seperti *Hikayat Malim Deman* (Winstedt dan Sturrock 1957), *Hikayat Awang Sulung Merah Muda* (Winstedt dan Sturrock 1957), *Raja Donay* (Zaharah Khalid

## PENDAHULUAN

1963), cerita-cerita dari 'kaba' Minangkabau, seperti *Rancak Dilabueh: A Minangkabau Kaba* (Johns 1958) dan *Kaba Cindua Mato dan Bundo Kandung* (Sjamsuddin Sutan Radjo Indah tt.) dan beberapa yang lain. Semakan telah juga dibuat terhadap novel-novel Melayu dalam zaman permulaan (tahun-tahun 1920-an) yang menggunakan puisi bukan saja untuk kata-kata 'Pendahuluan' kepada karya tersebut, tetapi sebagai suatu cara memerikan sesuatu babak yang "dirasakan lebih baik dibuat demikian", misalnya novel-novel *Hikayat Setia Asyik Kepada Maksyuknya: atau Syeikh Affendi dengan Faridah Hanom* (Syed Syeikh al-Hadi 1928), *Hikayat Perjumpaan Asyik* (1934) dan lain-lain.

Baik dalam kajian perpustakaan mahupun kaji lapangan yang dilakukan, kajian ini pada dasarnya menggunakan pendekatan-pendekatan sastera yang mementingkan prinsip dan teori kesasteraan; tegasnya bukan sejarah, sosiologi atau muzikologi. Suatu tinjauan yang dilakukan terhadap daerah, kelompok masyarakat, kumpulan-kumpulan atau orang-orang perseorangan atau sesuatu kegiatan seni, semata-mata bertujuan mendapatkan bahan-bahan berupa puisi. Kerana itu tidaklah dipentingkan soal-soal sejarah kegiatan atau permainan yang dikaji, bentuk persembahan, irama lagu atau nota muziknya, atau keadaan sosial dan ekonomi masyarakat yang berkenaan. Mengenai mantera, misalnya, kajian ini tidak membicarakan tentang konsep dan kepercayaan, hubungan-nya dengan kebudayaan lain, atau sambutan dan kesannya kepada masyarakat; kerana aspek-aspek itu adalah di luar ruang lingkup kajian ini. Penulis tidak menafikan betapa pentingnya aspek-aspek itu dikaji, terutama pada ungkapan-ungkapan yang merupakan konsep atau inti pada mantera itu seluruhnya; tetapi dalam konteks ini, aspek-aspek itu memerlukan penelitian yang tersendiri, misalnya yang khusus membicarakan mantera.

Pada beberapa tempat telah juga dipergunakan bahan-bahan daripada pengumpulan yang dijalankan oleh mahasiswa dengan penyeliaan pensyarahnya sama ada dalam bentuk latihan ilmiah, kertas projek dan lain-lain; tetapi penggunaannya hanya sebagai maklumat pertama. Biasanya yang dipetik ke dalam kajian ini ialah daripada yang telah dipastikan oleh penulis melalui tinjauan atau hubungan yang diadakan kemudiannya. Dan sumber-sumber ini lebih merupakan usaha-usaha kolektif; justeru itu tidak dinyatakan dalam penun-

ruk rujukan dan bibliografi.

Dengan maklumat dan pendekatan yang diambil untuk kajian ini penulis berpendapat bahan-bahan yang terkumpul dan dipergunakan ini dapatlah dikatakan mencukupi, sekurang-kurangnya buat sementara sehingga kajian-kajian yang lebih mendalam dapat pula dijalankan kemudian nanti.

### **Latar Belakang Pengkajian yang Telah Lalu**

Sebelum ditumpukan perhatian yang lebih terperinci dalam masalah genre dan fungsi, mungkin perlu dibicarakan dengan ringkas usaha-usaha yang telah dijalankan oleh para pengkaji yang telah lalu dalam pengkajian-pengkajian mereka terhadap puisi Melayu tradisional. Dengan demikian akan dapat diperlihatkan kepentingan kajian-kajian itu dan hasil-hasil yang telah tercapai, seterusnya sumbang-sumbangan yang diberikan oleh para pengkaji dalam bidang pengkajian puisi khususnya dan kesusastraan Melayu umumnya.

Dalam hal ini, walaupun puisi Melayu tradisional itu telah berkembang dalam jangka waktu yang begitu lama dan tersebar luas dalam masyarakat Melayu di Nusantara namun minat dan pengkajian terhadapnya dapat dikatakan tidak berkembang sehingga abad yang ke-19. Walaupun telah ada beberapa tulisan oleh penulis-penulis Melayu tradisional, pengkajian yang lebih serius, menyeluruh dan berdisiplin hanya dilakukan oleh pengkaji-pengkaji yang kemudian yang kebanyakannya tergolong sebagai sarjana-sarjana, pegawai-pegawai pentadbir, mualigh, pengembara, bahkan para pelancung dari Eropah. Hasil kajian daripada golongan ini, walaupun agak besar jumlahnya, namun masih belum ada yang dapat dianggap lengkap dan definitif, justeru tidak adanya kajian yang benar-benar komprehensif dan mendalam, baik terhadap sebuah genre maupun daripada keseluruhan genre puisi Melayu itu.

Untuk memudahkan pembicaraan mengenai kajian-kajian yang telah dilakukan sehingga ini, di bawah ini dibahagikan pengkaji-pengkaji itu kepada empat golongan:

1. Golongan penulis dan pengkaji Melayu tradisional.
2. Golongan para sarjana dan pegawai-pegawai pentadbir Eropah.
3. Golongan pengkaji-pengkaji yang kemudian (termasuk pengkaji-pengkaji tempatan) yang terdidik dalam disiplin-disiplin sastera dan akademik.

- Pengkaji-pengkaji lain yang memberikan sumbangan khasnya dalam menyebarkan teori-teori dan pendapat-pendapat dari pada golongan di atas.

Perujukan yang mula-mula yang boleh dibuat terhadap puisi Melayu tradisional melalui sumber tertulis ialah pada puisi yang terpahat pada sebuah batu nisan di Minye Tujuh, Aceh. W.F. Stutterheim, seorang ahli sejarah dan kajipurba Nusantara telah mengkaji keadaan batu itu dan memberikan transkripsi puisinya seperti di bawah:

Hijrat nabi mungstapa yang prasaddha  
 Tujuh ratus asta puluh savarssa  
 Hajji catur dan dasa vara sukra  
 Raja Iman (varda) rahmatullah.  
 Gutra bha(ru) bhasa (ng) ampu hak kadah pase ma  
 Tarukk tasih tanah samuha  
 Ilahi ya rabbi tuhan samuha  
 Taruh dalam svargga tuhan tatuha.

(Stutterheim 1936, 268 – 279)

Rangkap puisi itu digolongkan sebagai syair oleh Stutterheim, berdasarkan bentuknya yang hampir sama dengan syair Melayu. Anggapan ini diteruskan oleh pengkaji-pengkaji yang kemudian sehingga G.E. Morrison mengkaji semula batu yang sama dan memberikan pendapat yang berlainan (Morrison 1951, 162 – 165). Menurut Morrison, puisi yang dimaksudkan itu bukanlah syair; tetapi adalah salah satu daripada genre puisi Sanskrit yang dikenali sebagai *upajati*. Walau bagaimanapun perbezaan pendapat ini hanya dalam memberikan nama atau istilah teknisnya sahaja; sedang pada pokoknya puisi Melayu yang tertua yang tertulis, telah pun ada sejak tahun 1380. Sementelah pula puisi ini menggunakan bahasa Melayu purba yang bercampur dengan beberapa perkataan Sanskrit, tertulis dalam huruf Sumatera Purba – dan dari segi pola iramanya tidak juga sama sepenuhnya seperti *upajati* Sanskrit itu. Tegasnya puisi itu bukanlah *upajati* Sanskrit, tetapi adalah sebuah puisi Melayu yang mempunyai bentuknya demikian.

Sumber lain yang merupakan dokumentasi tentang puisi Melayu adalah *Sejarah Melayu* yang dikatakan ditulis oleh Tun Seri

Lanang dalam tahun 1612 (Teuku Iskandar 1967, 38–53). Dalam buku ini disebutkan beberapa genre puisi Melayu, pantun, syair, gurindam dan seloka dan diberikan beberapa rangkap pantun dari cetera-cetera yang berkenaan (Shellabear 1975). Kajian yang kemudian tidak menerima kenyataan itu dengan mengatakan genre syair tidak dikenali dalam masyarakat Melayu sehingga abad ke-17 atas dasar bahawa syair bermula, dicipta dan diperkembangkan oleh Hamzah Fansuri (Syed Naquib 1968 & 1971). Dalam *Sejarah Melayu* juga tidak ditemui contoh bagi genre-genre yang lain selain daripada pantun. Walaupun begitu hal itu menunjukkan bahawa dalam abad ke-15, pantun dan beberapa genre puisi yang peribumi (*indigenous*) telah dikenali dan dipakai dalam konteks-konteks yang sangat sesuai.

Minat dan pengetahuan terhadap puisi dari sumber Islam dapat dilihat dalam *Tajus Salatin*, oleh Bokhari al-Jauhari, terkarang kira-kira pada tahun 1603 (Roorda Van Eysinga 1827 & 1899, 55–69). Bokhari memberikan beberapa contoh puisi Parsi yang diterjemahkan ke bahasa Melayu dengan nama-nama seperti dalam sumber asalnya; antaranya termasuk syair, ruba'i, masnawi, kit'ah dan ghazal. Contoh-contoh dari *Tajus Salatin* ini dipetik dan digunakan oleh pengkaji-pengkaji yang kemudian hingga ke masa yang paling baru (Sutan Takdir 1971).

Sumbangan yang lebih berkesan dalam pengkajian dan penciptaan puisi ditunjukkan oleh Abdullah bin Abdul Kadir Munysi. Di antara beberapa karyanya yang penting Abdullah telah menulis *Syair Singapura Terbakar* (1830) dan *Syair Kampung Gelam Terbakar* (1847); dan dalam *Kisah Pelayaran Abdullah* (1965), beliau menerangkan tentang kedudukan dan kepentingan kerat-kerat sampiran dan maksud dalam sebuah pantun Melayu.

Seorang lagi tokoh yang memberikan sumbangan dalam bidang ini ialah Raja Ali Haji bin Raja Haji Ahmad, seorang penulis sastera, sejarah dan ahli fikir yang banyak menghasilkan berbagai-bagai karya. Dalam karangannya yang berjudul Gurindam Dua Belas (1846), beliau bukan saja mencipta gurindam yang sangat baik dari segi isi dan puisi, tetapi juga membantu dalam menerangkan erti gurindam dan bezanya dengan syair (Netscher 1854, 11–32). Dalam hal ini Raja Ali Haji dapat dianggap sebagai yang mula-mula memberikan definisi dan istilah teknik kepada syair dan gurindam;

## PENDAHULUAN

walaupun penerangannya dalam memberikan perbezaan istilah itu tidak begitu jelas dan selesai.

Dalam karyanya yang lebih terkenal, *Kitab Silsilah Melayu dan Bugis dan Sekalian Raja-Rajanya* (1956), Raja Ali Haji mengemukakan rangkap-rangkap syair hampir dalam setiap babak ceritanya. Syair-syair ini, walaupun dari segi isinya merupakan ulangan kepada babak-babak yang telah diberikan dalam bentuk prosa, dari segi puisi dapat juga dianggap sebagai syair yang baik.

Tokoh-tokoh dan tulisan-tulisan yang disebutkan di atas tidaklah bermaksud untuk menunjukkan perkembangan penulisan yang kreatif dalam bidang puisi Melayu tradisional; kerana dalam zaman yang sama dan yang terkemudian dari itu banyak pula hasil-hasil berupa puisi terutamanya dalam genre syair ditulis dan diterbitkan. Tulisan-tulisan daripada tokoh-tokoh yang disebutkan tadi adalah yang menyerahkan keinginan meneliti, memberikan pendapat dan teori terhadap aspek-aspek yang berhubung dengan puisi Melayu; dan kerana itu dapat kita terima sebagai pengkajian atau sekurang-kurangnya percubaan mengkaji.

Walau bagaimanapun kajian-kajian yang lebih serius yang menggunakan disiplin-disiplin akademik, sastera, sejarah, antropologi dan filologi baru dilakukan oleh pengkaji-pengkaji yang kita masukkan ke dalam golongan kedua, iaitu para pengkaji Barat, Inggeris dan Belanda pada akhir-akhir abad ke-19. Dalam kalangan ini pun perkembangan dan kemajuan pengkajian kelihatan perlahan. Perujukan yang mula-mula dibuat kepada puisi Melayu ialah dalam sebuah buku nahu Melayu yang ditulis dalam bahasa Latin bertarikh 1688 oleh Johannis Christopheri Lorberi. Pengarang buku ini mengakui yang dia tidak pernah mendengar, membaca atau melihat sebuah puisi dalam bahasa Melayu. Tetapi yang anehnya dalam keterangan selanjutnya beliau menyebutkan tentang adanya nyanyian-nyanyian yang bertemakan cinta dan kasih sayang; sebagai contoh diberikannya sebuah pantun:

Souda malam, sjappa de pintoeu?  
Anak banda, tester casomba,  
Mari massock, jangan takot,  
Lakii beta adda cotta.

(Lorberi 1688)

Selepas itu tidak didapati lagi tulisan-tulisan mengenai puisi Melayu sehingga tiga suku abad kemudian, apabila Werndly (1736) menyentuh soal itu dalam buku tatabahasanya. Tetapi Werndly lebih banyak membicarakan jalan bahasa Melayu dan hubungannya dengan bahasa-bahasa lain dan seterusnya persamaan puisi Melayu dengan puisi-puisi lain, iaitu Yunani, India, Arab dan Parsi. Daripada hasil kajiannya itu beliau tidak menemukan persamaan itu kerana bahasa Melayu berbeza sama sekali dengan bahasa-bahasa yang dibandingkannya. Dalam aspek puisi misalnya, ciri-ciri prosodi puisi Melayu tidak memiliki tekanan tinggi rendah atau panjang pendek suku kata seperti dalam puisi-puisi Yunani, Sanskrit dan Arab.

Dalam Lampiran buku itu, di bawah tajuk "Maleische Boekzaal" disebutkannya, antara lain 'Pantun Speelman'; sedangkan pada kenyataannya cerita Speelman bukanlah pantun, tetapi bentuk syair dan lebih dikenali sebagai *Syair Perang Mengkasar*. Kesilapan ini mungkin kerana Werndly tidak memastikan genre puisi tersebut atau mungkin kerana judul cerita atau manuskrip yang dimaksudkan itu memang demikian (Maxwell 1890, 173–224).

William Marsden (1812) juga seorang ahli bahasa dan sejarah, membicarakan tentang puisi Melayu dalam buku nahunya. Antara lain Marsden mengusulkan cara menuliskan baris-baris pantun dan syair Melayu. Menurutnya pantun ditulis empat baris berturut-turut manakala syair dengan dua baris pertama seajar dan dua baris yang akhir seajar juga. Pendeknya apa yang dikatakan oleh Marsden samalah dengan yang kita dapat dalam koleksi-koleksi pantun yang ada sekarang dan pada syair seperti di dalam manuskrip-manuskrip dan buku-buku syair yang telah diterbitkan.

Selain daripada itu Marsden juga membicarakan hubungan antara baris-baris sampiran dengan baris-baris maksud pantun. Menurutnya dalam dua baris pertama sebuah pantun terdapat kiasan yang tersembunyi atau kurang tersembunyi untuk menerangkan maksud dalam baris-baris berikutnya (hlm 128). Sesungguhnya inilah persoalan yang paling diminati oleh pengkaji-pengkaji dalam golongan ini. Dalam kajian-kajian mereka kemudiannya, masing-masing memberikan pendapat dengan bukti-bukti yang menarik, di samping membahaskan pendapat pengkaji-pengkaji yang lain. Bagaimanapun soal itu mungkin mula-mulanya dikemuka-

kan oleh John Leyden (1808, 175–184) yang mengatakan bahawa menurut orang Melayu sendiri asas itu sentiasa dipakai dengan teliti; iaitu antara baris-baris sampiran sebuah pantun seharusnya mempunyai kaitan, kiasan atau erti dengan baris-baris maksud.

Pendapat John Leyden dan William Marsden itu juga disokong oleh John Crawfurd (1852), dalam bukunya yang membicarakan tentang tatabahasa dan perhubungan bahasa-bahasa Melayu Nusantara. Tetapi di sini Crawfurd menganggap pantun sebagai teka-teki, iaitu teka-teki pengertian dan bukan permainan kata seperti di dalam wangsalan Jawa (hlm 81–82). Van der Tuuk, yang lebih terkenal sebagai ahli filologi dan perbandingan bahasa-bahasa Nusantara membicarakan juga soal ini. Dalam kajiannya itu beliau membandingkan pantun Melayu dengan 'upama' (umpama) Batak Toba. Dalam hal yang sama beliau berpendapat bahawa kedua-dua jenis itu, iaitu pantun dan umpama, kedua-dua baris yang pertama itu gunanya untuk menyamakan bunyi dan jarang-jarang mempunyai hubungan erti dengan kedua-dua baris yang akhir (Tuuk H.N. Van 1856, 1–54).

J. Pijnappel, dalam hal ini boleh dianggap sebagai seorang dari-pada pengkaji-pengkaji yang serius dalam membicarakan pantun Melayu. Menurutnya, setelah membandingkan pantun dengan um-pama Batak Toba dan wangsalan Jawa, pantun Melayu itu tiada lain daripada 'peribahasa' atau 'kiasan'; dan 'umpama' dalam bahasa Batak itu pun, dalam bahasa Melayunya bermakna kiasan. Jadi dalam hal pantun, satu pasangan yang sebahagian mengandungi kiasan atau sesuatu yang kurang terang, dijelaskan oleh bahagian yang lain dengan tidak mengira apa isinya; meskipun telah selayaknya kiasan yang dipakai demikian mempunyai semangatnya sendiri. Sebagai contoh Pijnappel memetik pantun 'telur itik' dalam *Sejarah Melayu* (Shellabear 1975, 67):

Telur itik dari Singgora  
Pandan terletak dilangkahi  
Darahnnya titik di Singapura  
Badannya terhantar di Langkawi.

Bahagian pertamanya memberikan kiasan tentang jauh jaraknya dan yang kemudiannya tentang dekatnya. Keseluruhan pantun itu memberi maksud bahawa pembunuhan itu jauh dari tempat

mayatnya dijumpai. Pijnappel juga menyatakan kiasan itu dapat juga dinyatakan dengan bunyi, seperti dalam wangalan Jawa – dan di samping itu masih banyak pula kiasan yang tidak kita fahami maksudnya (Pijnappel 1883).

Teori kejadian pantun dibicarakan dengan lebih luas oleh Van Ophuijsen (1958, 6–25); dan sehingga ini pengkaji-pengkaji sastera yang membicarakan asal usul pantun Melayu tidak dapat melepas diri daripada memetik atau merujuk kepada pendapat-pendapat Ophuijsen. Beliau menunjukkan pertalian yang rapat antara pantun Melayu dengan 'ende-ende', iaitu puisi rakyat Mandailing yang telah dikajinya sebelum itu. Menurutnya 'ende-ende' berkembang dari kebiasaan masyarakat Mandailing menggunakan daun-daun sebagai alat perhubungan, terutamanya dalam menyatakan perasaan kasih dan rindu antara anak-anak muda (Ophuijsen 1886, 402–432). Dengan adanya perkaitan bunyi yang memberikan makna seperti dalam bahasa daun itu beliau berpendapat, seperti 'ende-ende' tadi, pantun-pantun Melayu juga pada asasnya tidak mempunyai hubungan antara kerat-kerat sampiran dengan kerat-kerat maksudnya, seperti yang dipercayai oleh Pijnappel. Daripada beratus-ratus pantun yang dikumpulkannya dia tidak menemukan perhubungan itu; justeru itu beliau mengusulkan "bahawa tidaklah ada ataupun tak dapat tiada tidaklah dikehendaki pertalian kedua-dua bahagian pantun itu" dan "pada hemat saya mencari perhubungan kedua-dua bahagian pantun itu tiadalah akan berfaedah" (*Pantun Melayu*, 7–8). Ringkasnya pendapat Ophuijsen itu bertentangan sama sekali dengan pendapat Pijnappel di atas tadi.

Pengkaji yang lain dalam golongan ini yang patut disebutkan ialah Hans Overbeck. Beliau tidak berpuas hati dengan pendapat-pendapat yang telah diberikan tentang kejadian pantun dan hubungannya dengan puisi-puisi lain di Nusantara; lalu, beliau membandingkannya pula dengan seloka India dan *Hsi Ching*, iaitu sejenis puisi rakyat China (Overbeck 1922, 4–8). Daripada perbandingan itu Overbeck berpendapat tidak ada persamaan dalam pembentukan pantun dengan puisi-puisi yang telah dibandingkan, bahkan dengan puisi-puisi Nusantara yang lain yang selalu dikaitkan dengan perkembangan pantun. Dengan perkataan-perkataan lain, Overbeck menunjukkan bahawa pantun Melayu mempunyai ciri-cirinya yang tersendiri dan mengalami proses penciptaan yang berlainan daripada

puisi-puisi dalam kebudayaan lain.

Selain daripada itu Overbeck juga mengkaji dan menerbitkan syair-syair dari teks-teks cerita yang popular. Dalam kajian-kajian itu dibicarakannya ciri-ciri syair Melayu, dengan edisi teks dan terjemahannya ke bahasa Inggeris. Kajian-kajian Overbeck ini pada beberapa hal telah memberikan sumbangan asas dalam pengkajian puisi Melayu.

Pengkaji-pengkaji Inggeris yang paling banyak memberi dan menarik perhatian kepada puisi Melayu ialah R.J. Wilkinson dan R.O. Winstedt. Tetapi seperti yang berlaku sebelumnya penumpuan mereka juga lebih banyak kepada membicarakan asal usul dan pembentukan pantun. Dalam hal ini, R.J. Wilkinson tidak bersetuju dengan pendapat-pendapat yang telah dikemukakan sebelumnya. Daripada pemerhatiannya beliau berpendapat perkembangan pantun Melayu ialah dari kebiasaan masyarakat Melayu – seperti mana masyarakat Nusantara lainnya – menggunakan kata-kata yang bersajak yang memberi saranan kepada bunyi yang berhubungan makna. Keadaan ini dapat dilihat dalam pemakaian ungkapan-ungkapan yang bersajak dalam genre-genre yang lain seperti mentera dan teromba serta ungkapan-ungkapan berirama yang terbiasa dalam cerita-cerita lirik atau 'kaba' Minangkabau. Keadaan yang sama berkembang menjadi pantun-pantun dua kerat hingga akhirnya melahirkan bentuk yang lebih sempurna, iaitu pantun yang kita kenali sekarang. Dengan pendapat yang sama R.J. Wilkinson dan R.O. Winstedt menjelaskan dan memperluaskan lagi pendapat ini dalam karya-karya mereka kemudiannya, (Wilkinson 1907; Winstedt 1969, 193–207).

Selain daripada tokoh-tokoh yang telah disebutkan di atas, tidak kurang juga pentingnya sumbangan pengkaji-pengkaji yang lain dalam golongan ini. R. Brandstetter, misalnya, sebagai ahli perbandingan bahasa-bahasa Nusantara telah memberikan pendapat tentang asal perkataan pantun. Menurutnya perkataan itu ada kaitannya dengan perkataan-perkataan yang hampir sama dalam bahasa-bahasa lain di Nusantara; misalnya 'tuntun' dan 'atuntun' dalam bahasa Jawa bermakna berbaris panjang, 'tonton' dalam bahasa Tagalog bermakna bertutur dengan cara teratur (Brandstetter 1933, 198; 1947, 140–142). Dari pendapat Brandstetter itu bolehlah diagukkan akar kata 'tun' itu luas terdapat dalam bahasa-bahasa

## PENDAHULUAN

Nusantara dengan konotasi yang hampir sama iaitu suatu keadaan yang teratur yang jelas pula implikasinya kepada penciptaan dan fungsi sebuah pantun.

H.C. Klinkert juga tidak ketinggalan daripada membicarakan pantun dan syair Melayu. Dari teks dan pembicaraannya terhadap pantun yang digolongkannya sebagai nyanyian-nyanyian kasih (*minnezangen*) (Klinkert 1868, 309 –370) kita temui rangkap-rangkap pantun yang tipikal dan tua usianya dan yang dapat pula menunjukkan ciri-ciri yang unik di dalamnya. Selain daripada itu Klinkert juga membuat ringkasan dan kajian terhadap beberapa buah syair. Edisi-edisi dan ringkasan cerita-cerita ini memberikan keterangan tentang kandungan dan ciri-ciri lain yang dapat digunakan untuk kajian selanjutnya.

Seorang lagi pengkaji dalam golongan ini yang patut diberikan perhatian ialah W.A. Braasem. Dalam kajiannya mengenai pantun Melayu beliau menghujah teori-teori yang telah dikemukakan oleh pengkaji-pengkaji terdahulu dan memberikan contoh-contoh yang lebih luas daripada pantun-pantun yang didapatinya di kalangan suku-suku bangsa Melayu yang lain, iaitu Jawa, Sunda, Ternate, Batak dan lain-lain (Braasem 1950b).

Ringkasnya, seperti yang dapat dilihat setakat ini, para pengkaji Barat yang disebutkan di atas telah meletakkan batu asas kepada pengkajian selanjutnya. Banyak daripada teori-teori yang mereka berikan telah ditemui sebagai kenyataan; dan yang tidak diterima dijadikan kontroversi dan persoalan yang menjadi bahan kajian selanjutnya. Demikian, dalam zaman-zaman seterusnya kita mendapati pengkaji-pengkaji yang berlainan sedikit sikap dan pendekatannya daripada yang disebutkan dalam golongan kedua tadi. Dengan kematangan sikap dan pemikiran yang kemudian, perhatian kepada hasil-hasil sastera termasuk karya-karya puisi sesebuah masyarakat, tidak lagi tertumpu kepada membicarakan asal usul dan soal-soal luaran yang subjektif seperti yang telah begitu lumrah dibicarakan. Perkembangan akademik dan disiplin ilmu juga menggalakkan pengkajian dan pendekatan yang lebih sesuai dalam bidang-bidang yang berkenaan. Pengkaji-pengkaji yang kemudian ini tidak lagi terikat kepada pendekatan-pendekatan dan metode-metode etnologi, antropologi, filologi dan sejarah, tetapi lebih cenderung kepada pendekatan sastera, iaitu melihat dan menilai karya-

karya sastera dari kaca mata sastera.

Ke dalam golongan ini kita sentuh dahulu sumbangan yang diberikan oleh A.W. De Groot (1946). Walaupun beliau tidak mengkaji puisi Melayu secara spesifik, tetapi dapat dijadikan panduan kepada pendekatan terhadap puisi Melayu. Pokok pembicaraan beliau ialah penggolongan puisi-puisi dunia ke dalam kategori-kategori atau jenis-jenis berdasarkan bentuk dan ciri-ciri luaran puisi itu. Berdasarkan pembahagian itu, puisi Melayu tradisional dapat digolongkan sebagai puisi perkataan atau puisi kata (*woordvers*). Golongan ini berbeza dengan yang lain misalnya puisi suku kata (*isosyllabic*), puisi tekanan (*herffingsvers*) dan puisi kelompok kata (*woordgroupvers*).

Sebagai puisi kata, unit minimum yang menjadi ciri yang penting ialah perkataan dan bukan suku kata, tekanan atau kelompok kata seperti di dalam golongan-golongan yang lain itu. Sehubungan dengan ini penumpuan perhatian ialah kepada unit perkataan dan tidak lagi kepada jumlah dan tekanan suku kata, seperti yang dilakukan oleh beberapa pengkaji, antaranya Hollander (1845), Hooykaas (1965) dan beberapa yang lain. Perbezaan pendekatan ini memberikan hasil yang berbeza pula.

Kajian yang lebih konkret dalam disiplin sastera terhadap puisi Melayu tradisional diperluaskan lagi oleh Zainal Abidin bin Ahmad (Za'ba). Buku-bukunya, yang dengan luas membincarkan kesasteraan Melayu lama dan moden, menumpukan beberapa bab kepada puisi Melayu tradisional (Za'ba 1939, 1964). Dibandingkan dengan yang sebelumnya, kajian Za'ba ini dapat dianggap sebagai yang paling lengkap. Dari segi kepelbagaian genre, Za'ba telah membincarkan genre-genre yang lain iaitu seloka, gurindam, nazam, bait dan sajak; selain daripada pantun dan syair yang telah dikaji sebelumnya. Pada pembicaraan mengenai pantun dan syair juga Za'ba menambah dengan menjelaskan lagi beberapa konsep dan pengertian terhadap genre ini dengan memberikan lebih banyak contoh yang baik dan berguna. Kebanyakan contoh itu dipetiknya dari antologi-antologi puisi yang telah tertulis dan yang masih belum tertulis atau diterbitkan tetapi diketahuinya dengan pasti berdasarkan pengetahuannya terhadap puisi dan sastera masyarakatnya sendiri.

- Satu lagi kajian yang dapat dianggap objektif ialah yang dilaku-

## PENDAHULUAN

kan oleh B.O. Bijleveld (1943). Melalui bukunya itu, beliau mengkaji bentuk-bentuk ulangan dalam bahasa-bahasa Melayu, Jawa dan Sunda. Walaupun tumpuan kajian itu tidak kepada puisi semata-mata, apalagi puisi Melayu, namun pendekatan dan contoh-contoh yang diberikannya lebih banyak dipetik dari puisi, khasnya puisi tradisional masyarakat Nusantara, termasuk masyarakat Melayu. Kajian Bijleveld ini telah membukakan satu lagi lapangan pengkajian terhadap puisi Melayu tradisional iaitu aspek stalistik yang masih belum disentuh oleh pengkaji-pengkaji sebelumnya. Kajian ini juga dapat menunjukkan dengan agak terperinci ciri-ciri ekstrinsik puisi Melayu tradisional; misalnya keadaannya yang berulang dan sejarah, serta aspek-aspek kesejarahannya yang dapat dilihat dan ditimbulkan dari keseluruhan genre puisi itu.

A. Teeuw (1952) menumpukan perhatian kepada struktur bahasa dan puisi. Dari segi puisi Melayu tradisional, kajian ini dapat dianggap sebagai permulaan – kerana sebelum ini persoalan tentang bentuk dan struktur hampir tidak pernah disentuh. Aspek *form* dan *structure* ini penting dalam membezakan sesuatu jenis puisi itu dengan yang lain. Dari segi puisi Melayu misalnya ialah untuk membezakan dengan puisi-puisi Nusantara yang lain, bahkan dengan puisi dunia seluruhnya. Teeuw menunjukkan bahawa struktur puisi sesuatu bangsa ditentukan oleh struktur bahasanya; kerana itu puisi Melayu mendapat bentuknya demikian kerana struktur bahasanya demikian. Justeru itu puisi Melayu tidak dapat menerima bentuk-bentuk puisi Arab, India dan Inggeris yang masing-masing mempunyai bentuknya sendiri.

Selain daripada itu Teeuw telah juga menyunting dan mengkaji *Syair Ken Tambuhan* (Teeuw 1966a); di mana beliau memberikan juga interpretasi-interpretasi yang berguna pada tempat-tempat yang berkenaan. Penglibatannya dengan teks-teks syair ini menghasilkan pula pendapat-pendapat yang tidak kurang pentingnya iaitu tentang asal usul dan tradisi syair Melayu (Teeuw 1966b, 429–446). Dalam soal ini Teeuw berpendapat bahawa syair Melayu adalah hasil ciptaan Hamzah Fansuri dan bukan sebagai adaptasi dari puisi-puisi Arab-Parsi yang tertentu atau salah satu daripada puisi Indonesia purba. Dengan pendapat ini Teeuw hampir berjaya dalam membantu menyelesaikan persoalan tentang asal usul syair Melayu.

Seorang lagi sarjana tempatan yang menumpukan perhatian kepada bidang ini ialah Slametmuljana, seorang daripada pengkaji-pengkaji bahasa dan sastera Indonesia yang sangat produktif. Dalam bukunya (1954), beliau membicarakan puisi Indonesia dari segi gaya (stail); dan walaupun penumpuannya lebih kepada puisi Indonesia moden, pada beberapa tempat disentuh juga puisi tradisional iaitu puisi lama Indonesia sebagai bahan perbandingan. Selain daripada itu Slametmuljana memperluaskan tentang wangsalan, suswanan dan parikan Jawa dan puisi-puisi Nusantara yang lain, yang rapat pula perkaitannya dengan puisi Melayu. Bukunya yang lain (1966), tidak begitu banyak memberikan pendapat yang baru tentang teori puisi, tetapi dapat juga menambahkan pandangan dan panduan dalam bidang yang berkenaan.

Syed Naquib al-Attas, merupakan tokoh sarjana tempatan yang menumpukan minat di bidang kesusasteraan dan kebudayaan Islam di Nusantara. Bukunya yang terpenting (1970) membicarakan karya-karya dan fahaman mistik Hamzah Fansuri; tetapi pengetahuannya mengenai sarjana Islam yang begitu masyhur itu mendorong beliau mengkaji persoalan yang lebih pokok dalam teori kesusasteraan iaitu masalah asal usul dan pencipta (*origin and originator*) syair Melayu. Dalam kedua-dua karyanya yang kemudian, 1968 dan 1971 beliau menjelaskan bahawa Hamzah Fansuri adalah pencipta (*originator*) syair Melayu; dan '*origin*' syair itu adalah adaptasi dari syair atau puisi Arab yang diperkembangkan oleh Hamzah Fansuri. Jelasnya di sini Syed Naquib al-Attas telah memperkuatkan lagi pendapat-pendapat sebelumnya khasnya daripada Doorenbos (1933) dan Teeuw (1966) yang juga mengemukakan kemungkinan yang sama.

Persoalan tentang '*origin*' dan '*originator*' dalam apa juga genre kesusasteraan Melayu dan kesusasteraan lain adalah persoalan yang rumit dan tidak dapat diselesaikan secara definitif. Kerana itu pengkaji-pengkaji yang kemudian mungkin mengelakkan kontroversi yang demikian dan terus sahaja mengkaji sesuatu bahan sastera secara objektif dengan menggunakan pendekatan yang tertentu. Demikian kita melihat Gabriel Altmann mengkaji puisi Melayu tradisional dari segi stail dengan menggunakan pendekatan statistik (Altmann 1963, 274–286; 1965, 13–20; 1968, 9–16). Dari tiga makalahnya itu beliau mencuba menyelesaikan aspek yang ditimbul-

kannya dengan bantuan komputer. Selain daripada sumbangan Altmann dalam pendekatan saintifik ini, beliau juga menimbulkan ciri-ciri lain dalam puisi Melayu itu yang tidak ditemui atau disentuh oleh pengkaji-pengkaji sebelumnya. Pada pantun misalnya, Altmann menunjukkan satu ciri yang tetap tentang jumlah suku kata yang berlainan dalam pasangan sampiran dan pasangan maksud. Menurutnya dalam pasangan pertama jumlah suku kata ialah antara 7–8 dalam sebaris dan lebih mudah menemukan perkataan-perkataan sesuku kata (*monosyllabic*) dan dwisuku kata (*disyllabic*) sementara dalam pasangan maksud berjumlah antara 9–11 dalam sebaris dan lebih mudah menemukan kata-kata yang tiga suku kata (*trisyllabic*), bahkan yang empat suku kata (*tetrasyllabic*). Keadaan perpanjangan (*extension*) demikian disebut Altmann ‘*climax*’ dan terjadinya ‘*extension*’ adalah secara spontan, di bawah sedar (*subconscious*); dan keadaan ini didapati juga dalam genre-genre yang lain.

Dari kajiannya tentang fitur-fitur fonemik dalam pantun dan syair Melayu, beliau menunjukkan ciri-ciri kes spontan dan tendensi di samping pemilihan kepada fonem-fonem yang signifikan. Pendekatan yang digunakan oleh Altmann ini bukan saja dapat menimbulkan ciri-ciri yang tersembunyi dalam genre-genre puisi itu tetapi juga sebagai permulaan kepada pemilihan pendekatan yang demikian. Menurut Altmann, jika sebahagian besar daripada genre-genre puisi Melayu telah dikaji demikian, beberapa persoalan yang lebih kontroversial, tentang pentarikhian (*datum*), tempat penciptaan (*locality*), penjenisan (*typology*) dan beberapa yang lain mungkin dapat pula diselesaikan (Altmann 1968, 16).

Selain daripada tokoh-tokoh yang disebutkan tadi masih ada beberapa yang lain yang menyentuh tentang puisi Melayu tradisional secara tidak langsung dalam kajian-kajian mereka. Mohd. Taib Osman, misalnya, seorang sarjana tempatan yang walaupun lebih banyak terlibat dengan pengkajian kebudayaan Melayu, memberikan juga pendapatnya tentang puisi Melayu tradisional. Dalam bukunya (1965) beliau membicarakan tentang pantun dan syair bukan sahaja dengan menjelaskan lagi pendapat-pendapat sebelumnya, tetapi memberikan juga pandangannya, berdasarkan pemerhatian dan interpretasinya sendiri.

Bukunya (1975) merupakan antologi puisi Melayu lama yang dipetik dari beberapa buah buku puisi, termasuk pantun, syair,

cerita-cerita yang tertulis atau yang tidak tertulis yang mengandungi puisi. Walaupun Mohd. Taib Osman tidak banyak memberikan pendapat yang baru terhadap puisi yang dibicarakan namun karya dan usaha beliau itu dapatlah dianggap sebagai persambungan dalam penyelidikan dan perhatian umum terhadap puisi Melayu tradisional.

P.L. Mohd. Amin Sweeney lebih terkenal dalam pengkajian tentang wayang kulit dan cerita-cerita lisan Melayu. Tetapi dalam proses penelitiannya itu beliau juga menemukan persoalan-persoalan semasa tentang puisi Melayu tradisional. Dalam makalahnya (1971) beliau bukan sahaja meneliti syair yang tertulis pada meriam yang dibicarakan, tetapi juga pada ciri-ciri dan asal usul syair Melayu. Dalam soal ini, beliau tidak menerima begitu sahaja pendapat yang mengatakan syair sebagai hasil cipta Hamzah Fansuri, tetapi mengemukakan kemungkinan bahawa syair telah sedia dikenali dalam kesusasteraan Melayu sebelum zaman Hamzah Fansuri.

Kajian yang paling baru, walaupun tidak secara langsung mengenai puisi Melayu tradisional, ialah yang dilakukan oleh Muhammad Haji Salleh. Dalam bukunya (1977) beliau membincarkan tradisi dan perubahan dalam puisi Melayu-Indonesia sezaman. Walaupun bahan-bahan pembicaraan pokoknya ialah puisi moden, tetapi dalam dua bab yang besar beliau menyentuh juga soal-soal yang telah disebut terdahulu dan memberikan pendapat beliau pada persoalan yang berkenaan. Beliau misalnya telah menunjukkan di mana dan bagaimana puisi Melayu tradisional itu menjadi asas kepada puisi moden dan sejauh mana puisi moden itu berkembang dan berubah dari bentuknya yang tradisional. Pendapat-pendapat seperti ini bukan sahaja berjaya menilai dan menempatkan puisi moden itu dalam rantai perkembangan sastera sezaman, tetapi dalam beberapa hal, memberi nilai yang sewajarnya kepada puisi Melayu tradisional.

Selain daripada para pengkaji dalam tiga golongan di atas, kita menemukan juga nama-nama lain yang tidak kurang pentingnya dalam bidang pengkajian puisi Melayu tradisional. Bagaimanapun pengkaji-pengkaji golongan ini dapat dikatakan tidak begitu banyak memberikan pendapat yang baru atau teori-teori yang lain selain daripada yang telah diperkatakan sebelumnya. Pada umumnya tulisan-tulisan mereka merupakan ulangan, sokongan atau penjelas-

an kepada teori-teori daripada golongan pengkaji-pengkaji yang terdahulu. Antara nama-nama yang perlu disebutkan termasuk R. Hoessein Djajadiningrat, Sutan Takdir Alisjahbana, Zuber Usman, Gazali Dunia, Liaw Yock Fang dan beberapa yang lain.

R. Hoessein Djajadiningrat pada dasarnya menerima dan meluaskan lagi pendapat Van Ophuijsen tentang kejadian pantun dengan memberikan contoh-contoh daripada masyarakat lain di Nusantara dan bahan perbandingan daripada puisi-puisi Jawa dan Sunda. Beliau juga menyentuh tentang pantang bahasa dan hikmat perkataan-perkataan seperti yang terdapat dalam beberapa genre puisi masyarakat Nusantara. Sebagai kesimpulan, misalnya beliau berpendapat: "Sekaliannya ini (termasuk kata-kata sindiran dan kiasan dalam pantun-pantun itu) dan tanda lain tentang erti yang dilekatkan orang kepada bunyi, dapat dikembalikan kepada satu sumber, iaitu kepercayaan kepada kekuatan yang ghaib dan sakti (*magische kracht*) daripada bunyi, yang bukan sahaja terdapat pada bangsa-bangsa Indonesia". Dengan penekanan yang diberikan oleh Djajadiningrat ini dapat dibuktikan bahawa pantun itu bukanlah berisi bunyi-bunyi yang tidak bererti, olok-olokan atau mainan kanak-kanak, seperti pendapat setengah-setengah pengkaji sebelumnya.

Alisjahbana, Zuber Usman dan Gazali Dunia dapat dianggap sebagai penulis-penulis buku-buku teks yang tidak mengemukakan teori-teori yang baru. Bagaimanapun contoh-contoh dan tinjauan sendiri, seperti yang dilakukan oleh Zuber Usman, memberikan lebih banyak pemahaman tentang fungsi dan pemakaian puisi tradisional. Demikian pula Liaw Yock Fang, pada suatu segi hanya menterjemah dan memperluaskan pendapat-pendapat R.O. Winstedt dalam bukunya yang terdahulu tetapi dalam perluasan contoh dan pembicarannya, beliau juga memberikan sumbangan dalam membandingkan puisi Melayu dengan puisi-puisi Nusantara lain dan di luar Nusantara, misalnya China dan Sepanyol (Abu Hassan Sham 1975, 791 – 806).

Kesimpulan daripada tinjauan di atas – dan sepertimana yang telah disebutkan mula-mula tadi – dapatlah dikatakan bahawa kajian-kajian terhadap puisi Melayu tradisional masih belum lengkap dan mendalam. Walaupun dari segi jumlah pengkaji dan judul-judul yang dikemukakan kelihatan banyak dan luas, namun dari segi

isi dan ruang lingkup yang diliputi belumlah dapat dibanggakan. Pandangan ini adalah atas dasar bahawa sehingga ini masih belum ada suatu kajian dalam bidang puisi Melayu tradisional yang dapat disejajarkan dengan pengkajian terhadap puisi moden, apalagi jika dibandingkan dengan kemajuan dalam pengkajian puisi-puisi dunia yang lain. Dan kedua, seperti yang dapat dilihat daripada tinjauan ini, genre puisi yang mendapat perhatian pengkaji agak terbatas kepada pantun dan syair; sementara yang lain, yang lebih asas dan luas penyebarannya, seperti talibun, mantera dan teromba tidak dikaji sewajarnya. Gurindam dan seloka juga masih belum dianalisis dari segi isi dan ciri-cirinya yang lain, selain daripada contoh-contoh yang sama, dipetik berulang kali oleh pengkaji-pengkaji yang berlainan. Bentuk-bentuk puisi Melayu yang dikatakan berasal dari Arab dan Parsi hampir tidak pernah dibicarakan. Contoh-contoh bagi nazam, misalnya, sama sahaja dalam buku-buku Za'ba, Alisjahbana, Gazali Dunia dan lain-lain. Hal ini terjadi kerana petikan-petikan yang diberikan adalah daripada sumber yang sama, iaitu *Tajus Salatin*; sedangkan pada kenyataannya masih banyak karya-karya puisi dalam bentuk nazam yang dicipta dan disebarluaskan oleh para penulis agama dan ulama-ulama tempatan. Gambaran yang diberikan di sini, seolah-olah tulisan-tulisan itu tidak diketahui atau telah tidak mendapat perhatian daripada para pengkaji dan penulis-penulis buku-buku teks tersebut.

Dalam pembicaraan mengenai pantun dan syair juga, para pengkaji kelihatannya lebih berminat untuk memperpanjang polemik dan kontroversi mengenai asal usul dan kejadian pantun dan syair dan perhubungan syarat-ibarat pada pantun. Dengan demikian tinjauan lebih banyak berupa perbandingan bahasa, sejarah dan kebudayaan bangsa-bangsa, Nusantara atau dunia. Hasil daripada polemik dan kontroversi itu juga tidak membawa kepada penyelesaian masalah bahkan pada beberapa segi menambahkan lagi rumitnya persoalan itu. Dalam masalah asal usul syair, misalnya, masih banyak bukti yang diperlukan untuk melahirkan sesuatu keputusan yang dapat dianggap 'muktamad'. Bukti-bukti yang lebih tepat mengenai tulisan-tulisan Hamzah Fansuri, latar belakang sejarah, perkembangan, peranan dan pemakaian berbagai-bagai genre puisi Nusantara lainnya, mungkin mempengaruhi kecenderungan yang lain untuk menerima, menolak atau menimbulkan kemungkinan

yang baru pula.

Selain daripada kajian-kajian A. Teeuw dan Bijleveld, dapat dikatakan sehingga ini masih belum ada kajian tentang ciri-ciri luaran dan dalaman puisi Melayu itu. Ini ialah kerana kajian-kajian yang telah lalu itu melihat dan meneliti pantun dan syair dari segi karya yang telah dilahirkan; iaitu tidak dari segi penulis yang melahirkan karya itu. Dengan demikian tidak ada tinjauan tentang konsep penciptaan, pemikiran dan tanggapan yang dapat dikaitkan dengan penghayatan sastera (*modes of literature*) dari mana sesebuah fragmen yang dipetik itu dilahirkan. Kajian A. Teeuw tentang struktur puisi juga masih merupakan usaha permulaan yang seharusnya diperluaskan dan dilanjutkan supaya dapat diaplikasikan ke dalam pengkajian puisi Melayu tradisional secara keseluruhan. Demikian juga tinjauan stalistik oleh Bijleveld bukanlah khusus membicarakan aspek stail puisi tradisional Melayu atau Nusantara tetapi adalah mengenai bentuk-bentuk ulangan dalam bahasa-bahasa Melayu, Jawa dan Sunda.

Satu kekurangan yang sangat dirasakan ialah tinjauan mengenai fungsi puisi tradisional itu dalam masyarakatnya, baik masyarakat lama mahupun yang sezaman. Soal ini tidak pernah disentuh hampir dalam kesemua kajian yang telah disebutkan. Kajian-kajian tentang pantun, pengumpulan dan edisi teks yang diterbitkan adalah hasil sastera lisan yang telah ditulis. Ertinya tidak diberikan konteks dari mana rangkap-rangkap itu dipetik atau dilahirkan.

Dalam kumpulan *Pantun Melayu* oleh Balai Pustaka, diberikan Kata Pendahuluan yang merupakan terjemahan atau adaptasi daripada ucapan Van Ophuijsen mengenai Pantun Melayu. Dalam makalah itu Ophuijsen menyebutkan hanya satu fungsi pantun iaitu untuk dinyanyikan. Beliau memberikan nama lagu-lagu yang diketahuinya mengandungi pantun-pantun "Lagu Dua", "Lagu Kereta", "Ketapang", "Seroja", "Perak-Perak", "Cantik Manis", "Dendang Sayang" dan lain-lain. Sesungguhnya daripada apa yang kita perhatikan, pantun-pantun digunakan dalam semua aspek kehidupan masyarakat khasnya yang berhubung dengan kegiatan-kegiatan seni dan tarian, dalam istiadat perkahwinan, dalam ucapan-ucapan untuk upacara dan istiadat, dalam jampi dan mantera dan sebagainya.

Kegiatan-kegiatan seni dan budaya berbeza-beza dari setempat

ke setempat bahkan antara satu kumpulan dengan yang lain. Demikian kita menemukan pantun dalam permainan canggung dan beduan di Perlis, kebiah dan belian di Kedah, lotah dan lukah di Perak, bongai dan rentak kuda di Negeri Sembilan dan dondang sayang di Melaka. Lagu "Cantik Manis" yang disebutkan oleh Van Ophuijsen merupakan sebuah lagu daripada berbelas lagu yang lain dalam permainan bongai. Pemerhatian kita ini berdasarkan keadaan yang ada sekarang, ketika permainan-permainan dan hiburan-hiburan tradisi telah mulai luput terdesak oleh aktiviti-aktiviti dan hiburan moden. Bagaimana luas dan menyeluruhnya fungsi pantun dalam masa-masa pembicaraan dan pengumpulan itu – hampir 100 tahun yang lalu – tidak dapat kita bayangkan kerana terlalu sedikit disentuh oleh para pengkaji berkeraan. Berdasarkan keadaan yang sama tentang perkembangan gaya hidup masyarakat, tentulah keadaan itu lebih luas dan menyeluruh daripada apa yang ada sekarang.

Mungkin patut disebutkan di sini, bahawa dalam puisi Melayu tradisional, tidak pernah ada kajian tentang cara atau teknik menulis puisi. Kita hanya menemukan keterangan yang terlalu ringkas, misalnya bagaimana menulis pantun oleh Abdullah bin Abdul Kadir Munysi, bagaimana mengarang ruba'i oleh Hamzah Fansuri dan tentang perbezaan antara syair dan gurindam seperti yang diterangkan oleh Raja Ali Haji. Hanya sedikit yang diambil sebagai contoh yang lengkap iaitu melalui tulisan-tulisan Za'ba seperti yang disebutkan di atas dan satu kajian tentang pantun oleh Ahmad Balji (1961). Keadaan ini berbeza dengan apa yang terdapat dalam puisi Sanskrit dan Jawa. Bagi puisi Sanskrit diketahui adanya beberapa buah buku, misalnya *Natyashastra*, oleh Bharata dalam abad keempat atau kelima Masihi, merupakan buku yang tertua membicarakan bentuk-bentuk puisi Sanskrit, di mana 'kawya' iaitu salah satu daripada puisi Sanskrit dibicarakan dengan terperinci. Bhama, dalam abad-abad ketujuh dan kelapan juga membicarakan kawya, khasnya tentang kiasan-kiasan dalam puisi (*poetics*) atau 'kawyalankara'. Di sini juga dibicarakan tentang 'anuparsa' (*alliteration*), 'yamaka' (*assonance*), 'rupaka' (*metaphor*), 'upama' (*allegory*), 'dipaka' (*apprehension of suggested figures*), dan beberapa ciri yang lain.

Pembentukan kakawin dalam kesusasteraan Jawa Kuno dipengaruhi terus oleh kawya Sanskrit; dan pengetahuan mengenai

## PENDAHULUAN

puisi-puisi Sanskrit itu juga telah begitu mesra di kalangan pencipta kakawin Jawa. Terdapat beberapa buah buku dalam bahasa Jawa yang membicarakan pembentukan dan pemakaian istilah-istilah puisi yang menunjukkan pelajaran dan pengajaran mencipta puisi telah meluas di kalangan masyarakat Jawa dari sejak zaman-zaman permulaan lagi. Keadaan begini tidak terdapat dalam tradisi pengajaran dan pembelajaran puisi Melayu. Rupa-rupanya bidang pengajaran puisi Melayu tradisional masih seperti rimba yang terlalu luas untuk diteroka.



## **SENARAI SINGKATAN**

a.l.	antara lain
BKI	Bijdragen tot de Taal-, Land-en Volkenkunde (Bijdragen Koninklijk Instituut voor de Taal-, Land-en Volkenkunde).
dlm	dalam
hlm	halaman
jil	jilid
JMBRAS	Journal of the Malayan (Malaysian) Branch Royal Asiatic Society
JRAS	Journal of the Royal Asiatic Society
JSBRAS	Journal of the Straits Branch Royal Asiatic Society
TM	Tahun Masihi
Peny	penyunting, penyusun, penyelenggara
TBG	Tijdschrift voor Indische Taal-, Land-en Volkenkunde (Tijdschrift Bataviaasch Genootschap van Kunsten en Wetenschappen)
terj	terjemahan
Ver. BGKW (Ver. BG)	Verhandeligen Bataviaasch Genootschap van Kunsten en Wetenschappen



## **NOTA TENTANG EJAAN DAN PENGGUNAAN ISTILAH**

KESELURUHAN disertasi ini menggunakan sistem ejaan baru seperti yang digariskan dalam *Pedoman Umum Ejaan Bahasa Malaysia-Indonesia* yang dikeluarkan oleh Jawatankuasa Tetap Bahasa Malaysia, Kementerian Pendidikan Malaysia, (1978. Kuala Lumpur: Dewan Bahasa dan Pustaka, cetakan ketiga). Namun demikian pada beberapa tempat fonem-fonem Arab terpaksa dikekalkan; misalnya *f*/ف pada nama Za'ba (Zainal Abidin bin Ahmad), perkataan-perkataan Arab yang tidak dimelayukan, *'aqaid* (اعقادات) *bi'arfūn* (يعرفون), fonem /q/ dalam *Quran*, *qiamuhu* dan beberapa yang lain. Walau bagaimanapun tanda-tanda diakritik yang menunjukkan kuantiti fonologi Arab tidak digunakan.

Terdapat sedikit penggunaan istilah yang mungkin mengelirukan, misalnya perkataan 'rangkap' dan 'untai' yang pada penggunaan biasa memberi makna yang sama iaitu bait atau stanza, dalam kajian ini dibezakan: rangkap bermakna bait atau stanza, sedang untai bermakna gugus atau keseluruhan sebuah puisi. Istilah-istilah yang lain dalam bidang kaji puisi dan penikmatan, umumnya disesuaikan dari buku *Istilah Kesusastraan: Inggeris-Melayu-Inggeris*, (1972. Kuala Lumpur: Dewan Bahasa dan Pustaka).



## BAB I

# PUISI MELAYU TRADISIONAL: KONSEP, BENTUK DAN CIRI

### Konsep dan Ciri

DEFINISI dan huraihan di sekitar konsep dan erti perkataan puisi (*poesy, poem, poetry, verse*) telah terlalu banyak dibicarakan terutamanya pada pengertian dan pemakaian yang universal. Justeru itu pengertian ‘puisi’ dalam rangkai kata ‘puisi Melayu tradisional’ dalam kajian ini tidaklah perlu dihuraikan. Lebih-lebih lagi tiada suatu pun definisi universal itu yang dapat diaplikasikan dengan tepat kepada konsep dan erti puisi seperti yang difahami dalam masyarakat dan kesusasteraan Melayu. Hal ini terjadi, pertamanya, kerana dalam bahasa Melayu tidak terdapat suatu istilah atau perkataan yang membawa erti puisi, selain daripada ‘karangan berangkap’ seperti yang digunakan oleh Za’ba – yang terlalu umum dan kabur.<sup>1</sup> Dan kedua, setelah istilah itu digunakan dengan meluas, tidak pula terdapat perkataan-perkataan lain digunakan bersama-sama untuk membezakannya dengan ‘poem’, ‘poetry’ dan ‘verse’ yang dalam bahasanya yang asal mempunyai erti dan konsep yang berlainan dan berbagai-bagai. Hasilnya, perkataan ‘puisi’ dalam bahasa

<sup>1</sup>Zainal Abidin bin Ahmad (Za’ba), 1962. *Ilmu Mengarang Melayu*, hlm 218, menurutnya, “Karangan berangkap itu ialah karangan yang disusunkan dengan bahagian yang berkerat-kerat, dan antara sekerat dengan sekerat dengan itu biasanya berjodoh bunyinya atau rentaknya atau isinya, serta kebanyakannya memakai timbang-an atau sukatan yang tertentu. Dalam perbahasan pengarang-pengarang cara baru sekarang karangan demikian ini disebut ‘puisi’ (berlawanan dengan ‘prosa’ iaitu karangan lurus sahaja)”.

Melayu terpaksa merangkumi semua konsep dan erti dalam istilah-istilah yang lain itu.

Walau bagaimanapun, dalam kajian ini, 'puisi' akan difahamkan sebagai "suatu bentuk pengucapan dalam susunan yang istimewa", berbanding dengan "pengucapan yang biasa" seperti yang digunakan dalam pertuturan hari-hari; dan bahasa yang mementingkan kebenaran daya intelektual dan lojika (*discursive or logical thought*) yang khusus dalam bentuk prosa dan tidak berunsur sastera (Frye 1972, 885-890). Tetapi "susunan yang istimewa" dalam konteks di atas masih tidak mengkhkusus kepada puisi; kerana bahasa prosa juga, yang bernilai sastera masih dapat dianggap dalam bentuk dan ciri yang istimewa. Kerana itu 'susunan' atau ungkapan tersebut haruslah mempunyai ciri-ciri tertentu untuk membolehkannya tergolong sebagai puisi. Dalam kajian ini, ciri-ciri itu akan dirujuk sebagai "ciri-ciri puisi" atau "ciri-ciri kepuisian sesebuah ungkapan". Di bawah ini diberikan sebahagian daripadanya, yang merupakan ciri-ciri yang secara teorinya bersifat universal, tetapi di sini lebih mengkhkusus kepada puisi Melayu:

1. Susunan itu memperlihatkan penggunaan bahasa yang lebih baik, ekspresif, kental (*compressed*), mengandungi nilai-nilai keindahan, misalnya dengan penggunaan imajan, metafora dan lain-lain. Tegasnya bahasa yang dapat menimbulkan rangsangan, memberikan kualiti dan pengertian yang lebih berkesan kepada pengalaman dan perasaan.
2. Mempunyai bentuk yang tertentu, misalnya berkerat-kerat dan berurutan (diasingkan oleh hentian atau '*caesura*'). Setiap keratan sama ada sebagai sebuah kalimat yang lengkap atau sebahagian daripadanya, yang merupakan klausa atau frasa, yang dituturkan begitu rupa dengan sebab kepanjangan nafas atau emosi penutur atau dipengaruhi oleh intonasi, melodi dan unsur-unsur muzik yang lain dan prosodi bahasa itu.
3. Dalam bentuknya yang tertulis, kerat-kerat yang terbahagi itu akan tersusun dalam baris-baris yang sejajar mungkin sama panjang, atau sekurang-kurangnya memiliki ciri-ciri yang sama dengan baris-baris yang lain. Kesejajaran ini merupakan satu daripada ciri-ciri kepuisian yang penting.

4. Ungkapan-ungkapan puitis yang dipengaruhi oleh unsur-unsur muzik, dalam lagu atau sekurang-kurangnya intonasi, memberikan kadensa (*cadence*), irama (*rhythm*) dan harmoni yang merupakan unsur puitis yang penting. Rentak dan irama ini menjadi faktor kepada rima, kerana rima juga dipengaruhi oleh unsur muzik dalam sesebuah bahasa. Bagi setengah-setengah puisi, rima, termasuk asonansi dan aliterasi merupakan gejala-gejala yang amat penting dalam pembinaan puisinya.
5. Baris, rima dan irama disusun begitu rupa hingga membentuk pola atau ikatan yang tertentu; misalnya jumlah baris-baris yang dirangkap dengan jumlah yang tertentu dalam serangkap, jumlah perkataan atau suku kata dalam sebaris, perseimbangan bunyi, panjang pendek atau tekanan suku kata setiap baris, persamaan bunyi, sajak atau rima, di akhir atau di dalam kedudukan yang lain dalam sebaris. Ini dinamakan bentuk, struktur, ikatan, konvensi atau pola-pola metrik bagi puisi berkenaan.
6. Wujudnya pembahagian unit dalam menyatakan idea; misalnya unit minimum yang terdiri daripada dua baris serangkap, atau beberapa baris serangkap dan beberapa rangkap seuntai untuk membina satu keseluruhan idea. Keadaan ini bergantung kepada genre sesebuah puisi yang dipengaruhi pula oleh unsur-unsur lain yang lebih luas dalam rangka kesusastraan dan kebudayaan sesuatu bangsa.

Ciri-ciri yang disebutkan di atas hanya sebahagian sahaja daripada ciri-ciri puisi yang universal. Puisi dalam kesusastraan sesuatu bangsa berbeza daripada bangsa yang lain; tetapi sesuatu susunan atau ungkapan itu dapatlah dinilai sebagai puisi berdasarkan ciri-ciri kepuisian yang digariskasarkan di atas itu. Demikian puisi Melayu tradisional adalah puisi yang mempunyai sebahagian besar daripada ciri-ciri kepuisian yang tersebut; hanya di sini penumpuan diberikan kepada bentuk yang tradisional, lama atau klasik, berbanding dengan apa yang difahamkan sebagai baru, moden atau sezaman. Memang dari segi pemakaian istilahnya puisi tradisional telah dikenali umum sebagai puisi lama atau klasik, sesuai dengan genre kesusastraannya yang diberi label yang sama. Tetapi untuk kajian ini penulis merasakan penggunaan istilah-istilah itu tidak begitu

sesuai lagi dengan ciri-ciri puisi itu dan fungsinya dalam kesusasteraan dan masyarakat yang menggunakannya. Perkataan 'lama' memberikan konotasi sejarah, atau zaman silam yang telah berlalu, dengan anggapan bahawa tradisi tersebut telah tidak lagi berkembang atau digunakan dalam kehidupan moden. Demikian pula perkataan 'klasik' selalu dipersoalkan penggunaannya kerana dalam konteks kesusasteraan Melayu, istilah itu membawa erti 'lama' sedangkan pengertian sebenarnya merujuk kepada ciri, bentuk, mutu atau '*class*'. Oleh itu, dalam kajian ini istilah 'tradisional' akan membawa erti bentuk dan ciri yang dianggap sebagai tradisional yang masih diteruskan dalam kesusasteraannya. Memang pada kenyataannya puisi Melayu tradisional itu, dari segi bentuk, pemikiran dan fungsinya, masih dikekalkan oleh masyarakat seperti keadaannya yang tradisional. Sehingga ini puisi masih lagi berfungsi sebagai alat komunikasi antara anggota-anggota masyarakat melalui kegiatan-kegiatan hidup mereka; keadaan ini didapati bukan saja di daerah-daerah pedalaman, bahkan juga di bandar dan di kota.

Ke dalam konsep 'tradisional' ini juga dirangkumkan apa yang dikenali sebagai 'puisi lisan' (*oral poetry*) dan 'puisi rakyat' (*folk poetry*). Ini ialah kerana puisi itu masih digunakan dalam kegiatan-kegiatan kesenian rakyat yang merupakan sebahagian daripada budaya rakyat (*folklore*) yang dipersembahkan, disampaikan dan disebarluaskan dalam bentuk lisan. Hampir semua nyanyian daerah atau senandung rakyat, nyanyian-nyanyian yang mengiringi tarian, ungkapan-ungkapan dalam istiadat-istiadat sosial dan keagamaan, zikir yang dilakukan atau yang mengiringi perlakuan yang bersifat magis, dipersembahkan dan diabadikan dalam bentuk puisi. Oleh yang demikian hampir seluruh genre puisi tradisional itu dapat disesuaikan dengan jenis-jenis puisi lisan yang universal, yang secara pengelasan tergolong sebagai 'ritual', 'lirik' dan 'naratif' (Lord 1965b, 591-593).

Aspek ritual atau upacara ini dapat dilihat hampir dalam kesemua fungsi dan peranan yang diambil oleh puisi ini, yang seluruhnya dapat digunakan dalam pelbagai kegiatan yang bersifat ritual, baik yang berupa magis, maupun yang berunsur agama atau hiburan.

Selain daripada itu hampir seluruhnya juga bersifat lirik,

(*lyrical*) iaitu sebagai ungkapan-ungkapan puitis yang dapat digunakan untuk seni kata dalam lagu-lagu, cerita, ucapan dan kegiatan-kegiatan hidup yang lain dalam masyarakat. Sebagaimana puisi lisan dunia lainnya, puisi Melayu tradisional juga mengandungi unsur-unsur cerita dan bukan cerita. Yang berupa cerita termasuk syair, talibun dan prosa berirama (prosa lirik) – sementara yang bukan cerita, termasuk jampi dan mantera, teromba, gurindam dan lain-lain. Ringkasnya di sini puisi tradisional dapat dilihat sebagai puisi lisan atau sekurang-kurangnya mengandungi sifat-sifat lisan yang jelas dan penting.

Berdasarkan kenyataan-kenyataan di atas dan sifat-sifat umum puisi itu yang akan dibincangkan selanjutnya, ciri-ciri puisi Melayu tradisional itu dapatlah diringkaskan seperti di bawah:

1. Ia bersifat lisan, diwarisi dan disebarluaskan melalui tradisi lisan. Dan sebagai puisi lisan ia bersifat kolektif dan fungsional, iaitu tercipta oleh pengarang yang tidak bernama dan digunakan dalam kehidupan masyarakat. Sebahagian daripadanya merupakan hasil daripada kegiatan-kegiatan ritual atau masih mempunyai fungsi demikian.
2. Suatu cirinya yang penting ialah bentuknya yang terikat oleh konvensi-konvensi tertentu yang seterusnya memberikan bentuk dan struktur kepada puisinya. Bentuk dan ikatan yang berlainan ini menjadikan genre-genre yang berlainan pula; sebuah genre mempunyai ciri-cirinya sendiri, berbeza daripada genre yang lain.
3. Sebagai puisi yang fungsional yang digunakan dalam kehidupan hari-hari, sebuah genre tertentu digunakan untuk satu kegiatan; misalnya pantun untuk kegiatan seni yang berunsur hiburan dan ritual, lagu-lagu dan tarian yang tidak berunsur keagamaan; sedangkan syair pula untuk menyampaikan cerita dan pengajaran dan digunakan dalam kegiatan-kegiatan berunsur keagamaan. Seterusnya mantera pula digunakan untuk upacara-upacara ritual, pemujaan dan pengubatan, berunsur magis dan tidak agama; sebaliknya dikir (zikir) berupa pujian dan pengajaran yang lazimnya berunsur agama.

4. Puisi tradisional berhubung rapat dengan magis dalam maksud dan pengertian yang luas. Ungkapan-ungkapannya mempunyai kuasa, konotasi atau dipercayai berunsur magis. Sebahagian daripadanya, seperti mantera, pantun dan syair, dan pada beberapa tempat talibun dan prosa berirama dapat juga digunakan dalam kegiatan-kegiatan lain yang berunsur magis dan ritual. Keadaan begini adalah warisan daripada kedudukannya yang asal, di mana puisi dan magis merupakan sebahagian yang penting daripada kehidupan manusia (Lewis 1971, 221):

*In the past, poetry and science were one, and its name was magic. Magic for our earliest ancestor was the most effective ways of understanding nature and their fellow-men, and of gaining power over them.*

5. Sebagai bahan yang berunsur magis dan ritual puisi dianggap suci (*sacred*), berhubung rapat dengan kepercayaan tahayul, mempunyai pantang larang (*taboos*) dari segi masa, tempat dan orang-orang yang mengamalkannya; bagi mantera misalnya ialah pawang atau bomoh. Ungkapan-ungkapan dalam mantera hendaklah digunakan untuk tujuan yang tertentu dan bersama dengan perlakuan-perlakuan yang telah ditetapkan. Demikian pula ungkapan-ungkapan daripada teromba yang biasanya dalam bentuk dan bahasa yang tetap dengan erti dan implikasinya – tidak boleh diubah sesuka hati atau dijadikan bahan mainan.

6. Puisi Melayu tradisional juga dapat dikatakan mengan dungi unsur-unsur muziknya. Hampir semua pengucapannya disampaikan dalam lagu, irama atau intonasi yang tipikal. Kebanyakannya dijadikan seni kata dalam lagu-lagu rakyat, untuk mengiringi permainan dan persembahan yang berunsur ritual, magis dan keagamaan. Pantun, syair, nazam, dikir, mantera, talibun dan prosa berirama masing-masing mempunyai tempat dan peranan dalam permainan-permainan yang menggabungkan unsur-unsur nyanyian, dialog, muzik dan tarian. Di luar daripada kegiatan-kegiatan tersebut bentuk-bentuk puisi, seperti pantun, syair dan prosa berirama masih disampaikan dalam lagu, irama, rentak atau sekurang-kurangnya intonasi yang berbeza daripada pengucapan biasa.

7. Satu ciri yang menarik pada puisi ini ialah bahasanya yang padat dan kental, mengandungi unsur-unsur perlambangan, imajan, kiasan dan perbandingan-perbandingan lain yang tepat dengan maksud dan fungsinya. Keadaan ini dapat dilihat dan dirasakan dengan jelas dalam pantun, peribahasa berirama, gurindam, teromba dan mantera. Dalam dua genre yang kemudian itu hanya inti atau konsep yang disebutkan sebagai kunci kepada erti seluruhnya. Perkataan atau huraiyan yang lain tidak diperlukan kerana telah dapat dimengerti oleh penutur dan pendengar melalui pengalaman dan latar belakang kebudayaan yang mereka alami bersama.

Ringkasnya, sebagai kesimpulan dapatlah dikatakan bahawa puisi Melayu tradisional itu mempunyai bentuknya sendiri, mudah dikenal dan diasingkan daripada yang tergolong sebagai baru atau moden. Perbezaan itu bukan saji daripada unsur luaran seperti bentuk dan struktur, ikatan dan konvensi yang ada padanya, tetapi juga pada unsur dalaman, daripada bahan pembicaraan, pemikiran, isi dan fungsi, serta unsur-unsur estetika lainnya yang akan dibincangkan kemudian. Walau bagaimanapun, di samping perbezaan-perbezaan itu, terdapat pula persamaan yang penting, iaitu kedua-duanya merupakan hasil imaginasi, daya cipta dan realiti yang menguasai para penciptanya, walaupun dari zaman dan konteks yang berbeza-beza.

### Latar Belakang Perkembangannya

Persoalan mengenai permulaan puisi, waktu dan bagaimana mula-munya masyarakat Melayu berkomunikasi melalui puisi, adalah antara persoalan-persoalan yang kontroversial dan sukar dibuktikan. Para pengkaji yang menyentuh soal ini berpendapat bahawa sesuatu masyarakat itu menggunakan puisi sebaik sahaja anggota-anggotanya dapat berkomunikasi melalui bahasa. Dengan demikian dapatlah diambil kesimpulan bahawa puisi telah lahir dalam masa dan peringkat yang sama dengan kelahiran bahasa. Seorang manusia yang normal perkembangan mental dan fizikalnya akan berupaya menyampaikan emosinya dalam kata-kata yang berirama, dengan rentak dan nada yang paling sedikit mengandungi ciri-ciri atau unsur-unsur puisi. Tetapi, bagaimanakah bentuk puisi yang paling

awal dalam masyarakat Melayu itu masih belum diterangkan dengan jelas oleh para sarjana. A. Teeuw (1966b), misalnya dalam mempersoalkan asal usul syair Melayu, mengatakan:

*The syair could of course be thought of in terms of an old Indonesian form of poetry, possibly adapted to later foreign forms. Such a possibility cannot be immediately rejected. It is a fact that in Indonesia popular poetry the four-line stanza and four-word line occur frequently while rhyme too plays an important part in the various verse forms of this poetry (hlm 441).*

Th. Pigeaud (1967), dalam membicarakan puisi Jawa, juga menyebut tentang "the oldest form of Indonesian poetry":

*It seems probable that in olden times indigenous Javanese poetry had forms which were well suited to the structure of the language, as in the case with the literatures of other Indonesian peoples discovered by anthropologists in the nineteenth and twentieth centuries. Even in the Old Javanese period there may have flourished in the countryside, side by side with the court 'kakawins' with metres ruled by a foreign, Indian prosody, a less sophisticated poetry in native metres (hlm 18).*

Kedua-dua pendapat di atas merujuk kepada suatu bentuk puisi Melayu/Indonesia yang tertua yang mempunyai ciri-ciri, antara lain, terdiri daripada empat baris serangkap, empat perkataan sebaris dan mempunyai rima akhir. Ciri-ciri itu sesuai dengan genre pantun atau parikan Jawa yang sama pula dengan pantun Melayu.

Walau bagaimanapun, apabila dibandingkan, pantun Melayu dan parikan Jawa adalah daripada genre puisi yang telah berkembang, iaitu yang sudah mempunyai ciri-ciri tertentu untuk digolongkan kepada suatu genre. Sebaliknya bentuk puisi yang lebih awal di kalangan sebuah masyarakat primitif, seharusnya merupakan bentuk yang paling sederhana, sesuai dengan kematangan cara berfikir masyarakat itu. Dalam hal ini ada pendapat yang mengatakan jampi atau mantera adalah bentuk puisi yang terawal dalam sebuah masyarakat primitif, termasuk masyarakat Melayu. Elizabeth Drew (1972), misalnya memberikan pendapat demikian:

*Poetry probably started as magical chanting to accompany the dance, producing either a lulling of the senses and emotions or a whip to them, and it will always exist as the music and dance of words. Its pleasures can be purely those of sensations (hlm 26).*

Pendapat ini sesuai berdasarkan fungsi dan suasana yang melahirkan puisi mantera. Pada umumnya mantera bertujuan menguasai kuasa-kuasa ghaib yang dipercayai wujud pada segala objek. Kata-kata yang disusun, diulang, dilakukan dan diabadikan dalam ritual-ritual yang seluruhnya bermaksud untuk mencapai matlamat yang diharapkan. Hasil kegiatan-kegiatan itu dapat dilihat dalam mantera-mantera yang berbagai-bagai bentuk, dari yang paling sederhana – misalnya ungkapan-ungkapan pendek yang prosaik – kepada ungkapan-ungkapan yang mengandungi unsur-unsur puitis yang lebih sofistikated.

Walaupun demikian, pantun masih boleh dianggap mempunyai kedudukan yang sama sebagai genre puisi yang awal. Ini ialah kerana pantun juga merupakan perkembangan yang awal dalam masyarakat Nusantara. Van Opuijsen (1958), dalam membicarakan asal usul pantun Melayu, memberikan pendapat bahawa pantun lahir dalam peringkat hidup masyarakat yang paling sederhana. Misalnya, dalam masyarakat Batak Mandailing terdapat satu cara berkomunikasi antara anggota-anggotanya dalam menyampaikan emosi masing-masing melalui perantaraan bunyi dan erti yang disampaikan melalui penggunaan daun-daun. Kalau seorang pemuda mengirimkan gadisnya daun-daun *sitrak*, *hadungdung*, *sitata*, *sitanggis*, *podom-podom* dan *pahu*, ertiinya dia mahu menyatakan, bahawa sejak berpisah dia tidak dapat tidur sebelum menangis. *Sitarak* bersajak dengan *marsarak* (berpisah), *hadungdung* dengan *dung* (sesudah), *sitata* dengan *hita* (kita), *sitanggis* dengan *tangis* (menangis), *podom-podom* dengan *modom* (tidur) dan *pahu* dengan *au* (aku, saya). Kebiasaan menggunakan bahasa daun ini dapat dikenali sebagai ‘upama’ (umpama) dan *ende-ende* (andai-andai) di kalangan masyarakat Mandailing. Dengan perkataan lain, perkembangan umpama dan *ende-ende* adalah daripada bahasa daun; iaitu satu cara berkomunikasi yang paling primitif.

R.J. Wilkinson dan R.O. Winstedt (1907), walaupun tidak ber-setuju dengan pendapat di atas tetapi memberikan contoh yang sama dalam penggunaan lambang-lambang, iaitu apa yang dipanggilnya ‘bahasa lambang’. Kebiasaan menggunakan lambang-lambang adalah umum; dalam masyarakat Nusantara terdapat banyak penggunaan lambang-lambang, yang diambil daripada kejadian alam, mitos dan kehidupan rakyat, sebagai menyampaikan maksud

pantun. Walau bagaimanapun penggunaan lambang-lambang tidaklah menerangkan asal usul kejadian pantun; kerana kedudukan lambang-lambang lebih merupakan isi atau kandungan pantun. Daripada kajian dan pemerhatian mereka, Wilkinson dan Winstedt berpendapat perkembangan pantun adalah hasil daripada kebiasaan orang-orang Melayu menggunakan perkataan-perkataan yang bersajak, bunyi-bunyi yang mempunyai unsur saranan (*suggestive*) seperti yang terlihat dalam ungkapan-ungkapan yang bersajak dalam talibun, teromba, mantera dan lain-lain. Daripada kebiasaan ini kemudiannya berkembang menjadi pantun-pantun dua kerat dan seterusnya kepada bentuk pantun yang sempurna seperti yang dikenali sekarang.

Sesungguhnya masih banyak lagi pendapat yang diberikan oleh para pengkaji tentang asal usul kejadian pantun; tetapi walau bagaimanapun juga perbezaannya, dasarnya adalah sama: pantun adalah hasil daripada perkembangan yang perlahan, yang berperingkat-peringkat dari yang sederhana kepada yang sofistikated. Keadaan perkembangan seperti ini juga terjadi dalam genre-genre yang lain dalam keseluruhan puisi tradisional itu. Dari segi bentuk, kita kenali perbilangan adat, teka-teki, peribahasa berirama dan ikatan-ikatan yang lain seperti dalam talibun atau sesomba dan prosa lirik atau prosa berirama.

Hasil daripada pertembungan kebudayaan Melayu dengan kebudayaan-kebudayaan India, kira-kira dalam abad ke-14,<sup>2</sup> dan Islam (Arab-Parsi) dalam abad ke-15,<sup>3</sup> puisi Melayu mengalami

<sup>2</sup>Tidak ada bukti sejarah yang tepat mengenai tarikh kedatangan Hindu ke Semenanjung dalam konteks yang meninggalkan kesan kepada kebudayaan Melayu, seperti yang berlaku di Jawa dan Bali. Orang-orang India telah datang dan membuat tempat tinggal di Kedah mulai abad kelima Masihi. Tetapi pengaruh India yang berkesan mungkin dengan penaklukan Majapahit ke atas Sriwijaya (1338–1365). Kelantan, Kedah dan Patani menerima kesan daripada penaklukan itu. Ini membuktikan pendapat kita bahawa agama dan kebudayaan Hindu diterima oleh masyarakat Melayu melalui Jawa Majapahit, tidak terus dari India. (Lihat R.O. Winstedt, 1972. *The Malays: A Cultural History*, London Routledge & Kegan Paul Ltd., hlm 26–27).

<sup>3</sup>Seperiti di atas, kedatangan Islam ke Semenanjung juga tidak didapati tarikhnya yang tepat. Hanya setakat ini para sarjana bersetuju pada tarikh-tarikh antara abad ke-13 dan ke-14 apabila peniaga-peniaga Arab datang bermula ke daerah ini. (Lihat antara lain, Syed Naquib al-Attas, 1972. *Islam dalam Sejarah dan Kebudayaan Melayu*, Kuala Lumpur: Universiti Kebangsaan Malaysia, hlm 32–36 dan S.Q. Fatimi, 1963, *Islam Comes to Malaysia*, Singapura: Malaysian Sociological Research Institute, hlm 10–30).

perkembangan yang lebih dinamis. Istilah-istilah teknik yang terpakai dalam skema puisi India dan Arab diambil dan digunakan ke dalam puisi Melayu termasuk perkataan-perkataan 'gurindam', 'seloka' dan 'mantera' dari India, dan 'syair', 'nazam', 'bayt', 'kit'ah', 'masnawi' dan 'ghazal' dari Arab-Parsi. Di sini haruslah ditekankan bahawa perigambilan itu hanya setakat istilahnya sahaja, tidak pada bentuk dan isinya seperti dalam genre asalnya. Perkataan gurindam yang dikatakan berasal daripada bahasa Tamil, seloka dan mantera daripada Sanskrit, dalam puisi Melayu merupakan bentuk-bentuk yang tersendiri dengan isi dan ciri lain yang berbeza-beza daripada gurindam, seloka dan mantera India, (lihat bab-bab yang berkenaan di bawah). Keadaan yang sama berlaku pada syair dan nazam yang dikatakan daripada bahasa Arab dan Parsi, tetapi tidak juga menampakkan persamaan yang menyeluruh dengan genre-genre puisi Arab dan Parsi. Istilah dan bentuk-bentuk puisi Arab-Parsi yang diperkenalkan kemudianya ke dalam puisi Melayu, misalnya oleh Bokhari al-Jauhari, melalui karyanya, *Tajus Salatin* (Hollander 1845, 305), tidak mendapat sambutan daripada masyarakat Melayu. Puisi-puisi Arab-Parsi yang dikenali sebagai ruba'i, kit'ah, masnawi dan ghazal, yang diterjemahkan dan diberikan contohnya dalam karya tersebut, telah tidak berkembang dalam kesusastraan Melayu, berbanding dengan genre-genre yang memang telah ada, seperti pantun, seloka, gurindam, teka-teki, talibun, mantera, prosa berirama dan mungkin syair.

Perkembangan yang jelas sebagai hasil pertembungan itu, dalam konteks puisi tradisional ini mungkin dari segi pemikiran dan tanggapan, serta pengembangan sastera dalam rangka perkembangan kebudayaan yang lebih luas. Daripada pembicaraan yang sederhana yang berkisar pada soal-soal emosi dan kehidupan sehari-hari, kepada yang lebih abstrak yang menyangkut bidang-bidang falsafah, kemanusiaan, metafizika, kosmologi dan kosmogoni. Dengan perkembangan ini puisi Melayu telah dapat membicarakan persoalan-persoalan yang lebih rumit yang memerlukan daya cipta dan daya fikir yang tinggi sebagaimana hasilnya yang dapat dilihat dan diwarisi hingga kini.

Melalui pertembungan dan pengalaman dengan Barat, puisi Melayu mengenali pula genre dan tradisi puisi yang berkembang di sana. Pada peringkat awalnya perkembangan ini adalah hasil

daripada eksperimen-eksperimen yang dilakukan oleh penyair-penyair tempatan yang telah menerima sistem pelajaran Barat dan yang sedikit sebanyak telah mendapat pengalaman di Barat. Beberapa bentuk dan istilah dalam puisi Barat mulai dipelajari dan diadaptasikan ke dalam puisi Melayu, termasuk antaranya *distichon*, *terzina*, *quatrain*, *sextet*, *octavo* dan beberapa yang lain (Simorangkir Simandjuntak 1965, 67–71).

Walau bagaimanapun, seperti yang berlaku dalam hal pertem-bungan dengan kebudayaan-kebudayaan India dan Arab-Parsi tadi, pengambilan daripada unsur-unsur Barat bukanlah pada bentuk dan isi seluruhnya. Tidak terdapat bentuk-bentuk dengan istilah-istilah Barat yang rumit itu (misalnya bentuk dan istilah yang ditentukan oleh jumlah baris dan skema rima) ditiru, disadur atau diadaptasikan kepada puisi Melayu moden. Istilah-istilah dan bentuk-bentuk itu diperkenal, diberikan contoh berupa terjemahan atau penyesuaian di dalam beberapa buah buku tertentu untuk kemudian dilupa dan ditinggalkan daripada rantai perkembangan selanjutnya. Bentuk dengan istilah Barat yang mendapat tempat dan berkembang dalam puisi Melayu-Indonesia sekurang-kurangnya dalam masa-masa yang awal, ialah soneta, yang lebih mendekati bentuk puisi Melayu dan yang lebih banyak memberikan kelonggaran kepada para penyair untuk mencipta dan memancarkan emosi mereka. Namun begitu, bentuk ini juga dilupakan apabila penyair-penyair moden ini telah bertapak dan berkembang ke arah tradisinya sendiri.

Jelas di sini, perkembangan dan perubahan yang penting dalam peringkat ini dan peringkat-peringkat seterusnya, bukanlah dalam aspek menambahkan bentuk dan istilah-istilah teknik Barat itu sahaja. Aspek yang lebih penting ialah keinginan para penyair melepaskan diri daripada ikatan-ikatan dan undang-undang yang dikatakan wujud dalam puisi tradisional itu. Hasil daripada keinginan itu dan eksperimen-eksperimen yang dilakukan, melahirkan apa yang dikenali sebagai 'sajak bebas', 'puisi bebas' atau 'puisi moden'. Namun pada hakikatnya, pada peringkat awal ini penyair-penyair itu masih belum berjaya melepaskan diri sepenuhnya dari-pada ikatan-ikatan tradisi itu. Justeru itu 'sajak-sajak moden' mereka masih mengandungi unsur-unsur tradisional, baik dari segi bentuk (*form*) maupun dari segi tema dan isi. Keadaan ini dapat dibuktikan melalui karya-karya daripada angkatan Pujangga Baru

di Indonesia (dalam tahun-tahun 30-an), bahkan oleh Angkatan Sasterawan 50 (ASAS 50) di Malaysia dalam tahun-tahun 50-an. Perubahan yang lebih jelas sifat-sifat pembaharunya, hanya baru kelihatan dalam tahun-tahun 60-an, seperti yang diterangkan oleh Muhammad Haji Salleh (1977, 83):

*For those who chose to write in the free verse form, many took a considerable length of time to feel at ease with the foreign form and make it flexible enough for their concept of poetry. In Malaysia, the free verse form took about thirty years before it was really accepted by Malay poets. Only in the sixties did it come to be assimilated and blended gracefully with local literary practices. And it is also only since then that poets have had a real facility with its form and possibilities.*

Dewasa ini, sesudah 40 tahun puisi Melayu moden itu mempunyai hubungan dengan puisi Barat, bentuk puisi Melayu masih dalam peringkat membina identitinya sendiri. "Satu daripada ciri yang ketara bagi puisi zaman ini ialah bahawa karya-karya itu merupakan hasil daripada percubaan-percubaan (*experimentation*). Dan dalam percubaan ini masing-masing mahu mencari yang baru dalam pemikiran, bentuk dan suara." (Muhammad Haji Salleh 1977, 141). Dan, walaupun hasil pada keseluruhannya puisi Melayu sezaman itu dapat dikatakan telah mencapai tingkat perkembangan yang menggalakkan, namun pada hakikatnya masih belum juga mencapai identiti dan kematangan yang diharapkan. Sebaliknya pula, puisi Melayu tradisional itu – setelah melalui masa perkembangan yang jauh lebih panjang – telah mantap dengan identiti dan sifat-sifat kematangannya sendiri.

Satu keadaan yang sangat menarik dalam hal perkembangan puisi ini ialah tentang wujudnya perkembangan yang sejajar antara yang tradisional itu dengan yang moden. Dalam masa perkembangan yang pesat dengan sajak-sajak moden mengisi halaman-halaman akhbar dan majalah, dalam suasana kesibukan penyair-penyair moden mencipta dan mendeklamasi puisi mereka, dalam suasana yang lain penyair-penyair tradisional, khususnya di desa-desa dan pedalaman, masih terus mencipta, menghayati dan menyebarkan puisi tradisional. Dalam kegiatan-kegiatan seni dan dalam kehidup-

an hari-hari masyarakat, pantun masih dicipta, dinyanyikan dan diabadikan dalam istiadat dan keramaian, dalam lagu dan tarian; sementara syair dalam nasyid, zikir dan kegiatan-kegiatan lain yang berunsur keagamaan. Oleh kerana perkembangan ini lebih banyak di peringkat rakyat, iaitu tidak di kalangan terpelajar seperti dalam zamannya yang lampau atau seperti dalam suasana yang melahirkan puisi moden, isi dan pemikiran dalam puisi itu juga kembali kepada bentuknya yang sederhana yang menggambarkan kesederhanaan kehidupan dan cara berfikir masyarakat yang masih memelihara dan memperkembangkannya.

### Bentuk dan Penggolongan Puisi

Seperti yang dapat diikuti dalam perkembangan pengkajian puisi Melayu tradisional di atas tadi, setakat ini masih belum ada kajian yang menyeluruh, khusus membicarakan penggolongan puisi itu dari segi puisi-puisi dunia. Hanya dalam beberapa kajian yang kemudian, misalnya oleh A.W. De Groot, *Algemene Versleer* (1946) dan A. Teeuw, *Taal en Versbouw* (1952) yang menyentuh secara ringkas dan umum mengenai hal tersebut. Penggolongan seperti ini perlu dalam penelitian teori kesusastraan bagi menentukan dasar dan pendekatan dalam mengkaji sesuatu genre sastera. Bahkan pada beberapa segi penggolongan itu adalah asas untuk meneroka dengan lebih mendalam ciri-ciri yang lain dalam genre tersebut. Seperti yang telah diperkatakan, kebanyakannya pengkaji sebelum dan sesudah De Groot dan A. Teeuw, telah mengkaji puisi Melayu dengan menggunakan pendekatan terhadap puisi Barat, khasnya Yunani, Latin, Sanskrit dan Arab. J.J. De Hollander, misalnya, dalam membicarakan pantun Melayu, memberikan kesimpulan ringkas bahawa puisi itu terdiri daripada baris-baris yang mengandungi empat perkataan sebaris dengan jumlah suku kata yang tidak tetap jumlahnya. Suku kata-suku kata ini mempunyai tekanan panjang atau pendek, mengikut timbalan irama rangkap-rangkap yang berkenaan (Hollander 1845, 302). R. Hoesein Djajadiningrat, (1933) menyebutkan pantun sebagai terdiri daripada empat baris, tiap sebaris terjadi daripada empat kaki dan setiap kaki terdiri daripada dua atau tiga suku kata. Tegasnya, puisi Melayu telah diukur dari sudut bahasa dan puisi asing. Bahasa Melayu, seperti yang telah diketahui, tidak tergolong sebagai bahasa kuantitatif, di mana perkataan-perkataan-

nya mempunyai panjang pendek suku kata, seperti bahasa-bahasa Arab dan Sanskrit. Bahasa Melayu juga tidak mempunyai tekanan lemah dan kuat pada suku katanya seperti yang ada pada bahasa-bahasa Eropah seperti Yunani dan Latin. Oleh itu tinjauan terhadap puisi Melayu hendaklah dibuat berdasarkan struktur bahasa Melayu yang berlainan daripada bahasa-bahasa asing.

Berdasarkan pembahagian yang dibuat oleh De Groot, puisi-puisi dunia daripada semua zaman dapat digolongkan ke dalam empat bahagian:

1. Puisi suku kata (*isosyllabic*), seperti dalam puisi Perancis. Dalam golongan ini unit minimum yang dijadikan ukuran ialah suku kata, yang tertentu jumlahnya dalam sebaris. Jumlah itu tidak semestinya sama, tetapi dalam pola-pola yang mempunyai ukuran dan aturan yang tetap pula.
2. Puisi tekanan (*herffingsvers*), di mana unit minimum ialah pada suku kata, sama ada pada tekanan (*accent*) kuat dan lemah atau pada bahasa yang mempunyai kuantiti pada panjang dan pendek suku kata. Puisi tekanan lebih umum dalam puisi-puisi Jerman, Inggeris, Belanda, Itali, Sepanyol dan lain-lain. Di sini unit minimum dikatakan kaki (*foot*); sebuah kaki mengandungi sekurang-kurangnya satu tekanan kuat (*arsis*) dan satu tekanan lemah (*thesis*). Kombinasi tekanan-tekanan ini menjadikan pola-pola tertentu dengan nama-nama yang tertentu. Misalnya, sebuah kaki yang terdiri daripada satu *thesis* dan satu *arsis*, dinamakan *iamb* (*iambic*), sementara *arsis*, diikuti *thesis* dipanggil *trochée* (*trochaic*), dua *thesis* diikuti satu *arsis*, *anapest* (*anapestic*) dan seterusnya. Jumlah kaki dalam sebaris memberikan nama tertentu: *diametre* (dua kaki), *trimetre* (tiga kaki) dan seterusnya *tetrametre*, *pentametre*, *hexametre*, *heptametre* dan sebagainya. Demikian bagi baris yang mengandungi tujuh kaki, dengan kombinasi *thesis*, *arsis* dan *thesis* diberi nama *amphibrachic heptametre*.

Dalam puisi kuantitatif, seperti Arab dan Sanskrit, unit minimum ialah panjang dan pendek suku kata, dengan pola-pola dan nama-nama tertentu, bergantung kepada kombinasi kuantiti dalam sesebuah kaki dan jumlah kaki dalam sebaris. Dalam puisi Arab terdapat tidak kurang daripada 16 pola irama

yang dianggap umum dan asas; antaranya yang paling penting ialah tawil (*the long metre*), basit (*the wide metre*), wasir (*the ample metre*) dan kamil (*the perfect metre*) (Nicholson 1969, 55–57; Arberry 1965, 5–12). Dalam puisi Sanskrit juga pola irama terbina daripada susunan panjang dan pendek (guru dan lagu) suku kata, dengan kombinasi dan istilah-istilah yang berlainan. Suatu pola irama yang dinamakan *upajati*, misalnya, terdiri daripada 11 suku kata dalam sebaris, dengan jumlah kaki dan kombinasi guru dan lagu yang tertentu.

3. Puisi perkataan (*woordvers*) yang hanya boleh berlaku dalam bahasa-bahasa yang bukan inflektif, misalnya dalam bahasa-bahasa Nusantara, termasuk bahasa Melayu. Dalam golongan ini, unit minimum ialah perkataan, iaitu jumlah perkataan sebaris dan jumlah baris serangkap; tegasnya tidak dari segi suku kata, tekanan atau panjang pendek seperti puisi-puisi Eropah, Arab dan Sanskrit.
4. Puisi kelompok kata (*woordgroepvers*), yang terdapat pada puisi Hebrew dalam *Torah* dan *Psalm*. Di sini unit minimum yang menjadi ukuran ialah kelompok-kelompok kata yang seimbang dalam sesuatu baris, bersesuaian dengan baris-baris lainnya.

Daripada pembahagian di atas ternyata puisi Melayu tergolong sebagai puisi perkataan (Teeuw 1952, 10). Di sini unit minimum yang menjadi ukuran ialah perkataan, iaitu jumlah perkataan dalam sebaris, sama ada tertentu atau tidak. Pantun dan syair, misalnya, dicirikan dengan empat perkataan sebaris. Dan oleh kerana kebanyakan perkataan dalam bahasa Melayu bersifat dwisuku kata (*disyllabic*), menjadikan jumlah suku kata dalam sebaris antara lapan hingga sepuluh; iaitu apabila kata-kata dasar disertai imbuhan-imbuhan dan kata-kata fungsional, sesuai dengan sifat bahasa itu yang tidak menjadi lengkap atau sempurna tanpa tambahan-tambahan itu. Dengan demikian aspek suku kata bukanlah yang terpenting, tetapi dianggap sebagai yang kedua.

Melalui perbandingan yang lebih jauh, hampir keseluruhan puisi Melayu tradisional dicirikan sebagai empat perkataan sebaris, walaupun daripada genre yang tidak terikat, seperti gurindam,

seloka, talibun, teromba dan mantera. Perhatikan beberapa contoh di bawah ini:

**Pantun**

Sapu tangan punca pelekat  
Pakaian anak raja di Judah  
Luka di tangan dapat dilihat  
Luka di hati bilakan sudah.

(Winstedt 1961, 92)

**Syair**

Kalau kita ditanya orang  
Kemudi manusia apakah gerang  
Berilah jawab dengannya terang  
Akal, akal, akal, akal.

Kalau kita lagi ditanya  
Haluan manusia apa dianya  
Berilah jawab yang sempurna  
Hati, hati, hati, hati.

(Za'ba 1962, 107)

**Gurindam**

Dengan bapa jangan derhaka  
Supaya Allah tidak murka.

Dengan ibu hendaklah hormat  
Supaya badan dapat selamat.

Dengan anak janganlah lalai  
Supaya boleh naik ke tengah balai.

Dengan isteri dan gundik janganlah alpa  
Supaya kemaluan jangan menerpa.

Dengan kawan hendaklah adil  
Supaya dengan tangannya menjadi kafil.

(Netscher 1854, 19)

## PUISI MELAYU TRADISIONAL

Ayuhai dara Zulaika Tingkap  
Bangun apalah engkau  
Kerana engkau penghulu gundikku  
Bergelar Tun Derma Dikara.  
Bangun apalah engkau  
Tidakkah kaudengar bunyi  
Genderang perang di Tukasan  
Palu Tabuh-tabuhan  
Hari dinihari bulan pun terang

(Hill 1960)

### Talibun atau Sesomba

Kalau diukur sama panjang  
Kalau dibidas sama besar  
Kalau peroman sama baik  
Sirih pulang ke gagangnya  
Kuah tumpah ke nasinya  
Harta pulang ke empunyanya  
Orang setumbuk bagai gelang  
Orang sejodoh bagai cincin

(Mohd. Taib Osman 1975, 147)

### Teromba

Orang berbini nak berbelanja  
Orang bercerai nak berkesudahan  
Orang beranak nak berupah bidan  
Orang nikah dengan maharnya  
Adat diisi janji dilabuh  
Sah kata adat mensiang  
Cacat cedera berkembalian  
Sawan gila luar janji  
Elah si laki-laki luncur tanda  
Elah si perempuan ganda tanda

(Mohd. Din Ali 1957, 66)

### Mantera

Satu itu bernama se  
Dua itu bernama malwa  
Tiga itu bernama maliga \*  
Empat itu bernama kacang sepat  
Lima itu bernama panglima

## PUISI MELAYU TRADISIONAL: KONSEP, BENTUK DAN CIRI

Enam itu bernama tuk konam  
Tujuh itu bernama maujud  
Lapan itu bernama mati papan  
Sembilan itu bernama maulan  
Sepuluh itu bernama titi buluh  
Dia yang terjadi daripada yang satu  
Dia yang terbentuk daripada setitik mani  
Dia yang bertukar menjadi segumpal darah  
Dia yang berubah menjadi seketul daging  
Dia diberikan segala bentuk  
Bila telah genap masanya roh pun ditiu  
Maka menjadilah satu lembaga yang bernyawa.

(Daud Hj. Taib 1978)

### Nazam

Dengar olehmu encik dan tuan  
Inilah kisah hamba khabarkan dia.

Tatkala nabi hendak dizahirkan  
Tahulah habis laut dan daratan.

Cahaya rata sekalian alam  
Dijadikan Tuhan sekalian alam.

Nur Muhammad jatuh ke Abdullah  
Jadilah dia terlalu indah.

Perempuan muda di dalam Makkah  
Hendak melihat rupanya Abdullah.

Lalu melihat rupa Abdullah  
Hendak menerima cahaya nubuwah.

Abdul Mutallib datanglah susah  
Mencari yang patut dengan Abdullah.

(Haji Awang Mahmud 1979)

### Zikir atau Dikir

Nabi Allah Nabi Muhammad  
Orang di Mekah lalu berpindah ke tanah Madinah  
Hidupnya enam puluh tiga tahun

Sepuluh tahun lamanya di Madinah  
Lalu wafatnya di Madinah  
Petang Ahad malam Isnin  
Kepada dua belas haribulan  
Rabiulawal namanya bulan  
Tiga hari tiga malam di atas rumahnya  
Pelita yang tiada beroleh padam  
Air matanya si hujan renyai-renyai  
Yang tiada beroleh kering  
Seperti manik putus talinya  
Seumpama intan putus pengarangnya  
Jatuh satu, jatuh dua, jatuh tiga, basahlah  
bau  
Kasihilah akan bercerai dengan junjungan  
Allah sallaLah alaihi wasallam.

(Haji Omar Ismail 1978)

Daripada contoh-contoh di atas dapat dijelaskan, puisi Melayu mengambil dasar empat perkataan sebaris yang bukan sahaja terhad kepada pantun dan syair, tetapi juga kepada bentuk-bentuk yang lain. Memang terdapat keadaan-keadaan yang terkecuali atau menyimpang daripada dasar tersebut; misalnya terdapat nazam yang terdiri lebih daripada empat perkataan, teromba yang kurang daripada empat dan mantera yang tidak begitu terikat pada jumlah perkataan dan baris. Dalam pantun dan syair juga mungkin terdapat yang kurang atau lebih daripada empat perkataan, terutamanya bila dipertimbangkan imbuhan-imbuhan dan perkataan-perkataan tambahan yang berfungsi sebagai pengimbang kepada bunyi atau lagu. Tetapi, pada dasarnya perkataan-perkataan itu tidak memberikan erti secara bersendirian; misalnya kata-kata fungsional, 'yang', 'dan', 'nan', 'nang', 'lah', 'pun' dan sebagainya; demikian juga kata-kata ringkas 'dan' (sudah), 'nak' (hendak), 'tak' (tidak), 'lah' (telah) dan lain-lain.

Di samping itu terdapat dua atau lebih perkataan yang mewakili satu konsep, dan kerana itu dianggap sebagai satu perkataan; misalnya angka-angka, seperti empat belas, lima puluh lima, bahkan seribu sembilan ratus tiga puluh tujuh dan lain-lain. Perkataan-perkataan nama khas, atau penerang kepada nama, ungkapan-ungkapan yang telah tetap, seperti 'bismillahir-rahmanir-rahim',

'Lailaha illallahu' dan lain-lain; misalnya dalam contoh-contoh di bawah:

Sebuah pantun daripada *Sejarah Melayu*:

Apá djeruk dengan belimbing?  
Gerangan mudik muara  
Apa ditengok di balik dinding?  
Tun Hassan Temenggung anak Bendahara.

(Shellabear 1975, 245)

Demikian juga daripada Syair Perahu oleh Hamzah Fansuri:

Lengkapkan pendarat dan tali sauh  
Derasmu banyak bertemu musuh  
Selebu rencam ombaknya cabuh  
La illaha illallahu akan tali yang teguh.

Barang siapa bergantung di situ  
Teduuhlah selebu yang rencam itu  
Pedoman betuli perahumu laju  
Selamat engkau ke pulau itu.

La illaha illallahu yang engkau ikut  
Di laut keras topan dan ribut  
Hiu paus di belakang menurut  
Perpetatlah kemudi jangan terkejut.

(Sutan Takdir Alisjahbana 1971, 71)

Bentuk dan struktur sesebuah puisi berkait amat rapat dengan struktur bahasanya. Puisi perkataan hanya boleh berlaku dalam bahasa yang tergolong sebagai bahasa aglutinatif, di mana perkataan-perkataannya dapat berdiri sendiri. Perkataannya boleh menerima imbuhan, atau kata-kata fungsional tanpa mengubah erti, boleh berubah kedudukannya, bahkan untuk kepentingan rima akhir boleh diubah bunyi hujungnya tanpa mengubah erti yang dasar. Keadaan demikian berbeza daripada bahasa-bahasa yang inflektif, termasuk Latin, Arab dan Sanskrit. Dalam bahasa-bahasa ini puisi perkataan mungkin tidak berlaku kerana struktur bahasanya tidak menerima bentuk puisi demikian.

Suatu contoh yang dapat diambil sebagai contoh yang jelas, dalam hal ini, ialah pada kakawin Jawa Kuno yang dicipta berdasar-

kan 'kawya' Sanskrit. Bagi bahasa Sanskrit yang mengandungi aspek panjang pendek suku kata sebagai unsur gramatis yang membezakan erti, bahasa itu dapat mengikut dan menerima susunan-susunan meter puisi India. Tetapi penggunaan wirama atau pola meter India ke dalam kakawin Jawa Kuno menimbulkan berbagai-bagai kesulitan. Kerana, sebagai salah satu bahasa dalam rumpun Nusantara atau Austronesia yang tidak mempunyai kuantiti fonologi (vokal panjang pendek sebagai fitur tatabahasa), bahasa Jawa Kuno terpaksa membentuk semacam 'mekanisme' dalam tatabahasanya, untuk disesuaikan dengan penggunaan panjang pendek suku kata di dalamnya. Oleh itu, selain daripada meminjam perkataan-perkataan Sanskrit yang memang mengandungi suku kata panjang dan pendek, beberapa vokal seperti /e/ dan /o/, dan vokal pendek yang muncul sebelum sesebuah konsonan, dianggap panjang dalam bahasa Jawa Kuno. Oleh itu dengan membuat penyesuaian dengan *poetics* Sanskrit yang telah berkembang daripada bahasanya yang sofistikated, bahasa Jawa Kuno juga, lama-kelamaan menjadi bahasa yang lebih seni dan *artificial* (Sutjipto Wirjosuparto 1971, 263). Dalam perkembangan ini pengubah-pengubah kakawin Jawa Kuno mengikuti dengan agak terperinci susunan-susunan 'kawya' Sanskrit dalam buku-buku yang berkenaan, misalnya *Bhattikawya*, yang dikarang oleh Bhatti dalam abad ketujuh Masihi. Pengarang Kakawin Ramayana Jawa Kuno, telah menggunakan karya ini dalam kakawinnya. Menurut Sutjipto Wirjosuparto, 1971:

*The most conspicuous literary form used in Bhattikawya was that of the yamaka, of which Bhatti, the composer, near in the middle of his poem, demonstrated twenty different types that interrupted his discussions on grammatical exercises. It was expected, that the Old-Javanese language, being a language which quiet differed from Sanskrit could not have applied all the twenty types of yamakas. But, the composer of the Old-Javanese Ramayana Kakawin still applied seven types of yamakas. From comparison between Chapter II, stanza 19 of the Bhattikawya with sarga (chapter) II, stanza 19 of the Old-Javanese Ramayana Kakawin, it proved that the stanza of the Bhattikawya was rendered faithfully in the Old-Javanese Ramayana Kakawin (hlm 264 - 265).*

Dalam puisi Melayu tradisional tidak terdapat tanda atau kesan yang menunjukkan penyair-penyair Melayu mencipta puisi berpan-

dukan susunan puisi asing, baik Sanskrit mahupun Arab-Parsi; kecuali yang benar-benar merupakan terjemahan daripada puisi asing itu, seperti bait, kit'ah, masnawi dan ghazal. Tetapi usaha terjemahan dan adaptasi itu pun – seperti yang dilakukan oleh Bokhari al-Jauhari, di dalam bukunya *Tajus Salatin* itu hanya merupakan usaha yang terasing. Kegiatan seperti itu tidak berterusan seperti yang berlaku dalam penulisan kakawin-kakawin Jawa Kuno. Hal ini memperlihatkan bahawa struktur puisi Melayu begitu tertakluk kepada struktur bahasanya hingga dirasakan terlalu janggal untuk menerima susunan puisi asing. Atau, sebagai kemungkinan lainnya iaitu puisi Melayu itu telah mencapai perkembangannya yang matang semasa kedatangan pengaruh-pengaruh asing itu, hingga tidak lagi memerlukan adaptasi dan peniruan daripada tradisi asing.

### **Teknik dan Gaya**

Gaya atau 'stail', menurut Danzinger dan Johnson ialah pilihan yang dibuat secara sedar untuk mencirikan sesuatu karangan baik yang ditulis mahupun yang dituturkan. Pilihan itu termasuk pemilihan perkataan, misalnya bunyi-bunyi yang membina perkataan (unsur unsur asonansi dan aliterasi), atau antara perkataan (unsur rima), susunan perkataan dalam kalimat, panjang kalimat, jumlah kalimat dalam perenggan, rangkap dan lain-lain. Pada gaya juga terdapat pertimbangan tentang pengucapan (*diction*), imajan (*imagery*), sintaksis, '*sound*', ciri-ciri prosodi dan sebagainya. Puisi tradisional menekankan unsur-unsur pemilihan perkataan (*sound* dan prosodi) yang mengaitkan persoalan rima, meter, rangkap (*stanza*) dan sebagainya (Danzinger dan Johnson 1961, 23).

Dan seperti yang terjadi pada aspek penggolongan di atas tadi, kajian terhadap stail dan teknik sastera ini juga masih belum dilakukan, kecuali secara umum dan terhad kepada sesebuah genre, misalnya kepada pantun dan syair. S. Slametmuljana, dalam bukunya *Poezie in Indonesia* (1954), walaupun menyentuh persoalan stail dalam puisi Indonesia, tetapi lebih khusus kepada puisi moden. Demikian pula Gabriel Altmann, dalam kajian-kajiannya yang terbaru, hanya menumpukan kepada pantun dan syair, dan dalam aspek yang terbatas, iaitu aspek fonologi dan dengan menggunakan pendekatan linguistik, tidak sastera. Hanya satu yang mungkin

relevan digunakan untuk pengkajian teknik puisi Melayu, iaitu karya B.O. Bijleveld, walaupun kajian beliau itu tidak menumpukan sepenuhnya kepada puisi.

Kajian Bijleveld itu ialah mengenai aspek perulangan dalam bahasa – bahasa Melayu, Jawa dan Sunda; hanya secara kebetulan contoh-contoh yang diberikannya itu sebahagian besarnya diambil daripada puisi; sementelah keadaan-keadaan perulangan itu memang umum didapati dalam puisi Melayu tradisional. Sesungguhnya juga unsur ulangan adalah yang paling dasar dan yang penting dalam pembinaan puisi, bukan saja puisi Melayu, tetapi juga puisi universal. Di sini, perulangan tergolong sebagai pemilihan perkataan dan penyusunan bunyi yang merupakan unsur yang signifikan pula dalam pengkajian stail.

Perulangan dalam puisi dan karya-karya sastera yang lain bukanlah sengaja direka semata-mata untuk tujuan keindahan; tetapi adalah perkembangan yang semula jadi dalam bahasa itu sendiri dalam pengucapannya sehari-hari. Hanya setelah bahasa itu berkembang dan unsur perulangan itu disedari kepentingannya, lalu ia digunakan sebagai unsur estetika atau teknik penulisan, baik dalam prosa maupun puisi. Oleh yang demikian terdapat pelbagai bentuk, sifat dan fungsi perulangan. Dalam keadaannya yang semula jadi, perulangan berlaku dengan sebab tekanan perasaan atau emosi. Seorang yang sedang mengalami tekanan atau desakan emosi mungkin akan menuturkan perkataan-perkataan yang berulang-ulang kerana itulah sahaja caranya ia melepaskan tekanan dan desakan itu. Puisi juga adalah daripada hasil cetusan emosi, walaupun tidak semestinya daripada perasaan yang tertekan. Dalam jampi dan mantera, terutamanya yang mengiringi kegiatan-kegiatan berupa upacara atau 'ritual', pawang atau bomoh yang menjalankan upacara merasa benar-benar terlibat hingga dirinya sendiri terangkat menjadi sebahagian daripada semangat-semangat yang diserunya. Dalam penggunaan perulangan secara sedar, fungsinya lebih penting untuk tujuan *intensity*, memperkuat tujuan pengucapan bahkan menimbulkan kuasa ghaib yang dipercayai ada pada kata-kata. Bentuk perulangan dalam keadaan ini mungkin berupa perulangan perkataan-perkataan yang seerti (*synonyms*) atau ulangan bunyi-bunyi (*homophone*), seperti yang banyak terdapat dalam mantera-mantera Melayu.

Secara umum dapat dikatakan bentuk perulangan yang bertujuan keindahan, dalam puisi Melayu tradisional ialah apa yang dikenali sebagai perulangan sejajar (*parallelism*); iaitu apabila unit yang diulangi mengandungi lebih daripada satu perkataan. F.G. Hubbard, misalnya mengatakan, "*In all repetition, where the repeated unit consists more than a single word, parallelism is found.*" (Bijleveld 1943, 9). Sebagai perulangan sejajar, terdapat pelbagai aspek kesejajaran yang dapat ditunjukkan daripada kedudukan unit-unit yang diulangi; antara aspek-aspek itu yang penting adalah:

1. anafora (*anafoor*)
2. episora (*epifoor*)
3. simplok (*symplok*)
4. responsi (*responsie*)
5. ulangan kata akhir (*woordopname*)
6. asonansi dalam bentuk sejajar (*parallistische assonantie*)
7. Aliterasi dalam bentuk sejajar (*parallistische aliteratie*)
8. rima (*rijm*)

### 1. *Anafora, episora dan simplok*

Anafora ialah perulangan perkataan dalam kedudukan awal baris-baris yang sejajar; episora di akhir baris dan simplok, dalam kedua-dua kedudukan, di awal dan di akhir. Anafora, episora dan simplok lebih umum dalam mantera dan teromba; dan dalam semua keadaan, perulangan anafora adalah yang paling dominan. Perhatikan beberapa contoh di bawah ini:

*Mari roh ke mari  
Mari semangat ke mari  
Mari kecil ke mari  
Mari burung ke mari  
Mari halus ke mari.*

*Mari, aku duduk pujamu  
Mari, aku duduk melambaimu  
Balik kepada rumah tanggamu  
Kepada lantai sudah jongket-jongketan  
Atap sudah bintang-bintangan.*

PUISI MELAYU TRADISIONAL

*Jangan engkau berkecil hati  
Jangan engkau berkecil rasa  
Jangan engkau mengambil salah  
Jangan engkau mengambil silih.*

*Aku duduk pujamu  
Aku duduk halamu  
Aku duduk serumu  
Aku duduk lambaimu  
Mari pada waktu ini  
Mari pada ketika ini.*

(Skeat 1967, 86 – 87)

Terdapat banyak sekali aspek ulangan sejajar dalam contoh di atas: seluruh rangkap pertama, dua baris pertama dalam rangkap kedua dan seluruh rangkap keempat adalah simplok, iaitu dengan adanya perulangan perkataan-perkataan yang sama pada awal dan akhir setiap baris. Tiga baris pertama dalam rangkap kedua adalah episora dan keseluruhan rangkap ketiga, anafora.

Bentuk ulangan yang sama terdapat juga dalam contoh-contoh daripada genre yang lain, antaranya:

Teromba, perulangan anafora:

Sah batal kepada sekedim  
Kata bercari kepada warisnya  
*Tinggal* waris menongkat  
*Tinggal* sekedim melintang  
*Tinggal* harta bertuan tak jadi  
*Tinggal* tua batal.

(Nordin Selat 1976, 114)

Pantun, ulangan anafora:

*Kalau* belayar jangan berbelok  
*Kalau* berbelok patah tiangnya  
Orang muda jangan dipeluk  
*Kalau* dipeluk patah pinggangnya.

*Pecah* pekapur Cik Maalim  
*Pecah* ditimpah panah petang

## PUISI MELAYU TRADISIONAL: KONSEP, BENTUK DAN CIRI

Astaghfirullah al-'azim  
Pucuk dicita ulam mendatang.

(Winstedt dan Wilkinson 1961, 2, 21)

Dalam talibun atau sesomba, juga anafora:

*Panau di kening bintang bertabur  
Panau di pipi pauh dilayang  
Panau di leher perintik balam  
Panau di tangan bergelang puyuh  
Panau di rusuk bersiku keluang  
Panau di belakang bertompok catur  
Panau di dada boleh buat ganti hikayat Jawa.*

(Mohd. Taib Osman 1975, 145)

### 2. *Responsi dan ulangan kata akhir*

Responsi ialah perulangan perkataan dalam baris-baris sejajar, selain daripada kedudukan awal dan akhir. Perulangan seperti ini agak umum di dalam pantun, teromba, peribahasa berirama, gurindam dan mantera; diberikan beberapa contoh:

Dalam pantun:

*Air dalam bertambah dalam  
Hujan di hulu belum lagi teduh  
Hati dendam bertambah dendam  
Dendam dahulu belum lagi sembah.  
  
Nak mandi marilah mandi  
Setimba kita berdua  
Nak mati marilah mati  
Sekubur kita berdua.*

(Bijleveld 1943, 38)

Dalam syair:

*Setelah sampai ke balai seri  
Semayam di balai raja bestari  
Rasanya gundah tidak terperi  
Tersedarkan pesan si burung nuri.*

(Mohd. Taib Osman 1975, 63)

## PUISI MELAYU TRADISIONAL

Dalam teromba:

Kambing *biasa* membebek  
Kerbau *biasa* menguak  
Ayam *biasa* berkokok  
Murai *biasa* berkicau  
Penghulu *biasa* menghukumkan adat  
Alim *biasa* menghukumkan syarak  
Hulubalang *biasa* menjarah  
Juara *biasa* melepas  
Saudagar *biasa* bermain bungkal teraju  
Perempuan *biasa* berusahakan benang dan kapas.

(Mohd. Din Ali 1957, 56)

Dalam mantera:

(Sebahagian daripada jampi pengasih):

Sirih kuning saudara kuning  
Sirih tumpah madu yang rasa  
Kuning *cahaya* kuning  
Manis seri *cahaya* seri  
Cahaya Allah *cahaya* Muhammad  
Cahaya baginda Rasulullah.

(Pawang Mat bin Andak 1978)

Ulangan atau pengambilan kata akhir ialah apabila perkataan dalam kedudukan akhir satu kalimat, diulang dalam kedudukan awal baris atau kalimat berikutnya, dalam bentuk sejajar: di sini ulangan itu seolah-olah mengikat kedua paralelisme itu. Perulangan demikian tidak banyak ditemuiinya mungkin kerana kesukaran mengadakannya secara sedar atau mungkin fungsinya tidak sepenting anafora, epifora, simplok dan responsi yang khususnya untuk tujuan *intensity*. Lihat contoh di bawah ini:

Pantun:

Kain batik baju *batik*  
*Batik* datang dari Jawa  
Adik cantik abang cantik  
Bagai pinang dibelah dua.

(Bijleveld 1943, 42)

Pantun (yang mengandungi unsur magis), dalam main mayang:

*Dianggit mayang dianggit  
Dianggit di pantat pasu  
Kupanggil dayang kupanggil  
Kupanggil turun bersatu.*

(Skeat 1967, 632)

Dalam mantera:

*Merak di Anggul-anggul  
Anggul-anggul atas kota  
Gerak ikat sanggul  
Seri naik ke muka aku  
Cahaya melempar ke tubuh aku.*

(Skeat 1967, 632)

### 3. *Asonansi, aliterasi dan rima*

Asonansi adalah perulangan bunyi-bunyi vokal sama ada dalam satu perkataan, dalam beberapa perkataan dalam sebaris; atau dalam bentuk sejarar, ulangan vokal-vokal yang sama kedudukannya dalam baris-baris yang sejajar. Unsur asonansi amat penting dan luas sekali penggunaannya dalam puisi-puisi Nusantara, termasuk puisi Melayu. Daripada beberapa segi asonansi lebih penting dan lebih signifikan peranannya daripada rima.

Bagi genre-genre puisi yang tidak mementingkan rima, iaitu daripada bentuk-bentuk yang tidak terikat, unsur asonansi tetap hadir dalam kedudukan-kedudukan yang lebih bebas tetapi berkesan. Dalam mantera, perulangan asonansi, seperti ulangan-ulangan yang lain, dapat menimbulkan kuasa magis dan memperkuatkan maksudnya. Dalam pantun, unsur itu merupakan alat keindahan yang natural yang mungkin lahir dengan tidak disengajakan; di sini asonansi merupakan perkembangan daripada permainan kata dan bunyi-bunyi yang memberikan saranan, seperti dalam teka-teki, ungkapan-ungkapan bersajak, peribahasa berirama dan akhirnya berkembang menjadi pantun-pantun yang indah. Perhatikan

PUISI MELAYU TRADISIONAL

beberapa contohnya di bawah:

Dalam pantun:

Permata jatuh di rumput  
Jatuh di rumput gilang  
Kasih umpama embun di rumput  
Datang matahari hilang.

Banyak pacat terjengkau-jengkau  
Keluar di rumput tanah mereka  
Buah muda tampak kerau  
Bukan mudah hendak dicekah.

(Bijleveld 1943, 46)

Dalam syair:

Sempurnalah ia hulubalang berani  
Namanya masyhur ke sana sini  
Melihat Bugis Welanda Nasrani  
Marahnya tidak dapat ditahani.

Sempurnalah ia orang yang baik  
Berkata-kata sangatlah cerdik  
Pada sekalian sahabat benar dan sadik  
Ia pun seorang ada bermilik.

(Skinner 1963, 146)

Dalam mantera:

Besi yang tua tersundak ke langit  
Besi yang muda terunjang ke bumi  
Titah lalu sembah berlaku

(Bijleveld 1943, 44)

Tak turun makan menturung  
Tak datang makan binatang  
Hinggap di ranting terpelanting  
Hinggap di dahan mati terbahan  
Hinggap di daun dipatuk ular daun

(Skeat 1967, 595)

Aliterasi adalah ulangan-ulangan konsonan dalam satu perkataan atau beberapa perkataan dalam satu kalimat; dan bagi aliterasi dalam bentuk sejajar, ialah ulangan-ulangan konsonan yang sama kedudukannya dalam baris-baris yang sejajar. Aliterasi juga dipakai sebagai unsur keindahan di samping memberi *intensity* dan menimbulkan kuasa magis; kerana itu pemakaianya lebih signifikan dalam mantera dan agak sedikit dalam genre-genre yang lain. Misainya:

Sambut tali perambut  
Biar putus jangan rabut  
Kalau rabut mata kau cabut

(Skeat 1967, 626)

Kun fayakun  
Kun kata Allah  
Fayakun kata Jibrail  
Bujur lalu melintang patah  
Kun mati  
Fayakun pun mati

(Awang bin Mat 1978)

Dalam talibun:

Mengangkat kadam kepak yang indah  
Kuncup seperti sulur bakung  
Sayap seperti susun sirih  
Tertanggam paruh yang keemasan  
Tertimpuh kaki yang kiri  
Terdiri kaki yang kanan  
Sembah bergelar "Lela Sembah"  
Tiga tapak mara ke hadapan  
Dua tapak undur ke belakang.

(Mohd. Taib Osman 1957, 141)

Rima merupakan unsur yang amat luas pemakaianya dan penting dalam puisi Melayu tradisional, bukan saja pada genre-genre yang terikat seperti pantun, syair dan nazam, tetapi juga pada yang

bebas, seperti peribahasa berirama, teka-teki, talibun, teromba, mantera dan dikir. Rima tidak sahaja dalam skema atau pola tertentu, seperti rima akhir dalam kedudukan-kedudukan yang lain, seperti dalam peribahasa, talibun, teromba dan mantera. Di sini kehadiran rima sesuai dengan puisi tersebut yang terdapat dalam kesejajaran (*parallelism*) yang berirama; kerana rima hanya dapat hadir dengan adanya rima. Dengan demikian rima seolah-olah mengikat bahagian-bahagian dalam kesejajaran tersebut. Diberikan beberapa contoh di bawah:

Peribahasa berirama:

Pandai mencari merasa mendapat  
Tak pandai mencari merasa terikat.

Harimau mati tinggal belangnya  
Gajah mati tinggal tulangnya  
Manusia mati tinggal nama.

Beralih kain ke balik rumah  
Beralih cakap ke balik lidah.

Ikut suka luka  
Ikut hati mati  
Ikut rasa binasa.

(Za'ba 1962, 168–170)

Dalam rangkap yang akhir di atas, rima bukan sahaja terdapat dalam a dan c (luka: binasa) tetapi dalam setiap baris (seperti ulangan '*homoioteleuton*' dalam bentuk tidak seajar) (Bijleveld 1943, 62–68) iaitu suka luka, hati mati, rasa binasa. Walau bagaimanapun penggunaan rima yang paling umum ialah dalam pantun, syair, nazam dan sebahagian daripada gurindam; kerana di sini rima merupakan skema yang menentukan genre puisi. Dengan skema rima a-b-a-b untuk pantun, a-a-a-a untuk syair, a-a-a-a atau a-a, b-b untuk nazam dan rima yang lain untuk gurindam. Di bawah ini terdapat beberapa bentuk rima: dalaman, akhir, sempurna dan tidak sempurna:

Pantun:

Buah langsat kuning mencelah  
Keduduk tidak berbunga lagi

Sudah dapat gading bertuah  
Tanduk tidak berguna lagi.

(Bijleveld 1943, 225)

Permata jatuh ke rumput  
Jatuh ke rumput berbilang-bilang  
Ditempuh dilanda jangan  
Rumput pahit bersela-sela.  
Dari mata tidaklah luput  
Di hati tak kunjung hilang  
Siang menjadi angan-angan  
Malam menjadi mimpi pula.

(Bijleveld 1943, 227)

Dalam rangkap pertama, terdapat bukan sahaja rima akhir, tetapi rima dalaman, bahkan setiap perkataannya berima a-b-a-b; tetapi seluruhnya pula tergolong sebagai rima yang tidak sempurna; sementara rangkap kedua, daripada jenis pantun lapan baris mempunyai rima akhir yang sempurna.

Daripada pelbagai contoh yang dipetik di atas dapat dilihat sekurang-kurangnya secara sepintas lalu tentang bentuk dan ciri-ciri puisi Melayu tradisional itu. Dan dengan membuat perbandingan yang ringkas dapat dirasakan bagaimana rapatnya hubungan puisi itu dengan struktur bahasanya, iaitu bahasa Melayu. Sebagai salah satu bahasa dalam rumpun bahasa-bahasa Austronesia, bahasa Melayu mempunyai bentuk dan struktur yang sama pada dasarnya dengan bahasa-bahasa yang serumpun dengannya. Persamaan ini tercermin pula pada bentuk dan ciri-ciri puisinya yang lain, seperti yang dapat dilihat dalam beberapa bahasa sukuan termasuk Jawa, Sunda, Bugis, Tagalog dan lain-lain.

Pantun-pantun dalam bahasa Melayu dan Minangkabau mempunyai persamaan dalam bentuk dan ciri-ciri yang lain dengan daerah-daerah lain di Nusantara; perbezaan yang jelas hanya dalam aspek bahasa dan penyebutan, dan mungkin pada nama atau genre puisi yang dimaksudkan. Di bawah ini diberikan beberapa contoh

PUISI MELAYU TRADISIONAL

daripada puisi-puisi Nusantara yang lain, yang agak sama bentuknya:

Jawa, (pantun atau parikan):

Adja enak kaloeng saptangan  
Saptangane sing boeloe-boeloe  
Adja enak gandeng tangan  
Doeroeng terang kjai pengoeloe.

(Bijleveld 1943, 42)

Iwak lele mati ketutuk  
Sudjenana pring siladan  
Ngawe-awe sing kalung anduk  
Entenane ing prapatan.

(Slametmuljana 1966, 115)

Sunda, (suswalan):

Isoek ngaroedjak, sore ngaroedjak  
Ngaroedjak kalapa pocan  
Isoek ngadjak, sore ngadjak  
Ngadjak ge tatjan karockan.

(Bijleveld 1943, 42)

Sunda, (paparikan):

Turup tjupu buli-buli  
Eusina komala inten  
Daek sukur teu paduli  
Kami mah geus boga ru hideung santen.

(Ajip Rosidi 1966, 23)

Ternate, (pantun):

Lahe dibu to haka dibu  
Dibu madaha ake nongai  
Lahe nyingga to haka nyingga  
Nyingga madaha gate gogola.

(Bijleveld 1943, 42)

Batak:

Djana galinggang, djana garage  
Djana tangki, djana uwalang  
Djana panibal, djana pareme  
Djana portahi, djana ulubalang.

(Braasem 1951b, 68)

Aceh:

Ba' meureuya di dalam paya  
Poeto' meurisa ba' mata oeroe  
Meung na ta' eu matakoe doe  
Ada ka taboengka ba' redjang tawoe.

(Ward 1975, 10)

Tagalog:

Ang tubang ma i malalim  
Nahilirip cung libidin  
Itong burhing magaliling  
Maliung paghanapin.

(Lumbera 1967, 343)

Contoh-contoh yang dipetik secara rambang di atas memperlihatkan bahawa bentuk pantun itu terdapat di seluruh Nusantara. Dan daripada struktur dan ciri-ciri lainnya, seluruhnya sama seperti pantun, termasuk pembahagian unit kepada sampiran dan maksud, empat perkataan sebaris, empat baris serangkap dan skema rima a-b-a-b. Pada aspek-aspek teknik dan stail juga terdapat keadaan yang sama, lihat misalnya perulangan-perulangan anafora, responsi, pengulangan kata akhir, asonansi, aliterasi dan rima, yang semuanya dapat dicari daripada contoh-contoh di atas dan daripada sumber-sumber yang berkenaan (Bijleveld 1943).

Dalam genre-genre yang lain juga, masih terdapat bentuk-bentuk yang sama; misalnya sebahagian daripada *sinom* dalam *tembang Jawa* di bawah ini:

Amenangi jaman edan  
Ewuhnya ing pambudi

### PUISI MELAYU TRADISIONAL

Melu edan ora tahan  
Jen tan melu anglakoni  
Nora keduman melik  
Keliren wekasipun  
Ja talah nora sing lali  
Luwih beja kang eling lawan waspada

(Ward 1975, 24)

Dari segi bentuknya dan mungkin juga fungsinya bait puisi di atas bersamaan dengan talibun (sesomba) atau prosa berirama (*lyric prose*). Dan nyawer Sunda di bawah ini tidak pula jauh bezanya dari-pada teromba:

(Sebahagian daripada puisi yang mengiringi istiadat perkahwinan):

Jatuh krami mamrih mulus  
Runtut rukun papandansih  
Lulus mulus sanydmam  
Ka cai jadi saleuwi  
Ka dara jadi salebak  
Sisih asih silih asuh  
Silih titipkeunnya diri  
Poma lali ka wiwitam  
Salisih diri peribadi  
Nu jadi marga lantaran  
Urang gumelar dilahir

(Ward 1975, 30)

Kesimpulan yang dapat diambil setakat ini ialah: bahawa puisi Melayu tradisional itu ialah sebahagian daripada puisi tradisional Nusantara. Ia mempunyai persamaan yang banyak dari segi bentuk, isi dan fungsi dengan puisi-puisi Nusantara yang lain; dan kerana itu terbukti bahawa tradisi penciptaanya lahir dan berkembang dalam daerah Nusantara. Justeru itu, pendapat-pendapat yang secara umum mengatakan puisi itu sebagai tradisi, ambilan dan adaptasi daripada puisi asing, haruslah dikaji dan diperdebatkan semula.

## BAB II

### GENRE PUISI MELAYU TRADISIONAL

#### Pembahagian Genre yang Ada Sekarang

SEBAGAIMANA yang disebutkan dalam Pendahuluan bahawa soal genre puisi Melayu lama adalah suatu yang rumit dan kontroversial dan sehingga ini masih belum diselesaikan. Oleh itu untuk memudahkan perbincangan, dikemukakan di bawah pendapat-pendapat yang bertentangan mengenai hal ini dan pembahagian genre serta contoh-contohnya, menurut keadaan yang terdapat setakat ini. Tinjauan ini dibuat dalam tiga aspek:

1. Tentang jumlah genre puisi ini dan istilah-istilah yang berhubungan dengannya.
2. Tentang kekeliruan dalam menggunakan istilah.
3. Tentang menentukan ciri-ciri yang khusus bagi sesuatu genre dan yang membezakannya dengan yang lain.

A. Teeuw (1966b) dalam makalahnya yang disebut terdahulu menyatakan puisi Melayu tidak mempunyai banyak genre:

*Malay poetry does not possess a great variety of genres. It is true that through the years Malay poets have experimented incidentally with different foreign verse forms: masnawi, ruba'i and others as encountered in the Tajus Salatin, for example, and the gurindam was used in the nineteenth century, particularly by Raja Ali Haji, but none of these genres has ever become popular (hlm 431).*

Seterusnya, dalam perenggan yang sama, A. Teeuw menyebutkan selain daripada pantun dan syair, hanya ada sejenis lagi yang

mungkin boleh ditambahkan iaitu apa yang diistilahkan oleh Winstedt, sebagai bahasa berirama (*rhythmical verse*). Jadi kesimpulannya A. Teeuw beranggapan hanya ada tiga jenis puisi Melayu yang popular iaitu pantun, syair dan bahasa berirama, sementara yang lain ialah daripada puisi asing iaitu masnawi, ruba'i, kit'ah dan ghazal yang tidak pula popular.

Pandangan A. Teeuw ini dari suatu segi mungkin ada benarnya; tetapi dari segi yang lain, bertentangan daripada keadaan sebenar yang dapat kita lihat sekarang. Daripada pembicaraan-pembicaraan mengenai hal ini, kita menemui berbagai-bagai istilah yang merujuk kepada puisi Melayu lama. Istilah-istilah ini mungkin dapat digolongkan sebagai genre-genre atau mungkin hanya sebagai istilah-istilah klasifikasi yang bertindih-tindih, akibat daripada pemakaian yang tidak seragam. Untuk menentukan hal ini, di bawah disenaraikan secara menyeluruh kesemua istilah itu yang setakat ini diandalkan sebagai genre, dengan contoh-contohnya mengikuti kemudian:

1. Pantun
2. Syair
3. Gurindam
4. Seloka
5. Pantun seloka
6. Talibun
7. Perbilangan
8. Kata adat
9. Perbilangan adat
10. Teromba
11. Tambo
12. Terasul
13. Bahasa berirama
14. Sesomba
15. Peribahasa berirama
16. Peribahasa berangkap
17. Prosa berirama (prosa lirik)
18. Rejang
19. Dikir (zikir)
20. Jampi dan mantera
21. Teka-teki

## GENRE PUISI MELAYU TRADISIONAL

22. Endoi
23. Bayt
24. Nazam
25. Ruba'i
26. Kit'ah
27. Masnawi
28. Ghazal
29. Berzanji
30. Marhaban
31. Qasidah
32. Hadrah
33. Dabus
34. Puisi-puisi sukuan.

Istilah-istilah di atas dipetik daripada berbagai-bagai sumber:

1. Buku-buku yang khusus membicarakan puisi dan kesusastraan Melayu secara umum.
2. Makalah-makalah daripada akhbar, jurnal dan majalah yang menyentuh tentang puisi, secara langsung atau tidak langsung.
3. Daripada sumber-sumber lain, termasuk informan dan penutur-penutur puisi itu sendiri.

Za'ba (1939) adalah penulis dan pengkaji yang paling banyak memberikan istilah-istilah yang merujuk kepada puisi dalam senarai di atas. Beliau juga membicarakannya dengan terperinci dan memberikan contoh-contoh yang konkrit bagi setiap genre yang disebutkannya. Daripada senarai di atas beliau menyentuh genre-genre 1, 2, 3, 4, 7, 18, 20 dan 21. Pengkaji-pengkaji yang kemudian, yang kebanyakannya mengambil asas daripada beliau, telah mengulangi dan kemudian menambah dengan genre-genre yang lain. Sutan Takdir Alisjahbana (1971) menambah dengan genre 6, 8, 11, 17, 22, 23, 24 dan 25. Zuber Usman (1975), selain daripada beberapa genre yang telah disebutkan menambah dengan 9, 10 dan 12. Simorangkir Simanjuntak (1965) dengan 5, 13 dan 14, Mohd. Taib Osman (1975) dengan 16, 19 dan 26. Pengkaji-pengkaji yang kemudian ini mungkin membicarakan sesuatu genre itu berdasarkan pembahagian dan definisi yang dikemukakan oleh Za'ba atau hanya dengan memberikan contoh-contoh di bawah sesuatu istilah yang

baharu. Sesuatu istilah itu pula tidak semestinya dianggap sebagai suatu genre yang tertentu dan dibicarakan sebagai topik yang berasingan tetapi mungkin disebut sebagai persamaan atau kelainan daripada yang telah diketahui sebelumnya. Namun, anggapan dan keraguan seperti itu seolah-olahnya memungkinkan satu penggolongan yang baharu yang menambah kepada senarai yang telah ada.

Bagi genre-genre yang tidak disebutkan dalam sumber-sumber di atas, iaitu 15, 27, 28, 29, 30, 31, 32 dan 33 adalah dipetik daripada sumber-sumber kedua dan ketiga yang seterusnya tidak dapat dipetik dan dirujuk secara khusus. Rejang, misalnya, dipetik daripada kamus oleh R.J. Wilkinson (1901) yang antara lain menyebut "Syair Rejang" dan Hans Overbeck yang membicarakan rejang dalam pantun Melayu (Overbeck 1914, 219–220). Daripada tulisan-tulisan mengenai zikir, berzanji, hadrah dan dabus, kita melihat puisi yang digunakan di dalamnya sedang berkembang ke suatu hala, iaitu ke arah puisi Melayu. Zikir yang pada umumnya dalam bahasa Arab, dipetik daripada kitab-kitab zikir seperti *Majmu'at Maulud Syarif al-Anam* (1922); tetapi di beberapa tempat telah diberi makna atau terjemahan dalam bahasa Melayu atau dimasukkan ungkapan-ungkapan dalam bahasa Melayu, misalnya dalam zikir rebana dan zikir Pahang. Keadaan yang sama boleh didapati dalam hadrah dan dabus. Bahkan dalam hadrah lebih nyata puisi Melayu itu telah menggantikan puisi Arab. Berzanji yang dahulunya dalam bahasa Arab, sekarang telah diberi makna Melayu; dan dalam perayaan-perayaan tertentu dilakukan dalam campuran bahasa Arab dan Melayu, atau seluruhnya bahasa Melayu. Dalam bentuknya yang asal, seperti dalam *Majmu'at Maulud Syarif al-Anam* dan *Kitab Berzanji* (Hj. Jamaludin Hashim 1976), terdapat dalam dua bentuk: prosa (berzanji nathar) dan puisi (berzanji nazam). Tetapi dalam terjemahan Melayunya, dapat dilihat ciri-ciri puisi yang jelas dalam kedua-dua bentuk itu hingga seluruhnya dapat digolongkan sebagai puisi.

Marhaban dan qasidah masih belum dibicarakan sebagai genre puisi Melayu, dan dalam pemakaianya juga masih dalam bahasa Arab. Tetapi apabila dibandingkan dengan bayt, iaitu daripada jenis yang digolongkan sebagai syair Arab yang tidak diterjemahkan ke bahasa Malaysia (Za'ba 1962, 237–238), dapat pula diterima kedu-

dua puisi itu (marhaban dan qasidah) ke dalam senarai genre puisi Melayu. Masanya mungkin tiba genre-genre seperti ini diterjemah atau mempunyai adaptasinya dalam bahasa Melayu.

Puisi-puisi sukuhan tidak pernah dibicarakan sebagai puisi Melayu lama tetapi daripada contoh-contoh yang dipetik dan dikemukakan oleh beberapa pengkaji (antara lain Braasem, Harmsen, Van Hoevell dan Zuber Usman) dan pemerhatian penulis terhadap puisi-puisi daripada kaum bumiputera Sabah dan Sarawak (Rubinstein 1975), puisi-puisi itu tidak jauh bezanya daripada puisi Melayu dan masyarakatnya juga dianggap sebagai suku Melayu. Selain itu, daripada kerja-kerja lapangan yang telah kami jalankan, terdapat pula puisi yang tidak dapat ditentukan jenisnya. Mungkin kerana bahasanya bercampur-baur antara bahasa Melayu dengan bahasa suku kaum Nusantara yang lain, atau bentuknya berbaur antara yang lama dengan yang moden. Puisi-puisi sukuhan dan puisi-puisi yang masih belum tentu jenisnya ini akan tiba pula masanya untuk berasimilasi dengan puisi Melayu hingga dapat pula menjadi tambahan kepada bentuk, genre, isi dan variasi puisi Melayu lama.

Jika senarai dan pandangan-pandangan di atas itu benar, ternyata pendapat A. Teeuw mula-mula tadi yang mengatakan puisi Melayu itu tidak mempunyai banyak variasi dan genre, adalah tidak benar. Sebaliknya, daripada apa yang telah ditunjukkan, puisi Melayu lama itu mempunyai variasi dan genre yang amat banyak; satu-satunya, atau salah satu daripada puisi-puisi dunia yang bersifat demikian. Kepelbagaiannya bentuk dan jenis seperti ini tidak terdapat dalam puisi-puisi klasik yang lain, seperti Sanskrit, Latin, Arab atau Jawa. Dalam puisi Sanskrit kita mengenal seloka; dan kepelbagaiannya istilah dan nama-nama merupakan variasi dalam penggunaan pola irama guru dan lagu dalam sistem meter seloka (Bhama 1970). Demikian juga dalam puisi Latin: istilah-istilah teknik menunjukkan bentuk pola-pola menurut jumlah dan kombinasi tesis dan arsis dan jumlah baris dalam sesuatu rangkap (Kennedy dan Davis 1964, 1–23). Dalam puisi Jawa Kuno yang dibentuk mengikut sistem wirama Sanskrit, kita mengenal tembang, kidung dan kakawin. Kepelbagaiannya istilah dalam tembang dan kakawin adalah daripada kelainan jumlah baris suku kata dan kombinasi rima antara baris-baris dalam sesuatu rangkap (Soesatyo Darnawi 1964, Isma N. Karim 1976; Noriah Mohamed 1978, 71–92; Zoetmulder 1957,

50 – 69). Tegasnya istilah-istilah yang banyak dalam puisi itu adalah istilah-istilah teknik; tidaklah menggambarkan banyaknya genre dan variasi, seperti dalam puisi Melayu.

Walau bagaimanapun kemungkinan yang dikemukakan di atas masih merupakan andaian sahaja. Kita tidak boleh menarik sesuatu kesimpulan tanpa memeriksa dan menimbangkan keadaan-keadaan yang lain yang boleh pula memberikan kemungkinan-kemungkinan yang lain. Ada pendapat, misalnya, mengatakan kepelbagaian yang diperlihatkan sekali imbas seperti itu adalah hasil daripada pemakaian istilah-istilah yang sewenang-wenang oleh para pengkaji. Buku-buku dan pembicaraan-pembicaraan mereka memperlihatkan kegemaran menggunakan istilah-istilah yang kacau, bukan dengan maksud untuk lebih mengelirukan, tetapi kerana bidang itu sendiri masih kusut dan belum diselesaikan.

Untuk menimbangkan kedua-dua kemungkinan itu dan seterusnya membuat kesimpulan tentang jumlah genre puisi Melayu lama itu, di bawah ini dibincangkan pendapat-pendapat para pengkaji dan para penulis yang berkenaan mengenai genre puisi itu dalam keadaannya yang ada sekarang, bersama contoh-contoh untuk sesuatu genre yang berkenaan.

Anggapan yang mula-mula ditimbulkan dengan melihat senarai dan contoh-contoh yang diberikan, ialah seolah-olah puisi Melayu lama itu mempunyai tidak kurang daripada 34 istilah yang merujuk kepada genre, jenis atau bentuk. Jumlah itu tidak termasuk istilah-istilah lain yang digunakan bersamanya, yang juga diterima oleh umum. Pada mantera, misalnya, kadang-kadang dipersoalkan apakah ada perbezaannya dengan jampi, serapah, tawar, tangkal, cuca, puja dan seru; yang pada beberapa tempat mungkin menunjukkan sedikit perbezaan. Dan apakah doa dan ratib tergolong sebagai puisi, sama ada dalam genre tersendiri atau tergolong ke dalam zikir dan mantera. Dalam hal puisi sukuhan, sesuatu contoh yang berkenaan dianggap sebagai suatu genre; sedangkan pada kemungkinan yang lain dapat diperincikan menurut jenisnya dan daripada suku mana yang dimaksudkan. Secara umum, daripada suku-suku Jawa, Sunda, Batak dan suku-suku kaum yang lain di Sumatera, kita kenali kakawin, kidung, tembang, parikan, geguritan, suswalan, wangsalan, sisindiran, nyawer, berjeung, upama, andai-andai dan lain-lain. Selain itu kita temui juga fragmen-fragmen puisi yang ber-

campur dengan bahasa-bahasa sukuan Nusantara di Malaysia, termasuk Minangkabau, Banjarmasin, Jawa, Bugis, Batak, Mandailing, Rawa dan lain-lain. Setakat ini ukuran yang digunakan dalam menggolongkan sesebuah puisi itu sebagai puisi Melayu ialah bahasa dan tempat, iaitu bahasa Malaysia (Melayu) di Malaysia. Jika pengertian Melayu itu diluaskan untuk meliputi daerah-daerah bahasa Melayu-Polinesia atau Nusantara, tentu sahaja senarai di atas akan mengandungi lebih daripada 50 istilah yang dapat dianggap sebagai mewakili genre puisi Melayu lama Nusantara.

Pandangan yang demikian tentu sahaja akan menambahkan lagi kekeliruan yang telah sedia ada dan tidak akan membantu ke arah penyelesaian yang dimaksudkan. Oleh itu, dalam perbincangan di bawah akan dikemukakan aspek-aspek yang dianggap mengelirukan itu dan seterusnya diberikan pertimbangan apakah sesuatu istilah itu dapat dianggap sebagai sebuah genre atau tidak. Istilah-istilah yang dianggap tidak mewakili genre, akan digugurkan dan contoh yang diberikan untuknya dimasukkan ke dalam genre lain yang dirasakan lebih tepat. Hasilnya, pada akhir perbincangan akan dapatlah digambarkan genre puisi Melayu lama itu menurut tanggapan kajian ini.

### **Pantun dan Syair**

Daripada 34 istilah yang disebutkan, genre-genre pantun dan syair dapat dianggap sebagai yang paling muktamad. Tidak ada percanggahan pendapat dalam penggolongannya, berdasarkan bentuk, pembahagian unit dan isi. Kelainan-kelainan pendapat hanya di temui dalam klasifikasi pantun dan syair ke dalam jenis-jenisnya berdasarkan sistem rima dan tema; dan ini akan dijelaskan dalam bab-bab yang berkenaan. Tetapi dalam genre-genre yang lain, terdapat berbagai-bagai kekeliruan yang sangat penting diselesaikan. Di bawah ini disebutkan dengan ringkas. Perhatikan beberapa rangkap pantun dan syair di bawah:

Pantun:

- 2.1 Pinggan sabun berisi minyak  
Minyak bernama seragam bau  
Minta ampun banyak-banyak  
Minta maaf kata terlalu.

(*Pantun Melayu* 1958, 41)

- 2.2 Dalam kebun manoh  
Bunga yang maha putih  
Minta ampun ma'oh (maaf)  
Yang mana salah silih.

(Rakaman Permainan Beduan, Perlis 1978)

Syair:

- 2.3 Rampanai berakar pohon teja  
Akar daunnya bukannya ganja  
Narwastu harum tempat bermanja  
Gemala memimpin kebaikan kerja.

(Hassan Ahmad 1964, 21)

- 2.4 Ayuhlah nasib namakan untung  
Tanamlah pisang tiada berjantung  
Saya umpama seekor lotong  
Di mana ranting di situ bergantung.

(Rakaman Permainan Hadrah, Kedah 1976)

### Gurindam dan Seloka

Pembicaraan yang selalu menimbulkan kontroversi ialah mengenai gurindam dan seloka. Kekeliruan yang jelas ditimbulkan dalam pembicaraan-pembicaraan itu ialah pada memberikan definisi dan contoh-contoh yang tepat bagi kedua-dua genre tersebut. Za'ba, misalnya, mengatakan gurindam "adalah suatu jenis syair mlarat yang tiada tetap suku katanya atau rangkapnya; isinya mengandungi fikiran-fikiran yang bernas dengan bahasa yang riang dan suka sebagai nyanyian" (Za'ba 1962, 242). Daripada beberapa contoh yang diberikannya, Za'ba menggolongkan puisi di bawah ini sebagai gurindam:

- 2.5 Berbunyi kuang jauh ke tengah,  
Sering lanting riang di rimba,  
Melenguh lembu di padang.  
Sambut menguak kerbau di kandang  
Berkokok mendung merak mengigal  
Fajar sadik menyingsing naik  
Kicak kicau bunyi murai  
Tabtibau melambung tinggi

## GENRE PUISI MELAYU TRADISIONAL

Menguku balam di hujung bendul  
Terdengut puyuh panjang bunyi  
Puntung sejengkal tinggi sejari  
Itulah alamat hari nak siang

(Za'ba 1962, 244–245)

Penggolongan seperti itu dipersetujui oleh pengkaji dan penulis-penulis yang kemudian, termasuk Mohd. Taib Osman (1975); sebaliknya Winstedt dan Sutan Takdir Alisjahbana tidak menganggapnya gurindam, tetapi menggolongkannya sebagai ‘bahasa berirama’, (Alisjahbana 1971, 92). Menurut Alisjahbana, gurindam ialah “nasihat, pengajaran dan kebenaran. Kalau ditilik gurindam itu dekat benar kepada pepatah dan peribahasa” (Alisjahbana 1971, 77). Dan contoh-contoh yang dikemukakan oleh Alisjahbana adalah daripada gurindam yang mengandungi nasihat dan pengajaran. Selain daripada “Gurindam Dua Belas”, oleh Raja Ali Haji, Alisjahbana memberikan contoh di bawah ini:

- 2.6 Kurang fikir, kurang siasat  
Tentu dirimu kelak tersesat.

Fikir dahulu sebelum berkata  
Supaya terelak silang sengketa.

Perkataan tajam jika dilepas  
Ibarat beringin racun dan upas.

Kalau mulut tajam dan kasar  
Boleh ditimpa bahaya besar.

Siapa menggemari silang sengketa  
kelaknya pasti berduakacita.

Silang selisih jangan dicari  
Jika bersua janganlah lari.

Membuat perkara amatlah mudah  
Jika terjadi timbulah gundah.

(Alisjahbana 1971, 86)

Kesulitan yang sama ditemukan juga dalam memberikan definisi dan ciri-ciri seloka; kerana huraihan dan contoh yang diberi-

kan oleh Za'ba bagi seloka tidak jauh bezanya dengan yang dibrikannya untuk gurindam. Menurutnya, seloka adalah "sebuah syair mlarat yang mengandungi sindiran dan jenaka untuk maksud bermain-main" (Za'ba 1962, 242; Mohd. Taib Osman 1975, 130); sedangkan dalam definisi gurindam disebutkan juga ciri yang sama, iaitu sebagai "nyanyian, jenaka, senda gurau, kelakar dan sindiran giat yang bermain-main dan menggeli-gelikan hati". Kerana itu Za'ba (1962) sendiri menjelaskan kesulitan itu, demikian:

Oleh yang demikian kerapkali susah hendak dibezakan yang mana seloka dan yang mana gurindam. Bahkan terkadang suatu karangan itu juga boleh dikatakan gurindam dan boleh seloka. Jika gurindam itu mengandungi perasaan syair yang sebenar pada isinya, seloka itu tentulah begitu juga, kerana fikiran di dalamnya cantik disebutkan dengan bahasa yang cantik.

Antara beberapa contoh yang diberikannya, Za'ba menggolongkan petikan di bawah ini sebagai "seloka mlarat":

- 2.7 Apabila pecahlah keping-keping sebuah gunung emas maka pada masa itu berketauanlah siapa yang berhati baik dan mana yang berhati jahat. Kemudian apabila dihancurkan sekali batu-batu emas itu dimasukkan ke dalam lesung yang ada di dalamnya berpuluhan-puluhan antan, sekonyong-konyong kelihatanlah langit yang hijau itu terbentang dengan anjerah warnanya sunyi daripada awan. Maka sejurus lamanya baharulah kelihatan beberapa tompok awan-awan yang putih pada sepanjang panjang langit itu ialah alamat panas keras konon. Maka pada ketika itu juga bakat hujan yang daripada awan-awan yang putih itu. Hairan pada masa itu langit pun tergulung-lah dengan kudrat yang berkehendak, lenyap tiada kelihatan lagi, melainkan tatkala turun hujan emas baharulah disedari bahawa akan langit itu pun senasib juga rupanya dengan gunung emas itu.

(Za'ba 1962, 249 – 250)

Ternyata contoh di atas tidak dapat dianggap sebagai seloka, bahkan tidak juga puisi. Za'ba sendiri mengatakannya "seperti

nathar (prosa) sekadar isinya sahaja seloka". Memang, menurut ukuran universal contoh (7) itu bukanlah puisi.

Definisi dan ciri-ciri seloka tambah mengelirukan dengan adanya huraian-huraian yang berlainan pula. Simorangkir Simandjuntak, misalnya, mengatakan, "seloka adalah satu ikatan yang terdapat dalam buku-buku Weda"; dan beliau memberikan contoh di bawah ini:

- 2.8 Ayam hitam terbang malam  
Hinggap ke rimba dalam  
Bertali ijuk bertambang tanduk  
Ayam putih terbang siang  
Hinggap di kayu mlarasi  
Bertali benang bertambang tulang

(Simorangkir Simandjuntak 1965, 39)

dan

- 2.9 Ada seekor burung pelatuk  
Cari makan di kayu buruk  
Tuan umpama ayam pungguk  
Segan mencakar rajin mematuk

(Simorangkir Simandjuntak 1965, 40)

Jadi menurut Simorangkir, seloka adalah sebahagian daripada peribahasa; iaitu peribahasa, bidal atau pepatah yang tersusun dalam bentuk pantun, seperti contoh (8) di atas itu. Atau seperti contoh (9) iaitu apabila puisi itu mengandungi sifat-sifat syair dan pantun dengan skema rima a-a-a-a seperti syair dan pembahagian kepada pembayang dan maksud, seperti pantun. Di sini Simorangkir mempunyai persamaan pendapat dengan C. Hooykaas dan G. Emeis. Menurut Hooykaas, seloka itu ialah, suatu sajak daripada empat baris yang masing-masingnya terdiri seboleh-bolehnya daripada empat perkataan daripada 8-11 suku kata, dan bersajak sebagai kalimat-kalimat syair, tetapi dalam jumlah empat baris ataupun sebagai kebanyakan pantun. Contohnya:

- 2.10 Candu dibungkus kain palas  
Makan dia mata bilas

Mandi segan kerja malas  
Harta orang hendak digilas.

dan

- 2.11 Sudah bertemu kasih sayang  
Duduk terkurung malam siang  
Hingga setapak tidak renggang  
Tulang sendi habis bergoncang.

(Hooykaas 1965, 84–85)

Walau bagaimanapun, di sebalik perbezaan-perbezaan itu terdapat juga contoh-contoh yang sama diberikan oleh para pengkaji; dan contoh itu sesuai dengan definisi dan konsep yang dasar bagi seloka, iaitu puisi yang tidak tetap bentuknya dan isinya mengandungi perasaan-perasaan jenaka, sindiran, ejek dan giat, atau asyik, berahi, khayal dan mimpi, seperti yang diuraikan oleh Za'ba (1962); misalnya seperti contoh di bawah ini:

- 2.12 Baik budi emak Si Randang  
Dagang lalu ditanakkan  
Tiada berkayu rumah diruntuh  
Anak pulang kelaparan  
Anak di pangku diletakkan  
Kera di hutan disusui

(hlm 248)

Penulis berpendapat bentuk puisi seperti contoh (12) di atas adalah yang lebih tepat digolongkan sebagai seloka. Selain daripada bahasanya agak longgar, isinya ialah sindiran, giat, ejekan dan jenaka. Hal ini berbeza dengan gurindam yang bahasanya bernas dan serius, dan isinya mengandungi pengajaran, nasihat dan panduan hidup seperti bentuknya yang asal iaitu "Gurindam Dua Belas" oleh Raja Ali Haji dan contoh (6) yang diberikan oleh Sutan Takdir Alisjahbana. Atas alasan ini juga contoh (5) yang dikatakan gurindam oleh Za'ba dan Mohd. Taib Osman tidak dapat digolongkan gurindam kerana isinya tidak berupa nasihat dan pengajaran. Dalam kajian ini contoh (5) digolongkan sebagai talibun (dulunya, bahasa berirama). Demikian pula contoh (8) sebagai peribahasa

berirama, (9) dan (10) sebagai variasi kepada pantun, manakala (11) adalah syair.

### Pantun Seloka

Istilah di atas dikemukakan oleh Simorangkir Simandjuntak dan diikuti begitu sahaja oleh beberapa pengkaji dan penulis buku-buku teks. Menurut Simorangkir, pantun seloka ialah bidalan atau pepatah yang diberikan sampiran seperti pantun:

- 2.13 Setali pembeli kemenyan  
 Sekupang pembeli ketaya  
 Sekali lancung keujian  
 Seumur hidup tak percaya.

Anak agam jual sutera  
 Jual di Rengat tengah pekan  
 Jangan digenggam bagai bara  
 Terasa hangat dilepaskan.

(Simorangkir Simandjuntak 1965, 39)

Ibrahim Saad memberikan contoh di bawah yang menurut Simorangkir dan Hooykaas tergolong sebagai seloka:

- 2.14 Ada satu burung merak  
 Lehernya panjang suaranya serak  
 Tuan umpama emas dan perak  
 Hati yang mana boleh menolak.

(Ibrahim Saad 1977, 29)

Jadi, menurut Simorangkir, pantun seloka adalah peribahasa yang diberikan sampiran seperti pantun; dan menurut Ibrahim Saad, puisi yang mengandungi sifat-sifat syair dan pantun. Jika demikian kebanyakan pantun akan dapat digolongkan menjadi pantun seloka, termasuk yang tergolong sebagai peribahasa berirama, dan pantun yang memakai rima a-a-a-a seperti syair. Pada pendapat penulis, istilah pantun seloka itu tidak dianggap sebuah genre tersendiri kerana contoh-contoh yang dimaksudkan telah tergolong ke dalam pantun dan syair. Kerana itu istilah itu agak mengelirukan dan lebih baik digugurkan sahaja. Contoh-contoh (13) dapat digolongkan ke

dalam pantun yang biasa, dengan rima a-b-a-b manakala (14) sebagai suatu variasi pantun iaitu yang menggunakan rima a-a-a-a seperti syair.

### Talibun

Zuber Usman menganggap talibun sebagai pantun-pantun yang lebih daripada empat baris serangkap, iaitu pantun-pantun 6, 8, 10, 12, 16 baris dan seterusnya, misalnya dalam contoh di bawah ini:

- 2.15 Baju jas destar kesumba  
Seluar gunting Petani  
Jahitan nyonya Kampung Erak  
Di hilir pasar Kampung Melaka  
Singgah ke rumah nakhodanya  
Batang emas dahan suastra  
Buahnya intan dengan pudi  
Bunga diisap burung borak  
Pipit hendak hinggap di rantingnya  
Adakah boleh oleh yang empunya?

(Zuber Usman 1975, 60)

Gazali Dunia memberikan contoh daripada *Bacindai Aluih* yang menurutnya dikenali sebagai "pantun ibarat":

- 2.16 Berkain berkendang-kendang,  
Berukur berpucuk rebung  
Berintik beragi sutera  
Kiriman raja dari jauh  
Dipakai nak rang Sianok  
Bersuji dengan benang ameh  
Tenunan puteri rang Batipuh  
Jahit nan cara Mandahiling  
Upik, kalau sampai kaugendang  
Pegang petua bonda kandung  
Usah nak terdorong saja  
Mula laut akan ditempuh  
Ingati karang kalau meronggok  
Sebab begitu kata mandeh  
Rosak jalan kalau ditempuh  
Patut lurus makanan banding

(Gazali Dunia 1969, 183)

Selain itu Zuber Usman memberikan contoh talibun yang dinamakan "talibun adat":

- 2.17 Dari mana titik pelita  
 Di balik telong nan bertali  
 Dari mana asal nenek kita  
 Dari puncak gunung berapi  
 Turun ke Pariangan Padang Panjang  
 Di kaki gunung berapi kini  
 Mulanya nenek kembang biak  
 Kembang beratus tahun  
 Bagai si pasan anak beranak  
 Anaknya beranak pula  
 Membuat kota dan negeri  
 Di tepi laut masa dahulunya  
 Di sinan sirangkak nan berdengking  
 Di sinan buaya putih kuduk  
 Di sanalah bukit Siguntang-guntang

(Zuber Usman 1975, 159)

Dengan contoh di atas, ternyata talibun tidaklah semestinya pantun yang lebih daripada empat baris serangkap; kerana puisi di atas bukanlah daripada jenis pantun; kerana itu terpaksa dicari kemungkinan yang lain. R.J. Wilkinson, dalam memberikan erti talibun, menyebutkan perkataan "pantun setalibun" yang bermakna:

1. Satu untai atau urutan pantun-pantun (*a string of pantuns*).
2. Satu jenis karangan berangkap (*ode*) yang mempunyai rima yang sama seluruhnya.

Ternyata keterangan R.J. Wilkinson ini pun tidak menyelesaikan kekeliruan itu. *A string of pantuns* tidak bermakna satu rangkap pantun yang lebih daripada empat baris, sebaliknya mungkin pantun-pantun empat baris yang berurutan beberapa rangkap. Demikian pula puisi yang serima (*monorhyme*) – yang amat jarang terdapat dalam puisi Melayu – tidak akan tergolong sebagai pantun. Dengan kekeliruan-kekeliruan ini ada baiknya istilah talibun tidak digunakan untuk contoh-contoh yang diberikan di atas, yang dengan mudah dapat dimasukkan ke dalam genre-genre yang telah tetap. Misalnya contoh (15) sebagai pantun sepuluh baris dan (16), pantun

16 baris. Contoh (17) yang dengan jelas mengandungi konotasi adat dapat digolongkan sebagai teromba.

Gazali Dunia (1969) dalam menyebutkan kekeliruan yang sama mencadangkan, "lebih baik istilah talibun ini ditiadakan saja, cukup dinamai pantun" (hlm 183). Penulis bersetuju dengan pendapat ini tetapi mencadangkan supaya istilah itu digunakan untuk genre yang lain. Dalam kajian ini istilah talibun digunakan untuk menggantikan istilah bahasa berirama (*rhythrical verse*), berdasarkan ciri-cirinya yang lebih tepat dan berpandukan contoh lain yang juga dinamakan talibun, seperti di bawah ini:

- 2.18 Jip, jip, badrun ya ... maulai  
 Dengarkan saya bertalibun  
 Bukan umpat bukan sindiran  
 Bukan dipetik dari fikiran  
 Dengarkan benar jelas-jelas  
 Saya papar saya uraikan  
 Bagai menyusun buah ratap  
 Atap nan tidak teratapkan  
 Atap nan dari kebun salak  
 Mata nan tidak terlelapkan  
 Mendengar kokok ayam jalak  
 Si jalak burung dijalai  
 Anak murai pandai berkata  
 Usah berkata dua kali  
 Sekali pasang gemuruh  
 Dua kali pasang tenggiri  
 Sudah putus tali tundanya  
 Sebab kami datang ke mari  
 Ada gerak asal mulanya

(Zuber Usman 1975, 167–168)

#### **Perbilangan, Perbilangan Adat, Kata Adat, Teromba, Terasul dan Tambo**

Untuk istilah-istilah yang disebut di atas, diberikan beberapa contoh di bawah ini:

Perbilangan:

- 2.19 Hidup dikandung adat  
 Mati dikandung tanah.

## GENRE PUISI MELAYU TRADISIONAL

Hutang darah dibayar darah  
Hutang nyawa nyawa padahnya.

Mati tidak kerana sumpah  
Hidup tidak kerana kaul.

Kecil jangan disangka anak  
Besar jangan disangka bapa.

Merajuk pada yang kasih  
Manja kepada yang sayang.

Meminta kepada yang ada  
Berkaul kepada yang keramat.

(Za'ba 1962, 171–173)

### Perbilangan Adat:

- 2.20 Cincin sebentuk menanya ibu bapanya  
Cincin dua bentuk esa sekata  
Esa sekata, kata dibalikkan  
Tek esa sekata, cincin dibalikkan  
Esa sekata janji diikat  
Janji dibuat, dimuliakan  
Dalam janji digaduhkan  
Sampai janji ditepati  
Elah si lelaki luncur tanda  
Elah si perempuan ganda tanda  
Sawan gila luar janji

(Abdullah Siddik 1975, 136)

### Tambo:

- 2.21 Maka adalah adat:  
Tatkala negeri sudah lebar,  
Orang pun sudah ramai,

Adat tertentu, bilang teratur,  
Beroleh kecil pada yang gedang,  
Beroleh yang gedang pada yang tua,  
Apakah kata orang tua?  
Dalam alam rajanya.  
Dalam luak penghulunya.  
Dalam suku lembaganya,  
Berimpuk masing-masing,  
Harta orang jangan ditarik,  
Untuk anak jangan diberikan

(Simandjuntak 1965, 24)

Teromba:

- 2.22 Allah belum bernama Allah,  
Muhammad belum bernama Muhammad,  
Bumi belum bernama bumi,  
Bumi bernama pusat negeri,  
Langit bernama payung negeri,  
Bumi itu segedang talam,  
Langit itu segedang payung,  
Gagak putih bangau hitam,  
Datuk bujang nenek gadis,  
Sejaman raja jatuh berdiri,  
Sejaman penghulu jatuh terpekur,  
Sejaman lembaga jatuh bersila,  
Terbit adat dua teripar,  
Ke laut Temenggung, ke darat Perpatih.

(Sutan Takdir Alisjahbana 1971, 110)

Za'ba tidak memasukkan perbilangan dalam pembicaraan puisi; tetapi menggolongkannya sebagai satu jenis peribahasa, iaitu "peribahasa yang bererti selapis". Peribahasa jenis ini dibahagikan kepada dua jenis; satu daripadanya bidalan dan pepatah, dan yang lain perbilangan (Za'ba 1962, 166–177). Tetapi daripada contoh-contoh yang diberikannya untuk perbilangan, misalnya, contoh (19)

## GENRE PUISI MELAYU TRADISIONAL

di atas tidak jauh berbeza daripada yang digolongkan sebagai kata adat, atau perbilangan adat. Kerana itu perbilangan boleh juga digolongkan sebagai satu jenis puisi sepertimana peribahasa berirama dan perbilangan adat atau teromba.

Dalam hal ini pun terdapat kekeliruan pada menggunakan satu istilah yang baku dan tepat bagi genre ini. Daripada contoh-contoh yang dikemukakan bagi tiap-tiap satu istilah itu dapat dilihat keadaan yang sama dari segi bentuknya yang sejajar, skema rima yang tidak terikat, jumlah baris yang tiada tetap, juga isinya yang umum iaitu merujuk kepada adat dan undang-undang adat, khususnya sistem Adat Perpatih dan Adat Temenggung di Minangkabau dan di Negeri Sembilan. Istilah "perbilangan adat" digunakan mungkin kerana dalam urutan puisi itu ada menyebutkan:

- 2.23 Perbilangan adat kita anak Minangkabau  
Yang di bawah langit dan yang di muka bumi  
Selengkar gunung berapi  
Hingga lagundi mudik  
Yang bernama Tanah Sumatera Pulau Andalus.

(Rakaman Teromba Adat, Negeri Sembilan 1976)

Perkataan teromba (terumba) bermakna salasilah keturunan (*a pedigree, a family tree*) (Wilkinson 1901, 163); istilah ini digunakan oleh Alisjahbana dan Zuber Usman dan dipakai dalam daerah yang menggunakan adat ini, misalnya di Jelebu dan di beberapa daerah di Negeri Sembilan. Dalam urutan puisi adat itu ada tempat yang menyebut "teromba".

- 2.24 Ke darat Adat Perpatih  
Ke laut Adat Temenggung  
Ke darat berteromba  
Ke laut bersalasilah.

(Achan bt Hj. Memek, Rembau 1976)

Nama lain bagi puisi jenis ini ialah "tarasul", yang bermakna (mengikut kamus), menulis surat (*letter writing*) (Wilkinson 1901, 160), iaitu teknik atau seni menulis surat. Di Rembau juga, perbilangan adat atau kata-kata adat ini dikenali sebagai "tarasul"; "Terasul Adat Perpatih". Demikian pula istilah "kata-kata adat"

terpakai juga di daerah-daerah yang berkenaan, seperti yang dapat dilihat dalam tulisan Caldecotte (1918), "Customary Songs and Sayings" hanya istilah "lagu adat" yang tidak digunakan walaupun pada beberapa keadaan, kata-kata adat ini juga digunakan.

Istilah "tambo", digunakan oleh Simandjuntak, seperti contoh yang diberikan di atas (21). Perkataan "tambo" difahamkan sebagai sejarah atau tawarikh yang ditulis dalam bentuk bahasa yang tetap, hampir sama seperti teromba (Gazali Dunia 1969, 182).

Daripada keterangan dan contoh-contoh yang diberikan tadi, ternyata istilah-istilah itu berkaitan dengan maksud atau isi rangkap-rangkap puisi yang berkenaan. Tetapi dengan penggunaan istilah yang pelbagai ragam menimbulkan kekeliruan, sedangkan dari segi genrenya adalah sama. Oleh itu dalam kajian ini semua puisi yang mempunyai bentuk dan isi demikian, iaitu yang merujuk kepada sistem adat atau undang-undang adat, akan digolongkan sebagai teromba; dan ini tidak terhad kepada Adat Perpatih dan Adat Temenggung sahaja, malah meliputi semua yang mempunyai kontasi adat, termasuk, misalnya, apa yang dikenali sebagai "rejang" di Sumatera Tengah, yang sebahagian daripadanya berbunyi demikian:

*Gusti Adat Rejang*

2.25 Adapun tiap-tiap gerak itu  
 datang daripada Allah, waris  
 itu datang daripada nabi, khalifah  
 itu daripada raja.  
 Adat lembaga itu turun  
 daripada nabi Adam.  
 Berdirilah adat dua perkara, iaitu:  
 Pertama adat Jahiliah  
 Kedua adat Salamiah  
 Adat Jahiliah macamnya  
 ada merendah ada menggunung.  
 ada melereng ada mendaki  
 Adat Salamiah, datar; harus  
 dipakai, batal dibuang.

(Jaspan 1964, 45)

**Bahasa Berirama dan Sesomba**

"Bahasa berirama", umumnya dikenali sebagai puisi yang sejarah yang tidak mempunyai ikatan tertentu dari segi jumlah baris, jumlah

perkataan dalam sebaris dan skema rima. Ia juga diasingkan daripada gurindam dan seloka walaupun ketiga-tiga genre itu tidak jauh perbezaannya dari segi bentuk dan isi. Istilah "bahasa berirama" mungkin dipadankan daripada *rhythrical verse* oleh Winstedt dan kemudian digunakan seterusnya oleh pengkaji-pengkaji yang lain termasuk Alisjahbana, Zuber Usman, Simandjuntak dan Mohd. Taib Osman. Suatu contoh "bahasa berirama" yang diberikan oleh Alisjahbana berbunyi demikian:

*Bahasa Berirama – pidato mempersilakan makan di Gunung Pasir*

- 2.26 Mengaji daripada alif,  
Berbilang daripada Esa,  
Berkata daripada asal,  
Usul asal jangan ditinggalkan.

Ia, lah, tuk:

Sehelai akar  
Sebingkas tanah,  
Sebatang kayu,  
Sehelai akar yang putus akan perikat  
Sebingkah tanah berbalik buat permatang.  
Kayu sebatang buat terusan  
Permatang sudah lurus,  
Tanah sudah datar  
Tanaman sudah menjadi,  
Orang sudah nan sentosa.

(Sutan Takdir Alisjahbana 1971, 103)

*Rhythrical verse* yang dikemukakan oleh Winstedt, lebih tepat merujuk kepada ungkapan-ungkapan berirama yang digunakan dalam cerita-cerita penglipur lara, misalnya *Hikayat Awang Sulung Merah Muda*, *Hikayat Malim Deman*, *Hikayat Anggun Cik Tunggal* dan lain-lain. Dalam bahasa Inggeris ungkapan-ungkapan demikian dipanggil 'runs', dan dalam puisi Melayu digunakan dalam bentuk yang 'stereotaip', misalnya dalam memberikan deskripsi tentang cara menyembah, berpakaian, keadaan pesta dan keramaian, kesibukan kota dan sebagainya (Mohd. Taib Osman 1975,136).

Kekeliruan dalam penggunaan istilah ini ialah pada pengertian dan contoh-contoh yang diberikan. Misalnya contoh (5) di atas yang

digolongkan sebagai "gurindam" oleh Za'ba dan Mohd. Taib Osman, dianggap "bahasa berirama", oleh Winstedt, Alisjahbana dan Zuber Usman. Contoh (26) yang diberikan oleh Alisjahbana di atas bukan juga "bahasa berirama" tetapi adalah sebahagian daripada teromba. Selain itu kekeliruan juga berlaku kerana penggunaan istilah-istilah lain di samping "bahasa berirama". Simorangkir Simandjuntak, misalnya, mencampuradukkan istilah-istilah bahasa berirama dengan prosa berirama dan penglipur lara; lihat petikan di bawah:

Dalam puisi lama ikatan bernama bahasa berirama atau prosa berirama meliputi sebahagian besar daripada sastera Indonesia lama. Bahasa berirama di tengah-tengah masyarakat terkenal dengan nama penglipur lara (Simorangkir Simandjuntak 1965, 54).

Seterusnya Simandjuntak memberikan contoh sepenuhnya daripada cerita-cerita *Sabai Nan Aluih*, *Malim Deman* dan lain-lain. Kekacauan di sini timbul kerana, sebagaimana yang telah sedia difahami, bahawa "bahasa berirama", "prosa berirama" dan "penglipur lara" adalah tiga genre yang berasingan. Prosa berirama ialah prosa lirik (*lyric prose*) yang mempunyai ciri tertentu dan penglipur lara merupakan sebuah genre prosa, iaitu suatu bentuk naratif yang mengandungi pula di dalamnya ikatan puisi yang dikenali sebagai "bahasa berirama".

Istilah "sesomba" dikemukakan oleh Zuber Usman, seperti yang dapat difahamkan daripada petikan di bawah:

... bentuk sesomba atau bahasa berirama ini lebih kuat tertanam dalam kesusasteraan Minangkabau. Menurut hemat saya melihat peninggalan kesusasteraan Minangkabau yang ada seperti Kaba Rancak di Labuih, Sabai Nan Aluih, Cinduo Mato, Malim Deman, Bacindai Aluih, Kaba Si Manja Ari, Kaba Si Umbuik Mudo dan lain-lain, bahkan dalam cara kaum adat berkata-kata atau berpidato bahasa berirama seperti dalam kesusasteraan semacam itu menjadi satu kebiasaan, sangat digemari pada zaman yang lalu di Minangkabau. Sewaktu-waktu dalam bahasa berirama semacam itu dirasakan denyaran atau tarikannya yang kuat, seperti denyutan jantung yang menggerakkan dan menghidupkan dalam tubuh. Di antara bahagian yang merata atau biasa didapati pula bahagian

#### GENRE PUASI MELAYU TRADISIONAL

yang meninggi atau memuncak, beberapa tempat di Minangkabau dikenali dan disebut "sesomba" dan mengemukakan atau menonjolkan bahagian yang semacam itu dalam bercerita atau berkata-kata dikatakan bersisomba (dalam dialek Minangkabau basisomba) (Zuber Usman 175, 160-161).

Zuber Usman memberikan contoh di bawah ini sebagai sesomba:

*Sesomba bersenda gurau, Minangkabau*

Biduk lompong pengayuh lompong  
Ambil ke rakit goreng pisang  
Bertongkat lemag sebatang  
Tegakkan tiang gula tarik  
Kembangkan layar kue dadar  
Turun ke lurah agar-agar  
Mendaki bukit kue bolu  
Turun sekoci putu kering.

Datang berantai kue telur  
Masuk ke rimba sarang balam  
Terkembang seperti kue sepit  
Duduk termenung kue abuk  
Tambah penukut dalam negeri  
Apakan tenggang lepat dagang  
Anak meriam ondeh-ondeh  
Habis pikirnya kue lapis  
Berlabuh tentang air kopi.

(Zuber Usman 1975, 162)

Petikan di atas menepati konsep "bahasa berirama" sebagai *descriptive passages*, iaitu ungkapan-ungkapan yang mengandungi pemerian atau deskripsi, sama ada dalam cerita-cerita, dalam ucapan atau sebagai seni kata dalam lagu-lagu daerah, misalnya lagu "Gubang Panjang" dalam permainan bongai di Negeri Sembilan. Dari segi bentuk dan isinya, puisi di atas sama pula dengan talibun yang diberikan terdahulu, (contoh 18). Oleh itu untuk memudahkan pembahagian dan seterusnya menyelesaikan kerumitan yang dibincangkan, dalam kajian ini semua puisi yang tergolong sebagai "bahasa berirama", talibun dan sesomba, digolongkan ke dalam sebuah genre yang dikenali sebagai talibun (atau sesomba). Talibun dapat membawa konsep yang dibawa oleh "bahasa berirama", sementara sesomba menurut penggunaannya yang luas di Minang-

kabau, di mana puisi seperti itu digunakan secara menyeluruh dan dikenali sebagai sesomba.

### Prosa Berirama

Prosa berirama (*rhythmical prose*) atau prosa lirik (*lyric prose*) ialah bentuk bahasa yang digunakan dalam penyampaian setengah-setengah cerita rakyat khususnya dalam genre penglipur lara di Malaysia dan *kaba* di Minangkabau. Misalnya dalam contoh-contoh di bawah:

#### 2.28 *Sabai Nan Aluih*

Kait berkait rotan saga  
Terkait di akar bahar  
Terbang ke langit terberita  
Tiba di bumi jadi khabar.

Siapakah orang yang terkhabar  
Terkhabar Raja Berbanding  
Dalam negeri Padang Tarap  
Di ranah payung sekaki  
Di kerambil nan atap tungku  
Di pinang yang linggayuran  
Di cempedak nan condong-condong  
Di rusuk rumah nan gadang  
Di bawah anjung yang tinggi.

Kononlah Raja Berbanding  
Anaknya sebagai anak balam  
Seekor jantan seekor betina  
Seorang bernama Mangkutak Alam  
Perempuan bernama Sabai Nan Aluih.

(Simorangkir Simandjuntak 1965, 55)

#### 2.29 *Sulung Jawa*

Hei ...  
Sikun si kononnya Terung Pipit  
Terung Pipit pun sungguh sangat seperti  
adik Jerun dikata  
Dia pun yang-yang ke dewata  
Hilang di mulut timbul di mata

Marilah jin tujuh saudara  
"Ampun tuanku beribu-ribu ampun  
Awat tuanku panggil patik tujuh saudara?  
Apalah titah tuanku patik junjunglah."  
Kata Terung Pipit saudara yang tua  
"Hei jin tukang ketujuh yang terus mata  
sebab aku panggil engkau dengan segera  
Aku nak suruh pi cari merbau tanglung yang  
bercabang tiga  
Di mana yang ada  
Sebab hutan rimba bertambun pun ada  
Kot ada bertentang pada pandangan mata  
Aku nak buat penjajap emas berlapis suasa  
Aku nak buat tuntut bela.

(Jamilah Hj. Ahmad 1978, 8-9)

Dari segi bentuknya ungkapan-ungkapan di atas sama seperti talibun atau sesomba: tetapi isi dan fungsinya berbeza. Talibun merupakan ungkapan-ungkapan pemerian yang terperinci (*descriptive passages*) dalam sesebuah cerita penglipur lara; sementara prosa berirama adalah cerita itu sendiri yang seluruhnya tertulis atau disampaikan dalam ungkapan-ungkapan yang hampir sama seperti talibun atau sesomba. Oleh kerana istilah prosa berirama (*rhythrical prose*) itu merupakan istilah yang telah lama dikenal dan digunakan, dan tidak pula menimbulkan kekeliruan dengan yang lain, dalam kajian ini, istilah itu terus dipakai bersama prosa lirik (*lyric prose*).

### Rejang

Erti perkataan "rejang" menurut R.J. Wilkinson, ialah:

1. Suatu istilah astrologi, nama satu siri lambang-lambang (*symbols*) yang mewakili tiap-tiap hari dalam sebulan. Lambang-lambang ini dipercayai mempunyai pengaruh kepada nasib atau raksi (*fortunes*) pada hari-hari yang berkenaan. "Ketika rejang" merupakan ramalan waktu menurut rejang; dan "rejang ketika" ialah raksi mengikut waktu, iaitu nasib baik atau buruk mengikut sistem ramalan ini (Wilkinson 1901, 323). "Syair rejang" ialah syair yang menerangkan ramalan ini, misalnya "syair raksi" (Overbeck 1923, 282-307), dan "pantun rejang" ialah pantun-pantun yang menggunakan sistem ramalan ini seperti

contoh-contoh yang sedia diberikan di bawah ini:

2.30 *Rejang Sindir Ilmu*

Sehari bulan rejangnya kuda  
Kuda aman dari Pasai  
Dipacu lalu ke bandar Selan  
Akhir zaman muda dan bisai  
Tuntutlah ilmu mengenal Tuhan.

Dua haribulan rejangnya kijang  
Kijang mengantuk di rumpun buluh  
Memakan kaduk di dalam padi  
Tuntutlah ilmu biar bersungguh  
Hidup kita ini akhirkan mati.

Harimau sekuci turun sekawan  
Mari ditikam si janda balu  
Ilmu yang suci tuntutlah tuan  
Kerana suci sempurna fardu.

(Untong Hj. Akil, Kuala Kubu Bharu 1976)

2.31 *Rejang Si Padi Emping*

Bismillah itu permulaan kata  
Alhamdulillah puji semata  
Berkat syafaat penghulu kita  
Sekalian kembali ke Tuhan yang ada.

Barang siapa berpadi emping  
Padi emping huma di tengah  
Barang siapa berhati mukmin  
Berhati mukmin istana Allah.

Padi emping huma di tengah  
Sayang geliga di punca kain  
Berhati mukmin istana Allah  
Masuk syurga jannatunnain.

(Hj. Mohd. Wajib Hj. Abd. Rahman,  
Slim River 1976)

2. Ertj yang lain bagi rejang ialah merujuk kepada satu daerah, satu masyarakat atau bahasa di beberapa daerah di Sumatera

## GENRE PUISI MELAYU TRADISIONAL

Selatan, seperti yang dapat difahamkan daripada keterangan Philip Ward, di bawah ini:

*More recently M.A. Jaspan ... collected important literature from some of the 180 000 speakers of Rejang living in the Musi Rawas Kabupaten of South Sumatera and the Rejang-Lebong Kabupaten of Bengkulu province. The language of their texts in the Ka-Ga-Nga script is Malay, deriving from the court language of the medieval South Sumateran characters of South Indian origin ....*

*The poetry of Rejang is in Melayu Purbo or Old Malay, which differs from classical Malay in dropping final consonants ('tinggal' becomes 'tinga'), changing some vowels ('dalam' becomes 'leum' and 'diri' becomes 'dirai') and eliding or diphthongising final 'h' ('rumah' becomes 'umee').*

*Traditional literature of the Rejang texts includes the berjeung (love songs) such as the following examples, utep-utep (incantations), indau-indau (spells), peribahaso (proverbs), papatea (maxims), laws and clan histories.*

(Ward 1975, 22–23).

Daripada keterangan P. Ward itu (yang dipetik agak panjang di sini) bahawa "rejang" dalam "Rejang Ka-Ga-Nga" dengan judul "Gusti Adat Rejang" yang diberikan dalam contoh (25) adalah suatu jenis puisi dalam bahasa Melayu Purba, tetapi tertulis dalam bahasa dan huruf "rejang" yang terpakai dalam satu masyarakat dalam daerah Sumatera Selatan. Ertinya di sini, rejang bukanlah satu genre puisi yang tertentu ciri-cirinya, berbeza dengan genre-genre yang lain. *Berjeung* yang disebut oleh P. Ward, diberikan contoh di bawah:

- 2.32 Barat lawut  
tunggu maring gunung  
metari keilangan  
semueci maring gunung  
metari kekasi  
ruma ketunan  
bulan pernama.

(Ward 1975, 23)

Terjemahannya secara bebas (oleh penulis) kira-kira begini:

- 2.33 Seperti laut  
 Di atas kemuncak gunung  
 Puteri kehilangan  
 Kepada harimau puncak gunung  
 Puteri kekasihku  
 gedung tenunan  
 bulan purnama.

Ungkapan di atas tidak juga menunjukkan ciri-ciri yang tertentu untuk digolongkan sebagai sebuah genre, misalnya "rejang", bahkan "berjeung". Demikian pula dalam pantun dan syair yang dikemukakan dalam contoh-contoh 30 dan 31, istilah "rejang" bermakna raksi atau satu sistem ramalan tradisional. Deskripsi yang lebih lanjut mungkin dalam syair, pantun bahkan prosa, misalnya "Syair Raksi" (Overbeck 1923), "Syair Ta'bir Mimpi" (Overbeck 1929, 338 – 375), "Ketika Rejang" (Voorhoeve 1963, 61) dan lain-lain.

Berdasarkan keadaan-keadaan di atas, "rejang" dalam puisi Melayu bukanlah suatu genre yang tersendiri; demikian juga "rejang" seperti yang difahamkan di Sumatera. Kerana itu contoh-contoh (30) adalah pantun dan (31) adalah syair. "Gusti adat rejang" (25) adalah teromba kerana isinya sesuai sebagai *laws and clan histories*; sementara berjeung di atas boleh digolongkan sebagai puisi sukuan yang tiada terdapat dalam masyarakat Melayu di Malaysia.

### Perbahasa Berirama

Perhatikan beberapa contoh:

- 2.34 Siang terkenang-kenang malam termimpi-mimpi  
 Makan tak kenyang tidur tak lena  
 Mandi tak basah minyak tak licin
- Terkilan-kilan di hati terkalang-kalang di mata  
 Terasa-rasa bak duri dalam daging
- 2.35 Berserah berkebilan  
 Berucap berpegang ekor  
 Berpesan berturutkan  
 Bertaruh berpermalami

(Za'ba 1962, 169–170)

- 2.36 Laksana bahtera sauhnya berat  
Entah ke timur entah ke barat

(Wilkinson 1901, 70)

- 2.37 Baik tunangnya jahat  
Hidup tunangnya mati  
Kasih tunangnya cerai

(Hose 1933, 27)

Za'ba tidak membicarakan peribahasa sebagai bentuk puisi dan tidak juga mengemukakan istilah peribahasa berirama dalam kajian-nya. Menurutnya peribahasa "ialah segala susunan cakap yang pendek yang telah melekat di mulut orang ramai sejak beberapa lama oleh sebab sedap dan bijak perkataannya, luas dan benar tujuannya, dipakai akan dia jadi sebut-sebutan orang sebagai bandingan, tela-dan dan pengajaran". Dan di dalamnya termasuklah bidalan, pepa-tah, perbilangan dan perumpamaan. Walaupun begitu, sebagaimana yang dibicarakan mengenai perbilangan di atas, beberapa contoh yang dikemukakan bagi peribahasa, terutamanya bagi bidalan dan pepatah mengandungi ciri-ciri puisi dan dapat digolongkan sebagai genre puisi.

Kebanyakan buku yang menggolongkan peribahasa sebagai puisi memberikan contoh-contoh yang sesuai; misalnya ungkapan 'bidalan' atau 'pepatah' itu melebihi daripada satu kalimat, dapat disusun dalam baris-baris yang sejajar, mempunyai jumlah kata yang hampir sama dalam setiap kalimat dan bila dituturkan seolah-olah mempunyai rentak dan irama; kerana itu ia dinamakan peribahasa berirama.

Kalau ukuran itu digunakan bermakna tidak semua peribahasa dapat digolongkan sebagai puisi. Perumpamaan misalnya, yang terdiri daripada satu kalimat, panjang dan pendek, tidak mempunyai ciri-ciri puitis. Kerana itu dalam hal ini pun terdapat pelbagai kekeliruan. Ariffin Nur (1971), misalnya, memasukkan semua jenis peribahasa ke dalam pembicaraan puisi (hlm 197–202). Ia meng-gunakan istilah 'bidalan' dan di dalamnya termasuk pepatah, per-bilangan, perumpamaan, kiasan, tamsil, ibarat dan lidah pendeta. Contoh-contoh yang diberikan juga tidak semuanya dapat dianggap sebagai puisi; misalnya "bagai si kudung mendapat cincin", "seperti

susu dengan sakar", "nyiur kalumpang", "buang air" dan lain-lain.

Sewajarnya, menurut pendapat penulis, apa yang digolongkan sebagai peribahasa berirama ialah ungkapan-ungkapan yang mengandungi kiasan dan ibarat, bidalan, pepatah tamsil dan lidah pendeta yang mempunyai ciri-ciri puisi seperti yang dinyatakan tadi. Contoh-contoh (34) hingga (37) yang dikemukakan di atas dan dalam bab-bab yang akan datang serta dalam lampiran adalah ungkapan-ungkapan yang tergolong sebagai peribahasa berirama.

### Teka-teki

Teka-teki jarang dibicarakan sebagai puisi walaupun dari segi bentuknya, ia tergolong sebagai puisi, bukan sahaja dalam bentuk pantun dan syair, tetapi juga bentuk-bentuk yang lain seperti gurindam, talibun dan prosa berirama. Diberikan dua contoh di bawah ini:

#### 2.38 Teka-teki Bersyair

Apakah ini sebangsa batu,  
Berketul-ketul besar tak tentu  
Halus kasar nama suatu,  
Sudah adatnya memang begitu.

Sungguh keras keadaannya  
Tetapi lekas pula biasanya  
Bila bertemu dengan asalnya  
Hancur luluh segala tubuhnya.

Jangan tuan berasa hairan  
Alat makanan ialah campuran  
Kari dan gulai ialah jiran  
Jika tertinggal habislah karam.

(Muhammad Abdul Jalil 1964, 70)

Dan yang di bawah ini seperti talibun:

#### 2.39 Teka-teki 'Kain Sarung'

Ada kepala telinga tidak  
Ada kaki tiada bertangan  
Mata banyak tak boleh memandang

Adapun daging tidak berdarah  
Banyak urat tiada bertulang  
Atas bawah sama senama  
Tiada kulit banyak beroma  
Baru bertemu berkasih-kasihan  
Bertambah benci semakin lama.

(Gemala Hikmat)  
(Za'ba 1962, 244)

Za'ba menggolongkan puisi di atas itu sebagai "gurindam tiada pertentangan bunyi hujung" (atau gurindam tidak bersajak) (Za'ba 1962, 244). Dan daripada buku dan antologi teka-teki, seperti yang diusahakan oleh O.T. Dussek (1918) dan Munsyi Sulaiman (1907) terdapat pelbagai bentuk teka-teki dari yang sederhana seperti kalimat-kalimat prosaik kepada yang puitis dan indah, ungkapan-ungkapan bersajak, pantun, syair, talibun, gurindam atau dialog yang puitis. Kerana itu dalam kajian ini teka-teki dianggap sebagai satu genre yang tersendiri dan semua puisi yang berupa teka-teki dari segi isi dan fungsi akan dibicarakan dalam genre yang sama.

### Mantera

Mantera tidak menimbulkan kontroversi dari segi istilah dan bentuk walaupun terdapat beberapa istilah lain yang dipakai dengan erti yang hampir sama, misalnya jampi, serapah, sembur, puja, cuca, seru dan lain-lain. Dalam pembicaraan-pembicaraan tentang puisi juga, mantera tidak dibicarakan sebagai puisi yang tersendiri. Hanya contoh-contoh daripada mantera digunakan dan biasanya digolongkan sebagai sebahagian daripada "bahasa berirama". Dalam kajian ini semua puisi dengan bentuk, isi dan fungsi yang sama, iaitu yang merujuk kepada magis, perubatan dan perbomohan akan dianggap sebagai mantera dan digolongkan ke dalam satu genre, iaitu mantera. Di bawah ini diberikan beberapa contoh:

#### 2.40 Mantera Menguburkan mayat

Bumi ibu, langit bapa  
Air saudara, kayu daka  
Embun angin, saudara nyawa  
Rasi tanah pulang ke tanah

## PUISI MELAYU TRADISIONAL

Ganda rusa ganda rusi  
Tambus salah tambuh di lembah  
Kalau berdosa dipuji  
Kalau bersalah disembah  
Nyawa kembali kepada Allah.

(Zuber Usman 1975, 171 -172)

### 2.41 *Pemanis Suara*

Hei jin makrifat  
Bukalah pintu suaraku  
Yang tujuh lapis  
Allah Muhammad hendak lalu  
Air hilir lagi mudik  
Burung terbang lagi berhenti  
Mendengar suaraku  
Jangankan anak bidadari yang ketujuh sekalian  
Umat Muhammad pun turut mendengar suaraku  
Bukan suaraku tapi suara Nabi Daud  
Berkat doa LailahaillalLah

(Awang bin Mat, Perlis 1978)

### Zikir (Dikir)

Diberikan beberapa contoh di bawah ini untuk perbincangan:

### 2.42 *Dikir Laba*

Bulan dan bintang  
Bulan bercahaya  
Langit mendung meliputi awan  
Bila bercahaya  
Ayuha 'l-mali 'l-fajri  
Ayuha 'l-mali 'l-fajri la inu  
Hayatu latajidun wajdin  
'Ala n-nurin fardun ala wajdin  
Huwa 'l-lazi habibu ya labuna  
Jaibu turi l-lazi l-fahrin

(Razali Hj. Ibrahim, Pasir Mas 1976)

### 2.43 *Dikir Nabi Allah*

Adalah kayu dalam syurga Muhammad  
Sijarat al-Mutahhar namanya kayu

## GENRE PUASI MELAYU TRADISIONAL

Bertiuplah angin di dalam syurga jannatunnaim  
Bersinggitlah dahan bak sama dahan  
Bak bunyi gong dengan canai  
Bersinggitlah ranting bak sama ranting  
Bak bunyi gendang dengan serunai  
Jikalau bersinggitlah daun bak sama daun  
Bak bunyi rebab dengan kecapi  
Jikalau bersinggitlah putik bak sama putik  
Bak bunyi salung dengan bangsi  
Jikalau bersinggitlah buah bak sama buah  
Bak bunyi genggong dengan biola  
Jikalau bersinggitlah pucuk bak sama pucuk  
Bak bunyi serunai Nabi Allah Daud  
Itulah kayu di dalam syurga jannatunnaim  
Di bawahnya licin terlalulah licin  
Tempat kanak-kanak bermain-main  
Membawa air sekendi seorang  
Menantikan ibunya dengan bapanya  
Itulah kanak-kanak yang mati kecil  
Allah Sallallah

(Hj. Umar Ismail, Kuala Pilah 1978)

### 2.44 *Dikir Barat*

Bekah bangun cacang  
Bawa tongkat sepanjang sedepa  
Malam ini kita lawan  
Orang kita nanti jaya.

Bekah bangun cacang  
Bawa tongkat sepanjang sedepa  
Kita tak usah hairan  
Moda kita sama-sama bisa.

Bekah bangun cacang  
Bawa tongkat sepanjang sedepa  
Ini nak kenal Mat Lela Tampang  
Orang masyur rata-rata.

Bekah bangun cacang  
Bawa tongkat sepanjang sedepa  
Boleh dengar adik abang  
Apa-apa hamba nak kata.

(Salleh Abd. Rahman, Kota Bharu 1976)

Setakat ini tidak ada buku-buku yang membincarakan zikir atau dikir dalam pembicaraan mengenai puisi; ini bermakna zikir dan dikir tidak tergolong ke dalam mana-mana genre puisi. Tetapi pada perhatian penulis, berdasarkan bahan-bahan yang telah dikumpulkan peranannya dalam aktiviti kesenian masyarakat, penulis berpendapat bahawa zikir atau dikir patutlah dianggap sebagai sebuah genre puisi.

Mohd. Taib Osman dalam membuat klasifikasi bahan-bahan lisan menggolongkan dikir sebagai bahan-bahan yang mempunyai konotasi agama dan magis; dan di sini termasuk lagu-lagu Maulud seperti "Dikir Pahang" dan dikir yang diiringi oleh permainan kompong. Dalam golongan ini dimasukkan juga mantera, jampi, serapah dan seru seperti yang diungkapkan oleh bomoh dan pawang dalam pelbagai upacara. Mohd. Taib Osman juga menyamakan istilah dikir ini dengan *chants*, "walaupun pada praktiknya beberapa bahan tradisi lisan yang lazimnya tidak dikenali sebagai dikir dimasukkan ke dalam golongan ini" (Mohd. Taib Osman 1976, 59–60; 1975, 86–92). Sebaliknya pula, "dikir barat" tidak tergolong dikir, tetapi dianggap sebagai nyanyian.

Pada hemat penulis kesemua jenis zikir atau dikir tergolong ke dalam satu golongan; kerana semuanya dinyanyikan, bersama alat (rebana, kompong) atau tanpa alat. Sebaliknya jampi dan mantera dapat dianggap sebagai *chants* dan diasingkan daripada golongan dikir.

Dikir barat yang seluruhnya dalam bahasa Melayu dan tidak pula mengandungi unsur-unsur agama dan magis, pada dasarnya mempunyai persamaan dengan dikir Nabi Allah yang seluruhnya dalam bahasa Melayu, tetapi berunsur agama. Persamaan itu terdapat juga dalam dikir laba yang bercampur Arab dan Melayu, bahkan dengan dikir Pahang, dikir berarak, dikir Maulud dan lain-lain, yang seluruhnya dalam bahasa Arab dan mengandungi unsur agama. Kerana itu dalam penggolongan kita seterusnya, dikir dan zikir akan digolongkan sebagai suatu genre puisi; dan untuk mengelakkan kesulitan, tema atau isinya hendaklah berunsur agama:

### **Endoi**

Mohd. Taib Osman (1975) memberikan contoh endoi di bahagian akhir bukunya, sebahagian daripadanya seperti contoh (45) di

bawah. Namun demikian beliau tidak menyentuh tentang endoi dalam pembicaraannya mengenai syair; ini menimbulkan kekeliruan apakah endoi sebagai satu genre yang tersendiri. Daripada apa yang dapat diperhatikan dan dibandingkan dengan contoh-contoh yang didapati dalam kegiatan-kegiatan masyarakat endoi ialah nama temasya yang diadakan, iaitu daripada perkataan 'endul' bererti buaian, iaitu istiadat membuat anak setelah bayi (ibu bayi) itu selesai daripada masa berpantang. Seni kata lagu-lagu yang dinyanyikan ketika membuat anak itu biasanya berbentuk syair yang diselangi dengan zikir dan selawat untuk Nabi Muhammad S.A.W. Contoh yang diberikan oleh Mohd. Taib Osman adalah syair; demikian juga contoh-contoh yang telah dikumpulkan daripada temasya-temasya yang sama di Perak, Kedah, Negeri Sembilan dan Selangor, semuanya berbentuk syair. Kerana itu endoi bukanlah suatu genre yang terasing, tapi dapat dianggap sebagai syair atau variasi dalam penggunaan syair.

Lihat contoh-contoh di bawah yang memperlihatkan bentuk, isi dan fungsi yang sama:

#### 2.45 *Ucapan Mencukur Rambut Budak Kecil*

Bismillah-ir Rahman-ir Rahim  
Lailahaillallah, Muhammadar-Rasulullah.

Bismillah itu permulaan nama  
Keadaan zatnya bersama-sama  
Zahirkan sifat menyatakan isma  
Kadim dan taat sedia lama.

Hai segala anaknya Adam  
Asalnya wahi nur-ul-khatam  
Dipecahnya empat nazirnya Adam  
Dipecahnya pula sekalian alam.

Rahim bapamu turun ke ibumu  
Empat puluh hari nufkah namamu  
Delapan puluh alkah namamu  
Seratus dua puluh hari alamat namamu.

Dikandung ibumu sembilan bulan  
Lebih atau kurang tiada ditentukan  
Beranakkann dikau berapa kesakitan  
Berapalah pantang minum dan makan.

(Mohd. Taib Osman 1975, 159)

2.46 Bumi dan langit sempurna dijadikan  
Nabi Allah Adam pula dizahirkan  
Inilah permulaan manusia dijadikan  
Di dahinya nur yang dipancarkan

Lailahaillallah  
Lailahaillallah  
Lailahaillallah  
Nabi Muhammad pesuruh Allah.

Nabi Allah Adam Alaihissalam  
Nenek kepada manusia kafir dan Islam  
Asal ini dari Darussalam  
Diturunkan Tuhan ke dalam alam.

(Rakaman "Berendoi", Setiawan 1976)

### **Hadrah dan Dabus**

Hadrah dan Dabus bukanlah istilah-istilah yang merujuk kepada genre puisi: tetapi lebih jelas sebagai aktiviti-aktiviti seni dalam kehidupan masyarakat. Tetapi puisi yang dilakukan dalam aktiviti-aktiviti ini menimbulkan masalah untuk menggolongkannya.

#### *2.47 Hadrah Perlis*

Solo: Cempa vella, hai kemang ke vella  
Hai cempa vella, kemang ke vella  
Hai cempa bunga, kemang ke vella  
Hai cempa bunga, kemang ke vella.

Korus: Cempa vella hai kemang ke vella  
Hai cempa vella, kemang ke vella  
Hai cempa bunga, kemang ke vella  
Hai cempa bunga, kemang ke vella.

Solo: Eh dapat satu, wayang Melayu  
Eh dapat satu, wayang Melayu  
Hai anak murid.

Korus: Eh dapat satu, wayang Melayu  
Eh dapat satu, wayang Melayu  
Hai anak murid.

GENRE PUISI MELAYU TRADISIONAL

Solo: Jangan renum janganlah malu  
Jangan renum janganlah malu  
Adat meminang saja begitu  
Adat meminang saja begitu.

(Mohd. Ghous Nasaruddin 1976, 242–243)

2.48 *Dabus*

Ta'alanbina nastalhi  
Faba bulridda qadfuthi  
Wada ulfu'a dalladbi  
Bisaifil hawa qadjurih  
Aya mudda'j hubbina  
Dariuru hasbumat-tarikh  
Ta'allaz biahlii huta  
Waqlilil 'adhu listarih.

Berempat sahabat Nabi  
Empat orang menjadi khalifah  
Abu Bakar, Umar, Usman  
Sayidina Ali menantu Rasulullah.

Sailela Tengku di Klang  
Menempa rantai dengan gelang  
Kalau tuan bijak terbilang  
Cubalah capai bunga di dulang.

Seilela mahkota Alam  
Bukit Zaman Kubur aulia  
Diruntut besi yang tajam  
Besi yang tajam penawar bisa.

Seilela Tengku di Klang  
Menempa rantai dengan gelang  
Tuanlah sungguh telah terbilang  
Patik berdabus sampailah siang.

(Musa bin Jalil, Banting 1977)

Contoh-contoh (47) dan (48) seolah-olah mengemukakan bentuk yang lain daripada genre puisi Melayu yang telah dikenali. Bagaimanapun, kedua-dua contoh ini dapat sahaja digolongkan sebagai dikir atau zikir iaitu yang mengandungi puisi yang ber-

hubungan dengan acara-acara berunsur adat istiadat, agama dan magis. Dari segi genre, hadrah mungkin mengandungi syair, pantun, ungkapan-ungkapan puisi Arab dalam bahasa Arab atau Melayu atau apa yang dapat dianggap sebagai ikatan bebas, seperti dalam lagu-lagu Melayu asli, nasyid, ghazal dan lain-lain. Contoh 47 di atas, adalah daripada pantun yang dapat dianalisis demikian:

- 2.49 Cempa vella kemang ke vella  
 Dapat satu wayang Melayu  
 Jangan renum janganlah malu  
 Adat meminang saja begitu.

Demikianlah pula dalam contoh dabus (48) itu, rangkap pertama yang dalam bahasa Melayu adalah syair yang menggunakan rima pantun a, b, a, b, dan yang lain, rangkap-rangkap 2 dan 3 adalah pantun yang menggunakan rima syair a, a, a, a; sementara rangkap 4 adalah syair. Kerana itu dalam penggolongan genre contoh-contoh itu dapat sahaja dimasukkan ke dalam genre-genre yang berkenaan (pantun atau syair) atau ke dalam zikir atau dikir yang merupakan seni kata lagu-lagu yang dinyanyikan dalam istiadat-istiadat yang berhubung dengan agama dan magis.

### Berzanji dan Marhaban

Seperti hadrah dan dabus tadi, berzanji dan marhaban adalah aktiviti-aktiviti berupa istiadat, iaitu membaca berzanji dan marhaban untuk sambutan-sambutan berunsur keagamaan, menyambut Maulud, membuat anak, majlis kesyukuran dan lain-lain. Seni kata lagu berzanji biasanya dipetik daripada kitab-kitab yang telah dikenali misalnya *Kitab Berzanji* (hlm 5). Marhaban juga dipetik daripada kitab yang sama.

Berzanji telah diterjemahkan ke dalam bahasa Melayu dan telah mulai popular dalam masyarakat Melayu, sementara marhaban masih dalam bahasa Arab. Apakah puisi berzanji terjemahan ini dapat digolongkan ke dalam genre puisi Melayu masih belum dipastikan. Tetapi daripada contoh yang dikemukakan (49) dan daripada buku tersebut, dapatlah digolongkan sahaja ke dalam genre zikir atau dikir. Hal yang sama juga dilakukan terhadap marhaban, sementelah kedua-duanya berupa nyanyian berunsur upacara, adat dan agama.

## GENRE PUISI MELAYU TRADISIONAL

Diberikan dua contoh di bawah:

### 2.50 *Marhaban*

Marra Wajhaka yas'ad  
Ya karimal walidaini  
Harodukas safil muharrad  
Wirduna Yanman nusyuri.

Mara'ainal isa haunat  
Bissura illa ilaika  
Walghammat qadadhallat  
Walmal sallu alaika.

Wapatajak 'udu yabki  
Watazallal baina yadaika  
Wastarajat ya habibi  
Indakath dhab yunnufuru.

(Mokhtar Hj. Jaafar, Kuala Lumpur 1977)

### 2.51 *Berzanji*

Kumulakan karangan ini dengan nama Allah  
Tuhan Ilahi,  
Kumohonkan limpahan berkata, atas segala nikmat  
yang telah diberi  
Kuucapkan pujian kepada Allah, sebenar-benar  
puji  
Kuiiringkan pujian dengan kesyukuran, yang amat  
tinggi.

Kupohonkan semoga Allah cucurkan rahmat  
dan selamat kepada junjungan kita  
yang nurnya mula-mula  
dijadikan Allah di alam nyata  
Nur yang berpindah keturunan demi keturunan  
yang semuanya keturunan mulia  
Kupohonkan semoga Allah, kurniakan keredaan  
khasnya kepada seluruh keluarga baginda  
Dan, kepada sekalian sahabat, pengikut-pengikut  
sahabat dan orang-orang terkemudian  
dari masa ke masa.

(Hj. Jamaluddin Hashim 1976, 8)

### **Qasidah**

Qasidah adalah antara puisi Arab yang terawal dan umum sekali digunakan dalam puisi-puisi klasik Arab. Kebanyakan puisi ini dikumpulkan dalam "mu'allaqat" yang merupakan antologi karya-karya penyair klasik Arab termasuk Imur'ulqais, Tarafa, Zuhair dan lain-lain. Pola meter qasidah ini diperbaiki dan dikenalkan oleh penyair-penyair istana yang kemudian termasuk al-Mutannabi (meninggal 965 M.) (Grunebaum 1970, 18–19). Qasidah dalam masyarakat Melayu merupakan lagu dalam irama Timur Tengah, tipikal dan identik, selalunya dinyanyikan oleh seorang yang terlatih dan mempunyai suara yang baik. Bagaimanapun, seni kata lagu qasidah tidak dapat digolongkan kepada sesuatu genre puisi. Umumnya, daripada tinjauan yang telah dijalankan, didapati ahli-ahli qasidah menggunakan kitab *Majmu'at Maulud Syarif al-Anam*, pada bahagian Qasidah al-Burdah, atau Qasidah al-Bariah, karangan al-Syeikh Muhammad al-Busiri (dari halaman 148–173 buku itu). Contoh yang diberikan di bawah (52) adalah sebahagian daripada teks qasidah dalam kitab ini, tetapi telah diadaptasi oleh pembacanya mengikut lagu dan cara dia melagukannya:

#### **2.52 *Qasidah Bariat***

Fadlu gaya syidia Rab,  
 Ya Rabbi hai yik lana min amrina rosyada  
 Wa jaal manu, matahal muna lana hadada  
 Ya lin, ya lin, ya lin,  
 Raitul ghusla.  
 Allal kasbi, Allal kasbi  
 Syali biduri, syali biduri  
 Talam talam la, talam talam la.

(Lebai Salleh, Bangi 1978)

Melihat kepada bentuk puisinya, yang seluruhnya dalam bahasa Arab dan masih belum ada terjemahannya dalam bahasa Melayu, dapatlah dianggap qasidah sebagai puisi Arab dan tidak dibicarkan sebagai puisi Melayu lama. Hanya dalam pembicaraan mengenai zikir (dikir) sebagai genre puisi, qasidah akan disebutkan sebagai suatu daripada jenisnya, kerana qasidah juga, sebagaimana marhaban dan berzanji merupakan sejenis zikir yang mengandungi unsur-unsur istiadat dan keagamaan.

### Syair dan Nazam

Syair dan nazam selalu dikelirukan antara satu dengan yang lain. Ini terjadi kerana kedua-dua istilah itu diambil daripada bahasa Arab: *Shi'r* ( شعر ) dan *nazam* ( نظم ) yang masing-masing bermakna puisi secara umum (Hava 1970). Dan walaupun syair telah dapat ditentukan dan diasingkan daripada genre-genre yang lain, tetapi dalam beberapa contoh yang didapati, terdapat rangkap-rangkap syair yang dikenali sebagai nazam, dikenali pula sebagai syair. Perhatikan dua contoh di bawah:

#### 2.53 *Nazam Nasihat*

Siapa-siapa adik dan kakak,  
Memberi nasi sesuap pagi dan petang  
Minta redakan sekarang ini  
Diniatkan sedekah di dalam hati.

Barang siapa banyak sedekahnya,  
Itu menjadi akan payungnya  
Di padang Yau Min Mahsyar tempat bernaungnya,  
Panas yang keras lepas di bawahnya.

Sabda Nabi dengan sebenarnya  
Tujuh orang bernaung di Mahsyarnya  
Di bawah Arasy tempat bernaungnya  
Pada hari yang tiada menaung yang lainnya.

(Mansur bin Udin, Raub 1976)

#### 2.54 *Nazam Membuai Anak Perempuan*

Wahailah anak yang setiawan  
Engkaulah ini anak perempuan  
Jikalaulah engkau ada pertemuan  
Suamimu itu jangan dilawan.

Wahailah anak kami berpesan  
Kepada engkau di dalam buaian  
Ibu bapamu jangan kaulawan  
Jangan mu ikut iblis dan syaitan.

(Nainun bt Hassan, Raub 1976)

Berbanding dengan keadaan-keadaan di atas terdapat pula bentuk puisi yang jelas memperlihatkan struktur dan ciri-ciri yang tersendiri yang boleh menggolongkannya sebagai nazam. Misalnya

dalam contoh-contoh di bawah ini:

- 2.55 Bahawa bagi raja sekalian  
Hendak ada menteri demikian  
Yang pada sesuatu pekerjaan  
Sempurnakan segala kerajaan  
Menteri inilah maha tolan sahaja  
Dan peti segenap rahsianya sahaja  
Kerana kata raja itu katanya  
Esa ertinya dan dua adanya  
Maka menteri yang demikianlah perinya  
Ada keadaan raja dirinya  
Jika raja dapat adanya itu  
Dapat peti rahsianya di situ

(Alisjahbana 1971, 120)

- 2.56 Dengan nama Tuhanku Allah jua kumula  
Akan nazamku ini dengan tolongnya ia  
  
Allah jua kupuji dengan lidah dan hati  
Atas nikmatnya atasku dan lain ku pula  
  
Dan atas bangkitnya akan Rasul yang mulia  
Dengan menunjuk kita bagi jalan bahagia  
  
Dan selawat dan salamnya tu turun kedua  
Atas kasihnya jua Ahmad Rasul yang mulia  
  
Dan atas segala keluarganya yang suci  
Dan sahabat yang mempunyai martabat yang 'ulia  
  
Dan atas segala isterinya yang suci  
Dan anak dan cucunya pula yang mulia  
  
Dan atas segala yang mengikuti baginya  
Dengan amal yang salah dengan sunat yang 'ulia

(Syed Muhammad al-Idrus 1931, 2)

- 2.57 Muhammad Rasulullah kalimah iman  
Yang dinamakan ulama orang aman  
  
Yang terkandung pada itu enam belas  
Faham kamu baik-baik jangan malas

## GENRE PUISI MELAYU TRADISIONAL

Siddik itu makna benar bagi nabi  
Yang mustahil dusta ia tiada sekali

Amanah pula satu lagi bagi nabi  
Yang mustahil khianat ia jauh sekali

(Ahmad Hj. Abdul Rauf 1925, 8)

Puisi di atas (56) dan (57) masing-masing terdiri daripada dua baris serangkap dengan jumlah perkataan daripada 6 hingga 8 dalam sebaris. Skema rimanya juga dapat dianggap terikat, iaitu a-a-, a-a, bagi contoh (57); sementara 56 masih a-a-, a-a dengan sedikit kekecualian, dan a-b, c-b dalam contoh 56. Daripada pemerhatian penulis setakat ini bentuk demikianlah yang dapat dianggap sebagai nazam dan digolongkan ke dalam genrenya yang tersendiri. Dan ini termasuk contoh (55) di atas yang sepatutnya disusun demikian:

2.58 Bahawa bagi raja sekalian  
Hendak ada menteri demikian.

Yang pada sesuatu pekerjaan  
Sempurnakan segala kerajaan.

Menteri inilah maha tolan raja  
Dan peti segenap rahsianya sahaja.

Kerana kata raja itu katanya  
Esa ertinya dan dua adanya.

Maka menteri yang demikianlah perinya  
Ada keadaan raja dirinya.

Jika raja dapat adanya itu  
Dapat peti rahsianya di situ.

### Bait, Ruba'i, Kit'ah, Masnawi dan Ghazal

Bait dalam sistem puisi Arab ialah satu rangkap syair yang terdiri daripada dua baris; sedang jumlah suku kata, pola meter dan pola rima tidak ditentukan. Di sini juga bermakna bahawa bait bukanlah suatu genre yang khusus, tetapi hanya satu istilah yang hampir sama dengan syair (puisi) dalam ungkapan berbait, bersyair atau berpuisi. Satu bait bermakna satu kuplet puisi yang lengkap dan tersendiri.

Dalam sistem puisi Melayu, bait juga mempunyai kedudukan yang sama, iaitu tidak merupakan genre yang tersendiri. Za'ba memberikan sebuah contoh bait seperti di bawah:

- 2.59 Seorang manakala hati dia  
dengan angan-angan tertipu daya.  
Dan bergaduh-gundah dengan loba akan  
kaya dunia yang bukannya tempat kaya.  
Dan terkelam-kabut dengan asap jahil  
Serta wujud sum'ah takbur dan ria:  
Mempersenda ia akan amal ibadat  
dan ma'asi melekas akan dia.  
Lupa ia hari huru-hara mati  
padanya yang tidak ia bersedia.

(Za'ba 1962, 239)

Menurut Za'ba (1962), bait dalam bahasa Melayu dipakai dengan pengertian-pengertian di bawah ini:

1. Satu-satu syair Arab atau Parsi dalam bahasa asalnya, dipetik dan dipakai dalam satu konteks cerita atau dalam ungkapan-ungkapan; serta diberikan erti dalam bahasa Melayu. Misalnya dalam *Sejarah Melayu* dalam kisah perempuan tua pelulut dengan Tun Teja, diberikan satu bait Arab:

Ertinya jangan kamu percaya selamat perempuan tua  
masuk ke dalam khemahmu. Adakah kamu percayakan  
selamat jika harimau bercampur kawan kambing?

لأنمن عجوزند حل في الخباء هل تأمن اسدابع الأعنام.

2. Disebut bait juga jika syair yang dalam bahasa asal itu tidak disebutkan tetapi diterjemahkan sahaja ke dalam bahasa Melayu, misalnya:

- 2.60 Tiap-tiap penyakit ada ubat  
Yang boleh diubatkan kepadanya  
supaya ia sembah,  
Kecuali penyakit ahmak-  
lemahlah olehnya siapa-siapa yang  
hendak  
menyembuhkannya  
Dalam bahasa Arabnya, seperti berikut:

لكل وآء يستطب به الا الخاقات اعيت من يداو بها.

3. Segala rangkap puisi Melayu yang dibuat mengikut timbangan puisi Arab disebut juga bait, seperti contoh yang diberikan mula-mula tadi (59). Contoh ini jelas sekali menunjukkan percubaan mengikuti dan mengekalkan timbangan wirama atau pola meter puisi Arab.

Ringkasnya apa yang diistilahkan sebagai bait dalam puisi Melayu ialah ungkapan-ungkapan dalam bahasa Arab atau Parsi, sama ada dalam bahasa asalnya, bersama atau tanpa terjemahannya dalam bahasa Melayu atau terjemahannya sahaja tanpa rangkap puisinya yang asal. Dengan demikian bait, dalam puisi Melayu tidaklah merupakan genre puisi yang tersendiri dan contoh-contoh yang diberikan dapat dianggap sebagai puisi terjemahan daripada sumbernya yang asal (Arab atau Parsi). Sementara yang lebih mendekati atau sesuai untuk digolongkan ke dalam sesebuah genre, dapat sahaja dilakukan demikian. Contoh (59) di atas tadi, dari segi bentuk (baris dan rima) juga isinya, tidak jauh bezanya dengan nazam. Kerana itu ia dapat dianggap nazam atau sebagai satu variasi syair (Syed Naquib 1968: 24–25).

Mengenai ruba'i juga terdapat sedikit kekeliruan. Menurut erti dan bentuknya yang asal dalam sistem prosodi Arab-Parsi, ruba'i ialah puisi yang terdiri daripada empat baris serangkap (*quatrains*) dengan rima akhir a-a-b-a atau a-a-a-b dan sedikit sekali a-a-a-a (Syed Naquib 1968, 24–25). Tetapi contoh di bawah ini kadang-kadang dikelirukan sebagai ruba'i, semata-mata kerana ia dipetik dari bukunya yang memakai judul demikian (Hasjmi 1976), dan sebagaimana yang terjadi kepada syair-syair Hamzah Fansuri yang kadang-kadang dikatakan ruba'i.

- 2.61 Hapuskan akal dan rasamu  
 Lenyaplah badan nyawamu  
 Pejamkan hendak dua matamu  
 Di sana lihat peri rupamu.

Adamu itu yogia kauserang  
 Supaya dapat negeri yang henang  
 Seperti Ali tatkala perang  
 Melepaskan duldul tiada berkekang.

## PUISI MELAYU TRADISIONAL

Hamzah miskin orang Uryani  
Seperti Ismail jadi urbani  
Bukannya Ajam dan A'rabi  
Nantiasa wasil dengar yang bagi.

(Hasjmi 1976, 28)

Puisi di atas adalah syair, iaitu sebuah syair Melayu yang tipikal dan yang jauh sekali bezanya dengan ruba'i, dan lain-lain *shi'r* Arab. Daripada sumbernya yang asal, iaitu *Tajus Salatin*, karya Bukhari al-Jauhari, didapati beberapa contoh ruba'i:

### 2.62 *Manusia*

Subhanahu Allah apa hal segala manusia  
Yang tubuhnya dalam tanah jadi duli yang sia-sia  
Tanah itu kujadikan tubuhnya kemudian  
Yang ada dahulu padanya terlalu mulia.

### 2.63 *Dunia*

Dunia juga yang indah maka tercenganglah manusia  
Sebab terkadang ia terhina dan lagi termulia  
Bahawa seseorang tiada kenal dunia itu  
Dalam dunia juga hidupnya sehari sia-sia.

(Alisjahbana 1971, 119)

Berdasarkan ciri-ciri ruba'i Arab-Parsi, itulah contoh-contoh yang tepat bagi ruba'i; dan Bukhari semestinya telah menterjemah daripada sumbernya yang asal ke dalam bahasa Melayu dengan mengekalkan ciri-ciri ruba'i Arab-Parsi itu. Walau bagaimanapun, dalam bidang puisi Melayu lama, ruba'i Arab-Parsi ini tidak berkembang. Tidak terdapat contoh-contoh lain, daripada buku-buku atau penggunaannya di kalangan masyarakat Melayu, baik di Semenanjung maupun di luar Semenanjung. Oleh itu dalam kajian ini ruba'i tidak dianggap sebagai puisi Melayu dan akan digugurkan saja daripada pembicaraan seterusnya.

Untuk kit'ah, masnawi dan ghazal, lihat contoh-contohnya di bawah ini:

### 2.64 *Kit'ah*

Jikalau kulihat dalam tanah pada ehwal  
sekalian insan

GENRE PUISI MELAYU TRADISIONAL

Tiadalah dapat kubezakan pada antara  
rakyat dan Sultan  
Fana juga sekalian yang ada, dengarkan yang  
Allah berfirman,  
Kulhu man 'alaihi, iaitu:  
Barang siapa yang di atas bumi ini lenyap juga.

(Arenawati 1971, 97)

**2.65 *Masnu'i/masnawi***

Umar yang adil dengan perinya  
Nyatalah pun adil sama sendirinya  
Dengan adil itu anaknya dibunuh  
Ini adalah yang benar dan sungguh  
Dengan beda antara isi alam,  
Lagipun yang menjauahkan segala syar  
Imamu'l hak ke dalam Padang Mahsyar  
Barang yang hak Taala katakan itu  
Maka katanya sebenarnya begitu.

(Alisjahbana 1971, 117)

**2.66 *Ghazal***

Kekasihku seperti nyawa adalah terkasih  
dan mulia juga  
Dan nyawaku pun, mana daripada nyawa itu  
jauh ia juga  
Jika seribu tahun lamanya pun hidup  
ada sia-sia juga  
Dan menghilangkan cintanya pun itu  
Kekasihku yang setia juga  
Kekasihku itu yang mengenak hatiku  
dengan rahsia juga,  
bukhari yang ada serta nyawa itu  
ialah berbahagia juga.

(Alisjahbana 1971, 120)

Kit'ah ialah daripada genre puisi Arab-Parsi yang tiada tentu ikatannya. Erti "kit'ah" dalam bahasa Arab ialah berpatah-patah, berkerat-kerat; dan keadaan berkerat-kerat ini dapat dilihat dalam puisi itu. Isi kit'ah biasanya mengandungi tema yang umum yang dapat diselesaikan dalam bait-bait yang ringkas; misalnya dalam contoh (64) di atas, mengandungi nasihat atau ingatan kepada

manusia, bahawa setiap yang hidup akan merasai mati.

Dari segi bentuknya, tidak ada ciri yang khusus untuk membezakannya daripada 'genre' yang lain iaitu bait, masnawi dan ghazal. Perbezaan yang dapat digunakan ialah dari segi isi; masnawi biasanya mengandungi rangkap-rangkap yang panjang menceritakan tokoh-tokoh yang terkenal dalam Islam, misalnya Umar dalam contoh (65); sebaliknya ghazal lebih berupa bait-bait yang ringkas, tetapi dalam baris-baris yang panjang dan setiap baris menunjukkan urutan makna dan persambungan untuk membentuk satu keseluruhan. Tema dan isi ghazal juga lebih banyak mengenai cinta dan kasih sayang.

Patut disebutkan di sini mengenai adaya istilah ghazal dalam aktiviti kesenian masyarakat Melayu, khasnya di beberapa daerah di negeri Johor. Aktiviti kesenian itu berupa nyanyian dan tarian yang bernada Timur Tengah. Bagaimanapun seni kata lagunya tidaklah dapat digolongkan sebagai ghazal yang kita bicarakan. Daripada pemerhatian penulis, dan perbandingan yang telah dilakukan, seni kata lagu-lagu itu adalah puisi Melayu daripada genre pantun, syair atau ungkapan-ungkapan puitis yang tiada tentu jenisnya.

Dalam pembicaraan-pembicaraan mengenai puisi Melayu lama, walaupun puisi-puisi jenis ini (bait, nazam, ruba'i, kit'ah, masnawi dan ghazal) dibicarakan oleh penulis-penulis dan para pengkaji, tetapi contoh-contoh yang dikemukakan adalah sama. Umumnya contoh-contoh itu dipetik daripada Bokhari al-Jauhari dalam *Tajus Salatin*, dan sedikit sekali daripada sumber-sumber yang lain. Kenyataannya di sini bahawa bentuk-bentuk ini tidak berkembang dalam puisi Melayu (seperti yang dikatakan oleh A. Teeuw mula-mula tadi), bukan sahaja kerana ikatannya tidak begitu difahami oleh penyair-penyair Melayu, tetapi juga strukturnya yang terikat kepada sistem bahasa dan prosodi Arab-Parsi. Bentuk dan ikatan demikian mungkin terlalu asing kepada penyair dan pendengar Melayu di samping menghalang kelancaran cara berfikir dan pernyataan perasaan yang merupakan aspek yang penting dalam penciptaan dan perkembangan sebuah genre puisi.

Berdasarkan keadaan di atas, penulis berpendapat bahawa bait, ruba'i, kit'ah, masnawi dan ghazal dapat dikeluarkan dari genre puisi Melayu. Ungkapan-ungkapan puisi demikian, daripada contoh-contoh yang telah ada dan yang akan datang, dapat dimasukkan ke

dalam golongan puisi-puisi Arab yang dipetik atau diterjemahkan ke bahasa Melayu. Dari segi istilah atau genre akan ditentukan oleh keadaannya yang asal, seperti yang dikenali dalam puisi Arab atau Parsi itu.

### Puisi Sukuan

Sebagaimana yang disebutkan mula-mula tadi, terdapat di Malaysia pelbagai bentuk puisi yang digunakan dan yang berkembang dalam kehidupan masyarakat daripada pelbagai suku kaum dari daerah Nusantara termasuk Jawa, Sunda, Rawa, Mandailing, Kerinci, Batak, Bugis, Banjarmasin dan lain-lain, tidak termasuk kaum bumiputera Sabah dan Sarawak. Kebanyakan puisi itu dapat dilihat persamaannya dengan genre-genre puisi Melayu yang popular, seperti pantun, syair, talibun, mantera dan prosa berirama. Puisi ini jelasnya dalam bahasa Melayu, dialek sesuatu suku kaum, Jawa, Banjar dan sebagainya. Tetapi terdapat juga, (seperti dalam bahasa Jawa) yang berlainan bahasanya dan bentuknya daripada puisi Melayu. Diberikan beberapa contoh di bawah sekadar menggambarkan kepelbagaiannya itu:

- 2.67 *Pantun dua baris dan pantun-pantun yang mudah dalam dialek Banjar.*

Tampungas tampungit  
Bangas kada baduit.

(Tempungas tempungit  
Cantik tidak berduit)

Pucuk rabung di tengah banyu  
Cucuk hidung talinga babanyu.

(Pucuk rebung di tengah air  
Cucuk hidung telinga berair)

Ungga-ungga apung  
Kacubung wali-wali  
Tasipak daun bakung  
Kana buku lali.

(Ungga-ungga apung  
Kecubung wali-wali  
Tersepak daun bakung  
Terkena buku lali).

PUISI MELAYU TRADISIONAL

Ungut-ungut burung pialing  
Hendak terbang ke nagari Judah  
Ungut-ungut paragah garing  
Karindangan kada bapadah.

(Menung-menung burung pialing  
Hendak terbang ke negeri Judah  
Menung-menung berpura gering (demam)  
Menanggung rindu tak berfaedah  
(Menanggung rindu, tetapi tidak guna  
atau malu untuk diceritakan).

(Pantun suku Banjar, Teluk Intan 1977)

- 2.68 *Pantun yang dinyanyikan dalam "adai-adai"*  
*Suku Brunei di Sabah:*

*Anding Sidang Naindong*  
Adai-adai naidong dayang-anding  
Anding sidang naindong  
Kapal belayar, dayang anding  
Labuan, dari Labuan  
Adai-adai naindong layang-anding  
Anding sidang naindong  
Sarat bermuat, dayang anding  
Surat gelagah surat  
Adai-adai naindong dayang anding  
Anding sidang naindong  
Kalau tidak dayang anding  
Tuan kerana tuan  
Adai-adai naindong dayang anding  
Mana saya dayang anding  
Anding sidang naindong  
Melarat hidup melarat

(Mohd. Taib Osman 1975, 55)

- 2.69 *Puisi seperti talibun, (Sarawak):*

Tun Abun  
Sa-gugak apit ina  
Apit lemum-lemum  
Sa-lulei balak lawei  
Balak pu-un-pu-un  
Je patak ubei ina  
Ubei kun-kun

GENRE PUISI MELAYU TRADISIONAL

Ulo tetak kika wang sarak  
Ulo bibong kika lawei padong  
Ibat pulau taci mo debai.  
(Tun Abun  
Sebekas ketupat disimpan  
Ketupat diembun  
Sebatang hujung pisang  
Pangkal-pangkal pisang  
Sekerat ubi disimpan  
Untuk dimakan  
Kepala dipotong disimpan dalam peti  
Kepala dibelah disimpan atas bumbung  
Buang ke atas tahi engkau sendiri).

(Melikin Hj. Kajai, Sarawak 1977)

2.70 *Mantera "pengasih" dalam bahasa Jawa:*

Bismi 'llahi 'r-Rahmani 'r-Rahim  
Pulut gono pulut sari  
Sari pulut sijabam bayi  
Suntak pulut ketemu mati  
Aninggali desen wong  
Pon keliwon, gambar makrullah  
Ajiku sang banyu putih  
Jabam bayi (sipolan)  
Siro nang iso  
Nang isore derojo  
Nang isore derojo  
Nang isore derojo  
Teko malas teko ase  
Ase marang badan ingson  
Ase kersane Allah  
La illah 'illa 'Allah  
Muhammad Rasul Allah.

(Dengan nama Allah yang pemurah lagi penyayang)

Sebelum rasa sudah merasa  
Termenunglah si gadis dalam sehari  
matilah akalnya  
Di tali pusat bayang-bayang  
Pintaku pada air suci  
Hai si gadis (si polan ...)  
Menangis di cucur atap  
Menangis di cucur atap  
Menangis di cucur atap  
Datanglah kasih

Datanglah kekasih  
Kasihlah padaku  
Allah yang memberi kasih  
Laila illah 'illa 'Allah  
Muhammad Rasul Allah.

(Supaat bin Hassan, Muar 1978)

Daripada pelbagai contoh yang diberikan di atas, dapat dilihat kebanyakan puisi itu daripada bentuk, isi dan fungsi yang sama dengan puisi Melayu; lalu, dari segi genrenya dapat sahaja digolongkan ke dalam mana-mana genre puisi Melayu, pantun, syair, prosa berrima, talibun, mantera dan sebagainya, dengan disebutkan bahasa atau dialeknya, misalnya Jawa, Banjar, Batak dan sebagainya. Dalam kajian ini puisi sukuhan tidak dianggap sebagai sebuah genre dalam puisi Melayu, kerana perbezaan bahasa dan daerahnya dan kerana persamaannya dengan genre puisi Melayu. Di sini dapat dianggap puisi sukuhan itu sebagai pengaruh, saudara atau adaptasi daripada puisi Melayu.

### Pembahagian Genre dalam Kajian Ini

Daripada perbincangan dan contoh-contoh yang diberikan di atas, dapatlah dibuat kesimpulan bahawa penggunaan istilah-istilah teknik kepada genre-genre puisi Melayu lama telah tidak dibuat secara sistematis, melalui perbandingan dan pendekatan yang ilmiah, tetapi lebih bergantung kepada tradisi penggunaan istilah-istilah tersebut oleh penutur-penutur dan pengguna-pengguna puisi itu dalam kalangan masyarakat Melayu lama. Secara tradisinya – selain daripada pantun dan syair – memang tidak ada istilah yang khusus diberikan untuk sesbuah genre. Daripada apa yang dapat dilihat, penggunaan istilah-istilah itu tidak mempunyai sesuatu konsep tertentu yang dapat diikuti dan diamalkan secara *regular*. Mahu tidak mahu harus diakui, bahawa istilah ‘puisi’ itu sendiri telah tidak wujud dalam bahasa Melayu dan dalam tradisi penciptaan puisinya. Apa yang ada ialah istilah-istilah yang difahami sekarang sebagai merujuk kepada bentuk dan genre. Justeru kerana itu, seorang penutur mungkin akan menggunakan salah satu daripada istilah-istilah itu untuk membawa kedua-dua konsep, iaitu puisi secara umum atau suatu genre secara khusus. Hasil daripada penggunaan demikian, dapat dilihat istilah ‘gurindam’ membawa makna

'puisi' (dalam ungkapan 'bergurindam') dan dalam masa yang sama, sebuah genre yang dikenali sebagai gurindam. Demikianlah juga yang terjadi pada istilah-istilah seloka, talibun, teromba, nazam dan beberapa yang lain.

Selain itu haruslah disedari, bahawa sesuatu bentuk puisi itu memang telah mempunyai istilah dan nama-nama yang berlainan, akibat daripada kewujudannya dan pemakaianya di dalam dan dari daerah-daerah yang berlainan di seluruh Nusantara. Misalnya, istilah-istilah talibun dan sesomba dikenali di Sumatera, pantun di Semenanjung dan di Minangkabau, mendapat nama-nama yang lain, seperti paparikan, suswalan, geguritan, umpama, andai-andai dan lain-lain di daerah-daerah lain di Nusantara. Sebaliknya terdapat pula keadaan yang merupakan kontra kepada keadaan itu, iaitu dengan adanya puisi yang tidak mempunyai nama atau istilah yang tertentu; misalnya talibun (bahasa berirama atau *rhythrical verse*) dan prosa lirik (prosa berirama atau *rhythrical prose*). Hasilnya, potongan-potongan puisi daripada genre-genre ini akan mendapat nama-nama yang berbeza, bukan saja diberikan oleh penutur dan pencipta puisi itu, tetapi juga oleh para pengkaji.

Walau bagaimanapun, dengan keadaan di atas tidaklah bermakna masyarakat Melayu lama itu sama sekali tidak mempunyai prinsip dalam penggunaan istilah-istilah seperti itu. Jika dipertimbangkan dengan saksama, kekeliruan-kekeliruan yang ditemui dalam penggunaan ini adalah juga oleh penggunaan yang sewenang-wenangnya oleh para pengkaji dan penulis-penulis buku-buku teks mengenai puisi. Sebagaimana yang dapat kita lihat, beberapa pengkaji memberikan nama, definisi, huraihan dan contoh berdasarkan pada suatu 'bahan' yang ada padanya atau yang dikenalinya dengan nama yang berkenaan. Misalnya pada huraihan untuk nazam, sebagai "puisi yang terdiri daripada dua belas baris serangkap, dengan isinya mengenai menteri dan pegawai-pegawai raja" adalah semata-mata berdasarkan nazam yang diberikan contohnya oleh Bokhari al-Jauhari: sedangkan pada kenyataannya, tidak semestinya begitu. Masih banyak kejadian seperti ini berlaku; sebahagian daripadanya akan disentuh semula pada bab-bab yang akan datang.

Suatu tradisi berhubung dengan pengistilahan ini di kalangan penutur dan pencipta puisi Melayu lama ialah bahawa mereka telah mempunyai dasar yang kukuh, dengan menggunakan ketiga-tiga

aspek puisi iaitu: bentuk, isi dan fungsi. Pantun dan syair ternyata mendapat namanya berdasarkan bentuk; gurindam, seloka dan peribahasa berirama lebih berdasarkan isi; sementara teromba, mantera dan dikir dipengaruhi oleh fungsi. Mohd. Taib Osman telah memberikan pendapat yang sama, dengan mengatakan:

Sebaliknya pula suatu istilah itu tidak bergantung kepada bentuk, tetapi kepada isi atau maksudnya. Misalnya kita tidak akan bersalah apabila kita katakan sesuatu ikatan puisi itu teromba. Apa yang kita tanggap sebagai teromba atau perbilangan adat ialah ikatan puisi yang menyatakan adat lembaga atau asal usul adat lembaga itu ... (Mohd. Taib Osman 1975, 131).

Dan di tempat lain, beliau menambah:

Soal bentuk memang penting, tetapi ikatan-ikatan puisi yang terkumpul di sini mendapat namanya bukan daripada bentuknya, seperti pantun atau syair, tetapi daripada fungsinya, seperti endui, perbilangan adat, teromba, mantera dan sebagainya (Mohd. Taib Osman 1975, 133).

Daripada pemerhatian yang agak teliti kita dapatkan penamaan itu tidak begitu sewenang-wenang seperti yang selalu disangkakan. Teromba tidak dikenali sebagai mantera dan mantera tidak dikatakan dikir. Teromba tetap merujuk kepada peraturan adat bersama variasi nama menurut tempat dan keadaan, iaitu tambo, terasul, perbilangan adat, kata-kata adat dan sebagainya. Demikian pula yang merujuk kepada magis, ritual, perbomohan dan perubatan tetap dinamai mantera dengan variasi nama yang tetap iaitu jampi, seraph, sembur, tangkal, puja, cuca, seru dan sebagainya. Oleh itu dalam membuat pembahagian genre dan istilah, tradisi dan gejala-gejala tersebut hendaklah dipertimbangkan.

Sehubungan dengan tradisi itu, pembahagian dan penentuan istilah dalam kajian ini akan menggunakan ketiga-tiga aspek tersebut:

1. Bentuk dan struktur, iaitu ikatan atau kontroversial tertentu pada sesuatu genre.
2. Tema dan isi, iaitu kandungan dan pembicaraan yang umum dalam sesebuah genre.
3. Fungsi (dan penyebaran), iaitu peranan dan tempat puisi itu dalam kehidupan masyarakatnya.

## GENRE PUISI MELAYU TRADISIONAL

Berdasarkan prinsip di atas, genre-genre puisi Melayu lama dapat dibahagikan demikian:

1. Dari segi bentuk dan struktur, puisi itu terbahagi kepada dua bahagian:
  - a. Yang tertentu, tetap atau terikat, yang membolehkan pembahagian dari aspek bentuk dan struktur.
  - b. Yang tiada tetap, bebas dan tidak terikat, yang memerlukan pembahagian dari aspek isi dan fungsi.
2. Yang tertentu bentuk dan strukturnya ialah: pantun, syair dan nazam.
3. Yang tiada tetap strukturnya ialah: gurindam, seloka, teka-teki, peribahasa berirama, talibun (atau sesomba), teromba, prosa berirama, mantera dan dikir (zikir).

Pemerihalan dasar genre-genre tersebut dapat diberikan demikian:

### 1. Pantun

Iaitu sejenis puisi yang (pada umumnya) terdiri daripada empat baris serangkap, empat perkataan sebaris, mempunyai rima akhir a-b-a-b, dengan sedikit variasi dan kekecualian. Tiap-tiap serangkap terbahagi kepada dua unit: pembayang atau sampiran dan maksud. Setiap rangkap dapat melengkapkan satu keseluruhan idea.

### 2. Syair

Iaitu sejenis puisi yang (pada umumnya) terdiri daripada empat baris serangkap, empat perkataan sebaris, mempunyai rima akhir a-a-a-a, dengan beberapa variasi dan kekecualian. Keseluruhan rangkap merupakan idea yang berurutan, tetapi (biasanya) setiap rangkap tidak dapat berdiri sendiri dan memerlukan beberapa rangkap untuk melengkapkan keseluruhan idea.

### 3. Nazam

Iaitu sejenis puisi yang (pada umumnya) terdiri daripada dua baris serangkap, dengan jumlah perkataan antara 4–6 atau lebih, dengan skema rima a-a, a-a atau a-b, a-b atau a-b, c-b atau

serima (*monorhyme*), dengan sedikit variasi dan kekecualian. Biasanya memerlukan beberapa rangkap untuk melengkapkan satu keseluruhan idea.

#### 4. Gurindam

Iaitu sejenis puisi yang tiada tentu bentuknya, sama ada terikat atau tidak. Bentuk yang terikat, terdiri daripada dua baris serangkap seperti syair dua baris atau nazam, mengandungi 3–4 perkataan atau hingga enam perkataan sebaris, dengan rima a-a, a-a atau serima (*monorhyme*). Biasanya memerlukan beberapa rangkap untuk melengkapkan atau keseluruhan idea. Bentuknya yang tidak terikat, tergolong sebagai puisi bebas, tiada tentu berangkap atau tidak, jika berangkap tiada tentu jumlah barisnya dalam serangkap, jumlah perkataan dalam sebaris, memakai rima atau tidak. Memerlukan beberapa baris atau rangkap untuk melengkapkan satu keseluruhan idea. Dari segi bentuknya ia sama seperti talibun, teromba dan mantera; tetapi tergolong sebagai gurindam kerana bahasanya bernas dan serius, dan isinya mengandungi nasihat, pengajaran dan kebenaran.

#### 5. Seloka

Iaitu sejenis puisi bebas, (sama seperti gurindam yang tidak berikat), berangkap atau tidak, jika berangkap tiada tentu jumlah barisnya dalam serangkap, jumlah perkataan dalam sebaris, memakai rima atau tidak. Memerlukan beberapa baris atau rangkap untuk melengkapkan satu keseluruhan idea. Dari segi bentuknya ia sama seperti gurindam, talibun, teromba dan mantera; tetapi tergolong sebagai seloka kerana isinya mengandungi sindirian, jenaka, mengusik, bersenda gurau atau perasaan-perasaan asyik, berahi, khayal dan mimpi.

#### 6. Teka-teki

Iaitu sejenis puisi yang tidak tentu bentuknya (sama seperti gurindam yang tidak tentu bentuknya), terdiri daripada sebaris atau beberapa baris, berangkap atau tidak, tiada tentu jumlah barisnya dalam serangkap, jumlah perkataan sebaris, memakai rima atau tidak. Sebaris atau serangkap dapat melengkapkan

satu keseluruhan idea. Dari segi bentuknya, ia sama dengan gurindam, seloka, talibun, teromba dan mantera dan mungkin mengandungi bentuk-bentuk lain, seperti pantun atau gurindam. Tergolong sebagai teka-teki kerana isinya mengandungi soalan atau tekanan terhadap sesuatu benda atau aspek, baik konkret maupun abstrak. Dari segi fungsinya, ia digunakan untuk maksud berteka-teki sama ada sebagai menguji atau hiburan.

#### 7. Peribahasa Berangkap/Peribahasa Berirama

Iaitu sejenis puisi yang terdiri daripada sekurang-kurangnya dua baris serangkap dengan jumlah perkataan dari empat hingga enam atau lebih dalam sebaris, memakai rima atau tidak. Tergolong sebagai peribahasa berangkap, kerana isinya adalah peribahasa, iaitu daripada jenis bidalan, pepatah, perbilangan, simpulan bahasa (*maxims*), kiasan, ibarat, tamsil, lidah pendeta dan madah. Terdapat ungkapan-ungkapannya digunakan dalam seloka dan teromba. Tiap-tiap serangkap dapat melengkapkan satu keseluruhan idea.

#### 8. Teromba

Iaitu sejenis puisi yang tidak tertentu bentuknya (sama seperti gurindam dan seloka), berangkap atau tidak, jika berangkap tiada tentu jumlah barisnya dalam serangkap, jumlah perkataan dalam sebaris, memakai rima atau tidak. Dari segi bentuknya, ia sama dengan gurindam, seloka, talibun dan mantera, atau mungkin mengandungi bentuk-bentuk yang lain, seperti pantun atau gurindam. Tergolong sebagai teromba, kerana isinya mengandungi peraturan dan undang-undang adat dalam suatu kelompok masyarakat dan berfungsi sebagai panduan dan amalan dalam masyarakat yang berkenaan.

#### 9. Talibun

Iaitu sejenis puisi yang tiada tentu bentuknya (sama seperti gurindam dan seloka), tiada tentu berangkap atau tidak, jumlah baris dalam serangkap, jumlah kata dalam sebaris, memakai rima atau tidak. Memerlukan beberapa baris dalam serangkap dan tiap-tiap serangkap atau seuntai dapat melengkapkan satu

keseluruhan idea. Dari segi bentuknya, ia sama dengan gurindam, seloka, teromba dan mantera; digolongkan sebagai talibun (atau sesomba) kerana isinya merupakan penceritaan yang terperinci mengenai sesuatu objek atau aspek, sama ada dalam ucapan atau cerita-cerita khususnya dalam genre penglipur lara. Fungsinya juga lebih umum sebagai ungkapan-ungkapan pemerian (*descriptive passages*) dalam ucapan atau cerita-cerita tersebut.

#### 10. Prosa Berirama

Iaitu sejenis puisi yang tiada tentu bentuknya, terjadi daripada baris-baris atau kalimat-kalimat yang berurutan, berangkap atau tidak; jika berangkap tiada tentu jumlah barisnya dalam serangkap dan jumlah kata dalam sebaris. Dari segi bentuknya, ia sama seperti talibun, mungkin terjadi daripada ungkapan-ungkapan talibun dan mungkin bersama dengan bentuk-bentuk yang lain, seperti pantun dan gurindam. Ia tergolong sebagai prosa berirama atau prosa lirik, kerana bentuknya yang mendekati prosa, iaitu merupakan cerita-cerita penglipur lara atau kaba; tetapi tergolong sebagai puisi kerana mempunyai ciri-ciri puisi, dengan kalimat-kalimat atau baris-baris yang berurutan, sejajar dan dituturkan dengan intonasi, rentak dan irama. Memerlukan beberapa baris atau rangkap untuk melengkapkan satu keseluruhan idea dan beberapa untai pula untuk memberikan sebuah 'cerita' yang lengkap.

#### 11. Mantera

Iaitu sejenis puisi yang tiada tentu bentuknya, berangkap atau tidak, jumlah baris dalam serangkap, jumlah perkataan dalam sebaris, memakai rima atau tidak. Serangkap mantera, panjang atau pendek, dapat melengkapkan satu keseluruhan idea. Dari segi bentuknya, ia sama seperti gurindam, seloka, talibun dan teromba, atau mungkin terjadi daripada kombinasi dengan bentuk-bentuk yang lain seperti pantun dan gurindam. Tergolong sebagai mantera kerana isi dan fungsinya, sebagai mantera untuk tujuan-tujuan magis, perubatan dan perbomohan.

## 12. Dikir (Zikir)

Iaitu sejenis puisi yang tidak tentu bentuknya, terjadi daripada baris-baris berangkap atau tidak, tiada tentu jumlah baris dalam serangkap, jumlah kata dalam sebaris, memakai rima atau tidak. Serangkap atau seuntai dikir dapat melengkapkan satu keseluruhan idea. Dari segi bentuknya ia sama seperti talibun, teromba dan mantera dan mungkin terjadi daripada kombinasi pelbagai bentuk seperti pantun, syair atau talibun; tergolong sebagai dikir atau zikir kerana isinya yang kebanyakannya berupa pujian kepada Allah dan Rasul-Nya dan berfungsi dalam kegiatan-kegiatan yang berhubung dengan istiadat, agama dan magis. Ke dalam golongan ini dimasukkan juga yang berupa nyanyian, tidak berbentuk agama (seperti dikir barat), kerana bentuk dan fungsi persembahannya dapat dikatakan sama.

Istilah-istilah lain yang dibincangkan dalam bahagian di atas tadi, tidak dianggap sebagai genre yang tersendiri, iaitu: pantun seloka, perbilangan, perbilangan adat, kata-kata adat, tambo, terasul, rejang, endoi, berzanji, marhaban, qasidah, hadrah dan dabus. Beberapa istilah yang lain telah dipakai semula sebagai variasi atau pilihan kepada istilah yang dipilih, iaitu talibun, sesomba, peribahasa berirama dan prosa lirik; sementara puisi-puisi terjemahan atau saduran daripada puisi Arab-Parsi, tidak dianggap sebagai genre puisi Melayu, iaitu bait, ruba'i, kit'ah, masnawi dan ghazal.

Ringkasnya, menurut pembahagian dalam kajian ini, genre puisi Melayu lama itu ialah dua belas (12), iaitu:

- (1) Pantun
- (2) Syair
- (3) Nazam
- (4) Gurindam
- (5) Seloka
- (6) Teka-teki
- (7) Peribahasa berangkap
- (8) Teromba
- (9) Talibun (atau sesomba)
- (10) Prosa berirama atau prosa lirik
- (11) Mantera
- (12) Dikir atau zikir.

**PUISI MELAYU TRADISIONAL**

Seterusnya pembicaraan dalam kajian ini, dari segi genre dan fungsi akan berdasarkan pembahagian dan penetapan di atas. Carta di halaman sebelah menggambarkan kesimpulan daripada keseluruhan perbincangan dalam bab ini.

**CARTA I: Genre dan Istilah Puisi Melayu Lama yang Ada Sekarang dan yang  
Dirumuskan Dalam Kajian Ini.**

Istilah dan Genre yang Ada Sekarang	Genre	Istilah dan Genre dalam Kajian Ini		
		Dasar-dasar Penetapan Bentuk/Struktur	Tema dan Isi	Fungsi
Pantun, seloka, pantun seloka, talibun, (pantun) rejang, pantun ibarat, pantun adat dan lain- lain.	Pantun	Bentuk terikat: berang- kap dan berpasangan, dua baris, empat, enam, lapan dan seterusnya; empat perkataan sebaris; berima a-b-a-b dengan sedikit variasi; terbahagi kepada dua unit: pembah- yang dan maksud. Tiap serangkak dapat meleng- kapkan satu keseluruhan idea.		

*Sambungan CARTA I*

Syair, nazam, ruba'i, Syair  
(syair) rejang, seloka,  
pantun seloka, endoi,  
hadrah dan lain-lain.

Bentuk terikat: berangkap, umumnya empat baris serangkap dengan sedikit variasi; memakai rima a-a-a-a dengan sedikit variasi; keseluruhan rangkap-rangkap merupakan satu idea yang berurutan. Empat perkataan sebaris; memerlukan beberapa rangkap untuk melengkapkan satu keseluruhan idea.

Nazam, syair, endoi, Nazam  
dikir (zikir)

Bentuk terikat: berangkap dua baris serangkap; empat, enam atau lebih perkataan sebaris; memakai rima a-a, a-b, atau seirama, dengan sedikit variasi; memerlukan beberapa rangkap untuk melengkapkan satu keseluruhan idea.

Mengandungi pengajaran agama, sifah dan tauhid serta pemerian yang terperinci mengenai kehidupan dan perjuangan Rasulullah S.A.W.

### *Sambungan CARTA I*

Gurindam, seloka, perbilangan, perbilangan adat, gurindam adat, teka-teki, teromba, mentera bahasa berirama dan lain-lain.

Gurindam Terikat dan tidak terikat. Bentuk terikat: berangkap, dua baris serangkap; 5–6 perkataan sebaris; memakai rima a-a atau serima; setiap rangkap dapat melengkapkan satu keseluruhan idea. Bentuk tidak terikat: tiada tertentu bentuknya, berangkap atau tidak; tiada tentu jumlah baris dalam serangkap, jumlah perkataan sebaris, memakai rima atau tidak; setiap rangkap dapat melengkapkan satu keseluruhan idea.

Isinya bernas; mengandungi nasihat, pengajaran dan kebenaran.

*Sambungan CARTA I*

Seloka, gurindam, pantun, pantun seloka, syair, bahasa berirama, peribahasa, peribahasa berangkap dan lain-lain.	Seloka	Tidak terikat: berangkap atau tidak; tiada tertentu jumlah baris serangkap, jumlah perkataan sebaris, memakai rima atau tidak; setiap rangkap dapat melengkapkan satu idea.	Sindiran, ejekan, gurau-senda dan bermain-main; atau perasaan asyik, berahi, khayal dan mimpi.
Teka-teki, pantun, syair, gurindam, seloka, bahasa berirama.	Teka-teki	Tidak terikat: berangkap atau tidak; tiada tentu jumlah baris dalam serangkap, jumlah perkataan dalam sebaris; memakai rima atau tidak; mungkin terbina melalui kombinasi dengan bentuk-bentuk lain. Setiap rangkap dapat melengkapkan satu keseluruhan idea.	Mengandungi soalan (dan jawapan) yang merujuk kepada sesuatu objek atau aspek, baik konkrit mahupun abstrak.  Bertujuan menguji kecekapan berfikir dan berpuisi, baik bertujuan hiburan mahupun sebagai sayembara.

*Sambungan CARTA 1*

Peribahasa, peribahasa berirama, peribahasa berangkap, bidalan, perbilangan, pepatah adat dan lain-lain.

Peribahasa berangkap/ peribahasa berangkap, iaitu lebih daripada sebaris dalam peribahasa berirama. Tidak terikat; tetapi serangkap; tiada tentu jumlah perkataan sebaris; berima atau tidak; setiap rangkap dapat melengkapkan satu keseluruhan idea.

Peribahasa, pepatah, bidalan, perbilangan, perumpamaan, kiasan, tamsil, ibarat, madah dan lidah pendeta.

Perbilangan, perbilangan adat, kata adat, pepatah adat, teromba, terasul, tambo, gurindam adat, bahasa berirania, talibun, pantun adat dan lain-lain.

Teromba

Tidak terikat: berangkap atau tidak; tiada tertentu jumlah baris serangkap, jumlah perkataan sebaris, berima atau tidak. Mungkin mengandungi bentuk yang lain. Setiap rangkap dapat melengkapkan satu keseluruhan idea.

Mengandungi salasilah adat dan lembaga, lunas-lunas adat dan undang-undang dalam satu kelompok masyarakat.

Panduan dan amalan dalam kehidupan masyarakat yang berkenaan.

*Sambungan CARTA I*

---

Bahasa berirama, gurindam, talibun, sesomba, mantera, perbilangan, perbilangan adat, ' <i>rhythmical passages</i> ', ' <i>descriptive passages</i> ', ' <i>metrical passages</i> ', ' <i>metrical island</i> ', 'inset', 'runs' dan lain-lain.	Talibun/ Sesomba	Tidak terikat: berangkap atau tidak; tiada tertentu jumlah baris serangkap, jumlah perkataan sebaris; berirama atau tidak. Tiap serangkap dapat melengkapkan satu keseluruhan idea.	Mengandungi pemerian yang terperinci mengenai sesuatu aspek atau konteks dalam cerita-cerita penglipur lara Melayu atau kaba Minangkabau.	Menghias ucapan dan cerita, memberikan pemerian yang menarik untuk tujuan estetika atau memperindah persembahan cerita.
Bahasa berirama, penglipur lara, kaba, prosa, berirama ( <i>rhythmical prose</i> ) prosa lirik ( <i>lyric prose</i> )	Prosa berirama/ prosa lirik	Tidak terikat: terdiri daripada baris-baris kalimat yang berurutan, sejajar atau tidak; tidak tertentu berangkap atau tidak, jumlah baris serangkap, jumlah perkataan sebaris; berima atau tidak. Mungkin terbina daripada gabungan pelbagai bentuk: pantun, talibun atau teromba.	Seluruhnya merupakan naratif atau cerita dari pada genre penglipur lara atau kaba.	Merupakan satu cara stail persembahan dan kemahiran pencerita.

---

*Sambungan CARTA I*

---

Jampi, mantera, serapah, sembur, tangkal, puja, cuca, seru doa, bahasa berirama.	Mantera	Tidak terikat: terdiri daripada baris-baris kalimat yang berurutan, panjang atau pendek, sejarar atau tidak; tidak tertentu berangkap atau tidak, jumlah baris se-rangkap, jumlah perkataan sebaris, berima atau tidak; mungkin terbina daripada gabungan pelbagai bentuk: pantun, talibun atau teka-teki. Setiap untai dapat melengkapkan satu keseluruhan idea.	Merupakan seruan dan pemujaan terhadap kuasa-kuasa ghaib termasuk Allah dan Rasul, untuk tujuan magis, upacara, perubatan dan perbomohan.	Sebagai salah satu syarat dalam perlakuan dan kepercayaan berhubung dengan upacara, magis, perubatan dan perbomohan.
--	---------	---	---	--

---

*Sambungan CARTA I*

---

Dikir, zikir, hadrah, dabus, marhaban, berzanji, qasidah dan lain-lain.	Dikir/zikir	Tidak terikat: berangkap atau tidak; tidak tertentu jumlah baris dalam serangkap, jumlah perkataan dalam sebaris, berima atau tidak; mungkin terbitna bersama bentuk-bentuk yang lain, pantun, syair atau talibun. Tiap serangkap atau seuntai dapat melengkapkan satu keseluruhan idea.	Mengandungi puji-pujian terhadap keagungan dan kekuasaan Allah, riwayat hidup dan mukjizat Rasulullah, serta pengajaran keagamaan yang lain yang berupa nyanyian untuk hiburan di samping menyampaikan pengajaran.	Mengiringi perlakuan dan kegiatan berupa hiburan dan keagamaan; pada beberapa tempat mempunyai konotasi magis berhubung dengan kepercayaan dan amalan Sufi.
---	-------------	--	--	---

---

dituliskan pada akhirnya. Maka ia bukanlah suatu kesalahan yang besar apabila kita mengatakan bahawa pantun Sunda ini adalah hasil karya seorang penyair yang tidak dikenali. Tetapi ia juga bukanlah suatu kesalahan yang besar jika kita mengatakan bahawa ia adalah hasil karya seorang penyair yang tidak dikenali. Tetapi ia juga bukanlah suatu kesalahan yang besar jika kita mengatakan bahawa ia adalah hasil karya seorang penyair yang tidak dikenali.

## BAB III

### PANTUN

#### Beberapa Persoalan tentang Pantun

DALAM dua bab yang lalu telah pun disentuh tentang pantun dan beberapa genre puisi Melayu lama yang lain, tetapi pembicaraan itu tidak terperinci dan tidak tertumpu kepada soal genre, namun beberapa pendapat mengenai pantun telah pun dikemukakan antaranya termasuk:

1. Etimologi dan erti perkataan pantun.
2. Asal usul penciptaan pantun.
3. Tarikh atau zaman terciptanya pantun.
4. Hubungan syarat-ibarat dalam sesuatu untai pantun.

Selain itu, dalam Bab I telah dibicarakan dengan ringkas ciri-ciri stalistika puisi Melayu lama itu dengan memasukkan beberapa contoh pantun. Dalam bab ini akan dibincangkan semula soal-soal itu secara terperinci dengan maksud memberikanuraian yang lebih lanjut di samping beberapa pandangan terhadap pendapat-pendapat itu.

#### Etimologi dan Erti Perkataan Pantun

Mengenai asal, etimologi atau akar kata perkataan 'pantun' penulis bersetuju dengan pendapat Brandstetter yang telah banyak membuat kajian perbandingan bahasa-bahasa Polynesia-Austronesia. Menurutnya, perkataan "Pantun Sunda" itu akarnya ialah *tun* yang terdapat juga dalam bahasa Pampanga *tuntun* yang bererti teratur; dalam bahasa Tagalog *tonton*, mengucapkan sesuatu dengan susunan yang tertentu; dalam bahasa Jawa Kuno *tuntun* bererti

benang, *atuntun*, teratur dan *matuntun*, bererti memimpin. Dalam bahasa Bisaya, *panton* bermakna mendidik; bahasa Toba, *pantun* adalah kesopanan atau kehormatan. Ringkasnya, akar kata *tun* dalam bahasa-bahasa Nusantara merujuk kepada sesuatu yang teratur, yang lurus, baik secara konkrit atau abstrak. Keadaan yang demikian jelas dirasakan dalam perkataan 'pantun' yang juga merupakan sebagai bentuk atau cara yang teratur dalam melahirkan sesuatu maksud atau fikiran.

Persoalan bagaimana mula perkataan 'pantun' itu digunakan sebagai istilah teknik kepada suatu bentuk sastera masih belum ter-dapat sesuatu keterangan yang meyakinkan; sebagai contoh dapat disebut seorang sarjana yang berkecenderungan mengatakan bentuk pantun bermula di Minangkabau dan perkataan 'pantun' adalah daripada bahasa Melayu Minangkabau, *panuntun* (penuntun). Kemungkinan ini didasarkan kepada bentuk-bentuk sastera lisan Minangkabau yang lainnya iaitu 'pepatah' dan 'petitih'. Pepatah adalah cara, bentuk atau susunan bahasa untuk mematahkan fikiran orang lain dan 'petitih', sebagai suatu cara untuk meniti dan mencapai tujuan. Dan 'penuntun' adalah bentuk sastera lisan yang bertujuan memberikan tuntunan bagi manusia pendukung kebudayaan dan peradaban Minangkabau. Dalam perkembangannya 'panuntun' pun disebut dan dikenal sebagai pantun (Hamid Jabar 1979, 5).

Pendapat seperti itu tentu sahaja tidak boleh diterima tanpa bukti yang cukup. Ia juga tidak menjelaskan persoalan pokok bagaimana perkataan 'panuntun' atau 'pantun' dengan pengertian yang hampir sama dengan 'pepatah' digunakan sebagai istilah teknik kepada suatu bentuk puisi seperti yang digunakan sekarang. Memang dalam penggunaannya yang lain, erti perkataan pantun lebih dekat kepada 'umpama', 'seperti' atau, 'laksana', iaitu perkataan-perkataan yang selalu dikaitkan dengan 'pepatah' (Za'ba 1962, 219). Dalam beberapa rangkap pantun, perkataan itu digunakan dengan pengertian demikian; misalnya:

Raden Inu Raja Kuripan  
 Dicuri Ratu Sijuindu  
*Sepantun* jentayu menanti hujan  
 Tidak kuasa menanggung rindu.

(*Pantun Melayu* 1958, 57)

Hujanlah hari rintik-rintik  
 Tumbuh cendawan gelang kaki  
 Kami *sepantun* telur itik  
 Kasihan ayam maka menjadi.

(*Pantun Melayu* 1958, II)

Anak Tiung atas rambutan  
 Berbunyi bertonikat paruh  
*Sepantun* anjung di lautan  
 Datang angin bertolak jauh.

(Harmsen 1875, 508)

Sesungguhnya pengertian pantun sebagai pepatah atau peribahasa ada perkaitannya dengan perkataan dan pengertian yang sama dalam bahasa-bahasa Nusantara yang lain. R. Hoessein Djajadiningsrat, memetik keterangan Winter dalam *Javaansche Zamenspraken* (jil ii, hlm 207) bahawa *pari* yang bererti *basa, babasan*, iaitu peribahasa atau perbandingan; dan peribahasa itu dipakai bagi orang yang suka membuat perbandingan untuk mengolok-olokkan. Dalam bahasa Jawa pula perkataan pantun itu adalah bentuk Krama kepada *pari*, iaitu kependekan daripada *paribahasa* atau *pribha'sja'* dalam bahasa Sanskrit. Ertinya di sini, perkataan pantun bererti juga paribasa atau peribahasa dalam bahasa Melayu (Djajadiningsrat 1933, 1934).

Perhubungan makna seperti ini dapat juga dilihat dalam bahasa Melayu Tengah (*Middle Malay*), iaitu bahasa Serawai dan Basemah. Dalam bahasa-bahasa ini terdapat istilah-istilah *andai-andai* dan *guguritan* iaitu cerita prosa yang diucapkan amat cepat dan dengan lagu yang '*monotonous*'; sedang sajak atau puisi yang hampir sama dengan pantun Melayu, dalam bahasa ini dikenali sebagai redjong (Helffrich 1894, 1904).

Perkataan *andai-andai* di sini sama pula asalnya dengan perkataan Batak, *ende-ende*, yang di dalamnya terdapat akar kata *dai* yang seperti akar kata tun mengandungi pengertian mengatur, membariskan, menyusun dan telah banyak pula melahirkan perkataan-perkataan seni lainnya. Brandstetter selanjutnya memberikan kata *daidai* dalam bahasa Bisaya, bermakna teratur, berbaris dan dalam bahasa Dayak; *lundai* dan 'londe' di Kalimantan

bermakna amat panjang; Pampanga, *tundaian*, bermakna perkakas bertenun dan bahasa Melayu *pandai* bererti tukang atau ahli. Perkataan *guritan* pula dalam bahasa Melayu tengah sama asalnya dengan Sunda, *guguritan* yang bererti menyusun sajak, menulis bersajak untuk bersenang-senang, kedua-duanya berasal daripada akar kata *rit* yang bererti tali, baris, garis dan banyak pula menghasilkan perkataan-perkataan seni yang lain. Contoh-contoh yang dikemukakan ini menunjukkan perbandingan antara *andai-andai* dengan *ende-ende* samalah seperti *guritan* dan *guguritan* dan seperti perkataan *pantun* dalam bahasa Sunda dengan perkataan yang sama dalam bahasa Melayu. Ertinya di sini, perkataan-perkataan yang sama akarnya, dalam suatu bahasa dipakai untuk suatu karangan prosa dan dalam bahasa yang lain untuk suatu karangan puisi. "Menurut asal usul ini, perkataan-perkataan itu telah amat tua dan pastilah ertinya dalam bahasa Melayu perserupaan dan sebagainya datang kemudian." (Djadidiningrat 1934, 253).

Dengan keterangan-keterangan di atas, dapatlah diambil kesimpulan bahawa perkataan pantun sebagai istilah teknik kepada suatu bentuk sastera, prosa atau puisi – memang telah wujud begitu lama. Ertinya yang asal ialah sesuatu yang teratur, tersusun, suatu karangan yang bahasanya terikat atau tidak. Pertalian istilah dan erti seperti ini memang suatu keadaan yang umum, misalnya istilah bait untuk suatu genre puisi Arab berkembang daripada pengertian yang konkret iaitu khemah, membuat khemah atau merangka rumah. Perlakuan merangka rumah sama ideanya dengan merangka puisi. Demikian juga keadaan yang teratur dan tersusun yang umumnya ada dalam akar kata *tun* pada bahasa-bahasa Nusantara, menjadi *pantun* sebagai kata-kata yang tersusun, teratur, terikat yang jelas pula kaitannya dengan membentuk atau menulis puisi. Jika pendapat ini diterima, perkataan pantun yang dikatakan berkembang daripada erti perserupaan atau perkataan 'panuntun' dalam bahasa Minangkabau seperti yang dikatakan mula-mula tadi adalah perkembangan yang terkemudian daripada perkataan pantun sebagai suatu bentuk sastera, iaitu puisi.

### **Asal Usul Penciptaan Pantun**

Daripada perbincangan-perbincangan yang berlarutan mengenai asal terjadinya pantun hanya ada dua pendapat yang dominan, tetapi

berkontras antara satu dengan yang lain. Yang satu dikemukakan oleh Van Ophuijsen dan yang lain oleh R.J. Wilkinson dan R.O. Winstedt. Pendapat yang pokok daripada Van Ophuijsen ialah bahawa asal pantun itu adalah daripada bahasa daun: "pada bangsa Mandailing adalah kebiasaan bahawa orang yang bercinta-cintaan itu dalam surat-menyrat memakai daun dan dengan itu bermaksudkan perkataan yang sebuni dengan nama daun itu. Dengan daun *sitanggis* dan daun *pahu* misalnya, dinyatakan perkataan *tangis* dan *au*, iaitu saya, sebuni dengan itu. Dan pada susunan beberapa nama tumbuh-tumbuhan menjadikan beberapa baris yang berirama, diikuti oleh dua baris yang sebuni dengan itu yang menyatakan maksudnya; demikianlah terjadinya ende-ende. Sesungguhnya ada ende-ende dengan nama tumbuh-tumbuhan dalam dua baris yang pertama (Djajadiningrat 1934, 198).

Namun, Van Ophuijsen sendiri mendapati dalam kebudayaan Melayu tidak pernah ada bahasa daun; maka untuk menyokong hipotesisnya itu dia memberikan contoh kepada kebiasaan masyarakat Melayu di Sibolga, di mana seorang suami, selepas beberapa hari berkahwin, memberikan antara lain kepada isterinya ikan belanak dengan maksud memintakannya beranak, kerana perkataan beranak sebuni dengan *belanak*. Dari segi erti juga, Ophuijsen mendapati perkataan pantun itu sama dengan ende-ende. Dalam bahasa Batak-Toba, ende-ende disebut *umpama* yang juga bererti perbandingan, perserupaan, pepatah dan lain-lain; iaitu sama pula dengan pengertian pantun.

R.J. Wilkinson, ketika meragukan pendapat Ophuijsen itu menghujah bahawa kejadian pantun mungkin berasal daripada kebiasaan orang-orang Melayu menggunakan perkataan-perkataan yang sebuni, yang bersjak atau rima; suatu bunyi menjadi saranan (*suggestive*) kepada yang lain. Demikian luasnya kebiasaan itu hingga mungkin dapat dianggap keadaan sebaliknya, iaitu bukanlah bahasa daun yang menimbulkan kebiasaan itu, tetapi kebiasaan itulah yang melahirkan bahasa daun. Winstedt juga merasa keberatan terhadap pendapat Ophuijsen, kerana bahasa percintaan melalui daun-daun itu terasa dibuat-buat dan tidak bersahaja. Dalam masyarakat Melayu tidak pernah ada kejadian seorang lelaki mengirim gadisnya kayu jati atau daun jati untuk menyatakan yang ia 'menaruh hati' kepadanya, atau seorang gadis mengantarkan

padi kepada seorang pemuda untuk menyatakan 'jadi' terhadap sesuatu yang mereka rencanakan.

Pantun yang dimaksudkan oleh Winstedt itu ialah:

Kota Pahang dimakan api  
Antara jati dengan Bentan  
Bukan kularang kamu berlaki  
Bukan begitu perjanjian.

Kalau padi katakan padi  
Tidak saya tertampi-tampi  
Kalau jadi katakan jadi  
Tidak saya ternanti-nanti.

Apa yang dapat diperhatikan dalam pantun-pantun Melayu itu terlalu sedikit yang mengandungi '*cryptic jargon*' atau penggunaan nama-nama ikan, bunga-bunga atau tumbuh-tumbuhan dalam kuplet-kuplet sampiran sebagai saranan kepada bunyi-bunyi yang sama dalam kuplet-kuplet maksud (Winstedt 1960, 203).

Djajadiningrat juga bersetuju dengan pendapat Wilkinson dan Winstedt dalam hal ini. Beliau mengemukakan menurut suatu kumpulan wawangsalan dan sisindiran Sunda yang diterbitkan oleh Balai Pustaka, di antara penduduk-penduduk Bentan yang berbahasa Sunda, seorang perawan kadang-kadang memakai warna pengikat rokok yang diberikan kepada kekasihnya, untuk menyatakan perasaannya. Misalnya *hedjo* (hijau), ertinya *nendjo*, iaitu melihat, melihat dalam angan-angan; *hideung* (hitam), ertinya *eurem*, iaitu bengenti; maksudnya dia telah tidak lagi mencintainya. Bahasa yang berdasarkan perkataan yang sebunyi seperti ini pastilah belum berapa lama usianya (Djajadiningrat 1934, 248). Kerana itu dapatlah difahami penggunaan bahasa daun, seperti yang dihujahkan oleh Ophuijsen itu pun bukanlah suatu yang lama dan asal bagi seluruh penduduk Nusantara, khususnya masyarakat Melayu yang melahirkan pantun itu.

Berdasarkan pendapat-pendapat di atas kejadian pantun mungkin lebih hampir kepada kemungkinan yang dikemukakan oleh Wilkinson dan Winstedt; iaitu kuplet pertama dalam sebuah pantun berisi suatu saranan bunyi (*sound suggestion, klank suggestie*), iaitu

bunyi yang memberikan bayangan kepada kplet yang akhir. Kebiasaan menggunakan bunyi-bunyi yang *suggestive* inilah dipercaya menjadi permulaan kepada penciptaan pantun. Bunyi-bunyi yang mempunyai saranan ini tidak semestinya bersajak, tetapi umumnya berasonansi. Dalam Bab I telah dibincangkan tentang unsur-unsur asonansi yang begitu luas dipakai dalam pembentukan rima, hingga secara keseluruhan dapat dikatakan dalam puisi Melayu lama itu asonansi lebih penting kedudukannya daripada rima. R.O. Winstedt (1960) menyentuh tentang kepentingan asonansi dalam pantun:

*The theory of assonance alone is broad enough to cover not only the origin of possible herbalist love-code but all those quatrains that have no other connection at all between the couplets except the compulsion of rhyme* (hlm 203 – 204).

Kehadiran asonansi, rima atau sajak dalam satu kesejajaran sesungguhnya memberikan saranan kepada bahagian lain dalam kesejajaran yang sama, misalnya:

Kayu lurus dalam lelang  
Kerbau kurus banyak tulang.

Pinggan tak retak nasi tak dingin  
Engkau tak hendak aku tak ingin.

Tokok takal muka pintu  
Orang nakal memang begitu.

Kalimat-kalimat yang bersajak di atas itu dikenali sebagai pantun dua baris atau pantun kanak-kanak. Dari segi bentuknya ia merupakan pantun dua baris kerana terdiri daripada dua baris kalimat yang membina suatu untai pantun yang lengkap. Dari segi isi atau temanya, ia adalah pantun kanak-kanak. "Pinggan tak retak nasi tak dingin" merupakan pepatah; dan kerana ia berima, dapat pula digolong sebagai peribahasa berirama atau peribahasa berangkap. Dari segi struktur juga pantun-pantun dua baris di atas dapat dijadikan pantun empat baris, iaitu dengan memecahkan setiap baris kepada dua kolon:

Pinggan tak retak  
Nasi tak dingin  
Engkau tak hendak  
Saya tak ingin.

Walau bagaimanapun, pantun-pantun dua baris seperti di atas tidaklah semestinya dianggap sebagai permulaan kepada pantun-pantun empat baris, atau mahu dikatakan pantun-pantun empat baris itu berkembang daripada pantun-pantun dua baris. Daripada apa yang dapat diperhatikan kedua-dua bentuk itu berkembang sejajar dalam masa yang sama, perbezaannya hanya dalam konteks dan penggunaannya (Mohd. Taib Osman 1968, 17–27).

Perkembangan dan pemakaian bunyi-bunyi yang bersaranan dalam tradisi masyarakat Melayu itu terdapat juga dalam masyarakat lain di Nusantara. Seorang suami Sibolga yang dikatakan mulamula tadi memberikan ikan belanak kepada isterinya supaya ia lekas mendapat anak. Seorang pekedai di Jawa meletakkan daun cemara di depan kedainya untuk memberi maksud ‘mara’ (datang), supaya pelanggan ramai datang; demikian juga kebiasaan orang-orang Bugis memberikan sejenis tiram yang disebut *peno-peno*, ertiinya penuh, atau daun *riwu-riwu*, kepada kedua-dua pengantin dengan maksud supaya lekas kaya dan beroleh harta beribu-ribu, adalah beberapa contoh dalam menunjukkan keadaan ini. Dan penggunaan bunyi-bunyi yang bersaranan inilah yang membantu dalam proses penciptaan pantun (Zuber Usman 1975, 140–141).

Penggunaan bunyi-bunyi demikian yang lebih rumit dapat dilihat dalam perkembangan yang terkemudian iaitu seperti dalam wangsalan Jawa atau wawangsalan Sunda. Kedua-duanya adalah suatu bentuk teka-teki yang unik bentuknya dan hanya difahami oleh orang-orang yang benar-benar terdidik dalam tradisi itu. Wangsalan ini banyak dipergunakan, baik dalam karangan prosa, puisi, maupun dalam percakapan, juga digubah dalam lagu untuk nyanyian dengan tembang macapat dan sebagainya. Sebagai contoh, perhatikan wangsalan di bawah ini:

Uler kembang  
Kang sela panglawed ganda  
Betahena  
Tumeka ing pati pisan.

Maksudnya:  
Ulat terapung (lintah)

Batu campur bau-bauan (pipisan)  
Tahanlah  
Walau sampai mati pun.

(Achadiati Ikram 1964, 262)

Uler kembang (ulat terapung) adalah lintah. Kata lintah di sini merupakan saranan kepada *betahena*, kedua-duanya mengandungi unsur *tah*. Yang dimaskudkan dengan "selang panglawed ganda" (batu pencampur bau-bauan) adalah pipisan yang sesuai pula bunyinya dengan *pisan*. Suatu contoh lain yang lebih kompleks dapat dilihat dalam wangsalan karangan Mangkunegara IV di bawah ini:

Kembang nipah (dongong)  
Sumber tengahing sawah  
Dongone bae'ing patjake'  
Kedap tesmak pendelenge'  
Pratanda gede melike', kakang Djanaraga.

(Mangkunegara 1953, 68)

Maksudnya:  
Bunga nipah  
Tersebar di tengah-tengah sawah  
(Janganlah) duduk melihat saja  
Dengan tidak terkelip mata  
Itu tandanya hatimu tamak dan loba.

Dalam wangsalan di atas hanya satu kata sahaja, iaitu *dongong* – yang merujuk kepada sifat yang kurang baik dan dikecam – terdapat dalam bait itu. Dengan demikian contoh itu masih belum jelas untuk menunjukkan perkaitan bunyi yang tersembunyi di dalamnya, berbanding dengan contoh berikut – diberikan oleh Djajadiningrat (1934) – yang lebih jelas dalam memberikan saranan bunyi:

Koenir pita  
Wilangan lima ping lima  
Jen ketemoe  
Soenawe' bae' wis trima.

Maksudnya:  
Kunyit kuning

Bilangan lima kali lima  
 Kalau saya bertemu dengan dia  
 Telah besarlah hati saya kalau dapat saya  
 memberi isyarat kepadanya dengan melambai.

Kunyit kuning ialah *temu* iaitu perkataan yang umum bagi kunyit (sama seperti 'temu' dalam bahasa Melayu yang bermakna pelbagai jenis halia atau kunyit liar, *scitamincae*) (Wilkinson 1901, 190). Dan perkataan ini memberikan saranan kepada 'ketemu' dalam baris kedua. Lima kali lima ialah dua puluh lima, dalam bahasa Jawa, *selawe* dan perkataan ini sebunyi dengan *awe* bererti melambai. Jadi, dalam wangsalan ini yang penting ialah dua perkataan yang sebunyi.

Daripada contoh-contoh yang diberikan di atas, Achadiati Ikram (1964) membuat kesimpulan:

Bahawa wangsalan adalah suatu perkembangan daripada bentuk pantun, suatu gejala yang timbul dalam sastera seni untuk menghias dan memperliku-liku pantun yang dianggap terlalu sederhana dan kurang memenuhi kebutuhan sebab dalam keadaan-keadaan tertentu maka bentuk yang berhias ini memberi efek memperlunak kepada hal-hal yang dalam bentuk biasa sukar dikatakan. Ini sesuai pula dengan sifat Jawa untuk mengatakan sesuatu hal yang tidak langsung .... Dengan hilangnya kesederhanaan, hilang pula sifatnya sebagai alat pernyataan rakyat, sehingga daerahnya menjadi terbatas, khusus untuk puisi seni. Tak hairan kita bahawa untuk sajak-sajak jenaka bentuk pantun adalah tetap popular, kerana bentuknya yang sederhana dan '*straight-forward*' itu (hlm 265 - 266).

Hubungan pantun Melayu dengan wangsalan Jawa ini memang telah lama diperkatakan oleh para pengkaji baik dalam membincarakan tentang kejadian pantun mahupun dalam ciri-ciri yang lain, misalnya hubungan pembayang dan maksud pantun. Pendapat Achadiati Ikram bahawa wangsalan adalah perkembangan daripada pantun – kerana parikan Jawa tidak mempunyai sifat-sifat yang sofistikated seperti pantun-pantun Nusantara yang lain – mungkin kurang diterima oleh para pengkaji. Tetapi suatu keadaan yang dapat dilihat di sini adalah dalam pemakaian bunyi-bunyi yang menimbulkan saranan adalah juga yang mendorong kepada pembentukan pantun.

Walau bagaimanapun pemakaian bunyi-bunyi yang bersaranan seperti itu bukanlah satu-satunya faktor yang menghasilkan pantun. Sebagaimana yang dibicarakan oleh R.J. Wilkinson, dalam bahasa Melayu itu luas sekali penggunaan lambang-lambang hingga dapat dianggap wujudnya bahasa lambang, sebagai kontras kepada bahasa daun dalam masyarakat Batak dan Mandailing, seperti yang telah disebutkan di atas tadi. R.O. Winstedt, misalnya dalam membicarakan pantun Melayu menunjukkan penggunaan nama tumbuh-tumbuhan, bunga, buah, pohon dan pelbagai jenis burung dan ikan, dalam pantun-pantun Melayu; kerana itu untuk memahami pantun, perlu juga memahami penggunaan lambang-lambang daripada alam raya (*nature*) itu:

*The Malay language of fruits and flowers and plants and birds has to be mastered. Parallels in the cultural history of other races will help a little. The holy basil, sulasi as it is spelt in Raffles's MS of the Hikayat Berma Shahdan or selaseh as Malays now render it, was in India the symbols of happy wedlock, pervaded by the essence of Vishnu and Lakshmi and annually married to Krishna in every Hindu family; so that not only the coincidence of its name may make it an invariable prelude to the mention of kekasih in the pantun (Winstedt 1960, 201; 1943, 27–33).*

Pengetahuan ini, menurut Winstedt dapat memudahkan seorang memahami pantun-pantun seperti di bawah ini:

Kalau roboh Kota Melaka  
Sayang selasih di dalam puan  
Kalau sungguh bagai dikata  
Rasa nak mati di pangku tuan.

Penggunaan lambang-lambang dalam pantun Melayu memanglah mudah ditunjukkan, misalnya "kelapa ditebus tupai" terdapat di dalam pantun dan telah terkenal sebagai peribahasa yang memberi maksud gadis yang telah ternoda. Demikian pula pelbagai *simile* yang telah begitu popular misalnya 'delima' untuk bibir gadis yang cantik, 'kumbang' sebagai lambang pemuda yang kurang bertanggungjawab dan 'kemboja' sebagai lambang kematian.

Djajadiningsrat mula-mula tadi menyebut lambang seperti ikan belanak untuk maksud 'lekas beranak', *peno-peno* dan *riwu-riwu*

untuk maksud lekas menjadi kaya, sebagai salah satu asas kepada kejadian pantun. Di sini objek-objek yang digunakan itu bukan sahaja mempunyai hubungan bunyi, tetapi juga hubungan maksud, atau lambang yang difahami dan terpakai dalam masyarakat yang berkenaan. Perhubungan lambang-lambang ini dengan maksud pantun seluruhnya akan lebih jelas apabila dilihat dari segi hubungan kuplet-kuplet pembayang dengan kuplet-kuplet maksud, seperti yang akan dibuktikan kemudian. Dalam pantun-pantun yang meng-adakan perhubungan itu, lambang-lambang lebih banyak digunakan; sedangkan pada yang tidak berhubungan maka, pantun-pantun lebih jelas terbentuk oleh pamakaian bunyi-bunyi yang bersaranan yang lebih berfungsi dalam memberikan hubungan bunyi. Daripada contoh-contoh yang telah dijelaskan tadi, dapatlah dibuat kesimpulan, bahawa pantun terjadi daripada dua faktor; iaitu pertama kebiasaan menggunakan bunyi-bunyi yang memberikan saranan dan, kedua, kebiasaan menggunakan lambang-lambang.

### Tarikh Tercipta dan Pengaruh dalam Penciptaan Pantun

R.O. Winstedt mengatakan bentuk pantun mula-mula terdapat dalam *Sejarah Melayu* dan di dalam hikayat-hikayat atau cerita-cerita romantis yang popular dari India dan petikan dalam *Syair Ken Tambuhan*. Kerana itu pantun-pantun hanya terdapat dalam karya-karya tulisan sejak abad ke-15, walau dalam lagu-lagu rakyat yang popular mungkin lebih awal daripada itu. Kelihatannya bentuk-bentuk pantun yang berkembang daripada teka-teki (*jingling riddles*) di kalangan masyarakat Indonesia itu mungkin daripada seloka India yang mempunyai empat baris, dengan lapan suku kata setiap baris; dan hanya empat daripadanya yang ditentukan jumlahnya sementara yang lain sama ada panjang atau pendek. Overbeck memetik seloka daripada *Ramayana* (Buku IX, Kanto 9, terjemahan K.C. Dutt) dan daripada *Sakuntala* (Adegan IV dan V, terjemahan A.W. Ryder), yang menurutnya merupakan '*reminiscent*' kepada sentimen dan seni kata pantun Melayu (Winstedt 1960, 195).

Pendapat Winstedt bahawa pantun mulai dikenal dalam kesusasteraan Melayu, mulai abad ke-15 dengan berdasarkan istilah pantun dan contoh-contoh pantun dalam *Sejarah Melayu* agak sukar hendak diterima. Penggunaan bahasa daun dalam pembentukan umpama dan ende-endé dalam masyarakat Batak dan Mandailing

seperti yang diterangkan oleh Van der Tuuk dan Van Ophuijsen, juga penggunaan warna-warna di kalangan masyarakat Banten, seperti yang dijelaskan oleh Djajadiningrat, ternyata merupakan antara beberapa perlakuan yang sangat primitif, tetapi masih dianggap terkemudian daripada zaman-zaman yang diagakkkan sebagai permulaan penciptaan pantun. Demikian pula penggunaan bunyi-bunyi yang *suggestive* seperti dalam wangsalan Jawa yang dapat dirasakan keasliannya dalam kesusasteraan yang begitu kaya itu masih juga merupakan perkembangan yang terkemudian daripada pantun. Parikan sebagai pantun dalam bahasa Jawa adalah juga penyesuaian yang terkemudian dari segi urutan waktunya. Kerana itu sudah tentu pula pantun telah lebih dulu wujud dan berkembang, sebelum ende-endé, umpama, wangsalan, wawangsalan dan parikan. Buku *Sejarah Melayu* itu sendiri dihasilkan dalam abad ke-17, sezaman dengan *Hikayat Hang Tuah* yang juga dipercayai terkarang dalam abad yang sama. Jadi, atas dasar apakah abad ke-15 itu dihubungkan dengan permulaan pantun? Oleh kerana pantun adalah suatu bentuk sastera lisan dan masih berkedudukan begitu hingga sekarang, tidaklah dapat ditentukan tarikh ia dicipta dan popular dalam masyarakat Melayu. Sebagaimana genre-genre puisi yang lain, mantera, teromba, gurindam, seloka dan talibun atau sesomba, pantun mungkin telah wujud dan terkenal sejak dari zaman-zaman permulaan lagi, iaitu terdahulu daripada kedatangan Islam bahkan lebih awal daripada kedatangan Hindu. Dari segi sejarah purba Semenanjung Tanah Melayu kedatangan kebudayaan Hindu berlaku dalam abad-abad pertama dan ketiga dengan tertubuhnya kawasan-kawasan penempatan (*settlements*) Hindu di Langkasuka, Kedah dan Beruas. Dan oleh kerana daerah-daerah itu merupakan kawasan penempatan di tepi-tepi pantai, tidak semestinya kebudayaan Hindu itu begitu cepat mempengaruhi masyarakat Melayu yang luas tersebar di daerah-daerah pedalaman, terutamanya di tempat-tempat lain, seperti di Melaka, Negeri Sembilan dan negeri-negeri Pantai Timur yang dipercayai begitu lambat menerima pengaruh Hindu.

Satu lagi kenyataan Winstedt yang terlalu umum ialah tentang kemungkinan pantun itu berkembang daripada teka-teki bunyi (*jingling riddles*) masyarakat Indonesia; dan *jingling riddles* itu pula adalah penyesuaian daripada seloka India seperti yang terdapat di

dalam *Ramayana* dan *Sakuntala* (Winstedt 1960, 196). Seperti yang telah dibuktikan tadi, apa yang dikatakan '*jingling riddles*' dalam masyarakat Indonesia adalah wangsalan Jawa dan wawangsalan Sunda. Dan ini telah pun diperseptuji sebagai perkembangan yang terkemudian daripada pantun. Demikian pula, bentuk seloka India itu adalah terlalu berbeza daripada pantun bahkan daripada seloka Melayu. Seloka dalam kesusasteraan Sanskrit adalah puisi yang tidak tentu strurnya, digunakan untuk cerita, epik atau naratif, sedangkan pantun merupakan *quatrain* yang terdiri daripada baris-baris yang pendek, mempunyai rima hujung yang tetap dan fungsinya lebih umum untuk menyatakan fikiran dan perasaan dengan ringkas dan padat. Demikian pula seloka Melayu lebih mendekati genre-genre puisi Melayu yang lain seperti gurindam, teromba dan talibun atau sesomba dan berbeza sekali bentuknya dengan seloka India. Dalam hal ini ada baiknya dibandingkan dengan keterangan Pigeaud mengenai puisi Jawa. Menurut beliau, sebelum berkembangnya *kakawin* yang dipadankan dengan *kavya* Sanskrit, mungkin telah ada suatu bentuk puisi Indonesia purba yang lebih dekat bentuknya dengan puisi asli (*indigenous*), masyarakat Nusantara (Pigeaud 1967, 1–18). Puisi itu menurut A. Teeuw, haruslah yang berupa *quatrain* iaitu terdiri daripada empat baris serangkap, empat perkataan sebaris dan mempunyai rima atau sajak (Teeuw 1966b, 431). Sebagai yang telah begitu diketahui umum puisi tersebut tidak lain daripada pantun. Mengenai *kakawin* dalam masyarakat Jawa mulai abad kesembilan, berdasarkan prasasti-prasasti yang telah dijumpai (Sutijpto Wirjosupratro 1971, 262). Oleh itu puisi purba Indonesia yang dimaksudkan oleh Pigeaud dan Teeuw itu seharusnya telah terkenal sebelum abad ke-19. Berdasarkan keterangan-keterangan ini tidaklah benar untuk dikatakan bahawa pantun itu berasal daripada '*jingling riddles*' Indonesia, khasnya wangsalan dan wawangsalan dan tidak pula berkaitan untuk dihubungkan dengan abad ke-15.

Satu lagi pendapat Winstedt (1960) yang menimbulkan keraguan ialah apabila dia mengatakan:

*In the pantun the relevancy of the first two lines of the quatrain to the last two is often as remote as it is in Chinese odes, and it is possible that in the cosmopolitan port of Malacca the Chinese too had a hand in moulding the Malay pantun to its*

*present shape; certainly for many decades or even centuries the straits-born Chinese have been ardent improvisers of these quatrains* (hlm 195–196).

Pendapat Winstedt dalam mengaitkan peranan orang-orang Cina di Melaka dan Negeri-negeri Selat yang lain dalam membentuk pantun ini adalah diragukan. Berdasarkan *Sejarah Melayu*, kedatangan orang-orang Cina ke Melaka adalah dalam abad ke-15 iaitu bila Sultan Mansur Shah (1454–1498) berkahwin dengan puteri China Hang Li Po; tetapi kumpulan pendatang ini terlalu kecil jumlahnya untuk dapat mempengaruhi sesuatu aspek kebudayaan yang telah berkembang. Jumlah pendatang-pendatang ini hanya bertambah apabila Melaka menjadi Negeri Selat bersama Pulau Pinang dan Singapura pada pertengahan abad ke-19. Tetapi pada peringkat ini, perhubungan orang-orang Cina dengan masyarakat tempatan semata-mata dari segi perniagaan dan perlombongan, iaitu tidak ada sama sekali perhubungan kebudayaan dan kesenian. Sikap pendatang-pendatang Cina yang lebih mengutamakan kekayaan material dari dulu hingga sekarang memperlihatkan sikap asing mereka terhadap kebudayaan dan kesenian tempatan. Perbandingan yang telah dibuat dalam hal ini menunjukkan peranan yang disertai oleh masyarakat Cina dalam aspek berpantun ialah di kalangan kaum Baba di Melaka, khasnya dalam permainan dondang sayang. Tetapi daripada kumpulan pantun-pantun yang didapati daripada masyarakat ini tiada menunjukkan apa-apa perbezaan daripada pantun-pantun yang dikumpulkan daripada masyarakat Melayu, bukan sahaja dalam permainan dondang sayang, tetapi meliputi aktiviti-aktiviti kesenian yang lain termasuk dikir barat (Kelantan), balai, saba dan rodat (Terengganu), bongai (Negeri Sembilan), lotah (Perak), beduan dan canggung (Perlis), serta penggunaan pantun-pantun dalam kehidupan sehari-hari masyarakat Melayu. Ini menunjukkan bahawa tidak jelas adanya sumbangan daripada masyarakat Cina, baik dari segi bentuk, mahupun dari segi isi pantun. Apa yang berlaku ialah kaum Baba di Melaka dan juga di tempat-tempat lain (jika ada) hanya menggunakan pantun-pantun yang telah ada tanpa memasukkan apa-apa pengaruh daripada puisi Cina yang jauh berbeza daripada puisi Melayu.

Alasan yang digunakan oleh Winstedt dalam mengaitkan puisi Cina dengan pantun ialah kerana dalam setengah-setengah puisi

Cina itu terdapat juga penggunaan objek-objek yang lain sebagai bayangan kepada objek yang sebenarnya. Dalam sesuatu rangkap puisi itu terdapat baris-baris yang merujuk kepada fenomena yang semula jadi dan umum, atau peristiwa yang diketahui ramai, sebagai daya membangunkan sensasi dan fikiran bagi baris-baris yang mengikutinya. Keadaan ini hampir sama dengan pantun Melayu. Contoh yang diambil oleh Winstedt ialah daripada terjemahan oleh Cranmer Bying dalam *The Book of Odes*:

*Green is the upper robe  
Green with a yellow lining  
My sorrow none can probe  
Nor can I cease repining.*

*Green is the upper robe  
The lower robe is yellow  
My sorrow none can probe  
Nor any reason mellow.*

Fahaman Winstedt dalam hal itu jelas berdasarkan keterangan V. Von Strauss dalam Pendahuluannya kepada buku *Shi King (The Book of Odes)* yang merupakan sebuah daripada empat buah buku klasik Cina yang penting. Dalam Pendahuluannya, Strauss menyatakan:

*The Chinese editors always indicate at the end of each stanza whether it contains a direct statement (*fu*), a simile or comparison (*pi*) or a metaphor or symbolical saying (*hsing*). Only the latter is something peculiar, as in each stanza, before coming to the real object of the poem, in one or two lines a peculiar natural phenomenon, a well-known event or occurrence is mentioned as an introduction not unlike a clever arabesque in order to prepare reflection, sensation and the state of mind, for that which follows. The symbol is either the same in all stanzas or a new one is taken each time. Thus we find in the symbolical introduction of different poems absolutely independent from each other the same picture or metaphor.*

(Overbech 1922, 12-13)

Daripada contoh-contoh yang dibicarakan oleh Hans Overbeck memang dapat dilihat keadaan yang hampir sama dalam pengguna-

an simile, perbandingan, metafora dan perlambangannya; tetapi dari segi struktur, jumlah kata dan rima, persamaan itu dapat dikatakan tidak ada. Rima a-b-a-b yang dikatakan ada dalam puisi Cina itu hanya terlihat dalam terjemahan Inggerisnya; sedangkan dalam bentuknya yang asal, dalam dialek Mandarin dan bahasa Cina Klasik, persamaan itu tidak jelas. Perhatikan contoh di bawah yang terjemahannya diberikan oleh Winstedt di atas tadi:

*Yuan hsi i hsi  
Yuan i huang li  
Hsin chih yu i  
He wei chi i (styled pi)  
Yuan hsi i hsi  
Yuan i huang shang  
Hsin chih yu i  
He wei chi wang (styled pi)*

Sebuah contoh lagi:

*Yuan hsi szu hsi  
Nu so chih hsi  
Wo szu ku jen  
Pi wu yu hsi (styled pi)*

*(The silk was of emerald dye,  
Ah, this was all your doing;  
But I dream of an age gone by,  
To keep my heart from rueing.)*

Dari segi sistem rima, hanya rangkap kedua yang hampir sama dengan pantun Melayu; sedangkan yang pertama a-a-a-a dan yang ketiga a-a-b-a. Contoh-contoh yang lain adalah daripada a-b-c-c, a-b-c-d, a-b-b-c dan a-b-c-b. Suatu prinsip yang tegas dalam pembentukan pantun ialah adanya pembahagian kepada dua unit: pembayang dan maksud. Antara kedua-dua unit itu tidak ada persambungan kalimat, tetapi hanya persambungan makna. Contoh-contoh puisi Cina yang dibicarakan oleh Winstedt dan Overbeck, walaupun terbahagi kepada dua unit, tetapi sukar untuk dipisahkan dari segi urutan kalimat. Contoh-contoh di bawah ini menunjukkan perbezaan yang jauh antara Shi King dengan pantun, dari segi pembahagian unit:

*Deep in the grass there lies a dead gazelle,  
The tall white grass enwraps here where she fell -*

*With sweet thought natural to spring  
A pretty girl goes wandering  
With lover that would led astray.*

(Styled Hsing)

*"Ah, gently do not disarray,  
My kerchief gently pray  
Nor make the watch-dog bark  
Under my lattice dark".*

(Overbeck 1922, 15)

Daripada perbincangan di atas dapatlah disimpulkan bahawa pantun adalah ciptaan yang asal dalam masyarakat Melayu; iaitu bukan daripada puisi Jawa, India atau Cina. Hanya ada beberapa aspek daripada pantun itu yang hampir sama dengan puisi-puisi yang lain dalam masyarakat Nusantara dan di luar Nusantara. Persamaan itu bukan sahaja dengan India dan Cina – seperti yang telah ditunjukkan – tetapi juga dengan Jepun, Scandinavia, Perancis, Jerman, Sepanyol, Parsi dan lain-lain. Prampolini telah cuba menunjukkan persamaan ini hampir dalam semua bahasa, kecuali bahasa India-Amerika dan bahasa Indie. Persamaan itu hanya berdasarkan dua ciri iaitu sifatnya sebagai sastera rakyat dan bentuknya yang dalam empat baris menyatakan sesuatu fikiran yang bulat dan lengkap. Beberapa contoh daripadanya dipetik di bawah (Prampolini 1951, 234–243), sebagai perbandingan:

Doidatsu Jepun:

Bunga yang gugur di musim semi  
Di tahun nanti berkembang lagi  
Tetapi sayang, engkau dan aku  
Bertemu hanya semusim ini.

Scandinavia:

Tiada burung membumbung tinggi  
Seperti angsa induk beranak  
Tiada ular yang berbisa  
Seperti bisa lidah yang jahat.

Ternyata dalam contoh-contoh itu pun tidak ada persamaan lain, selain daripada kedudukannya sebagai puisi rakyat dan bentuknya sebagai *quatrain* yang lengkap dalam suatu rangkap.

### Ciri-ciri Pantun Melayu

Ciri-ciri pantun yang berbagai-bagai dapat dibincangkan dari dua aspek yang penting, iaitu aspek luaran dan dalaman:

1. Aspek luaran ialah dari segi struktur dan seluruh ciri-ciri visual yang dapat dilihat dan didengar; dan ini termasuk:

- a. Terdiri daripada rangkap-rangkap yang berasingan. Setiap rangkap terjadi daripada baris-baris yang sejajar dan berpasangan 2, 4, 6, 8, 10 dan seterusnya, tetapi yang paling umum, empat baris (*quatrains*).
  - b. Setiap baris mengandungi empat kata dasar; dan oleh kerana perkataan-perkataan dalam Bahasa Melayu pada umumnya berupa dwisuku kata, bila termasuk imbuhan, penanda dan kata-kata fungsional, menjadikan jumlah suku kata pada sebaris antara 8 – 10. Ini bermakna unit yang penting ialah perkataan, sedang suku kata merupakan aspek sampingan.
  - c. Adanya klimaks (*climax*), iaitu perpanjangan atau kelebihan jumlah unit suku kata atau perkataan pada kuplet maksud.
  - d. Setiap stanza terbahagi kepada dua unit iaitu pembayang dan maksud; kerana itu sebuah *quatrain* mempunyai dua kuplet: satu kuplet pembayang dan satu kuplet maksud.
  - e. Adanya skema rima yang tetap, iaitu rima akhir a-b-a-b, dengan sedikit variasi a-a-a-a. Mungkin juga terdapat rima dalaman, atau rima pada perkataan-perkataan yang sejajar, tetapi tidak merupakan ciri yang penting. Selain daripada rima, asonansi juga merupakan aspek yang dominan dalam pembentukan sebuah pantun.
  - f. Setiap stanza pantun, sama ada dua, empat, enam dan seterusnya, mengandungi satu fikiran yang bulat dan lengkap. Dengan perkataan lain sebuah stanza dihitung sebagai satu keseluruhan.
2. Aspek dalaman ialah unsur-unsur yang hanya dapat dirasakan

secara subjektif mengikut pengalaman dan pemahaman pendengar iaitu termasuk:

- g. Penggunaan lambang-lambang yang tertentu mengikut tanggapan dan *world-view* masyarakat.
- h. Adanya perhubungan makna antara pasangan pembayang dengan pasangan maksud, sama ada hubungan konkrit atau abstrak atau melalui lambang-lambang.

Sebahagian besar daripada ciri yang disebutkan di atas telah pun begitu biasa dan diketahui umum; kerana itu di bawah ini hanya disentuh beberapa aspek yang dirasakan perlu diberikan contoh dan penjelasan selanjutnya:

a. Pasangan sejajar

Puisi Melayu lama itu pada dasarnya merupakan keadaan-keadaan yang sejajar (paralelisme), iaitu baris-baris atau urutan-urutan perkataan yang berulang-ulang dalam kedudukan yang sejajar. Bagi pantun, kesejajaran itu lebih jelas dengan adanya baris-baris yang berpasangan, semukur (*asymmetrical*); iaitu suatu bahagian secara fizikal mempunyai ciri yang sama dengan yang lain. Dengan skema rima akhir a-b-a-b, baris pertama berpasangan dengan baris ketiga dan baris kedua dengan keempat. Sebuah pantun yang baik akan mempunyai pasangan-pasangan yang sempurna daripada segi rima, jumlah suku kata, bahkan perkataan-perkataan yang mungkin berpasangan; misalnya:

Anak kumbang terayap-rayap	9
Mari ditangkap anak Turki	9
Hendak terbang tidak bersayap	9
Hendak hinggap tidak berkaki.	9
Dari mana punai melayang	9
Dari paya turun ke padi	9
Dari mana datangnya sayang	9
Dari mata turun ke hati.	9

Dalam pantun di atas, selain daripada rima akhir yang sempurna, *rayap-sayap*, *Turki-kaki*, terdapat juga rima dalaman yang

tergolong sempurna: *anak-hendak* dan *anak-tidak*. Dari segi jumlah suku kata juga ia tergolong sempurna dengan mempunyai 9 – 10 suku kata, paling sempurna dari segi timbangan pantun (Za'ba 1962, 224). Keadaan yang sama terdapat pada pantun kedua; bahkan di sini, beberapa perkataan dalam satu baris diulang lagi dalam baris yang sejajar. Perulangan anafora *dari* diulang dalam a-b-c-d dan responsi *mana* dalam a-c dan *turun* dalam b-d. Bagaimanapun, dari segi pemilihan kata, perulangan seperti ini tidaklah digalakkan. Ini mungkin kerana fungsi pantun ialah untuk didengar, melalui ucapan dan nyanyian; perulangan perkataan seperti ini dirasakan kurang indah pada pendengaran. Za'ba memberikan contoh yang sama:

Apa guna pasang pelita  
Kalau tidak dengan sumbunya  
Apa guna bermain mata  
Kalau tidak dengan sesungguhnya.

Ke teluk sudah ke Siam sudah  
Ke Mekah saja saya yang belum  
Berpeluk sudah bercium sudah  
Bernikah saja saya yang belum.

Dan beliau memberikan huraian terhadapnya, begini

"Yang demikian dalam pantun sungguh tidak salah, tetapi tentulah orang mengarangnya tiada pandai, hendak mengambil senang sahaja." (Za'ba 1962, 225).

Perulangan-perulangan anafora, episora dan simplok seolah-olah mengurangkan nilai estetika sebuah pantun dan nilai ciptaan seorang pencipta. Walau bagaimanapun pantun-pantun seperti itu banyak terdapat dalam kumpulan-kumpulan yang telah ada dan dalam penggunaannya di kalangan masyarakat hari ini, tetapi tidak pula dianggap rendah mutunya dari segi estetika dan buah fikiran di dalamnya; perhatikan contoh-contoh di bawah ini:

*Aku pengapa padiku ini*  
*Jika dilurut pecah batangnya*  
*Aku pengapa hatiku ini*  
*Jika diturut susah datangnya.*

(Winstedt 1960, 204)

*Banyak orang bergelang tangan  
 Saya seorang bergelang kaki  
 Banyak orang kata jangan  
 Saya seorang turutkan hati.*

### b. Kehadiran Klimaksa

Satu lagi ciri pantun yang menarik telah dikemukakan oleh Gabriel Altmann (1962) dalam makalahnya berjudul "The Climax in Malay Pantun". Menurut Altmann, dalam pantun Melayu terdapat klimaksa yang hanya dapat dibuktikan melalui pendekatan statistik walaupun pada beberapa tempat dapat dilihat secara relatif. Klimaksa, menurut Altmann ialah:

*Either a gradual increase of the extension or intension of each succeeding unit within a sequence of units of the same kind or immediate increase of the extension or intension of the last unit within a sequence of units of the same kind. According to this definition we may distinguish a gradual and an instantaneous climax respectively. The sequence of units within which the climax occurs will be called construction (hlm 13).*

Sesuatu baris pantun Melayu secara metriknya terbahagi kepada dua kolon atas dasar unit kata. Satu kolon bersamaan dengan satu frasa linguistik yang terdiri daripada dua unit kata. Kerana itu jumlah suku kata dalam sebaris ialah dari 8 ( $2 \times 4$ ) dengan maksimum 12 ( $3 \times 4$ ). Pembahagian suatu baris ke dalam dua kolon, demikian juga had jumlah suku kata dalam sebaris dapat dianggap sebagai 'metric constant'; dengan jumlah 4 perkataan sebaris mewakili 80 peratus. Jika suku kata itu merupakan faktor yang menjadikan klimaksa kata dalam baris pantun itu, keadaan itu boleh dikaji secara keseluruhan dengan menentukan jumlah suku kata pada setiap perkataan sesuai dengan kedudukan barisnya daripada jumlah contoh (*sample*) yang besar jumlahnya dan menganalisisnya secara statistik. Daripada 250 baris pantun yang dipetik secara rambang daripada *Pantun Melayu* oleh R.J. Wilkinson dan R.O. Winstedt sebagai data kajiannya, Altmann mendapatkan beberapa kesimpulan, seperti yang diberikan dalam daftar I kajiannya itu (Altmann 1962, 15).


Bahagian atas daftar itu adalah data yang didapati melalui kiraan ini. Dan daripada pemerhatian melalui daftar ini, memperlihatkan tiga ciri yang penting:

- i. Sebahagian besar perkataan (98.6 peratus) adalah dwi dan tri (dua dan tiga) suku kata, sedangkan jumlah yang mono- dan tetra - (satu dan empat) suku kata adalah sangat kecil.
- ii. Jumlah perkataan-perkataan yang tertentu panjangnya (mono, dwi, tri atau tetra) tidak sama jumlahnya dalam sesuatu kedudukan, tetapi menunjukkan perbezaan yang jelas.
- iii. Perbezaan-perbezaan ini tidak berlaku secara rambang atau '*irregular*' tetapi seolah-olah menunjukkan korelasi yang sistematis antara kepanjangan dan kedudukan perkataan-perkataan itu.

Sebagai penjelasan seterusnya, di bawah ini dipetik sebahagian saja daripada daftar I oleh Altmann, sekadar menunjukkan kesimpulan yang boleh dibicarakan lebih lanjut dalam bahagian ini:

Kedudukan baris	I	II	III	IV
Jumlah monosuku kata	6	-	-	-
Jumlah dwisuku kata	181	163	148	131
Jumlah trisuku kata	62	86	97	118
Jumlah tetrasuku kata	1	1	5	1
Jumlah	250	250	250	250
Purata jumlah suku kata setiap perkataan	2.232	2.352	2.428	2.480
Indeks panjang perkataan	1.000	1.054	1.088	1.111

Daripada daftar di atas, kelihatan lebih banyak perkataan panjang (tri- dan tetra- suku kata) dalam baris-baris III dan IV (pasangan maksud), iaitu 221 berbanding dengan 150 dalam baris-baris I dan II (pasangan pembayang). Secara purata, jumlah suku kata dalam sesuatu perkataan juga berbeza, iaitu  $2.292 (1\,000) = 10\,000$  dalam pasangan pembayang dan  $2.454 (1.0706) = 10\,706$  dalam pasangan maksud. Pada kesimpulannya lebih banyak perkataan pendek (mono-, dwi- dan tri- suku kata) dalam pasangan pembayang dan lebih banyak perkataan panjang (dwi-, tri- dan tetra-suku kata) dalam pasangan maksud. Keadaan demikian digamarkan oleh Altmann (1962) seperti dalam gambarajah di bawah ini:



Daripada keterangan-keterangan yang diberikan oleh Altmann, kelihatan adanya klimaks, iaitu perpanjangan dari segi unit perkataan pada baris-baris pantun menurut kedudukannya; perpan-

jangan inilah yang diistilahkan sebagai klimaksa (*climax*). Untuk menguji pendapat Altmann itu penulis telah menggunakan metode yang sama terhadap 4 000 baris pantun yang tidak sahaja terdiri daripada pantun 4 baris, tetapi memasukkan juga 2, 6, 8 dan 10 baris. 4 000 baris pantun ini adalah daripada data yang digunakan dalam keseluruhan kajian ini. Tetapi apa yang menjadi premis penulis ialah bahawa perpanjangan (klimaksa) itu berlaku antara kedua-dua pasangan iaitu pembayang dan maksud, walaupun pada hakikatnya pada baris-baris yang berlainan. Ini ialah kerana tujuan penelitian kita ialah melihat secara relatif, tidak '*absolute*', menggunakan angka-angka dan rumus-rumus seperti yang dilakukan oleh Altmann. Sebahagian daripada pendekatan dan kesimpulan penulis diperlihatkan di bawah:

- Terdapat panjang perkataan atau jumlah suku kata yang sama antara pasangan I (pembayang) dan II (maksud), misalnya dalam pantun di bawah:

Apa guna pasang pelita	9
Kalau tidak dengan sumbunya	9
Apa guna bermain mata	9
Kalau tidak dengan sungguhnya.	9      18:18

Jawi hitam tidak bertanduk	9
Makan rumput di atas munggu	10
Lihatlah ayam tak berinduk	9
Demikian hidup anak piatu.	10      19:19

- Terdapat keadaan yang berbeza, iaitu pasangan pertama lebih panjang perkataannya daripada pasangan kedua, contoh:

Bunga cempaka ditebang rebah	10
Kakinya sudah bercendawan	9
Bonda kita pergi ke sawah	9
Adik di rumah tak berkawan.	9      19:18

Anak buaya makan di pantai	10
Surut pasang makan ke tengah	9
Pada hidup bercermin bangkai	9
Baik mati berkalang tanah.	9      19:18

- iii. Perbezaan yang paling jelas ialah pasangan kedua lebih panjang daripada pasangan pertama, contohnya:

Berakit dari hulu	7	
Kayu api ambil petanak	9	
Alang sakitnya menanggung rindu	10	
Sepantun api memakan dedak.	10	16:20
Teritip di tepi kota	8	
Mari dikayuh sampan pengail	10	
Imam dan khatib lagi berdosa	11	
Inikan pula kita yang jahil.	10	18:21

Dengan memadankan keadaan di atas dengan simbol-simbol yang digunakan oleh Altmann (1962, 18), tiga keadaan di atas dapat diberikan dalam tiga simbol:

Yang tidak berbeza: I II B atau C

Yang berbeza: (a) I > II - A  
 (b) I < II - D

Daripada 2 000 pasangan pantun (4 000 baris) yang dikaji untuk tujuan ini, didapati:

B atau C berjumlah	110	100 = 100
A berjumlah	114	103.6 103.6
D berjumlah	1 776	1 614.5 1614.5
Jumlah	<u>2 000</u>	

Ertinya di sini, daripada 1 000 rangkap pantun, 888 rangkap tergolong dalam jenis D, iaitu pasangan I lebih kecil jumlah suku katanya daripada pasangan II atau dengan perkataan lain pasangan kedua lebih banyak mengandungi perkataan-perkataan panjang, tri- dan tetrasuku kata. Altmann, dalam makalahnya yang dibincangkan ini tidak mengemukakan pendapat mengapa keadaan itu demikian atau mengapa adanya klimaksa dalam sesuatu binaan (*construction*) pantun. Apa yang dapat kita fahamkan, pantun adalah alat pernyataan fikiran dan inti pernyataan ini terkandung dalam pasangan maksud. Kerana itu kalimat-kalimat dalam pasangan itu perlulah terjadi daripada

perkataan yang lengkap untuk dapat dimengerti oleh masyarakat bahasa itu. Sebaliknya pasangan pembayang, mungkin merupakan frasa-frasa yang ringkas mengandungi peribahasa, kiasan, metafora, lambang-lambang atau yang lain yang telah mesra dan dapat dimengerti oleh masyarakatnya. Dan contoh di bawah dapat menerangkan keadaan ini:

Kata dulang paku serpih	8	
Mengata orang awak yang lebih	10	8:10
Menangguk ke batu licin	8	
Dapat udang sebelanga	8	
Abang tengok siputan kau licin	10	
Rasa nak pulang ke janda lama	10	16:20

Dalam contoh pertama, baris maksud merupakan kalimat yang lengkap; tanpa imbuhan *me* dan kata fungsi *yang*, kalimat itu akan tidak bermakna atau memberi makna yang kabur. Dalam contoh kedua, pasangan pertama masing-masing terdiri daripada tiga kata dasar sebaris. Walaupun demikian (kalau mahu) boleh juga ditambahkan *pergi*, pada awal baris pertama dan imbuhan *me* pada baris kedua, hingga jumlahnya 10:19, demikian pula dalam baris ketiga, imbuhan *an* pada *siputan* dapat digugurkan tanpa menjesakan makna; hingga dengan itu pantun itu berkedudukan dalam jenis B dan C (tiada perbezaan), 19:19. Tetapi tentu saja pemindaan seperti itu tidak menggambarkan sifat yang asli dalam pantun-pantun tersebut. Dalam contoh-contoh lain daripada data yang sama, keadaan seperti itu sangat umum didapati; misalnya seperti yang diberikan di bawah ini:

Daun terap di tengah padang  
Datang gajah dilelainya  
Tengah sedap mata memandang  
Datang Allah diceraikan-Nya.

(*Pantun Melayu* 1958, 100)

Baju perai kain perai  
Buat atap kasi tongkang  
Nyawa di badan lagi bercerai  
Inikan pula kasih menumpang.

(Fatimah bt Lembing, Melaka 1978)

## Unsur-unsur Dalaman

### *Lambang dan Perlambangan*

R.J. Wilkinson dan R.O. Winstedt, dalam kajian mereka terhadap pantun Melayu telah menunjukkan tentang penting dan luasnya pemakaian lambang-lambang dalam puisi itu. Daripada keadaan itu mereka mengusulkan bahawa pantun berkembang daripada 'bahasa lambang', malah 'bahasa daun' yang dikatakan oleh Van Ophuijsen sebagai asal kepada perkembangan umpama dan andai-andai itu juga mungkin berkembang daripada bahasa lambang (Wilkinson 1907, 44–45; Wilkinson dan Winstedt 1961, 11). Hans Overbeck pula, dalam membuat perbandingan pantun Melayu dengan puisi-puisi India dan Cina menunjukkan keadaan yang hampir sama dalam penggunaan lambang. Dalam puisi Cina misalnya terdapat istilah-istilah *pi*, *fi* dan *hsing* yang membezakan kategori-kategori perlambangan yang digunakan (Overbeck 1922, 12–13). Prampolini yang membandingkan ciri-ciri pantun dengan beberapa puisi rakyat dunia menekankan juga tentang persamaan dari segi pemakaian lambang-lambang ini (Prampolini 1951, 240). Kepentingan pemakaian lambang-lambang dalam pantun Melayu sudah semestinya sejajar dengan pemakaian lambang-lambang dalam kehidupan hari-hari masyarakat itu. Keadaan ini jelas terdapat dalam aktiviti-aktiviti yang berhubungan dengan kehidupan masyarakat, dalam kepercayaan dan nilai mereka, upacara-upacara, adat istiadat dan kebiasaan, serta juga dalam kebanyakan hasil dan genre kesusasteraananya. Dalam genre puisi perlambangan tidak hanya terbatas dalam pantun tetapi juga dalam syair, gurindam, seloka, mantera, teromba, teka-teki dan lain-lain. Dari segi puisi, aspek perlambangan ini merupakan aspek semantik yang rapat sekali hubungannya dengan keseluruhan nilai estetika sesebuah puisi. Kebolehan seseorang pencipta menggunakan lambang-lambang yang segar dan berkesan di dalam pantun-pantun amat mengagumkan. Daripada keseluruhan pantun-pantun yang telah dikaji dapat dikatakan kira-kira 70 peratus daripadanya menggunakan sesuatu atau beberapa lambang yang terbiasa dalam masyarakat Melayu atau Nusantara.

Apa yang dimaksudkan dengan lambang di sini tidak sahaja terhad kepada erti 'simbol', tetapi meliputi seluruh aspek '*figure of speech*', iaitu '*simile*', '*metaphor*', '*imagery*', '*symbol*' dan apa yang

difahamkan dalam bahasa Melayu sebagai perbandingan, penyerupaan, kiasan, ibarat dan peribahasa. Sementara kehadiran lambang-lambang pula tidak terbatas dalam sesuatu untai pantun.

Daripada pemerhatian penulis, lambang-lambang pula tidak terbatas ke dalam empat kategori di bawah ini:

1. Lambang yang terdiri daripada objek yang konkrit digunakan sebagai perbandingan atau representatif kepada suatu idea yang abstrak; misalnya bulan melambangkan kejelitaan seorang gadis, syamsu (matahari) melambangkan pemuda yang baik, bangsawan dan bertanggungjawab; atau sebagainya; contoh:

Bacang masak, empelam manis  
 Makanan anak bidadari  
 Bintang teresak, bulan menangis  
 Hendak bertemu si matahari.

(Wilkinson dan Winstedt 1961, 15)

2. Lambang yang berupa objek yang konkrit digunakan sebagai lambang kepada suatu idea yang abstrak; tetapi antara kedua-duanya mempunyai hubungan erti yang *transparent*; misalnya selasih merujuk kepada kekasih atau kata-kata yang lain yang hampir seerti dengannya; padi dengan budi, pandan dengan badan dan sebagainya; contoh:

Puas sudah kutanam padi  
 Nenas juga ditanam orang  
 Puas sudah kutanam budi  
 Emas juga dipandang orang.

(Wilkinson dan Winstedt 1961, 148)

3. Lambang yang merupakan objek yang konkrit tetapi memberikan erti yang hampir sama dengan peribahasa; misalnya "kelapa mumbang" sebagai gadis yang telah ternoda, "bunga dilingkar ular", "pungguk rindukan bulan", "jelatang kampong" dan sebagainya; contoh:

Berambang buah bidara  
 Masak seruntai dua runtai

Bersubang kusangka dara  
Rupanya mumbang ditebuk tupai.

(Wilkinson dan Winstedt 1961, xiii)

4. Lambang yang merupakan sebahagian daripada mitos masyarakat, watak-watak dalam kesusasteraan lisan atau tempatan, watak atau peristiwa yang ada hubungannya dengan legenda atau sejarah; misalnya Si Tanggang, Raden Inu, Belanda berperang dengan Cina dan sebagainya; contoh:

Raden Inu Raja Kuripan  
Dicuri Ratu Sijuindu,  
Sepantun jentayu menanti hujan  
Tidak kuasa menanggung rindu.

(*Pantun Melayu* 1958, 57)

*Perlambangan daripada Objek yang Konkrit*

Bentuk perlambangan dalam kategori ini hampir sama ideanya dengan pengertian perbandingan, '*simile*' atau *pi* dalam puisi Cina. Suatu objek yang konkrit dihubungkaitkan dengan suatu idea yang abstrak, misalnya bunga melambangkan keperibadian seorang gadis, kecantikannya, kesuciannya, dipuja dan dijadikan perhatian umum, tetapi terdedah kepada gejala-gejala yang merbahaya. Pada keseluruhannya objek-objek yang dipilih ialah daripada alam raya (*nature*), terutama sekali dari dunia tumbuh-tumbuhan dan haiwan, cakerawala dan kejadian alam. Oleh itu, selain daripada bunga, mawar, kenanga, melur, dedap, seroja, melati; bahagian-bahagian bunga: tangkai, kelopak, kuntum, madu dan debu; proses-proses kewujudan bunga: kembang, layu, segar, menguntum, memecah kelopak dan gugur. Dari dunia haiwan digunakan lambang pipit, merak atau burung; ayam, kambing, harimau atau helang. Sesuai dengan konteksnya, gadis juga dilambangkan oleh bulan, bintang, purnama, sinar, kencana, emas, intan, atau kaca, seterusnya bahagian-bahagian yang penting daripada anggota tubuh manusia dijadikan juga lambang untuk menunjukkan kedudukan seorang gadis daripada kaca mata penyair: buah hati, gemala, biji mata, batu kepala, junjungan dan sebagainya. Sehubungan dengan itu teruna dihubungkaitkan dengan binatang-binatang: kumbang, buaya, ular,

naga atau burung: cenderawasih, pungguk, jentayu, rajawali, geroda, helang, pipit dan sebagainya; atau sebagai syamsu (matahari), suria, langit, awan, bumi dan laut. Dalam semua keadaan, pemilihan objek tidaklah sewenang-wenang, tetapi *regular* dan hampir sama antara daerah-daerah dan zaman-zaman yang berjauhan. Tegasnya pemilihan objek sesuai dengan keperibadian dan keperihalan yang dikemukakan; kerana itu buaya digunakan untuk melambangkan pemuda yang jahat dan syamsu kepada yang baik, jujur dan daripada kalangan bangsawan.

#### *Lambang-lambang 'Transparent'*

Hampir sesuai dengan erti metafora atau *fu* dalam puisi Cina, perlambangan di sini mempunyai asosiasi yang rapat antara objek, perkataan dan erti. Mungkin ada unsur onomatopoeia di sini, tetapi bukan dari segi bunyi perkataan yang langsung, sebaliknya dari segi erti perkataan yang dilambangkannya. Satu perkataan berhubung-kait dengan perkataan lain yang tidak saja sebunyi, tetapi mempunyai nilai erti yang hampir sama. Selasih, misalnya adalah suatu objek yang konkrit, dikaitkan dengan kasih, suatu idea yang abstrak; tetapi antara *selasih* dan *kasih* memang ada semacam hubungan yang dapat dirasakan terutama oleh orang yang telah terlatih dalam pemakaian perlambangan seperti ini. Selain daripada selasih, kasih dan perkataan-perkataan lain yang sehubungan dengannya: sayang, cinta, rindu, dendam, hasrat, hajat, ingin dan lain-lain dihubungkan dengan embun, air, sarbat, api, pasir, ombak, laut, rimba, hutan, belantara, bukit dan gunung. Keadaan yang sama terdapat juga dalam perhubungan objek idea yang lain. Padi, misalnya dihubung-kaitkan dengan budi, jadi, hati; peti dengan hari dan mati; jati dengan hati; padan dengan badan; penuh dengan jauh; layang-layang dengan sayang dan lain-lain. Di sini juga pemilihan objek tidak sewenang-wenang; kerana itu hampir semua pandan menjadi rujukan kepada *badan*; walaupun, dari segi bunyi masih banyak perkataan-perkataan lain, seperti undan, tandan, bandan, bidan, medan, tindan, edan atau sedu-sedan. Anehnya pemilihan seperti itu tidak pernah ditemui.

#### *Perlambangan Peribahasa*

Kiasan-kiasan yang sudah tetap maknanya dan telah difahami

umum, digunakan sebagai lambang-lambang di dalam pantun, sama ada dalam pasangan sampiran atau maksud; tetapi dengan idea memberikan pertalian makna. Banyak perkataan, klausu, kalimat atau rangkai kata daripada beberapa objek dipakai sebagai lambang dalam kehidupan sehari-hari termasuk di dalam pantun-pantun. Pantun yang dikemukakan sebagai contoh bagi kategori ini tadi, mengandungi beberapa lambang; *buah*, *berembang* dan *bidara* melambangkan seorang wanita; bersubang, memakai subang daripada emas atau bunga melambangkan gadis yang masih *dara*; dan perkataan *dara* diberikan melalui kata *bidara*. "Mumbang ditebuk tupai" adalah kiasan kepada gadis yang telah dinodai secara diam-diam, sama pula dengan "buah dimakan tikus", "sarung sudah dipakai" atau "tergunting dalam lipatan". Pemilihan di sini juga ternyata mementingkan idea dan nilai objek yang memberikan kata yang indah. "Buah berembang buah bidara" memberikan gambaran yang indah, persamaan dan kontras yang amat sesuai; tentu sahaja menjadi cacat, misalnya kalau dikatakan "buah berembang dimakan *kera*"; walaupun *kera* masih dapat bersanjak dengan *dara*, tetapi telah menjadi suatu rumus yang tidak tertulis, bahawa *dara* tidak pernah berjodohan dengan *kera*.

#### *Perlambangan daripada Sumber Mitos*

Mitos dan legenda, warisan daripada cerita-cerita lisan dan sejarah tempatan, atau mungkin watak-watak dan peristiwa hari-hari, telatah manusia dalam masyarakat setempat, dijadikan juga lambang, perbandingan atau semacam *direct statement* tersemat dalam mana-mana kedudukan dalam serangkap pantun. Watak 'Raden Inu' dalam peristiwa dia "dicuri atau diculik Ratu Socawindu" adalah watak dan babak yang amat popular dalam Cerita-cerita Panji, baik Melayu mahupun Jawa. Melalui cerita lisan atau permainan wayang kulit, topeng atau gambuh, episod itu menjadi terkenal dan dapat difahami masyarakat lalu dijadikan lambang kepada situasi yang hampir sama. Keresahan seorang kekasih, dilamun rindu, "seperti jentayu menanti hujan", sama pula dengan keresahan dan penyeksaan yang dideritai oleh Raden Inu ketika dalam tawanan Ratu Socawindu. Contoh-contoh yang lain mudah pula ditemui: Kapten Light, Jeneral Majelis mati di Bali, Cau

Pandan, Dang Nila, Seri Rama, Laksamana, jin besar, telaga zam-zam dan sebagainya.

Apa yang dikemukakan di atas adalah sekadar contoh dalam menerangkan keadaan ini. Gambaran itu pun masih secara umum kerana tidak mungkin dapat diberikan secara terperinci, dalam setiap kategori, setiap contoh dan setiap perkara yang dibincangkan itu dalam kajian ini. Untuk tujuan itu satu kajian statistik harus dilakukan dengan lebih sistematis dan menggunakan lebih banyak bahan yang diperlukan. Bagaimanapun di bawah ini diberikan angka-angka peratusan dan purata, bagi beberapa perkara yang dipilih secara rambangan daripada 1 000 rangkap pantun yang dijadikan contoh bagi kajian ini. Daripada jumlah 1 000 rangkap itu, 698 (69.8 peratus), mengandungi lambang-lambang yang dapat dimasukkan ke mana-mana kategori di atas dengan jumlah yang besar pula dapat memasuki lebih daripada satu kategori. Peratusan dan purata daripada dua kategori, lebih kurang seperti di bawah ini:

Kategori I	Dari 1 000	Peratus
Gadis dengan lambang bunga	52	5.2
Gadis dengan lambang tumbuhan selain bunga	62	6.2
Gadis dengan lambang yang lain	74	7.4
Teruna dengan lambang kumbang	34	3.4
Teruna dengan lambang haiwan yang lain	28	2.8
Teruna dengan lambang-lambang yang lain	22	2.2
Jumlah	272	27.2
Kategori II	Dari 1 000	Peratus
Kasih dengan lambang selasih	56	5.6
Kasih dengan lambang yang lain	23	2.3
Sayang dengan lambang layang-layang	18	1.8

Badan dengan lambang pandan	38	3.8
Jauh dengan lambang pauh	14	1.4
Budi dengan lambang padi	16	1.6
Hati dengan lambang padi	10	1.0
Hati dengan lambang yang lain	8	0.8
 Jumlah	 183	 18.3

*Perkaitan Sampiran dengan Maksud*

Persoalan yang paling menarik dan yang masih terus dibincangkan ialah tentang (apakah ada atau tidak ada) perhubungan makna antara pasangan-pasangan pembayang dan maksud dalam suatu untai pantun. Mulai dibincangkan dengan serius oleh Pijnappel (1883) hingga yang paling baru oleh Mohd. Taib Osman (1975), soal ini masih segar tetapi masih juga belum selesai. Kesimpulan daripada pendapat-pendapat para sarjana itu bolehlah diringkaskan demikian:

1. Yang mengatakan hubungan itu tidak ada, antaranya yang penting: Van Ophuijsen dan Abdullah Munsyi.
2. Yang mengatakan hubungan itu ada, misalnya Pijnappel dan Za'ba.
3. Yang mengatakan pantun-pantun itu ada yang berhubungan dan ada yang tidak, misalnya R.O. Winstedt dan Mohd. Taib Osman.

Oleh kerana kontroversi mengenai hal ini telah begitu luas dibicarakan dan sedikit daripadanya telah pun disentuh dalam Pendahuluan kajian ini maka polemik itu tidak perlu diulangi lagi. Apa yang mahu diperkatakan di sini, bahawa setelah dilakukan perbandingan antara 1 000 rangkap pantun, penulis mendapati pendapat yang ketiga adalah lebih dekat kepada kenyataan. Namun begitu kesimpulan ini tidaklah berdasar kepada pendapat dan pendekatan Winstedt atau Mohd. Taib Osman, tetapi adalah daripada kajian intensif terhadap setiap rangkap pantun yang dijadikan data kajian ini. Daripada 1 000 rangkap tersebut, hasil yang didapati bolehlah

digolongkan ke dalam tiga kategori:

1. Pantun-pantun yang jelas menunjukkan perhubungan itu.
2. Pantun-pantun yang mempunyai hubungan tetapi tidak sejelas keadaan di atas.
3. Pantun-pantun yang jelas tidak berhubungan.

Kesimpulan yang lebih penting daripada perbandingan ini ialah, bahawa perhubungan itu lebih umum dalam bentuk perlambangan yang difahami masyarakat, seperti yang telah dibicarakan sebelum ini; erti-nya di sini perhubungan tidaklah semestinya dalam bentuk yang langsung dan mudah. Mungkin ia dalam bentuk yang objektif atau subjektif, tetapi tidak secara kebetulan seperti yang didakwa oleh Ophuijsen dan sarjana-sarjana lain yang sependapat dengannya. Kesimpulan daripada 1 000 rangkap yang telah diperiksa adalah:

- |                                      |     |
|--------------------------------------|-----|
| i. Peratusan dalam kategori pertama  | 25% |
| ii. Peratusan dalam kategori kedua   | 30% |
| iii. Peratusan dalam kategori ketiga | 45% |

Jumlah 100%

Peratusan di atas didapati daripada perincian yang dibuat berdasarkan tema atau isi pantun:

Tema/Isi pantun	Kategori (%)		
	A	B	C
Pantun kanak-kanak	29.9	33.1	37.0
Berkasihan (cinta)	52.9	26.0	21.1
Berceraian	52.9	26.0	21.1
Kecewa	29.1	30.1	40.8
Jenaka	12.5	31.2	56.3
Nasihat	16.4	32.8	50.8
Adat	14.8	25.5	59.7
Agama	17.3	40.3	42.4
Jumlah	187.6	240.6	271.8
Purata	23.45	30.0	46.4

Perhubungan makna di sini jelas sekali tetapi bukan berdasarkan pendapat Pijnappel yang menunjukkan perhubungan itu dalam keadaan yang berkontras, jauh dan dekat: Singgora yang letaknya beratus-ratus batu dari tempat kejadian dan pandan yang terletak di ujung kaki. Atau seperti pendapat Winstedt yang meletakkan pandan sebagai tikar yang terbentang dan harus dihormati supaya jangan dipijak dengan kaki yang berkasut (Winstedt 1960, 199–200). (Ternyata ukuran ini daripada kaca mata Barat; kerana dalam masyarakat Melayu, tikar tidak berhubungan dengan kaki yang berkasut. Tikar dibentangkan di dalam rumah dan dalam masyarakat Melayu tidak timbul soal berkasut di dalam rumah). Apa yang kita lihat sebagai perhubungan di sini ialah dalam konteks cerita dan lambang-lambang yang diberikan. Supaya lebih jelas kita petik pendapat Hamka berhubung dengan persoalan ini:

Diceritakan dalam *Sejarah Melayu* tentang diri Tuan Jana Khatib yang datang dari Pasai ke Singapura, tatkala Singapura masih diperintah oleh Raja Hindu. Ketika Raja Perempuan melihat beliau dari tingkap, ketika beliau berjalan di pekarangan istana. Tun Jana Khatib marah kerana Raja Perempuan melihat dia lalu itu. Lalu dilepaskan marahnya dengan menunjukkan pandang matanya kepada sebatang pohon pinang. Tiba-tiba belah dualah pohon pinang itu. Boleh kita katakan bahawa ini hanya dongeng belaka. Tetapi jika dianalisis dengan ilmu perdukunan atau bomoh Melayu yang berdasar mantera-mantera lalu digabungkan dengan ilmu makrifat dan sabda Rasulullah: "Kekuatan mata itu adalah benar." Dan bolehlah kita ambil kesimpulan bahawa agama Islam telah difahamkan oleh orang Melayu dengan mendalam, baik yang mengenai 'akidah', atau fiqhi dan inti ajaran tasawuf (Hamka 1977, 171).

Membandingkannya dengan cerita dan keterangan di atas dapat dilihat beberapa lambang telah terpakai di dalam pantun itu. 'Telur' adalah lambang bagi situasi yang '*delicate*', yang lemah dan tak berdaya, samalah seperti timun dengan durian, "menggolek luka digolek luka." 'Pandan' memberi makna badan, suatu yang membawa makna mistik, mempunyai kuasa, semangat atau badi walau-pun telah mati. Tun Jana Khatib, seorang ulama Sufi daripada sebuah negara Islam yang menjadi '*rival*' kepada sebuah negeri Hindu dapatlah dilambangkan sebagai telur: dia berada dalam

bahaya; sedikit gerak yang kecundang akan menjadikan dia binasa. Tetapi dengan sikap, sahaman dan kedudukannya, dia tidak senang dengan tindakan permaisuri; namun dia tidak seharusnya melepaskan kemarahan terhadap 'badan' atau 'tubuh' yang mewakili sebuah negeri. Dalam cerita seterusnya dikatakan mayat Tun Jana Khatib ghaib; hanya dalam setengah-setengah riwayat mengatakan badan Tun Jana Khatib terhantar di Langkawi, "dikuburkan orang di sana." Ini adalah kepercayaan atau sentimen Islam. Seorang suci Islam tidak seharusnya berkubur di tanah kafir; tetapi dia tidak dikembalikan ke Pasai kerana kesilapannya. Sementara Langkawi, dengan kedudukannya dalam abad ke-14 adalah tempat yang sunyi, dibandingkan dengan Pasai dan Singapura yang berstatus negara kota. Dan kesunyian, pengasingan (*solitude*) adalah matlamat yang dituju oleh seorang ahli fikir. Jikalau rumus ini diterima nyatalah kata 'Singgora' hanya memberikan saranan kepada 'Singapura'; dipilih kerana keindahan bunyi dan perseimbangannya dengan kata yang dimaksudkan.

Jika bentuk pentafsiran di atas dapat diterima nyatalah bagaimana sukarnya mentafsirkan pantun Melayu. Sesungguhnya pendekatan demikian berdasarkan cara yang digunakan oleh Hamka dan Za'ba dalam mentafsirkan sebuah pepatah-petitih, seperti di bawah:

Padi ranit tambun Aceh  
 Ranit Aceh pada 'rang Tiku  
 Pertahunan putera Sri 'Alam  
 Kalau panas lingkut-lingkutan,  
 Kalau hujan kekar-kekarkan,  
 Secotok usah di ayam,  
 Sudah habis baru halaukan.

Hamka dan Za'ba sependapat mengatakan:

Bahawa yang dikatakan padi ranit ialah kiasan daripada budi. Kerana ilmu padi akan dipakai, kian berisi kian tunduk. Padi itu datang dari Aceh melalui Tiku; besar sekali kemungkinan bahawa kata-kata ini bertali dengan pepatah dan petua, 'adat menurun syarak mendaki'. Kerana Tiku adalah salah satu perhentian atau pelabuhan di Pantai Barat Sumatera zaman dahulu, tempat berlabuh kapal yang datang dari Aceh. Dikata-

kan padi itu sangat hebat dan kuat. Sehingga jika sedang padi itu dijemur di halaman rumah lalu datang panas, lingkutkan sajaalah. Kerana dia telah masak dengan sendirinya buat ditumbuk. Bahkan kalau hari hujan, dia tidak akan rosak. Tetapi kalau satu kali padi itu dicotok (dipatuk) oleh ayam, harganya sudah jatuh dengan sendirinya. Pada waktu itu tidak ada faedahnya dijaga lagi kerana bererti nilainya sudah habis. Sebab harga padi atau kiasan budi itu sudah merosot jatuh (Hamka 1977, 167–168).

Perkaitan padi dengan ‘budi’ seperti yang dihuraikan oleh Hamka di atas mungkin dapat digunakan untuk mendekati perhubungan makna dalam pantun di bawah:

Kalau hendak tahu di rumpun padi  
 Lihatlah rumput di permataang  
 Kalau hendak tahu diuntung kami  
 Lihatlah laut petang-petang.

(*Pantun Melayu* 1958, 44)

Ternyata perhubungan itu jelas melalui lambang-lambang yang digunakan, di samping pernyataannya yang terus dan mudah. Rumput di permataang dengan sendirinya menjelaskan keadaan padi di sawah; permataang yang semak-samun menunjukkan padi telah lama ditinggalkan; seperti dalam kalimat “tinggi rumput dari padi.” “Laut petang-petang” juga adalah kiasan kepada suatu keadaan sunyi, walaupun indah tetapi tidak berfungsi; kerana laut didatangi se-waktu subuh dan ditinggalkan menjelang senja. Ini adalah kiasan kepada situasi di mana anak-anak ditinggalkan oleh ayah yang tidak berbudi; walaupun perkataan budi tidak ada dalam pantun tersebut.

Untuk keadaan dalam kategori kedua, iaitu yang berhubungan tetapi tidak terlihat dengan jelas, sengaja dipetik pantun di bawah ini yang juga telah dibicarakan oleh Pijnappel, Ophuijsen dan Winstedt:

Satu dua tiga enam  
 Enam dan satu jadi tujuh  
 Buah delima yang kutanan  
 Mengapa maka peria tumbuh.

atau

Satu tangan bilangan lima  
 Dua tangan bilangan sepuluh

Asal kutanam biji delima  
Mengapa peria pula yang tumbuh.

(Wilkinson dan Winstedt 1961, 194–195)

Penulis berpendapat pantun-pantun di atas mempunyai hubungan makna antara pasangan-pasangan pembayang dan maksudnya; tetapi perhubungan itu tidak sepertimana yang dijelaskan oleh Winstedt yang melihatnya sebagai kehairanan seorang petani ketika membilang ayamnya dan kejadian yang berlaku di ladangnya. Ke pada penulis perhubungan ini juga adalah dalam bentuk lambang-lambang di dalamnya. Delima dan peria adalah dua keadaan yang berkontras: manis, sedap, baik dan pahit, jahat, atau tidak menyenangkan. Maksud yang mahu dinyatakan ialah sesuatu yang di luar jangkaan seseorang. Sesuatu yang di luar kebiasaan atau adat, sama ada adat alam atau adat manusia. Dalam masyarakat dikatakan "baik dibalas baik" dan ini juga undang-undang Tuhan; tetapi apa yang berlaku adalah di luar undang-undang ini: sesuatu kebaikan yang dibuat atau diberikan, tetapi balasannya adalah keburukan, jahat atau yang tidak menyenangkan. Kontras yang dimaksudkan dalam pasangan ini telah pun dijelaskan dalam pasangan pembayang; sesuatu yang di luar logika, logika matematik yang tepat dan pasti:  $1 + 2 + 3 + 1$  semestinya tujuh; atau  $2 \times 5 = 10$ . Dan rupa lojika matematik yang pasti tidak sama halnya dengan lojika alam yang di luar dugaan.

Daripada contoh dan perumusan yang diberikan bagi kategori-kategori I dan II di atas menjelaskan bagaimana sukarinya mencari dan memerikan perhubungan itu. Sesuatu yang objektif kepada seorang mungkin subjektif pada yang lain. Namun secara keseluruhannya dapat dikatakan, kebanyakan pantun yang telah digolongkan ke dalam mana-mana kategori ini dirasai mudah memahaminya dan menegaskan perhubungan seperti itu. Dan dengan cara yang sama pula dapat kita membandingkannya dengan pantun-pantun dalam kategori ketiga yang dirasakan tidak memiliki perhubungan yang demikian.

Umumnya pantun-pantun dalam kategori ketiga ialah yang lahir dalam keadaan-keadaan yang spontan, dalam aktiviti-aktiviti sosial dan kesenian, misalnya dalam pertandingan berpantun, semasa menyanyi seperti dalam dondang sayang, bongai, canggung,

lotah dan sebagainya. Demikian pula pantun-pantun yang dilafazkan secara langsung dalam istiadat-istiadat pertunungan dan perkahwinan. Secara perbandingan, daripada aktiviti-aktiviti seperti inilah yang lebih banyak menunjukkan pantun-pantun yang spontan dan yang tidak memperlihatkan perhubungan makna. Diberikan sedikit contoh di bawah:

Budak-budak bermain sudu  
Main-main di atas papan  
Kalau jumpa kasih setuju  
Bagai paku lekat di papan.

(Fatimah Lembing, Melaka 1978)

Hilir rakit batu tenggelam  
Minyak ada berbulu-buli  
Bulan sakit matahari demam  
Itu bernama dunia sunyi.

(Wilkinson dan Winstedt 1961, 207)

### Bentuk dan Struktur

Sebagaimana yang dibicarakan di atas tadi, pantun mempunyai bentuk dan ciri-ciri yang tersendiri; antaranya yang penting ialah sejajar dan berpasangan, semukur (*symmetrical*) dan '*reciprocal*' (Muhammad Hj. Salleh 1979, 73 – 74). Setiap rangkap terbina daripada dua pasangan, iaitu pembayang dan maksud. Suatu pasangan terdiri daripada dua baris sejajar dan setiap baris terbahagi kepada dua kerat atau kolon (*colon*) yang sama panjang dan setiap kolon (biasanya) mengandungi dua kata dasar yang lazimnya berupa dwisuku kata (*bi-syllabic*). Pembahagian ke dalam kolon, penentuan jumlah bunyi berdasarkan suku kata serta kehadiran klimaksa pada kolon-kolon tertentu dalam suatu rangkap pantun, merupakan ciri-ciri yang tetap dan '*regular*' hingga dapat dianggap sebagai satu timbangan metrik (*metrical constant*) seperti yang terdapat pada puisi-puisi yang mempunyai pola irama, misalnya puisi Barat (Altmann 1965, 14).

Dengan bentuknya yang tetap – berbaris dan berangkap – pantun-pantun dapat diklasifikasi atau dijeniskan atas dasar jumlah

baris serangkap. Pantun dua baris (atau pantun dua kerat) ialah yang terdiri daripada dua baris serangkap; demikian seterusnya pantun-pantun empat baris, enam baris, lapan baris dan lain-lain. Dengan mengekalkan bentuk yang sama, tetapi mengulang baris-baris tertentu dalam serangkap dapat memberikan bentuk atau jenis yang lain, iaitu yang dikenali sebagai pantun berkait. Di samping itu kelainan pada skema rima juga dapat memberikan variasi; misalnya terdapat pantun-pantun dalam rima a-a-a-a seperti syair atau diberi variasi yang lain mengikut kemampuan dan daya cipta para penyair.

Sesungguhnya itulah sahaja aspek-aspek bentuk yang dapat digunakan dalam penjenisan pantun, iaitu jumlah baris, teknik berkait dan kelainan rima. Kerana itu penjenisan yang berdasarkan aspek tema dan isi, seperti yang umum terdapat dalam tulisan-tulisan dan buku-buku yang telah lalu dapatlah dianggap tidak begitu tepat. Tegasnya judul-judul seperti "pantun kanak-kanak", "pantun berkasih sayang", "pantun dagang" dan lain-lain tidaklah dapat dianggap sebagai jenis pantun; kerana apa yang dimaskudkan ialah tema atau isi pantun.

Di bawah ini dibincangkan jenis-jenis pantun berdasarkan baris, teknik berkait dan variasi rima, seperti yang disarankan dalam kajian ini:

### 1. Jumlah baris

#### a. Pantun dua baris, dengan rima a-a

Pinjam ekor sembilang  
Pinjam-pinjam hilang.

Kalau tak cengal giam  
Kalau tak kenal diam.

Santan tairu gula Melaka  
Perempuan tak malu jantan tak suka.

(Hamilton 1922, 393–395)

Pantun dua baris atau pantun dua kerat ini dikenali juga sebagai *carmina* atau pantun kilat. Seperti dalam contoh-contoh di atas – dan yang telah selalu dibicarakan – baris pertama yang juga berkeduduk-

an sebagai sampiran atau pembayang, seolah-olah tidak bererti apa-apa selain daripada mengadakan bunyi untuk baris maksud. Ini bermakna ia sebagai hasil daripada pemakaian bunyi-bunyi yang bersaranan; tetapi bila dilihat lebih jauh dan dibandingkan dengan contoh-contoh yang lain, mungkin juga sampiran itu mengandungi kiasan yang dapat membayangkan maksudnya; misalnya:

Sudah gaharu cendana pula  
Sudah tahu bertanya pula.

Bukan ketam, tarah  
Bukan makan, muntah kedarah.

Ikan tokak makan meranggung  
Sedap tekak badan menanggung.

(Hamilton 1922, 393–395)

Dalam contoh-contoh di atas dapat dirasakan hubungan makna antara kedua-dua baris itu. Gaharu dan cendana kedua-duanya daripada jenis kayu yang berbau harum, biasanya digunakan dalam istiadat pengebumian. Di sini, mempergunakan kedua-duanya mungkin dengan maksud memperlengkapkan, kerana biasanya gaharu, cendana dan khalambak (kayu cengkih) digunakan dalam masa dan tujuan yang sama. Jadi "sudah tahu bertanya pula" mungkin dengan maksud menambah dan mempertegas sesuatu kenyataan. Tetapi dalam pengertian yang umum, menggunakan gaharu dan cendana dirasakan tidak perlu dan merugikan; kerana itu sesudah diberitahu, tidak perlu lagi ditanya, seperti maksud pantun-pantun di bawah ini:

Lepas gaharu cendana pula  
Rama-rama terbang ke pekan  
Sudah tahu bertanya pula  
Dari selama patik sembahkan.

atau

Sudah gaharu cendana pula  
Tetak temu di dalam puan  
Sudah tahu bertanya pula  
Hendak bercumbu gerangan tuan.

(Wilkinson 1901, 266)

Ikan tokak makan meranggung memang suatu pernyataan yang tepat; iaitu sejenis ikan air tawar yang mempunyai tabiat makan yang rakus, tidak memilih dan tidak terhad. Dengan begitu, mudah ter tangkap oleh umpan pancing atau jala. Demikian juga seorang yang makan mengikut sedap tekak akan menanggung akibatnya, tercekik atau mendapat penyakit. Tabiat makan yang buruk seperti ini disebut dalam bahasa yang kasar "muntah kedarah" atau "muntahkan darah", dan sifat ini dikeji oleh masyarakat Melayu. Dalam contoh kedua ketam dan tarah adalah proses pekerjaan yang berlainan. Mengetam atau memapan hanya sekadar merata atau melincinkan dengan menggunakan ketam tetapi menarah ialah membuang lebih banyak dengan menggunakan kapak atau parang. Demikian memapan sesuai dengan makan dan menarah, menyapu bersih hingga selesai. Perseimbangan sampiran dan maksud seperti ini umum ditemui dalam pantun-pantun dua baris seperti ini. Ini menunjukkan bahawa pantun bukanlah sekadar permainan bunyi yang tidak bererti. Dalam dua baris yang ringkas seperti itu masih dapat dijalankan lambang-lambang yang jelas untuk suatu idea yang tepat dan berkesan; betapa pula pantun-pantun empat baris dan lebih yang memberikan lebih banyak ruang untuk menyatakan maksud yang lebih kompleks. Contoh-contoh di bawah ini masih dapat menerangkan keadaan itu:

Tua-tua keladi  
Makin tua makin menjadi.

Tua-tua lengkuas  
Makin tua makin buas.

Ada beras taruh dalam padi  
Ada hajat taruh dalam hati.

(Hamilton 1922, 393–395)

Ada hujan ada panas  
Ada hari boleh balas.

Habis fikir jangan bohong  
Salah jawab kena rempong.

(Hose 1933, 9–16)

Walau bagaimanapun, seperti dalam pantun-pantun yang lain, perhubungan dan persembangan seperti itu bukanlah suatu keadaan yang tetap dan pasti. Masih mudah ditemui pantun-pantun yang tidak berkedudukan demikian yang jelas menunjukkan kes spontan cipta dan fungsi. Pantun dua baris, pada tahap yang awal telah mendekati peribahasa iaitu digunakan untuk membanding atau menyindir. Dengan mengucapkan baris yang pertama, orang yang disindir sudah mengetahui maksudnya pada baris kedua. Demikian 'tua-tua lengkuas' memberikan sindiran kepada seseorang yang tidak dapat mengimbangi kelakuannya dengan usianya. Kerana sifatnya demikian pantun-pantun dua baris masih luas terpakai dalam apa yang kita golongkan sebagai peribahasa berirama dan tidak kurang juga dalam seloka dan teromba.

b. Pantun empat baris, dengan rima a-b-a-b

Tinggi bukit Gunung Juasih  
Nampak dari jeram padang  
Bukannya mudah bercerai kasih  
Umpama kerbau sesat bertandang.

(Wilkinson dan Winstedt 1961, 96)

Cenderawasih burung udara  
Senduduk di tengah huma  
Hatiku kasih tidak terkira  
Hidup mati bersama-sama.

(*Pantun Melayu* 1958, 149)

Bukit bunian panjang tujuh  
Dilipat lalu panjang lima  
Bukan tanaman tak mau tumbuh  
Bumi yang enggan menerima.

(Hamid Jabar 1979, 10)

Pisau landa hulu landa  
Koyak ke nenas kupas bawang  
Laksana genggam api bara  
Berasa panas dilepas buang.

(Tahir Kotai, Negeri Sembilan 1978)

c. Pantun enam baris, dengan rima a-b-c, a-b-c.

Ayam kurik rambaiyan tedung  
Ekor melewati dalam padi  
Ambillah sayak beri makan  
Dalam daerah tujuh kampung  
Tuan seorang tempat hati  
Yang lain jadi diharamkan.

(Pantun Melayu 1958, 68)

d. Pantun lapan baris, dengan rima a-b-c-d, a-b-c-d.

Rumpun rotan di kota alam  
Ditebang dibelah empat  
Tumbuh serumpun di seberang  
Selasih muara sungkai.  
Penglihatan usah diperdalam  
Pandang nan usah dipertepat  
Adik di dalam tangan orang  
Maksud rasa takkan sampai.

(Pantun Melayu 1958, 68)

e. Pantun sepuluh baris, dengan rima a-b-c-d-e, a-b-c-d-e.

Turun hujan hari dah petang  
Bunga mawar tumbuhnya subur  
Ditiup angin habis tunduk  
Dipetik jangan dicabutkan  
Tanaman puteri dari Jawa.  
Sudah habis rokok sebatang  
Telah punah sirih sekapur  
Pasar sudah tempat duduk  
Penatlah saya menantikan  
Buah hati tak muncul jua.

(Mohd. Taib Osman 1975b, 27)

f. Pantun 14 baris, dengan rima a-b-c-d-e-f-g-h, a-b-c-d-e-f-g-h.

Rotan sepathah dua patah  
Tarik kerakap batang padi  
Dibawa sutan dari Jeddah  
Padi yang jangan digempakan  
Kalau gempa antara gugur  
Bila gugur masuk pergi  
Di situ tanamkan pula.

Tuan di Makkah dan Madinah  
Naik akhirat batu haji  
Tegak berdiri Rasulullah  
Kami jangan dilupakan  
Kalau lupa antara tidur  
Dalam tidur menjadi mimpi  
Jika terbangun teringat pula.

(Mohd. Taib Osman 1975b, 27)

g. Pantun 16 baris dengan rima a-b-c-d-e-f-g-h, a-b-c-d-e-f-g-h.

Mat Jenin berangan hendak berniaga  
Menjual papaya dengan rambutan  
Untung dibilang lama ditelek  
Berpeluk mayang berpegang tali  
Di kiri telefon di kanan teleks  
Berkepak berkokok 'akulah jago'  
Duduk dirubah gerak berpada  
Peleleh patah lungsur melayang.  
Ekonomi baru bila dah jaya  
Bumiputera pun kaya bukan buatan  
Industri dan kilang menjadi milik  
Lombong dan ladang direbut kembali  
Gerai di lorong menjadi kompleks  
Dangau dan pondok berganti banglo  
Isteri bertambah kekasih berganda  
Ikrar dan sumpah kabur menghilang.

(Harun Mat Piah 1979b)

Seperti yang telah disentuh sebelum ini, pantun-pantun yang lebih daripada empat baris tidak begitu popular; pertamanya mungkin kerana kesukaran menciptanya. Memang tidak mudah mendapatkan urutan baris-baris yang berhubungan maknanya dan indah bunyinya seperti dalam pantun-pantun empat baris. Kedua-duanya, memang dapat dirasakan sampiran-sampiran yang berurutan 3, 4, 6 atau 8 baris itu seolah-olah sengaja diadakan dan bila diucapkan, bunyinya seperti membilang atau membacakan mantera. Suatu hal yang penting dipertimbangkan bahawa pantun pada fungsinya yang dasar ialah untuk dinyanyikan. Secara kebetulan pula, nada lagu-lagu asli, joget dan lain-lain yang menggunakan liriknya daripada pantun, biasanya terjadi daripada empat 'bar', untuk satu

pasangan dan keseluruhan empat baris pantun dapat diisi dalam dua pasangan yang terdiri daripada 8 bar. Dengan demikian pantun-pantun empat baris adalah paling sesuai untuk dinyanyikan. Dalam permainan bongai atau donak-danai di Negeri Sembilan, hampir keseluruhan liriknya merupakan pantun empat baris. Hanya sesekali didapati pantun enam atau mungkin lapan baris, tetapi tidak pernah lebih daripada itu. Apabila pantun enam baris yang digunakan dalam pola lagu yang sama seperti pantun empat baris, penyanyinya akan mengulang baris ketiga dan keenam dengan nada yang sama untuk baris kedua dan keempat. Dalam satu rakaman permainan ini iaitu dalam lagu Petasih, terdapat satu untai pantun enam baris dalam urutan pantun-pantun empat baris. Di bawah ini dipetik urutan itu untuk menggambarkan keadaannya yang sebenar:

Laki-laki I (En. Tahir)	Ya Ilahi ngadik Kalau nam mandi biar sama mandi Biar bersampan kita berdua Ya Ilahi ngadik Kalau nak mati biar sama mati Biar sekafan kita berdua.
Perempuan I (Puan Senyum)	Ya Ilahi tuan Merpati terbang seribu Hinggap seekor di hujung laman Ya Ilahi tuan Rasa nak mati di hujung kuku Hendak berkubur di tapak tangan.
Laki-laki I	Ya Ilahi ngadik Masak nasi pulan-pulan Makanan anak permaisuri Dimakan di Kota Melaka Ya Ilahi ngadik Kalau nak mati berpayung bulan Nak berkubur di hujung jari Elok bertimbun si air mata.
Laki-laki II (En. Abdullah)	Ilahi dik oi Kok tuan mandi di hulu Hanyut abang tempurung dasar Ilahi dik oi Kok tuan mati dahulu Nantikan abang di Padang Mahsyar

Penyanyi laki-laki pertama (En. Tahir bin Kotei) merupakan ketua kumpulan ini dan memang amat mahir dalam bidang pantun. Beliau boleh berpantun secara spontan dan menyanyi berbalas pantun untuk dua atau tiga jam tanpa berhenti. Dengan pengalaman ini beliau dapat memberikan variasi misalnya menggunakan pantun-pantun enam atau lapan baris dalam pola lagu untuk empat baris. Tetapi ada juga ketikanya beliau terlupa atau kehilangan salah satu daripada barisnya, menjadikan pantun itu lima atau tujuh baris; namun demikian dengan kecekapannya berpantun, kesilapannya itu tidak akan disedari penonton.

Sesungguhnya memang sukar mencipta pantun-pantun yang lebih daripada empat baris, lebih-lebih lagi dalam konteks yang memerlukan kes spontan, misalnya dalam pertunjukan atau pertandingan. (Aktiviti-aktiviti kesenian seperti ini kadang-kadang mengandungi maksud bertanding sama ada secara langsung atau tidak; misalnya dalam majlis-majlis, keramaian atau pesta, di mana lebih daripada satu kumpulan dijemput menunjukkan permainan). Selain daripada irama lagu yang mesti diikut dengan betul, ciri-ciri pantun yang baik harus juga dipelihara. Urutan baris-baris pembayang, 3, 4, 5, 8 dan seterusnya harus juga mempunyai hubungan makna di samping pilihan kata, susunan dan rima. Dalam contoh di atas (pantun oleh Encik Tahir) tadi masih dapat mempertahankan ciri ini.

“Masak nasi pulan-pulan” iaitu masak yang sempurna, gebu, putera gahara raja Melaka. Demikianlah mati orang yang berkasihan, dalam suasana yang tenteram, selalu dikunjungi dan dikenang oleh orang yang ditinggalkan. Ciri demikian dapat juga dilihat dalam contoh pantun lapan baris dan 16 baris. Dalam contoh yang akhir pembayang berdasarkan mitos Mat Jenin yang begitu popular atau diketahui umum. Urutan ceritanya ada, bagaimana Mat Jenin ketika memanjat kelapa berangan-angan hendak menjadi kaya akhirnya jatuh dan mati. Kiasan begitu sesuai dengan maksud pantun sebagai sindiran kepada kaum bumiputera yang tidak tahu menggunakan peluang-peluang yang diberikan atau menggunakan pada jalan yang tidak wajar.

## 2. Pantun berkait

Ahmad Balji, dalam bukunya *Pantun* (1961), memberikan keterangan-

an mengenai pantun berkait, seperti di bawah ini:

Mengarang pantun berkait susah sedikit daripada mengarang pantun biasa, sebab pantun berkait sambung-menyambung antara satu rangkap dengan satu rangkap, baik maksudnya atau pembayang maksudnya. Seolah-olah kita akan mengarang layaknya. Pembayang maksud itu akan bersambung-sambung menerangkan maksud atau tujuan kita.

Sebab itulah dalam pantun berkait kurang dihiraukan orang tentang tata tertibnya, tidak mustahak mesti mengikuti semua petua-petuanya. Memadailah jika kita dapat mengikuti tata tertib (Ahmad Balji 1961, 80).

Keterangan di atas agak jelas menggambarkan sifat dan ciri pantun berkait. Dari segi bentuknya sama seperti pantun empat baris, dengan skema rima a-b-a-b dan seboleh-bolehnya mengekalkan seberapa banyak ciri-ciri pantun yang baik dari segi rima akhir dan rima dalaman, rima yang sempurna, pemilihan kata dan sebagainya. Tetapi, sebagaimana yang disebutkan oleh Ahmad Balji itu, memang agak rumit mengadakan ciri-ciri estetika pantun, kerana penyair akan sentiasa terkongkong oleh jalan cerita atau persambungan idea yang harus diutamakan. Perhatikan contoh di bawah yang dapat dianggap sebagai pantun berkait yang baik:

Rajawali tinggi mengawan  
Anak merbah di ranting palas  
Cinta kami padamu tuan  
Dengan hati yang tulus ikhlas.

Anak merbah di ranting palas  
Patah ranting terbanglah dia  
Dengan hati yang tulus ikhlas  
Tidak kami menduakan cinta.

Patah ranting terbanglah dia  
Pulang ke sarang di rumpun pandan  
Tidaklah kami menduakan cinta  
Selagi hayat dikandung badan.

(Ahmad Balji 1961, 83)

Dari segi persambungan idea ini, pantun berkait hampir menyamai syair; dan pada beberapa tempat dapat menjalankan peranan yang sama seperti syair, misalnya dalam menyampaikan

cerita. Dalam pantun "Raja Haji" misalnya, pantun berkait telah digunakan untuk menyampaikan cerita (naratif) yang panjang yang biasanya disampaikan dalam bentuk syair. Tetapi secara keseluruhan dapat dirasakan cara yang demikian tidak begitu menggalakkan. Selain daripada penggunaan ulangan yang membazir, jalan cerita juga terputus-putus hingga mungkin menjelaskan minat untuk mengikuti ceritanya yang sebenarnya amat menarik. Lihat contoh di bawah ini yang merupakan bahagian akhir daripada pantun itu, menceritakan kedudukan isteri Raja Haji yang telah tewas di tangan Belanda:

Puan terletak di atas rantaka  
 Orang berpadi di tanah liat  
 Isteri pun tiada dapat berkata  
 Mayatnya pun tiada dapat dilihat.

Orang berpadi di tanah liat  
 Di Mekah banyak buah pedada  
 Mayat tiada dapat dilihat  
 Seperti merekah rasanya dada.

Di Mekah banyak buah pedada  
 Bunga tanjung di atas rakit  
 Bagai merekah rasanya dada  
 Terkenangkan untung dengan nasib.

Bunga tanjung di atas rakit  
 Sarabei di muka pintu  
 Sudah untung dengan nasib  
 Maka sampai sehinggaan situ.

Sarabei di muka pintu  
 Pergi ke parit hendak meriau  
 Maka sampai sehingga itu  
 Ratu Amas lalu berbalik ke Riau.

Pergi ke parit hendak meriau  
 Situlah banyak buah kembili  
 Isteri berbalik ke tanah Riau  
 Serta duduk mendiam-diamkan diri.

(Maxwell 1890, 187)

Selain daripada contoh-contoh di atas, terdapat juga teknik berkait dalam bentuk yang lain; iaitu seperti yang dapat dilihat

dalam apa yang dikenali sebagai "pantun rejang", "pantun tiga puluh", "pantun Si Busu pandai membilang malam" dan "pantun abjad". Untuk mendapatkan gambaran yang jelas, di bawah ini dibicarakan dengan ringkas bentuk-bentuk pantun tersebut:

a. Pantun rejang

Pantun rejang terdiri daripada lima baris serangkap; baris pertama merujuk kepada sistem kepercayaan terhadap rejang, iaitu raksi mengikut kiraan waktu, ketika, hari dan hari bulan yang sesuai dengan takwim Islam. Misalnya, sehari bulan rejang kuda, dua hari bulan rejang kijang, tiga hari bulan rejang harimau, empat hari bulan rejang kucing dan seterusnya sehingga tiga puluh hari bulan. Baris kedua hingga kelima adalah seuntai pantun empat baris dengan rima a-b-a-b dan tidak serima dengan yang pertama yang bebas dari segi rima. Rejang, sama ada dalam bentuk pantun atau syair biasanya dilakukan dalam majlis-majlis perkahwinan atau keramaian yang lain, atau sengaja diadakan sebagai hiburan sambil bekerja, misalnya ketika melerai padi, menumbuk emping, berjaga-jaga untuk sesuatu majlis atau perayaan dan sebagainya. Contoh:

*"Rejang 30 Hari" atau "Rejang Sindir Ilmu"*

Sehari bulan rejangnya kuda

Kuda aman dari Pasai

Dipacu lalu ke bandar Selan

Akhir zaman muda dan bisai

Tuntutlah ilmu mengenal Tuhan.

Dua hari bulannya rejang kijang

Kijang mengantuk di rumpun buluh

Memakan ilmu biarlah sungguh

Hidup kita ni akhirkan mati.

Tiga hari bulan rejangnya harimau

Harimau sekuci lari sekawan

Mati ditikam si janda balu

Ilmu yang suci tuntutlah tuan

Kerana suci sempurna fardu.

Empat hari bulan rejangnya kucing

Kucing melompat ke atas geta

Lalulah turun ke serambi

Apakah sudah kejadian kita

Hidup kita ni akhirkan mati.

- b. Pantun Cik Busu Pandai Membilang Malam, atau 30 Hari

Terdapat dua versi pantun yang memakai judul "Cik Busu Pandai Membilang Malam"; satu di Tanjung Ipoh, Negeri Sembilan dan satu lagi di Ulu Dungun, Terengganu. Pantun ini, di Negeri Sembilan dikenali juga sebagai "Gubang Pendek", iaitu sebagai pendahuluan kepada "Gubang Panjang" yang biasanya merupakan sebahagian daripada cerita Malim Deman. Versi ini hanya hingga ke malam yang ke-21, kerana menurut informan, lagu itu dinyanyikan oleh Malim Deman ketika dalam perjalanan mencari isterinya yang telah kembali ke kayangan. Dan setelah malam ke-21, ketika dia menunggu di laut Tanjung Jati, barulah dia mendapat ilham bagaimana caranya dia akan mendapatkan isterinya.

Versi Ulu Dungun, Terengganu dikenali juga dengan nama "Pantun 30", dan pantunnya sehingga malam yang ke-30. Menurut informan (Hj. Ibrahim Abdullah), pantun ini mengisahkan seorang "Cik Busu" yang mendapat jodoh atau kekasih, tetapi tidak dapat menakluki gadis itu hingga malam yang ke-30. Di bawah ini diberikan petikan daripada kedua-dua versi itu:

i. Negeri Sembilan:

Amboi ... la ngamboi  
 Si Bongsu pandai bilang malam  
 Malam ini malam keesa  
 Esa di pangsa  
 letak mari di dalam perahu  
 Belum kenal dengan biasa  
 Apa dibuat orang pun tahu.

Amboi ... la ngamboi  
 Si Bongsu pandai bilang malam  
 Malam ini malam kedua  
 Dua di pagar anak  
 Mati seekor di sumpitan  
 Ada kak janda dua beranak  
 Ada seorang mais mulutan.

Amboi ... la dingamboi  
 Si Bongsu pandai bilang malam  
 Malam ini malam ketiga  
 Tiga lubuk bulangan

Rama-rama terbang ke Jawa  
 Seorang mencuba seorang bulangan  
 Sama-sama bersabung nyawa.

Amboi ... la ngamboi  
 Si Bongsu pandai bilang malam  
 Malam ini malam kengempat  
 Berempat duduk di pentas  
 Cukup berlima dengan gurunya  
 Bagai dakwat dengan kertas  
 Sudahlah kena dengan jodohnya.

ii. Versi Ulu Dungun, Terengganu:

Kata Cik Busu pandai membilang malam  
 Malam ini malam kese-se  
 Parang dewangsa  
 Hendak memarang gunung sebuah  
 Kata Cik Busu pandai berkata  
 Kata sepatah tiada berubah.

Kata Cik Busu pandai membilang malam  
 Malam ini malam kedua-we  
 Dua di kayu anak  
 Mari disumpit dengan sumpitan  
 Orang berdua berdukung anak  
 Macamlah gunung bersahutan.

Kata Cik Busu pandai membilang malam  
 Malam ini malam ketiga-ga  
 Dua tiga genggong kupatah  
 Hendak menggenggong si batang padi  
 Dua tiga gunung kulangkah  
 Hendak mencari bagi di hati.

Kata Cik Busu pandai membilang malam  
 Malam ini malam keempat-pat  
 Pisau lipat diulas geta  
 Ilmu jatuh ke padang  
 Bagai disipat bagai di peta  
 Haram tak jemu mata memandang.

Daripada tiga contoh yang diberikan di atas dapat dilihat bahawa dalam setiap untai pantun terdapat seuntai pantun empat

baris yang menggunakan rima a-b-a-b. Sementara baris pertama (pada Pantun Rejang) dan pertama dan kedua (pada Pantun Si Busu) merupakan penghujung kepada untai-untai pantun seluruhnya. Dan dari segi persembahannya keadaan ini sesuai dengan irama lagunya. Bagaimanapun ada suatu ciri yang umum di dalam ketiga-tiga jenis itu yang menjadikan unik dan indahnya ciptaan ini. Baris-baris penyambung ketiga-tiga contoh berhubungan dengan empat baris pertama, menjadi subjek kepada baris kedua; demikian kuda, kijang, harimau, kucing dan seterusnya menjadi subjek kepada baris kedua dalam setiap rangkap pantun yang berikutnya.

Dalam pantun Cik Busu, baris kedua mengandungi satu bunyi yang dapat diulang dalam baris ketiga. Perkataan *esa* (satu, pertama) diulang dalam baris ketiga: 'esa dipangsa' (Negeri Sembilan), 'parang dewangsa' (Terengganu). Demikian untai-untai seterusnya (Negeri Sembilan): perkataan *kedua* dengan *dua*, *ketiga* dengan *tiga*, *keempat* dan *empat* dan seterusnya; dan Terengganu perkataan *kedua-we* dengan *dua*, *ketiga-ga* dan *dua-tiga*, *keempat-pat* dengan *pisau lipat* dan seterusnya. Keadaan seperti ini dapat mengadakan variasi yang sedikit kompleks kepada pantun, menjadikan bentuknya lebih indah dan tersendiri di samping menunjukkan kebolehan mencipta dan mengadakan kepelbagaiuan kepada bentuk yang telah ada.

### c. Pantun abjad, atau pantun alif, ba, ta

Pantun ini dari segi bentuk dan ciri-ciri yang lain, tidak berbeza daripada pantun empat baris (*quatrain*). Hanya perbezaannya baris pertama pada tiap-tiap untai perkataannya yang mula-mula merujuk kepada satu abjad (huruf) jawi dari *alif* hingga *ya*. Penggunaan huruf-huruf ini tidak memperlihatkan apa-apa keistimewaan, misalnya menggunakan konsep '*quality*' atau nilai huruf seperti yang terpakai dalam sistem raksi dan sebagainya. Bagaimanapun idea mendapatkan satu perkataan yang sesuai daripada suatu abjad tertentu itu dapat juga memberikan kelainan kepada bentuk pantun. Contoh-contoh di bawah ini dipetik daripada sumber-sumber yang berlainan. Contoh pertama, daripada R.O. Winstedt (1923, 308–311), memperlihatkan teknik berkait dengan tema cinta dan kasih sayang. Contoh kedua, daripada satu permainan lotah di Kampung Gajah,

Perak, juga bertemakan kasih sayang. Perhatikan sebahagian daripadanya dalam contoh-contoh di bawah ini:

i. Daripada kumpulan Winstedt:

- (+) Alif pertama awal ditulis  
Nyatakan terdiri huruf sekalian  
Tersalah mimpi diharu iblis  
Rasanya ditimpa gunung berlian.
- (-) Baju layangan kain sampingan  
Dikurniai Baginda Nila Suba  
Rasanya ditimpa gunung berlian  
Mimpikan bulan jatuh ke riba.
- (-) Tajuk mas Nila sagurba  
Perbuatan Galih Puspakencana  
Mimpikan bulan jatuh ke riba  
Cahayanya limpah di dalam istana.
- (+) Thalatha berangkat Maharaja China  
Melanggar negeri Kembayat Negara  
Cahayanya limpah di dalam istana  
Asyik berahi edan asmara.

ii. Daripada permainan Lotah, Perak:

- (+) Alif terdiri ambangan bayu  
Pelajaran anak Raja Jumah  
Akal bicara mohon dipayu  
Wujud anggota habis lemah.
- (-) Balai berisi nila kesumba  
Minuman anak raja kayangan  
Harap hati minta perhamba  
Supaya kasih berpanjang-panjangan.
- (-) Telepot bunga teratai  
Tumbuh di jambang bunga wanta  
Reput atap dengan lantai  
Abang tak lepas dari bercinta.
- (-) Thebu (tebu) ladang dimakan kuda  
Lada diramas dalam telaga  
Manak padan dengan saya  
Tuan emas, saya tembaga.

(Salleh bin Ngah Jaafar, Parit 1977)

Seperti yang terlihat dalam contoh (i) terdapat perkaitan pada baris keempat daripada rangkap yang mula-mula, diulang menjadi baris ketiga pada rangkap yang berikutnya. Sementara baris pertama dalam setiap rangkap merujuk kepada suatu abjad sebagai ganti kepada perulangan baris kedua, seperti dalam pantun berkait yang biasa. Dengan perkaitan demikian terasa pantun ini lebih tinggi nilainya; kerana untuk baris pertama, selain perkataan di awal baris mesti terbina oleh suatu abjad tertentu, rima akhir juga harus sama dengan baris ketiga yang telah tetap bentuknya. Sebaliknya dalam contoh (ii) seolah-olahnya tidak ada perkaitan; tetapi pada kenyataannya perkaitan itu wujud; iaitu melalui persambungan idea yang terbina melalui penggunaan abjad yang berurutan untuk suatu tema yang sama, hingga melahirkan suatu keseluruhan. Justeru itu ia dapat dianggap sebagai suatu variasi pantun berkait.

### 3. Variasi daripada kelainan rima

Sepertimana yang berlaku dalam syair, pantun juga mungkin terdapat dalam skema rima yang lain daripada biasa iaitu mungkin dalam bentuk a-a-a-a seperti rima syair, atau dalam susunan yang lain menurut daya cipta pengarangnya. Setengah-setengah pengkaji memberikan istilah yang lain kepada pantun dengan rima a-a-a-a ini; misalnya Hooykaas (1965) menamakannya seloka dan Simandjuntak (1965), pantun seloka; tetapi – seperti yang disebutkan dalam bab yang lalu – bentuk demikian masih pantun, iaitu pantun yang memakai rima syair. Lihat contoh-contohnya di bawah ini:

Isap rokok tembakau Cina  
 Asapnya keluar seperti bunga  
 Ayuhai adik abang bertanya  
 Cincin di jari siapa yang punya?

(Wilkinson dan Winstedt 1961, 7)

Sinyor mabuk simpang tiga  
 Jatuh tersungkur tepi telaga  
 Matahari mabuk bulan gila  
 Bintang bertabur puyuh berlaga.

(Wilkinson dan Winstedt 1961, 16)

Anak sepat dalam padi  
 Anak seluang meloncat tinggi

Kalau tak dapat bagai di hati  
Biar bujang sampai ke mati.

(Wilkinson dan Winstedt 1961, 33)

Jauh-jauh kapalnya datang  
Pasang bendera atas tiang  
Jauh-jauh adinda datang  
Perutku lapar menjadi kenyang.

(*Pantun Melayu* 1958, 160)

### Tema dan Isi

Van Ophuijsen membahagikan pantun ke dalam lima "macam atau jenis", iaitu:

1. Pantun tua
2. Pantun dagang
3. Pantun riang
4. Pantun nasihat dan
5. Pantun muda.

Penyusun buku *Pantun Melayu* (Balai Pustaka), memperincikan pembahagian itu kepada:

1. Pantun anak-anak:
  - a. Pantun bersukacita
  - b. Pantun berdukacita.
2. Pantun orang muda:
  - a. Pantun dagang atau pantun nasib
  - b. Pantun muda
  - c. Pantun jenaka.

Pantun muda terbahagi kepada empat:

- a. Pantun berkenalan
  - b. Pantun berkasih-kasihan
  - c. Pantun berceraiann
  - d. Pantun berhiba hati.
3. Pantun orang tua:
    - a. Pantun nasihat
    - b. Pantun adat
    - c. Pantun agama.

Cara pembahagian atau klasifikasi seperti di atas mungkin kurang tepat; pertama kerana aspek yang dijadikan ukuran penjenisan tidak daripada bentuk dan struktur yang tetap, objektif dan '*constant*', tetapi daripada yang tidak tetap, subjektif dan boleh berubah-ubah menurut pentafsiran yang berlainan. Kedua, dengan pembahagian demikian seolah-olah mempermudahkan persoalan dengan mengambil sebagai dasarnya, tiga peringkat hidup manusia; iaitu: kanak-kanak, orang muda dan orang tua. Pembahagian seperti ini dirasakan tidak begitu sesuai, kerana pada praktiknya, pantun tidak terbahagi mengikut peringkat usia. Contoh-contoh yang diberikan bagi tiap-tiap bahagian itu juga tidak begitu tepat dengan keadaan yang sebenar. Pantun-pantun yang diklasifikasikan sebagai pantun kanak-kanak, tidak menggambarkan cara hidup dan cara berfikir kanak-kanak. Dunia kanak-kanak dunia permainan. Kanak-kanak berpantun atau berpuisi dalam lagu yang mengiringi permainan; ketika itulah lahirnya pantun-pantun yang bernada jenaka, gembira, menyindir, menggiat atau hanya berupa permainan bunyi yang kurang bererti. Kerana itu dengan memberikan dua tema sahaja – bersukacita dan berdukacita – tidaklah menggambarkan dunia kanak-kanak yang sewajarnya. Pembahagian kepada pantun orang muda dan pantun orang tua juga tidak jelas maksudnya. Dari segi pemakaian pantun bukanlah orang-orang muda semestinya menggunakan pantun-pantun cinta dan orang-orang tua menggunakan pantun-pantun agama dan adat. Biasanya aktiviti berpantun secara praktiknya melibatkan orang-orang tua. Kebanyakan penyanyi dalam permainan-permainan kesenian seperti bongai, lotah, canggung, beduan, rodat, dondang sayang dan lain-lain, terdiri daripada peserta-peserta yang telah lanjut usianya, dan hampir keseluruhan pantun-pantun yang dipungut daripada aktiviti-aktiviti ini tergolong sebagai pantun cinta, berahi dan kasih sayang.

R.J. Wilkinson dan R.O. Winstedt tidak membuat penjenisan dan klasifikasi, tetapi memberikan pelbagai topik dan judul yang diikuti dengan rangkap-rangkap pantun yang sesuai isinya dengan judul-judul yang diberikan; misalnya "Datangnya Cinta" (*The Coming of Love*), "Hati Muda" (*Wilful Youth*), "Pungguk Rindukan Bulan" (*Unrequited Love*) dan lain-lain. Cara begini hampir sama dengan yang dibuat oleh Mohd. Taib Osman (1975b) yang

membahagikan pantun kepada empat bahagian, iaitu:

1. Ungkapan bersajak atau pantun dua baris
2. Pantun kanak-kanak
3. Pantun biasa
4. Pantun berkait.

Pada pantun biasa, diberikan beberapa judul bersama rangkap-rangkap pantun yang sesuai dengan judul-judul tersebut, antaranya:

- a. Pantun berkasih sayang, yang dapat pula dibahagikan kepada judul-judul kecil:
  - i. Menyatakan kasih sayang
  - ii. Kasih yang berkias
  - iii. Kasih yang diuji
  - iv. Kehampaan berkasih.
- b. Renungan terhadap hidup:
  - i. Nasib
  - ii. Telatah manusia
  - iii. Badi
  - iv. Harapan dan ikhtiar
  - v. Dagang melarat.
- c. Pantun teka-teki
- d. Pantun meminang
- e. Pantun yang lebih daripada empat baris.

Sesungguhnya pengkaji-pengkaji yang disebutkan di atas telah mendekati pantun pada aspek tema dan isi. Hanya pembahagian itu yang disalahtafsirkan sebagai jenis atau klasifikasi. Dengan melihat pembahagian-pembahagian itu dan membandingkannya dengan sumber-sumber yang lain, penulis berpendapat tema dan isi pantun Melayu dapat dibahagikan seperti di bawah ini:

1. Pantun kanak-kanak
2. Cinta dan kasih sayang

3. Telatah dan cara hidup masyarakat
4. Pantun teka-teki
5. Pantun puji-pujian atau sambutan
6. Pantun nasihat, agama dan adat
7. Pantun naratif atau cerita.

Di bawah tema kasih sayang boleh dimasukkan judul-judul kecil berdasarkan maksud pantun, antaranya:

- i. Berkenalan dan usik-mengusik.
- ii. Berkasih, bersetia dan kepuasan berkasisih
- iii. Kasih menumpang, cemburu dan bercerai
- iv. Kegagalan dan penyesalan.

Dan di bawah telatah dan cara hidup masyarakat dapat dimasukkan:

- i. Budi, ketinggian budi
- ii. Nasib, dagang
- iii. Kiasan dan jenaka
- iv. Deskripsi perjalanan, keadaan dan sebagainya.

#### *Pantun Kanak-kanak*

Dari segi struktur, pantun kanak-kanak lebih mudah daripada pantun yang biasa. Ia mungkin berupa pantun dua baris atau empat baris yang setiap baris terdiri daripada tiga perkataan. Bahasanya sederhana, mudah difaham, tidak begitu terikat kepada tatabahasa, misalnya kata-kata dasar, tanpa imbuhan yang sewajarnya. Pemakaian lambang-lambang mungkin mudah, ataupun tidak ada langsung dan walaupun terbahagi kepada unit-unit sampiran dan maksud, fungsi sampiran lebih jelas untuk mengadakan bunyi dan tidak semestinya mempunyai hubungan makna seperti yang selalu-nya ada dalam pantun-pantun empat baris.

Isi dan tema pantun semestinya merujuk kepada dunia kanak-kanak – perasaan, pemikiran dan kehidupan mereka. Mungkin juga isinya mengandungi nasihat, pengajaran dan rasa kasih sayang, seperti misalnya pantun-pantun yang ditujukan kepada kanak-

kanak oleh orang dewasa, ibu bapa atau guru mereka. Di bawah ini diberikan beberapa contoh:

i. Permainan, jenaka dan usik-mengusik

Burung kakak tua  
Bersarang rumah batu  
Badan sudah tua  
Gigi jarang sana satu.

Kain baju basah  
Selit balik pintu  
Abang baru nikah  
Keluar cari kutu.

(Mohd. Taib Osman 1975b, 15)

Hujan rintik-rintik  
Tumbuh bunga lalang  
Kau sangat cantik  
Aku sangat sayang.

Cak-cak rang  
Terpacak tengah terang  
Hendak bertunang  
Belanja kulit kerang.

(Sungai Manik, Teluk Intan 1979)

Keluang keluit  
Bertanak tembikar  
Balik dari bukit  
Terkincit atas tikar.

Dang-deng kat  
Tempurung bulu-bulu  
Pengenden sudah dekat  
Tidak tahu malu.

Buai-buai kaduk  
Pertah dalam timba  
Panjang janggut datuk  
Buat tali timba.

(Mariam Hj. Ahmad, Batu Pahat 1976)

ii. Kasih sayang, nyanyian atau mendodoi anak

'mbok 'mbok emping  
Emping lesung tuk siak  
Di mana tikus bunting  
Lari masuk celah ketiak.

Endui-endui cak  
Cak makan padi  
Adik dok teriak  
Mak pi ketam padi.

Gi da biak dak  
Ku kan an cak  
Gigi ada bibiak tak dak  
Aku makan haruan besak.

(Randon bt Sinha, Selama 1978)

Buah setoi tok doi  
Masak perang-perang  
Dodoi adik dodoi  
Nanti takut musang

(Rokiah Hj. Yahya, Selama 1978)

iii. Rayuan nasihat dan pengajaran

Ayun tajak buai tajak  
Tajak Palembang dari Jawa  
Ayun anak buailah anak  
Anak bertimbang dengan nyawa.

Banyak anak sarang tebuan  
Ambil kelapa dari ulu  
Aduhai anak ibu berpesan  
Jangan lupa menjaga ibu.

(Randon bt Sinha, Selama 1978)

Ayun anak ayun  
Ayun sampai ujung serambi  
Bangun anak bangun  
Jangan tidur tinggi hari.

(Sarah bt Sihar, Batu Pahat 1978)

## iv. Perasaan gembira, dukacita

Anak lembu merah  
Tambat di pokok asam  
Adik kena marah  
Tarik muka masam.

Durian atas titi  
Pisang dalam kubang  
Suka rasanya hati  
Ibu sudah pulang.

(Rokiah Hj. Yahya)

Elok rupanya kumbang jati  
Dibawa itik pulang petang  
Tidak terkata besar hati  
Melihat ibu sudah datang.

Ramai orang borsorak-sorak  
Menepuk gendang dengan rebana  
Alang besarnya hati anak  
Mendapat baju dengan celana.

Lurus jalan ke Paya Kumbuh  
Kayu jati bertimbal jalan  
Di mana hati tidakkan rusuh  
Ibu mati bapa berjalan.

Jawi hitam tiada bertanduk  
Memakan rumput di atas tungku  
Lihatlah ayam tidak berinduk  
Demikian hidup anak piatu.

(*Pantun Melayu* 1958, 28, 29, 32, 37)

### *Pantun Kasih Sayang*

Sebahagian besar daripada pantun-pantun Melayu, baik daripada koleksi yang telah ada mahupun daripada yang belum terkumpul, adalah merupakan cetusan emosi yang mengandungi perasaan cinta, asyik, berahi dan kasih sayang. Daripada 3 000 rangkap pantun yang telah diperiksa (dari segi tema dan isi), 60 peratus daripadanya merujuk kepada kehidupan bercinta antara para kekasih, seluruhnya membayangkan perasaan, harapan, pengalaman dan pergolakan

jiwa orang-orang yang sedang bercinta. Memang agak susah memberikan judul-judul yang khusus, misalnya seperti yang dilakukan oleh Winstedt, kerana pendekatan yang demikian lebih berupa subjektif, dan bergantung kepada pemahaman individu. Tetapi kalau mahu dibuat penggolongan, pantun-pantun itu akan memenuhi seluruh edaran (*cycle*) hidup berkasih sayang. Dari peringkat keduanya suasana berkasih sayang atau memadu kasih, berjanji dan bersetia. Pada peringkat ketiga mungkin keduanya akan teruji bersengketa atau berubah sikap dan pada peringkat keempat mungkin berpisah, bercerai dan putus asa. Daripada 1 800 rangkap pantun kasih yang dikaji untuk persoalan ini, setiap rangkapnya boleh memasuki sesuatu bahagian daripada empat golongan itu; dan tidak jarang juga sesuatu rangkap boleh memasuki lebih daripada satu golongan. Di bawah ini diberikan beberapa contoh:

i. Peringkat perkenalan, giat dan usik-mengusik:

Pohon beringin di tengah negeri  
Buah beribu di tangkainya  
Ingin dibunga sunting Nabi  
Bolehkah kami memetiknya.

(*Pantun Melayu* 1958, 68)

Tetak nyirih galangkan dapur  
Mari taket dengan dahannya  
Minta sirih barang sekapur  
Mari minta dengan tuannya.

(Wilkinson dan Winstedt 1961, 6, 7)

Baju jas destar kesumba  
Seluar gunting petani  
Jahitan nyonya Kampung Erak  
Di hilir pasar Kampung Melaka  
Singgah di rumah nakhodanya  
Batang emas dahan suasa

Buahnya intan dengan padi  
Bunga diisap burung borak  
Pipit hendak hinggap di rantingnya  
Adakah boleh oleh yang punya?

(Zuber Usman 1975, 69)

Ketiga-tiga pantun di atas ditujukan oleh pemuda kepada gadis yang diharapkannya. Dalam pantun pertama gadis dilambangkan sebagai "bunga sunting Nabi", dan dalam pantun ketiga, "bunga" lebih tinggi kedudukannya: "berbatang emas berdahan suasa", sesuai untuk "suntingan burung borak" yang dianggap burung syurga; sedangkan pemuda yang berkedudukan sebagai pipit meminta kesudian si gadis. Jawapan kepada pantun-pantun yang bernada begitu, mungkin dalam bentuk kiasan juga sama ada dengan nada menerima atau menolak:

Menerima:

Anak ruan berlima-lima  
 Mati ditimpa punggur berdaun  
 Kasih tuan saya terima  
 Menjadi hutang beribu tahun.

(*Pantun Melayu* 1958, 76)

Padi bernama padi baluk  
 Benihnya datang dari Palembang  
 Ambil galah mari dijolok  
 Supaya dapat bunga yang kembang.

(*Pantun Melayu* 1958, 81)

Cempedak dari juana  
 Mari dibelah di atas tudung  
 Jika hendak bersunting bunga  
 Pergilah naik ke puncak gunung.

(*Pantun Melayu* 1958, 89)

Menolak:

Tinggi ombak bertimbal buih  
 Kapal karam di Teluk Belanga  
 Bermain kasih kami yang boleh  
 Batang tubuh orang yang punya.

(Idris Abd. Manap, Kuala Pilah 1978)

Masaklah buah jambu arang  
Tuan haji lalu ke rimba  
Burung undan tinggalkan sarang  
Rajawali sudahlah tiba.

(Wilkinson dan Winstedt 1961, 46)

Pergi ke hutan mengambil rotan  
Berjumpa langsar seperigi  
Janganlah tuan harap-harapkan  
Jung sarat tidak berisi.

(*Pantun Melayu*, 1958, 130)

Penerimaan seorang gadis terhadap lamaran daripada pemuda seperti pantun pertama, tidak akan membawa masalah kepada kedua-duanya; tetapi jodoh dan pertemuan di tangan Tuhan dan ibu bapa pula yang menentukannya. Pantun kedua memberi saranan kepada si pemuda untuk menemui keluarga si gadis. Mungkin keluarga si gadis daripada golongan atasan, kerana itu tidak begitu mudah untuk mendekatinya; tetapi "pergilah naik ke puncak gunung" dan lihatlah sama ada berjaya atau tidak. Namun dalam ketiga-tiga pantun, si gadis tidak menolak dan akan sedia menerima. Penolakan daripada seorang perempuan mungkin dengan sebab-sebab tertentu, terutamanya bila dia sudah dipunyai orang, telah bertunangan atau isteri orang; seperti pada pantun keempat. Atau kerana perbezaan status, si pemuda daripada kelas bawahan, 'burung undan', sedang si gadis telah diuntukkan kepada yang lebih tinggi, 'rajawali'; atau mungkin si pemuda tidak punya masa depan sama sekali, hanya pandai menggoda tetapi tidak punya apa-apa, kekayaan atau ilmu di dada: "jung sarat tidak berisi", hampir sama maknanya dengan "besar-besar limau abung, walau besar di dalam kosong", atau "kokok berderai-derai, ekor bergelumang tahi".

Daripada kumpulan-kumpulan pantun yang telah dikaji sebahagian besar daripada pantun-pantun kasih sayang tergolong ke dalam peringkat ini: perkenalan, usik-mengusik, menduga atau melamar. Sebahagian besar pula berupa penerimaan dan hanya sebahagian kecil, penolakan daripada yang dilamar.

ii. Berkasih, bermesra, bersetia dan berjauhan

Apabila hasrat pemuda telah mendapat layanan daripada gadisnya,

suasana bercinta menjadi lebih ghairah dan lebih mesra. Mereka memandu kasih, mencurahkan perasaan yang terpendam, bersumpah setia sekata dan menguji ketabahan hati masing-masing. Mereka berjanji untuk bertemu di suatu tempat tersembunyi; pemuda mungkin dapat diseludupkan ke kamar gadis. Mungkin digambarkan kepuasan mereka selepas sesuatu perjumpaan atau kehampaan si pemuda bila mendapati gadisnya sudah ternoda. Di suatu ketika mereka mungkin bersengketa oleh sesuatu hal yang kecil, tetapi kemudian berbaik semula. Berjauhan, berpisah dan rindu adalah perkara yang lumrah dalam kehidupan bercinta. Di bawah ini dipetik beberapa contoh sekadar menggambarkan pengalaman dan perasan pasangan-pasangan yang bercinta mengalami detik-detik yang ghairah dalam kehidupan berkasih sayang.

Bertemu:

Sirih kuning pinangnya kelat  
Buluh perindu tidak berdahan  
Putih kuning marilah dekat  
Hati rindu tidak tertahan.

(Wilkinson dan Winstedt 1961, 19)

Anak lintah banyak bersua  
Lintah melilit batang padi  
Peluk cium kita berdua  
Tandanya cinta di dalam hati.

(Pantun Melayu 1958, 131)

Berkokok ayam dalam parak  
Hinggap di ranting kayu mati  
Oh, adik sampaikan kehendak  
Sangat tercinta dalam hati.

(Pantun Melayu 1958, 132)

Azam dan janji:

- Kemuning daunnya lampai  
Tumbuh di jirat paduka tuan  
Di atas dunia kau tak sampai  
Di dalam syurga bernantian.

Angkut-angkut terbang ke langit  
Mati disambar anak merbah  
Tertangkap bumi dengan langit  
Setia tidak akan berubah.

(Wilkinson dan Winstedt 1961, 29)

Nyiur gading tinggi menjulang  
Masak ketupat berisi inti  
Buah delima di dalam cawan  
Hancur daging berkisi tulang  
Belum dapat belum berhenti  
Hendak bersama denganmu tuan.

(Za'ba 1962, 226)

Ujian dan sumpah setia:

Jika tuan pergi ke Jambi  
Lipat kajang kemas-kemas  
Jika tuan kasihkan kami  
Carikan kijang bertanduk emas.

(*Pantun Melayu* 1958, 135)

Kalau ya selasih dandi  
Pucuk sambung si lada muda  
Kalau tuan kasihkan kami  
Carikan tombong kelapa muda.

Lipat kain lipatlah baju  
Mari kulipat di dalam puan  
Sukat air menjadi batu  
Baharu saya lupakan tuan.

(Fatimah bt Lembing, Melaka 1978)

Bertemu, bercengkerama:

Saya tidak segan menyapu  
Sampah banyak di dalam dedap  
Saya tak segan membuka pintu  
Ayah dan emak belum lelap.

Saya hendak menikam mengkuang  
Tertikam umbut mensiang

Saya tidak menyuruh pulang  
Hari sudah benderang siang.

Anak tiung menyusur bukit  
Nam mandi jalan gemilang  
Peluk leher cium sedikit  
Buat bekal abang nak pulang.

Burung pucung terbang melintang  
Sudah melintang membujur pula  
Hidung dicium membayar hutang  
Pipi digigit berhutang pula.

(Fatimah bt Lembing, Melaka 1978)

Kepuasan atau Kekecewaan:

Ke teluk sudah ke Siam sudah  
Ke Makkah saja aku yang belum  
Kupeluk sudah kucium sudah  
Bernikah saja aku yang belum.

(Za'ba 1962, 225)

Tetak buluh sampaian kain  
Dang Pulih memangku puan  
Empat puluh ada yang lain  
Bilakan sama mudamu tuan.

Sudah gembur baru menukai  
Benih dibawa di dalam bungkus  
Menjalar melata pohon tembikai  
Sayang buah dimakan tikus.

(*Pantun Melayu* 1958, 141)

Buah berembang buah bidara  
Masak seruntai dua runtai  
Bersubang kusangka dara  
Rupanya mumbang ditebuk tupai.

(Winstedt 1960, 201)

Bersengketa dan Berdamai:

Sapu tangan pelekat hijau  
Mari terletak di atas tangga

Luka tangan disebabkan pisau  
Luka hati disebabkan kata.

Mangkuk jorong pinggan pun jorong  
Si jorong berisi buah jati  
Dua tiga kata terdorong  
Jangan dibawa masuk ke hati.

(Winstedt 1960, 92)

Burung merpati terbang scribu  
Hinggap seekor di tengah halaman  
Hendak mati di hujung kuku  
Hendak berkubur di tapak tangan.

(Puan Senyum, Kuala Pilah 1978)

Berjauhan dan rindu:

Ambil mengkudu di pohon kapas  
Beli kapas berat sekati  
Hati rindu belumlah lepas  
Akan terbawa sampai ke mati.

(*Pantun Melayu* 1958, 100)

Bunga angsana bunga andani  
Kembang bunga di dalam hutan  
Abang di sana adik di sini  
Bagai burung bersahut-sahutan.

(Wilkinson dan Winstedt 1961, 53)

Selasih di pucuk pauh  
Tetak batang pecah belah  
Alangkah sakit berkasih jauh  
Saya menjadi serba salah.

(Wilkinson dan Winstedt 1961, 9)

iii. Dugaan, rintangan, bercerai dan berbalik

Suasana berkasih tidak selalunya tenteram tanpa sebarang rintangan. Lumrahnya alam bercinta dikaitkan dengan perkahwinan dan perkongsian hidup yang bahagia. Tetapi pada praktiknya – seperti

yang terbayang dalam pantun-pantun yang dikaji ini – tidak semua cita-cita suci itu terlaksana. Pasangan yang bercinta mungkin terhalang daripada berkahwin, kerana tidak direstui oleh keluarga, desakan hidup dan sebagainya meretakkan kehidupan berkasih, hingga akhirnya keretakan itu membesar dan tidak terbendung lagi. Pasangan yang berkasih, suami dan isteri mungkin bercerai atau berpisah, untuk selamanya atau kalau masih ada jodoh berbalik pula.

#### Berubah sikap:

Anak punai anak merbah  
Sambil terbang membawa sarang  
Anak sungai lagi berubah  
Kononlah pula hatinya orang.

Sehari-hari mandi di paya  
Laksamana pergi mendekul  
Kasih tuan tidak bermaya  
Sebagai embun di hujung rumput.

(Wilkinson dan Winstedt 1961, 70)

#### Kasih menumpang:

Kalau ada selasih di dulang  
Jangan menumpang ke Jawa saja  
Saya tahu kekasih orang  
Cuma menumpang ketawa saja.

Baju perai kain perai  
Buat atap kelasi tongkang  
Nyawa di badan lagi bercerai  
Inikan pula kasih menumpang.

(Fatimah Lembing, Melaka 1978)

#### Bermadu:

Kapal masuk ke Pulau Pinang  
Singgah berlabuh di hujung tanjung  
Macam mana hati nak senang  
Satu sangkar dua burung.

(Wilkinson dan Winstedt 1961, 74)

PUISI MELAYU TRADISIONAL

Sudah hilang panas di padang  
Tinggallah sahaja panas di rimba  
Sudahlah hilang hati nan sayang  
Tinggallah sahaja hati nan hiba.

(Wilkinson dan Winstedt 1961)

Kalau tuan melempar batu  
Tiba mari di pucuk durian  
Jangan mudah membuang aku  
Tidak ada belas kasihan.

(Fatimah Lembing, Melaka 1979)

Bercerai:

Panjanglah rumput di permatang  
Disabit orang Inderagiri  
Disangka panas sampai petang  
Kiranya hujan di tengah hari.

(*Pantun Melayu* 1958, 196)

Sarawak sungainya sempit  
Buah lengas limbang-limbangan  
Hendak dibawa perahuku sempit  
Tinggallah emas tinggallah junjungan.

(Wilkinson dan Winstedt 1961, 76)

Hendak menggali pucuk rebung  
Penggali dibawa dari ulu  
Putus tali bolch disambung  
Putus arang bercerai lalu.

(Fatimah bt Lembing, Melaka 1978)

Berbalik:

Gulai cemperai sebelanga  
Gulai keladi ketulangan  
Abang cerai sudah lama  
Bagaimana hendak berpulangan.

Menangguk ke batu licin  
Dapat udang sebelanga  
Den pandang siputan kau licin  
Rasa nak pulang ke janda lama.

(Tahir bin Kutei, Kuala Pilah 1978)

Ribut datang meluru-luru  
Batang nangka ditumbangkan  
Kita hidup elok berguru  
Pulang ke janda elok dipantangkan.

(Rakaman permainan bongai, Kuala Pilah 1978)

iv. Kecewa, kesal, putus asa:

Cinta atau perkahwinan yang menemui kegagalan akan meninggalkan kesan yang amat berat kepada jiwa dan kehidupan orang yang bercinta. Kekecewaan menjadikan seseorang tidak berdaya lagi menghadapi hidup; kerana itu mati adalah lebih baik daripada hidup. Ada pendapat yang menyatakan jumlah pantun yang bernada kecewa dan putus asa ini agak banyak, tetapi secara perbandingan, tidak demikian; hanya enam peratus sahaja daripada jumlah 3 000 untai yang dikaji didapati mempunyai tema ini.

Kecewa:

Kain baldu kain mengkasar  
Halusnya tidak dapat ditenun  
Sungai madu laut bersakar  
Haus tidak dapat diminum.

(Wilkinson dan Winstedt 1961, 161)

Tanjung darat padang seringan  
Tempat taman raja berjuntai  
Harapku berat langit nan ringan  
Mati kempunan lamun tak sampai.

(Za'ba 1962, 243)

Berlari ke padang datar  
Putuslah urat ikatan taji

PUISI MELAYU TRADISIONAL

Nantikan saya di Padang Mahsyar  
Di dunia tidak tercapai lagi.

(Za'ba 1962, 199)

Sesal:

Rambutan manis di atas peti  
Sentul masak di dalam kain  
Bukannya saya sesalkan mati  
Sesal tidak lama bermain.

(Za'ba 1972, 199)

Kain putih bersimpul pulih  
Pakaian raja perempuan  
Lain dicinta lain yang boleh  
Sudahlah nasib badanku tuan.

(Za'ba 1962, 200)

Mula diparang jirat nang itu  
Rebah pandar atas permataang  
Tarik keruntung dengan longgaian  
Jatuh sumarai bunga lada.

Mula dikarang surat nang itu  
Duduk termenung sama seorang  
Terkenang untung dengan bagian  
Jatuh berderai air mata.

(Harmsen 1875, 491)

Putus asa:

Anak kumbang terayap-rayap  
Mari ditangkap anak Turki  
Hendak terbang tidak bersayap  
Hendak hinggap tidak berkaki.

(Za'ba 1962, 224)

Kaca batu beri berbingkai  
Ambil peti muatkan panah  
Pada hidup bercermin bangkai  
Baiklah mati berkalang tanah.

(*Pantun Melayu* 1958, 211)

Bukit embun Ulu Kelantan  
 Tempat taruh buluh perindu  
 Minta racun saya nak makan  
 Saya tak sanggup menanggung rindu.

### *Telatah dan Cara Hidup Masyarakat*

#### i. Budi

Selain daripada cinta dan kasih sayang, pantun-pantun Melayu menekankan persoalan dan renungan terhadap kehidupan masyarakat dan kemanusiaan sejagat. Satu daripada norma-norma hidup yang begitu dipentingkan ialah budi: pentingnya berbudi, menge-nang budi dan membalaq budi. Apa yang dianggap sebagai budi tidaklah semestinya yang berupa material, barang, makanan, emas atau wang; tetapi meliputi juga berbahasa, menghormati, bersimpati dan kasih sayang; kerana itu pada beberapa tempat budi dan kasih sayang tidak mudah diasingkan. Di bawah ini diberikan beberapa contoh:

Ramai orang di Kuala Sawah  
 Masak nasi jangankan hangit  
 Sedikit budi bukannya mudah  
 Seberat burni antara langit.

(Tumpang bin Mohamad, Melaka 1978)

#### ii. Nasib

Selain daripada budi, tema yang selalu dikemukakan melalui pantun ialah nasib, menyesali nasib diri sebagai tidak beruntung, miskin, tersingkir, dihina atau hidup melarat di rantau orang. Seni kata lagu-lagu Melayu asli sering sekali mengandungi pantun-pantun yang membayangkan penyesalan terhadap nasib yang tidak beruntung. Dalam lagu-lagu daerah juga, seperti yang dilihat dalam aktiviti-aktiviti kesenian mereka, mudah didengar pantun-pantun dengan nada demikian. Dari segi pembahagiannya, agak susah mengasingkan tema nasib daripada dagang dan kasih sayang; kerana, mungkin nasib yang dikesalkan itu berpunca juga daripada kekecewaan ber-cinta, kasih yang tidak dibalas atau kerana ditinggalkan oleh orang

yang dikasihi. Lihat beberapa contoh di bawah ini:

Dari Gersik ke Surabaya  
Pagar siapa saya sesarkan  
Wahai nasib apakan daya  
Pada siapa saya sesalkan.

(*Pantun Melayu* 1958, 42)

Gula batu isi keranjang  
Mari taruh dalam kedai  
Laksana hantu tidak berjinjang  
Hanyut merata segenap pantai.

(Wilkinson dan Winstedt 1961, 135)

Lembu ada bertapak tidak  
Diberi makan di bawah meja  
Ibu tiada berbapak tidak  
Kepada siapa hendak bermanja.

(Tahir bin Kutei, Kuala Pilah 1978)

### iii. Dagang

Merantau dan berdagang merupakan sebahagian daripada kegiatan hidup masyarakat Melayu. Kebanyakan anak muda meninggalkan kampung halaman, merantau ke negeri lain, misalnya orang-orang Minangkabau ke Semenanjung Tanah Melayu, orang Kelantan ke negeri Perak, ke Pulau Pinang, Singapura dan sebagainya. Tujuan utamanya ialah mengadu untung, mencari pekerjaan, bermiaga atau menuntut ilmu; dan tidak jarang juga sebagai satu cabaran kepada kemampuan seseorang. Di tempat asing itu seorang perantau dianggap 'orang luar' atau 'orang dagang' yang lebih rendah statusnya dan ini dirasakan sendiri oleh yang berkenaan. Dalam pantun-pantun yang menceritakan hidup di perantauan ini digambarkan rasa terhina, tersisih, rendah diri, rindu kepada kampung halaman, keluarga atau kekasih, juga azam dan tekad untuk menghadapi cabaran hidup. Beberapa contohnya:

Asam pauh dari seberang  
Tumbuhnya dekat tepi tebat

## PANTUN

Badan jauh di rantau orang  
Sakit siapa akan mengubat.

(*Pantun Melayu* 1958, 43)

Kalau nak tahu enaknya surau  
Tiba di surau terus mengaji  
Kalau nak tahu enaknya rantau  
Lihat Cina tak pulang lagi.

(Hamid Jabar 1979, 14)

Sejak berbunga daun pandan  
Banyak tikus di permatang  
Anak buaya datang pula  
Daun selasih tambah banyak.

Sejak mula dagang berjalan  
Tidak putus dirundung malang  
Banyak bahaya yang merupa  
Lamun kasih berpaling tidak.

(Mohd. Taib Osman 1975b, 5)

### iv. Jenaka

Secara umum pantun-pantun yang telah dibicarakan di atas berasa serius dan berat, seolah-olah masyarakat Melayu daripada golongan yang terlalu sensitif atau terlalu sibuk hingga tiada waktu untuk berjenaka dan bergurau senda. Tetapi kenyataannya, sebagaimana yang telah disebutkan orang-orang Melayu adalah daripada golongan yang selalu gembira, mudah ketawa, cepat mesra dan penuh dengan '*sense of humour*'. Dalam kumpulan-kumpulan pantun yang ada dan yang masih digunakan hingga kini, terdapat nada jenaka, mengejek, menggiat, sama ada dengan tujuan bergurau senda atau secara tidak langsung menyindir seseorang, sesuatu pihak atau masyarakat seluruhnya. Sedikit contoh:

Tumbuh padi dalam hutan  
Sudah ditanam ditunggui  
Kesalkan hati ayam jantan  
Padi dijemur ditunggui.

(Mohd. Taib Osman 1975b, 5)

PUISI MELAYU TRADISIONAL

Singapura dilanggar todak  
Singgah pula di Tanjung Beringin  
Orang tua berlaki budak  
Bagai beruk mendapat cermin.

(Tahir bin Kutei, Kuala Pilah 1978)

Campak nyala batunya nyaring  
Jala rambang olak beranak  
Badan bulat bagai tenggiling  
Laksana beronok berminyak-minyak.

(Wilkinson dan Winstedt 1961, 132)

Anyam sumpun kelarai berdiri  
Mari tukar sebilah parang  
Jangan usik kopek kami gelii  
Hak bawah saya tak larang.

(Mohd. Ali Hitam 1967, 44)

Api-api bergigi dua  
Terletak di dulang gedang  
Tuan haji berjudi juga  
Tergadai serban yang gedang.

(Hamka 1977, 180)

v. Sindiran, kias dan ibarat

Kias dan ibarat yang tidak bernada jenaka mungkin ditujukan kepada masyarakat atas sesuatu tindakan atau perlakuan masyarakat itu yang dirasakan tidak baik atau merugikan. Pantun-pantun itu mungkin juga bermaksud pengajaran sama ada merupakan satu cara sosialisasi atau berunsur keagamaan:

Orang karam terapung-apung  
Hanyut ke beting dalam londang  
Pakai kain belah betung  
Dipukul angin terbuka lapang.

(Wilkinson dan Winstedt 1961, 135)

Rumah besar berdinding tidak  
Berdinding dengan daun palas  
Badan besar berbini tidak  
Itu tanda orang pemalas.

(Mohd. Ali Hitam 1967, 30)

Tatkala perang negeri Jerman  
Mati Keling askar mengamuk  
Sentenglah gunung dikunyah kuman  
Lautan kering diminum nyamuk.

(Petikan lagu "Rentak Kuda",  
Negeri Sembilan 1978)

#### vi. Teka-teki

Terdapat juga pantun yang mengandungi maksud teka-teki, walaupun jumlahnya agak kecil dibandingkan dengan teka-teki dalam bentuk prosa, ungkapan-ungkapan bersajak atau dalam bentuk syair. Daripada segi bahasa dan strukturnya, pantun teka-teki agak mudah dan sederhana, lebih hampir kepada pantun kanak-kanak. Terdapat juga bentuk bersoal jawab seperti yang terbiasa dalam lagu-lagu dondong sayang. Contohnya:

Kalau tuan tombak rencana  
Ambil gantang sukat pala  
Kalau tuan bijak laksana  
Apa binatang tiada kepala?

(jawabnya ketam)

Kelip-kelip disangka api  
Kalau api di mana puntungnya  
Hilang ghaib kusangka mati  
Kalau mati di mana kuburnya (179)

(jawabnya kilat)  
(Mohd. Taib Osman 1976, 23-24)

Soal: Tajamnya gigi ikan yu parang  
Dapat juga ditangkap manusia  
Tajam-tajam mata parang  
Dapatkah melawan lidah manusia?

## PUISI MELAYU TRADISIONAL

Jawab: Parang ini paranglah indah  
Digunakan oleh banyak pahlawan  
Jangankan parang melawan lidah  
Meriam besar pun tak terlawan.

(Tumpang bin Mohamad, Melaka 1978)

### vii. Pengajaran, agama dan adat

Pantun tidak sahaja sebagai alat komunikasi untuk menyatakan emosi cinta dan kasih sayang. Sebagaimana syair dan genre-genre puisi Melayu lama yang lain, pantun boleh juga berunsur deduktif, mengandungi pengajaran tentang kehidupan bermasyarakat, nasihat, pelajaran agama, menegaskan Keesaan Allah dan balasan di hari kemudian. Selain itu tidak kurang pula yang dapat membicarakan persoalan yang lebih serius, iaitu norma-norma adat, peraturan dan undang-undang seperti yang terdapat dalam teromba Adat Perpatih.

#### Pengajaran:

Baik-baik belayar malam  
Arus deras karangnya tajam  
Cari-cari mualim yang faham  
Di situ banyak kapal tenggelam.

(*Pantun Melayu* 1958, 238)

Anak sepat mudik ke hulu  
Ikan haruan putih dadanya  
Mana yang cepat dialah dahulu  
Yang kemudian putih mata.

(Rakaman permainan bongai, Kuala Pilah 1978)

#### Agama:

Bintang tujuh tinggal enam  
Jatuh sebuah ke Melaka  
Langit runtuh bumi tenggelam  
Tinggallah syurga dengan neraka.

Alhamdulillah tulisan Cina  
Dibawa khatib Seri Alam

Sedang di dunia begini hina  
Di akhirat wallahualam.

(Hamka 1977, 179 - 180)

Baik berburu ke seberang  
Rusa banyak di dalam rimba  
Baik berguru kita sembahyang  
Dosa banyak di dalam dunia.

(Pantun Melayu 1958, 256)

Adat:

Di mana asal api pelita  
Dari balik telong yang bertali  
Dari mana asal nenek kita  
Dari puncak Gunung Merapi.

(Hamid Jabar 1979, 6)

Inggeris mengerat kuku  
Dikerat dengan pisau raut  
Peraut betung tua-tuanya  
Elok negeri keempat suku  
Lebih suku berbuah perut  
Tuan kampung ada tuannya.

(Pantun Melayu 1958, 247)

Pantun dalam adat menghantar tanda atau meminang:  
Sambutan pihak perempuan:

Katung-katung berisi manik  
Manik berisi hampa padi  
Semua yang datang silalah naik  
Inilah air pembasuh kaki.

Jawab pihak laki-laki:

Dari jauh ke permatang  
Tetap dengan papan kemudi  
Dari jauh kami datang  
Mendengar tuan yang baik budi.

Jawab pihak perempuan:

Tatang puhan tatang cerana  
Tatang biduk Seri Rama  
Datang tuan datanglah nyawa  
Jemput duduk bersama-sama.

Jawab laki-laki (setelah duduk):

Certi pinang certi  
Cerana di atas papan  
Sirih kami sirih bererti  
Sukat dahulu baharu dimakan.

Rumah besar alangnya besar  
Rumah datuk Perdana Menteri  
Kalaup tidak hajat yang besar  
Kami tidak sampai ke mari.

Orang mengambil siput di lubuk  
Airnya dalam banyak lintah  
Datang membaiki atap yang tembus  
Hendak mengganti lantai yang patah.

Jawab pihak perempuan:

Rimba dibakar menanam padi  
Makan berulam buahnya petai  
Jikalau sudah suka dan sudi  
Berbantalkan bendul bertikarkan lantai.

(Rakaman dari Mukim Kuda Jempul, Kuala Pilah 1976)

(Lalu diikuti dengan istiadat menyarungkan cincin tanda ke jari gadis).

Suatu perkara yang menarik dalam hal ini – daripada tinjauan penulis terhadap penyebaran pantun – didapati masih banyak judul-judul pantun yang dicipta oleh penyair dan pemantun untuk sesuatu tujuan tertentu. Ciptaan-ciptaan ini, bagaimanapun, tidaklah memperlihatkan sesuatu keistimewaan daripada segi bentuk atau tema untuk digolongkan ke dalam sesuatu jenis atau klasifikasi yang lain daripada pantun-pantun yang biasa. Sebagai contoh, didapati judul-judul seperti “Pantun Laut”, “Pantun Adat”, “Pantun Puji-pujian”,

"Pantun Ayam Sabungan", "Pantun Harimau", "Pantun Intan", "Pantun Si Anak Dara", "Pantun Mak Limah" dan sebagainya. Perhatikan dua contoh yang dipetik di bawah ini:

Pantun Ayam Sabungan:

Pakai tanjak' di sapu tangan  
 Rentang jaring di hujung tanjung  
 Bukankah banyak ayam sabungan  
 Lepas di laman cuba disabung.

Ramai orang di Kampung Ulu  
 Ambil galah di dalam perahu  
 Ayam jalak sabungkan dulu  
 Kalau menang baru kan tahu.

Putus kelat tali temberang  
 Kita belayar di sampan kotak  
 Jangan jadi sabungan garang  
 Takut-takut kepala kau botak.

Patah kayu galah melintang  
 Lalu anak sultan di Kelang  
 Biar bertabur buluku di padang  
 Namun malu ku tak bawa pulang.

(Tumpang bin Mohamad, Melaka 1979)

Pantun Adat:

Air pasang perahu ke hilir  
 Pasang penuh di hujung tanjung  
 Adat ikan hidup di air  
 Di mana lubuk di situ kampung.

Apa dipikat burung dekut  
 Kerana sudah patah kaki  
 Adat orang hendak diikut  
 Kalau tidak malulah diri.

Bunga sepulih tidak layu  
 Daunnya lebar tidak berbatang  
 Tepak sirih kebudayaan Melayu  
 Adat penyambut orang datang.

Orang mengail di hujung tanjung  
Dapat seekor ikan kelah  
Adat sirih memanjat junjung  
Junjung diajar dari bawah.

(Ibrahim Baba, Melaka 1977)

Daripada dua contoh di atas – demikian juga yang lainnya – pantun-pantun itu tidak menunjukkan bentuk, jenis atau tema yang tertentu yang boleh dianggap mewakili sesuatu golongan. Daripada segi isi atau tema, "Pantun Ayam Sabungan" boleh digolongkan sebagai membawa tema bagaimana pentingnya hidup mengikut adat atau kebiasaan yang baik; dengan demikian ia tergolong di bawah tema pengajaran.

#### *Fungsi dan Penyebaran*

Dalam pembicaraan yang lalu telah dibincangkan kepelbagaiannya pantun daripada segi bentuk, jenis dan tema. Jumlah dan kepelbagaiannya yang dikemukakan itu mungkin merupakan sebahagian sahaja daripada apa yang sebenarnya; kerana tentu sahaja masih ada yang terkeluar daripada pengetahuan dan penganalisisan penulis. Demikian pula keadaan itu tidak juga dapat menjelaskan bagaimana mesranya masyarakat Melayu dengan pantun, bagaimana tercipta dan tersebarnya puisi itu dalam seluruh aspek kehidupan masyarakat. Untuk memahami keadaan ini perlulah diteliti dan dibincangkan fungsi dan penyebaran pantun itu dalam masyarakatnya sekurang-kurangnya secara sepintas lalu, seperti mana yang dilakukan di sini.

Pantun selalu dianggap sebagai alat komunikasi antara anggota-anggota masyarakat. Pantun-pantun yang bertemakan kasih sayang adalah hasil komunikasi daripada kegiatan menggunakan pantun dalam suasana berkasih sayang, sama ada diucapkan secara langsung, melalui lambang atau tulisan, atau melalui perantaraan suatu suasana yang berkenaan. Pantun-pantun dalam istiadat perkahwinan adalah hasil daripada cara berkomunikasi yang dirasakan lebih sesuai dan berkesan dalam konteks yang dimaksudkan. Demikian pantun jenaka yang berfungsi sebagai alat komunikasi dalam menyampaikan rasa mesra dan 'humor' antara anggota-

anggota masyarakat. Daripada contoh-contoh yang dikemukakan seolah-olahnya menjelaskan bahawa seluruh aspek kehidupan masyarakat dapat digambarkan melalui pantun. Dari dalam buaian lagi seorang anak didendangkan dengan pantun; dan dalam proses sosialisasinya dia menerima nasihat dan pengajaran melalui pantun. Setelah remaja dan berkasih sayang dia menyatakan emosi dan pengalamannya melalui pantun. Sebagai orang dewasa – misalnya sebagai penghulu adat – dia menyampaikan norma-norma adat dan undang-undang, sebahagian atau seluruhnya, dalam bentuk pantun. Dan setelah dia menjadi orang yang penting, diberikan pula sambutan dan puji-pujian dalam bentuk pantun, dan mungkin setelah dia meninggal, puji-pujian itu termeterai pada nisannya atau terukir sebagai dokumentasi sejarah bangsanya.

Setakat itu pun, masih boleh dikatakan bahawa fungsi dan penyebaran yang demikian hanya sebahagian saja daripada kaedah yang sebenarnya. Fungsi dan penyebaran secara langsung dan konkret harus dilihat dalam aktiviti-aktiviti yang berhubung dengan kesenian dan kebudayaan, masyarakat, termasuk nyanyian, muzik, tarian, permainan dan perlakuan-perlakuan lain yang berhubung dengan ritual, magis, agama dan kepercayaan. Dalam kegiatan-kegiatan seperti ini akan terlihat dengan lebih jelas bagaimana pantun digunakan, bagaimana ia tercipta, tersebar dan meninggalkan kesan dalam kehidupan masyarakat. Untuk memudahkan tinjauan itu, kegiatan-kegiatan seperti itu sengaja dibahagikan kepada tiga golongan:

1. Kegiatan yang berunsur upacara (*ritual*) atau berasal daripada perlakuan-perlakuan yang tergolong sebagai *ritual*, antara lain termasuk permainan saba, ulit mayang dan ulit badang ketiga-tiganya di Terengganu, tarian balai dan anak indung di Terengganu dan Pahang, lotah di Perak dan bersandoi di Negeri Sembilan. Dalam permainan-permainan ini pantun dipersembahkan dalam lagu yang diiringi tarian atau gerak fizikal yang membayangkan perlakuan-perlakuan yang berhubungan dengan sesuatu *ritual*.
2. Kegiatan-kegiatan seni yang bersfungsi sebagai hiburan sama ada berupa nyanyian sahaja tanpa tarian seperti beduan

di Perlis, bongai di Negeri Sembilan, dondang sayang di Melaka dan dikir barat di Kelantan, atau yang bersama dengan tarian seperti hamdolok dan main pelanduk di Johor, canggung di Perlis dan rodat di Pahang dan Terengganu.

3. Kegiatan-kegiatan yang berunsur agama dan kepercayaan termasuk dikir Pahang di Pahang, dikir rebana di Kelantan dan dabus di Melaka, Perak dan Selangor (Harun Mat Piah, 1980b; Mohd. Taib Osman 1979, 97 – 111).

### 1. *Kegiatan berunsur upacara*

Saba, permainan saba atau tarian saba di Terengganu berasal dari-pada upacara mengubat penyakit, hampir sama fungsinya dengan main puteri di Kelantan dan Terengganu; berbagih di Kelantan; kebiah dan belian di Kedah. Dalam satu peringkat permainan itu peserta-pesertanya menari mengelilingi pohon saba dengan irungan gendang dan rebab. Terdapat beberapa nyanyian yang mengiringi tarian-tarian itu dalam bentuk berbalasan antara pemain rebab, penyanyi, penari-penari atau para penonton. Seni kata lagu-lagu ini selain daripada yang berbentuk talibun atau sesomba dan mantera adalah dalam bentuk pantun, daripada pantun-pantun daerah dan pantun-pantun yang telah dikenali umum. Dalam lagu yang diberi nama "Raja Muda", terdapat pantun ini:

Kiri jalan kanan pun jalan  
Sama tengah pohon mengkudu  
Kirim jangan pesan pun jangan  
Sama-sama menanggung rindu.

Dalam lagu "Muda Lingah" atau "Awang Sijambul Lebat", penulis mendengar pantun di bawah ini:

Burung-burung terbang berumbu  
Terbangnya pun beraneka  
Adat muda baru bertemu  
Ada kurang ada jenaka.

Ulit mayang dan ulit badang dewasa ini lebih merupakan hiburan popular yang selalu dipertunjukkan dalam keramaian-keramaian, pesta, puja pantai dan kepada para pelancong walaupun

bentuknya yang asal adalah juga tarian pemujaan untuk mengubat penyakit, memulih semangat seseorang pesakit atau sebuah komuniti. Seluruh nyanyian yang mengiringi tarian ulit mayang adalah dalam bentuk pantun. Diberikan petikan pantun-pantun yang selalu dinyanyikan:

Umbut mayang kuumbut  
Umbut mayang terjala mala  
Sambut dayang kusambut  
Sambut dengan puteri ngesa.

Puteri ngesa berkain serong  
Puteri ngesa berbaju hijau  
Puteri ngesa bersubang gading  
Puteri ngesa bersanggul sendeng.

Umbut mayang kuumbut  
Umbut mayang terjala mala  
Sambut dayang kusambut  
Sambut dengan puteri dua.

Puteri dua berkain serong  
Puteri dua berbaju hijau  
Puteri dua bersubang gading  
Puteri dua bersanggul sendeng.

Demikian seterusnya hingga puteri tujuh. Lagu di atas ialah dalam peringkat menghidupkan mayang. Apabila mayang telah hidup dan tarian menjadi rancak, rangkap-rangkap pantun akan lebih pelbagai, antaranya:

Tiut liut terhulai balai  
Pucat simpul tergulung-gulung  
Habis maja tawar maja  
Hendak sambut puteriku turun.

Turun mencecah naik bujur  
Sentak berdengung punca tali  
Apa sudah badanku tidur  
Bingkas bangun serta menari.

Limau ciut condong berlapis  
Koyak kulit buat rebana  
Tuan puteri tujuh beradik  
Masuk ke kebun menyiram bunga.

Pantun-pantun lain juga, termasuk yang telah popular, akan dinyanyikan oleh penyanyi utama (Adi) dan disambut oleh penari atau korus oleh penari-penari yang lain, bergantung kepada waktu dan tempoh bermain. Apabila permainan akan selesai, dinyanyikan pula pantun ini:

Timun betik timun batang  
Timun cekih atas batu  
Mari adik mari pulang  
Abang hantar ke muka pintu.

(Muda Mat Zain, K. Terengganu 1979)

Dalam permainan ulit badang, pantun-pantun yang dinyanyikan tidak begitu pelbagai seperti dalam ulit mayang, mungkin kerana permainan ini agak sempit penyebarannya. Sedikit contoh diberikan di bawah:

Ya bani ya badang  
Gok gelek tumbuh di bukit  
Untung batu tumbuh di lembah  
Nak tengok badang sedikit  
Nak tengok kaya Allah.

Hilir lerah mudik lerah  
Pat bemban dak bertali  
Apa mudah sekara mudah  
Nak tengok badang menari.

Tinggi bukit sarang helang  
Pat ular naga melur  
Sedap helah badan Islam  
Badang menari tak ada ekor.

Ya bani ya badang  
Gok gelek tumbuh di bukit  
Untung batu tumbuh di lembah  
Nak tengok badang sedikit  
Nak tengok kaya Allah.

(Mohd. Zain Talib, Marang 1978)

Tarian balai, main pulau dan berlotah masing-masing ada kaitannya dengan memuja semangat padi. Main pulau yang lebih terkenal di

Ulu Tembeling (Pahang) dan Ulu Dungun (Terengganu) lebih umum diadakan ketika menanam dan merumput padi, sementara tarian balai dan lotah ketika menuai dan melera padi. Dalam lagu-lagu yang mengiringi tarian-tarian tersebut terdapat beberapa rangkap pantun yang baik, sama ada berupa ciptaan tempatan atau daripada pantun-pantun yang telah popular. Antaranya diberikan di bawah sebagai contoh:

a. Dalam permainan balai:

Daun rengas berminyak-minyak  
 Daun selasih di dalam cawan  
 Minta maaf berbanyak-banyak  
 Terima kasih kepadanya tuan.

Anak ciak di hujung pauh  
 Anak babi di bawah langsat  
 Rasa nak pijak Bukit Gemuruh  
 Rasa nak minum air teresat.

Ayam denak Bukit Tualang  
 Hutang batu simpul pulih  
 Hak jinak jadi jalang  
 Guano (bagaimana) buat sampai boleh.

Petik pauh delima batang  
 Sampan pengail tarik kemudi  
 Dari jauh kamilah datang  
 Kenangan tuan yang baik budi.

Tanam nanas di tepi pantai  
 Nanas berbuah di Tanjung Tuan  
 Bukan kami mengata pandai  
 Kami nak lepas ke hajat tuan.

(Rakaman permainan balai di Mukim Teresat,  
 Terengganu 1979)

b. Dari Main Pulau

*Lagu Anak Indung*

Tabik ke hulu tabik ke hilir  
 Tabik di air tabik di darat  
 Minta tabik empunya kampung  
 Saya mengambil si anak indung.

PUISI MELAYU TRADISIONAL

Ibu serindit tidur bergantung  
Tidur bergantung di tulang bumbung  
Minta tabik empunya kampung  
Kami bermain si anak indung

Petik-petik si bunga kangkung  
Mari petik di kepala tangga  
Minta tabik empunya kampung  
Kami bermain tak reti basa.

(Rakaman di Ulu Dungun dan  
Ulu Tembeling 1977)

*Lagu Bandan Jodi*

Gali-gali isi lengkuas  
Lepas sejari dua jari  
Cari-cari padang yang luas  
Hendak menengok bandan menari.

Hendak ditarah papan kelai  
Buat buah papan catur  
Muda lengah bandan berderai  
Campak langkah bagai diatur.

Tilam kapas di tengah laman  
Tinggi mahligai datuk keramat  
Bandan terlepas daripada tangan  
Alhamdulillah bandan selamat.

(Marang, Terengganu 1978)

*Lagu Rentak Kuda*

Kuda ini kuda sialai  
Rama-rama terbang ke Jeddah  
Main ini main beramai  
Ketima mana akannya sudah.

Selasis padang selasis  
Rama-rama terbang ke tanjung  
Tuan kasih saya pun kasih  
Sama-sama kita menanggung.

Keladi ini keladi makan  
Anak haruan dalam baldi  
Nyawa di badan saya serahkan  
Kepada tuan yang baik hati.

*Lagu Pulang Indung*

Hendak dulang kuberi dulang  
Dulang berisi sagu mentah  
Indung nak pulang kuberi pulang  
Mintak indung pantun sepathah.

Timun betik timun belulang  
Secucuk dengan ranting buluh  
Balik encik baliklah tuan  
Balik indung ke gunung tujuh.

Timun betik timun belulang  
Mari panjat pucuk sungkai  
Indung nak pulang kuberi pulang  
Pulang indung ke puncak Mahligai.

(Ulu Tembeling, Pahang 1979)

Seni kata lagu-lagu dalam berlotah atau tarian lotah seluruhnya juga dalam bentuk pantun:

c. Berlotah:

Dari tepi rumpun padi  
Colek pula dengan manisan  
Masa ini kita tak jadi  
Ada anak kita berbesan.

Nak bada kuberi bada  
Bada dari pisang abu  
Nak janda kuberi janda  
Janda yang ada macam kekabu.

Ya sungguh kata ulama  
Maharaja singa turun bersiram  
Tuan umpama sekuntum bunga  
Itu sebab kakanda geram.

(Kampung Gajah, Perak 1977)

Bersandoi di Negeri Sembilan adalah pekerjaan mengambil dan menurunkan madu lebah. Seni katanya, selain daripada yang berupa

mantera dalam peringkat ritualnya, seluruhnya adalah dalam bentuk pantun:

d. Bersandoi:

Peting bunga kangkung  
Mari diperik ke Sungai Baru  
Minta tabik yang punya kampung  
Saya memijak tangan baru.

Peting pulau kepeting  
Sari kesari merendang lada  
Tujuh lapis hutan mendinding  
Hitam manis nampaklah jua.

Nanding burung sinanding  
Nanding bersarang dalam huma  
Turun nan mendoi si raja angin  
Aku meniup si sapu lalang.

(Hj. Omar Ismail, Kuala Pilah 1978)

2. Kegiatan-kegiatan yang berupa hiburan:

Permainan beduan di Perlis menggunakan pantun-pantun yang mudah, hampir sama dengan pantun kanak-kanak. Umumnya terdiri daripada tiga perkataan sebaris dengan tema yang biasa termasuk sindiran, kasih sayang dan jenaka. Terdapat pelbagai nama lagu dengan seni kata pantun yang berlainan. Contoh:

*Lagu Mula Pasang*

Mula-mula padi  
Padi tiga perdu  
Mula-mula menyanyi  
Menyanyi tiga lagu.

Murai-murai mandi  
Mandi atas rumput  
Murai mula menyanyi  
Mari kawan ikut.

Dalam kebun Manaf  
Bunga yang maha putih  
Minta ampun maaf  
Yang mana salah silih.

*Lagu Alang-alang*  
 Dari pulau kurung  
 Singgah di Batu Tawan  
 Adik jadi burung  
 Terbang cari kawan.

Liluk cabang pauh  
 Jarang-jarang jari  
 Duduk kampung jauh  
 Jarang-jarang ke mari.

Anak kijang emas  
 Masuk sawah padi  
 Bukan hutang emas  
 Hutang kerana budi.

duduk edukemeng gugai-gugai  
 sering dengar alih-alih dengar  
 nyanyi-puji-gruda nyanyi-meng-meng  
 sering tular ke arah meng-meng

actu's road edukemeng dengi  
 nyanyi-puji-gruda nyanyi-meng-meng  
 nyanyi-puji-gruda nyanyi-meng-meng  
 dengi nyanyi-puji-gruda nyanyi-meng-meng

(Rakaman permainan beduan, Kangar,  
 Perlis 1978)

Permainan bongai, rentak kuda atau donak donai yang terkenal di Negeri Sembilan dan dondang sayang di Melaka dapat dikatakan yang paling utama dalam proses penciptaan dan penyebaran pantun. Sebahagian besar daripada koleksi-koleksi pantun yang ada mungkin dikumpulkan daripada permainan-permainan ini, kerana menurut perhatian penulis kebanyakannya daripada pantun-pantun yang dikumpulkan daripada permainan-permainan ini mudah diketemukan dalam koleksi-koleksi tersebut.

Variasi pantun-pantun dalam permainan bongai terletak pada lagu-lagunya. Setakat ini diketahui tidak kurang daripada 12 lagu yang berlainan yang hanya dapat dimainkan oleh peserta-peserta yang telah berpengalaman. Antara lagu-lagu itu termasuk *petasih*, *budu landa*, *timang seberang*, *rentak kuda*, *cempurai*, *dindin*, *gubang pendek*, *gubang panjang* atau *bujang jauh*. Diberikan beberapa contoh di bawah:

#### *Lagu Petasih*

Baju hitam kerongsang tiga  
 Pakaian anak raja seberang  
 Tabik adik abang bertanya  
 Bolehkah menumpang berkasih sayang.

PUISI MELAYU TRADISIONAL

Layang-layang menimba buih  
Buih ditimba Lautan China  
Berkasih sayang abang yang boleh  
Batang tubuh den ada yang punya.

Buih ditimba Laut China  
Ombak melata di tepi pantai  
Batang tubuh ada yang punyai  
Kalau boleh nak tumpang pakai.

(Manaf bin Idris, Kuala Pilah 1978)

*Lagu Dindin*

Dindin pulang ke dindin  
Anak raja pulangnya mahat  
Kalau tak jadi pulangkan cincin  
Eden mendengar khabar begitu jahat.

Siak palih beringin kok tumbang  
Dah setakuk setakuk lagi  
Siak palih pulangkan cincin  
Dah sebentuk sebentuk lagi.

Cik Siti anak Tuk Bandar  
Makan kerak berulam paku  
Kalau dah benci katalah benar  
Jangan ditolak ke fiil laku.

Kalau ribut Kuala Pahang  
Ombak memukul ke Pulau Lengkasa  
Kalau ada umur yang panjang  
Hajat di hati nak jadikan juga.

(Tahir bin Kutei dan Latiff bin Oyek,  
Kuala Pilah 1978)

*Budu Landai*

Cik Mamat orang Segamat  
Bunga melur kembang sekaki  
Biar lambat asalkan selamat  
Dalam telur lagikan dinanti.

Bunga melur kembang sekaki  
Anak musang meniti akar

Kalau elok bolehlah dinanti  
Kalau tembelang apa akal.

Buah sitambun tulang  
Makan anak sibarau-barai  
Ada untung berbalik pulang  
Kalau tidak hilang di rantau.

Selasih di tebing tinggi  
Kalau tinggi berdaun jangan  
Kekasih hati janganlah pergi  
Kalau pergi bertahun jangan.

(Tahir bin Kutei dan Latiff bin Oyek,  
Kuala Pilah 1978)

Dondang sayang, walaupun tidak mempunyai banyak variasi dari segi lagu, tetapi oleh kerana penyebarannya begitu luas, jumlah pantunnya lebih banyak dengan pelbagai tema yang berhubungan dengan kehidupan masyarakat. Sebahagian besar daripada tema-tema yang dibicarakan tadi boleh didapati dalam lagu-lagu dondang sayang. Dipetik sedikit contoh:

Pantun Kasih (bersoal jawab):

Soal: Kalau menebang kelapa muda  
Jangan tebang pokok lain  
Kalau abang kasihkan adinda  
Jangan paling pada yang lain.

Jawab: Gulai berempah si ubi keledek  
Terkena kain turun warnanya  
Abang bersumpah di depan adik  
Pada yang lain haram hukumnya.

Soal: Encik Baba orang Cina  
Menjual berangan ke rumah Cik Puan  
Ingin hamba hendak bertanya  
Siapa gerangan kekasih tuan.

Jawab: Ikan pelata ikan sembilang  
Kalau boleh jualkan hamba  
Kekasih hamba sudahlah hilang  
Dilarikan oleh kumbang durjana..

(Tumpang bin Mohamad, Melaka 1978)

Pantun laut:

Siapa itu menjual tapai  
Dijual pula anak Cik Daud  
Bukankah banyak perahu di pantai  
Cuba-cubalah turun ke laut.

Panggilkan saya pawang Cik Daud  
Petikkan saya kelapa mumbang  
Bukan saya enggan ke laut  
Takut-takut dipukul gelombang.

Yang mana adik yang mana abang  
Orang berjudi di meja kaca  
Apa takut dipukul gelombang  
Kemudinya ada di tangan saya.

Sayang puteri raja Embangan  
Bayar niat di Kampung Hulu  
Sungguhpun kemudi ada di tangan  
Malang menimpa manakan tahu.

(Tumpang bin Mohamad, Melaka 1978)

Hamdolok dan main pelanduk di Johor didapati juga menggunakan pantun dalam lagu-lagunya. Hamdolok yang berasal dari Timur Tengah mempunyai banyak lagu yang berirama padang pasir mungkin lebih umum dalam bahasa Arab, tetapi pada beberapa tempat diselitkan pantun-pantun Melayu; antaranya seperti di bawah:

Kenanga daunnya tinggi  
Jatuh ke tanah pecah belah  
Kalau tak dapat di masa ini  
Nyawa di dalam tangan Allah.

Lang laut lang tembikar  
Lang beranak sembilan ekor  
Duduk menangis memandang tikar  
Siang dan malam tak dapat tidur.

Tanam pisang rapat-rapat  
Tempat punai puyuh berlari

Kalau dipinang tidak mendapat  
Pujuk pikat kubawa lari.

(Rakaman permainan Hamdolok, Batu Pahat 1978)

Seni kata lagu dalam "Nyanyian Pelanduk" adalah dalam bentuk pantun disesuaikan dengan lagunya yang lebih banyak berirama Timur Tengah. Oleh kerana pola atau susunan katanya dalam irama yang khusus dan belum begitu dikenal, di bawah ini sengaja diperturunkan bentuknya yang asal:

Nyiur tindan kelapa tindan  
Tindan-menindan  
Pelanduk jahanam  
La si limau manis  
Ya pulak ya pulak  
Si limau limau manis.

Peluklah tinggal  
Pelanduk jahanam  
La cium tinggal  
Cium tinggal  
Tinggal Cik Adik  
Pelanduk jahanam  
Jangan menangis  
Ya pulak ya pulak  
Jangan menangis.

Lagu di atas dapat ditulis semula dalam bentuk pantun yang tipikal:

Nyiur tindan kelapa tindan  
Tindan-menindan si limau manis  
Peluk tinggal cium pun tinggal  
Tinggal cik adik jangan menangis.

Demikian untai-untai yang lain:

Mudik ke hulu menembak bangau  
bangau ditembak habis terbang  
Singkaplah baju nampaklah panau  
Panau seperti bulan mengambang.

Ayam borek kelabu tentang  
Mari ditambat si limau manis

Hendak mudik hari dah petang  
Bentanglah tikar duduk menangis.

Sakit kaki ditikam tunggul  
Tunggul kecil di tengah rumah  
Sakit hati memandang sanggul  
Sanggul kecil berisi bunga.

(Rokiah Ariffin, Pontian 1976)

Dalam dikir barat di Kelantan terdapat juga penggunaan pantun selain daripada bentuk yang tergolong sebagai puisi bebas atau ungkapan-ungkapan bersajak yang digolongkan sebagai dikir. Di bawah ini diberikan sedikit contoh:

Lagu oleh juara:

Sebilah kapak di dalam tukir  
Ambil kikir membuang karat  
Bismillah letak lagu berdikir  
Inilah nak kenal berdikir barat.

Ambil rebana jalan ke rimba  
Buah betik masak kari  
Ambil rebana naik ke riba  
Hajat nak petik dengan hujung jari.

Dari Tanjung hendak ke Seberang  
Naik perahu hanyut ke Jertih  
Niat hati hendak melamar orang  
Tetapi saya tak ada pitih.

Berakit-rakit ke hulu  
Hendak mencari rotan gula  
Hamba nak berhenti di sini dulu  
Boleh puak lawan mula pula.

(Salleh Abd. Rahman, Kota Bharu 1977)

Lagu mengarut:

Bekah bangun cacang  
Bawa tongkat sepanjang sedepa  
Malam ini kita berlawan  
Orang kita nanti jaga.

Bekah bangun cacang  
 Bawa tongkat sepanjang sedepa  
 Kita tak usah hairan  
 Moga kita sama-sama bisa.

Bekah bangun cacang  
 Bawa tongkat sepanjang sedepa  
 Ini nak kenal Mat Leh Tempang  
 Orang masyhur rata-rata.

(Salleh Abd. Rahman, Kota Bharu 1977)

Tarian canggung di Perlis merupakan satu lagi alat penyebaran pantun di kalangan masyarakat. Seluruh seni kata lagu yang mengiringi tarian itu adalah daripada pantun-pantun yang popular di samping lagu-lagu tempatan. Seperti dondang sayang dan bongai, canggung juga mempunyai kepelbagaiannya dari segi lagu dan tema, termasuk pantun-pantun berkasih sayang, teka-teki, sindiran dan jenaka. Antara lagu-lagu yang popular adalah *lagu canggung*, *cinta sayang*, *ayam didik* dan lain-lain.

Diberikan sedikit contoh:

*Lagu Canggung*

Nasi kunyit gulai ayam  
 Singgah makan di Batu Lintang  
 Senget topi jalan malam  
 Abang nak cari si sanggul lintang.

Bukit Papan jalan ke kuala  
 Tempat orang ketuk batu  
 Bunga pekan di atas kepala  
 Bolehlah beri abang yang satu.

Walau pecah sepak raga  
 Sudah kusepak kusepak juga  
 Tujuh bilah keris di dada  
 Sudah kulekuk kulekuk juga.

(Rakaman dari Kangar 1978)

*Lagu Cinta Sayang*

Cinta sayang dari Perlis  
Lagu lama sangat terpilih  
Di dalam rekod telah tertulis  
Cinta sayang, buat tarian di tengah majlis.

Buah keranji buah berangan  
Masak sebijji di dalam perahu  
Kirim jangan pesan pun jangan  
Biarlah sama kita merindu.

Baik-baik mengirai padi  
Takut mercik ke muka orang  
Biar baik menjaga diri  
Takut nanti diejek orang.

Orang Aceh pulang ke Aceh  
Sampai ke Aceh bertemu jalak  
Puan kasih saya pun kasih  
Ada jodoh bertemu kelak.

(Rakaman dari Kangar 1978)

Permainan rodat atau tarian rodat terdapat di beberapa tempat di Semenanjung tetapi lebih terkenal di Pahang dan Terengganu. Di daerah-daerah ini lagu-lagu yang mengiringi tariannya lebih banyak berirama tempatan, berbahasa Melayu dan sebahagian besar berupa pantun. Di tempat-tempat lain seperti di Perak, Selangor dan Johor lebih banyak dalam bahasa Arab dan berirama Timur Tengah. Dalam rodat Terengganu terdapat juga pelbagai nama lagu yang sesuai untuk mengiringi rentak tariannya. Di bawah ini dipetik beberapa rangkap pantun yang biasa dinyanyikan:

Bukit Datu Kuala Nerus  
Sama terbang Pulau Sekati  
Bila tentang bilalah jurus  
Tak payahlah saya nanti-nanti.

Banyak nyamuk di Sungai Nerus  
Manalah tempat nyalakan api  
Badan gemuk menjadi kurus  
Manalah tempat nak hiburkan hati.

## PANTUN

Tanah sini tanah lembah  
Anak keduduk sepohon dua  
Tanah di sini tanah bertuah  
Nak tumpang duduk setahun dua.

(Jusoh bin Deraman, Kuala Terengganu 1977)

### 3. Kegiatan-kegiatan yang berunsur agama dan kepercayaan:

Dalam kegiatan-kegiatan yang berunsur agama dan kepercayaan walaupun kebanyakan seni katanya dalam bahasa Arab terdapat juga sedikit pantun di samping yang berbentuk syair dan ungkapan-ungkapan puitis yang lain. Dalam dikir Pahang penulis menemukan pantun ini:

Padam damar padam pelita  
Habis sumbu rambu sutera  
Jangan tuan berbanyak kata  
Hilang satu kuganti dua.

Orang Jawa pulang ke Jawa  
Kisi berisi tiang bersambung  
Bukan mudah membuang nyawa  
Nyawa tidak boleh disambung.

Banun sia banun  
Mentimumun bongkok balik tiang  
Bangun cik adik bangun  
Ayam berk Kokok hari nak siang.

Goreng si kacang goreng  
Mari digoreng di dalam mangkuk  
Sorong surat suara tak nyaring  
Tambah pula mata mengantuk.

(Abu Bakar Mohd. Seh, Marang, Pahang 1977)

Dalam permainan dabus, di Kampung Gajah, Perak, pantun di bawah ini dijadikan lagu pembukaan:

Bismillah itu mula disurat  
Sudah disurat digulung-gulung  
Nabi Muhammad turun berangkat  
Malaikat yang banyak kembangkan payung.

Mohonlah kita berburu rusa  
Rusa yang banyak dalam rumia  
Mohonlah kita mengampun dosa  
Dosa yang banyak di dalam dunia.

Baju putih serban putih  
Untuk dibawa pergi sembahyang  
Allah kasih Muhammad kasih  
Rasulullah terlalu sayang.

(Mohd. Salleh bin Ngah Jaafar,  
Kg. Gajah, Perak 1977)

Kesimpulan yang dapat diambil daripada pembicaraan dalam tiga bahagian yang akhir ini – iaitu bentuk, tema dan fungsi pantun – ialah bahawa pantun Melayu dapat dilihat daripada tiga aspek yang saling berhubungan, iaitu:

1. Bentuk dan struktur
2. Tema dan isi
3. Fungsi dan penyebarannya.

Dari segi bentuk dan struktur, pantun dapat diklasifikasi ke dalam beberapa jenis, iaitu:

- a. Pantun dua baris (karmina)
- b. Pantun empat baris
- c. Pantun yang lebih daripada empat baris
- d. Pantun berkait
- e. Pantun dalam rimba yang lain.

Dari segi tema dan isi, pantun dapat membawa pelbagai tema yang menerangkan pegangan dan amalan hidup masyarakat, antaranya:

- a. Alam kehidupan kanak-kanak
- b. Cinta dan kasih sayang
- c. Telatah dan kehidupan masyarakat
- d. Pengajaran, nasihat, agama dan adat.

Dari segi fungsi dan penyebarannya, pantun terdapat dalam pelbagai kegiatan, antaranya:

- a. Berupa upacara (*ritual*)

- b. Berunsur hiburan
- c. Berunsur agama dan pengajaran.

Jika pendekatan di atas diterima, bermakna jenis-jenis pantun yang berkedudukan sebagai istilah teknik yang tetap hanya dalam (1) itu sahaja; sementara dalam (2) dan (3) tidak dianggap sebagai jenis, tetapi hanya sebagai kandungan, isi, tema, fungsi dan penyebaran. Pengistilahan di sini tidak tetap, iaitu bergantung kepada pendekatan perseorangan, menurut penekanan dan interpretasi masing-masing. Kerana itu tidaklah ada "pantun kanak-kanak", "pantun kasih" atau "pantun budi"; yang ada ialah pantun-pantun yang bertemakan kehidupan kanak-kanak, kasih sayang dan budi. Demikian pula tidak ada "pantun dondang sayang", "pantun lotah" atau "pantun dikir"; yang ada ialah pantun-pantun yang terdapat atau yang digunakan dalam kegiatan-kegiatan seni, seperti dalam dondang sayang, lotah atau dikir. Tidak juga benar penamaan "pantun laut", "pantun ayam sabungan"; tetapi adalah pantun-pantun yang menceritakan atau yang merujuk kepada laut, bunga atau ayam sabungan.

Ringkasnya, penganalisisan sebuah pantun dapat diberikan dalam rumus yang mudah, misalnya:

$$P = B(x) / R(y) / T(m) / F(k)$$

iaitu sebuah pantun adalah daripada jenis x baris, dalam rima y, dengan tema m dan terdapat dalam fungsi k; misalnya pantun di bawah ini adalah daripada jenis enam baris, dalam rima a-b-c-a-b-c, dengan tema cinta dan kasih sayang, terdapat dalam permainan bongai di Negeri Sembilan.

Masak nasi pulan-pulan  
 Makanan anak permaisuri  
 Dimakan di Kota Melaka  
 Kalau nak mati berpayung bulan  
 Nak berkubur di hujung jari  
 Elok bertimbun si air mata.

Gambarajah di sebelah adalah analisis daripada pembicaraan mengenai bentuk dan ciri-ciri pantun Melayu dalam kajian ini.



CARTA II: Analisis Bentuk dan Ciri Pantun Melayu

## BAB IV

### SYAIR DAN NAZAM

#### SYAIR

##### Persoalan Asal Usul Syair

SEBAGAIMANA pantun dan genre puisi Melayu lama yang lain, syair juga mengalami polemik yang panjang berhubung dengan asal usul penciptaan dan penyebarannya dalam kesusasteraan dan kehidupan masyarakat Melayu. Persoalan mengenai asal usul ini bukan sahaja menarik dari segi sejarah dan proses penyebaran sesebuah genre sastera, tetapi berkaitan rapat dengan teori kesusasteraan secara umum dan khususnya mengenai genre yang dibincangkan. Dalam kes syair ini, misalnya, penentuan tentang asal usulnya akan dapat pula menentukan ciri-cirinya yang penting yang merupakan persoalan yang lebih pokok. Demikian dalam polemik yang panjang itu berbagai-bagi pendapat telah diberikan oleh para pengkaji, khasnya daripada kalangan pengkaji Eropah, Inggeris dan Belanda dan kemudian oleh pengkaji-pengkaji tempatan. Kesimpulan daripada pendapat-pendapat itu bolehlah diringkaskan demikian:

1. Bahawa istilah 'syair' itu berasal daripada bahasa Arab; dan penggunaannya dalam bahasa Melayu hanya sebagai istilah teknik sahaja.
2. Bahawa syair Melayu itu, walaupun ada kaitannya dengan puisi Arab, tetapi tidak berasal daripada syair Arab atau Parsi, atau sebagai penyesuaian daripada mana-mana genre puisi Arab atau

Parsi. Dengan perkataan lain syair adalah ciptaan asli masyarakat Melayu.

3. Ada kemungkinan syair itu berasal daripada puisi Melayu-Indonesia yang asli.
4. Bahawa syair Melayu dicipta dan dimulakan penyebarannya oleh Hamzah Fansuri dan beracuankan puisi Arab-Parsi.

### Istilah Syair

Tentang istilah 'syair' dapat dikatakan para sarjana pada keseluruhannya sependapat bahawa istilah itu berasal daripada perkataan Arab; *shi'r* yang secara umum bermakna puisi (*a poem, poetry*), sedangkan *sha'ir* bermakna penulis puisi, penyair atau penyajak (*a poet*). Bagaimana perkataan 'syair' itu yang digunakan, tidak 'shi'r' seperti di dalam bahasa Arabnya, lebih jelas diterangkan oleh Syed Naquib al-Attas (1968), yang dipetik agak panjang di bawah:

*In the first instance, it seems to me that from the point of view of Arabic phonetics the 'fi'l' form is pronounced initially between the first and second radicals with the sound nearer to 'a' than to 'i' that is 'i - a' more than 'i - i'. It is quiet clear to see that from this point of view, coupled with general characteristics of Malay phonetics, the sound 'sha'ir' was developed more logically than shi'r in the Malay language. In the second instance, the unvocalised Arabic orthography of the MSS, contrary to what Teeuw believes, does not necessarily conceal the pronunciation. In my experience of Malay texts, the spelling, when it refers to sha'ir, is shin-'ayn- ya'r'a', and not shin-'ayn-ra'. The ya is to denote the 'kasrah' on the second radical pointing to the third to produce the sound 'ir'. It is quiet common to find the letters alif, waw and ya' employed in unvocalised Malay texts as substitute for the 'fathah', the 'dammah' and the 'kasrah' respectively, thus also revealing the way in which a particular word is to be pronounced (hlm 53).*

Ringkasnya keterangan Syed Naquib al-Attas itu menunjukkan perkataan *sya'ir* lebih sesuai dengan sistem bunyi bahasa Melayu. Dan dari segi urutan vokal-vokal dalam bahasa Melayu, memang urutan a – i itu lebih umum daripada urutan i – a; terutama dalam konteks yang mementingkan keindahan bunyi. Dalam puisi seperti syair yang menekankan rima akhir dalam bentuk yang sebolehnya sempurna,

perkataan syair sangatlah tepat dan sesuai, untuk berirama dengan perkataan-perkataan lain yang asal Melayu, yang lebih banyak dalam struktur a-i seperti ini, misalnya, air, cair, ghair, zahir, taksir, akhir bahkan layar, bayar dan lain-lain. Suatu contoh syair oleh Hamzah Fansuri berbunyi demikian:

Minuman itu bukannya air  
Mabuknya sangat terialu bersyair  
Setelah terminum fanalah sekalian ghair  
Itulah pertemuan batin dan zahir.

(Syed Naquib al-Attas 1968, 54)

Penggunaan perkataan syair dalam bentuk seperti itu bukanlah perkembangan yang kemudian, tetapi mestinya dari sejak syair mula diketahui lagi. Syed Naquib al-Attas mengatakan istilah syair itu telah diketahui dan dikenali dalam masyarakat Melayu di Sumatera Utara, sebelum zaman Hamzah Fansuri. Mungkin sekali dalam zaman Hamzah perkataan *syi'r* telah disebut *syā'ir*, atau telah digunakan oleh Hamzah dengan sebutan demikian dengan maksud menyesuaikannya dengan skema rima puisi yang dikarangnya.

Penggunaan yang tidak tepat antara istilah dan bentuk seperti ini bukanlah suatu perkara yang baharu dan terasing dalam bahasa Melayu. Banyak perkataan pinjaman daripada Sanskrit dan Arab yang dipakai dalam bahasa Melayu dengan makna yang lain daripada sumbernya yang asal. Penyimpangan dalam pemakaian istilah syair ini pun masih dapat dilihat dalam penggunaannya sekarang. Istilah-istilah penyair dan kepenyairan digunakan dengan maksud yang sama dengan *poet* dan *versification*, menjadikannya sama dengan kedudukannya dalam bahasanya yang asal. Sebaliknya apa yang difahami umum tentang syair ialah suatu genre puisi yang tertentu bentuknya. Kerana itu istilah-istilah penyair dan kepenyairan sewajarnya tidak digunakan kerana penulis-penulis yang dimaksudkan tidak lagi menulis syair, tetapi sajak atau puisi. Kerana itu digunakan istilah-istilah pemuisi, dan *kepuisian* bagi maksud *poet* dan *versification*, namun dalam penggunaannya, penyair dan kepenyairan lebih luas digunakan oleh pembicara-pembicara puisi zaman kini.

Suatu hal lagi yang harus dipertimbangkan bahawa syair, dalam peringkat awalnya adalah suatu genre sastera lisan, sama seperti

genre-genre sastera yang lain atau puisi, seperti pantun, mantera, teromba dan lain-lain. Kerana itu penyebutan sesuatu kata atau istilah tidak berdasarkan penglihatan tetapi pendengaran; dan penyebutan itu lebih tertakluk kepada sistem bunyi bahasa yang berkenaan, khususnya bahasa pertuturan atau lisan. Justeru itu, syair atau *syi'r* disebut juga sebagai *sa'e* atau *sa'iyo* dalam bahasa Melayu, *sayer* dan *singir* (atau geguritan), Leyden, 1808: 182–184) (Pigeaud 1938, 304), *sair* (Drewes 1955, 68) dan *singir* (Johns 1965, 72) dalam bahasa Jawa.

### *Asal Usul Syair Sebagai Genre Puisi*

Hooykaas berpendapat, "Walaupun perkataan syair daripada bahasa Arab, *shi'r* (sajak), tetapi rupa sajak ini ketara asli, bukan dari negeri asing" (Hooykaas 1965, 72–73). Pendapat ini berlawanan dengan keterangan yang terdapat dalam *Encyclopaedia van Nederlandsch-Indie* (S.V. 'sjair') yang menyatakan, "sebagaimana istilahnya yang asing, asalnya juga adalah dari negeri asing". Bagaimanapun secara keseluruhan para pengkaji memberikan kesimpulan bahawa syair Melayu tidak beracukan *syi'r* Arab atau mana-mana puisi Arab-Parsi yang lain. Untuk menjelaskan keterangan itu, di bawah ini akan dibincangkan pendapat-pendapat yang berhubungan dengan persoalan tersebut.

Sebagaimana yang dijelaskan sebelum ini, perkataan *syi'r* dalam bahasa Arab bermakna sama ada puisi secara umum (poem) atau satu genre puisi yang paling awal, yang telah ada dalam kesusteraan Arab dari sejak zaman Jahiliyah lagi. Menurut Ignace Goldziher (1966), bentuk puisi Arab yang paling primitif adalah sejenis prosa yang berima (*rhymed prose*) yang dipanggil *saj'* yang tidak mempunyai pertimbangan tertentu dan berbeza dari segi panjang dan pendeknya; bahagian-bahagiannya berakhir dengan suku kata-suku kata yang berima. Rima yang umum inilah yang mengadakan kesamaan (*unity*) puisi-puisi itu. *Saj'* pada asalnya digunakan oleh ahli-ahli sihir Pagan ini yang dipanggil *kahin* dalam ilmu ramalan (*oracles*) mereka, selain daripada sumpah atau kutukan (*maledictions*) dan jampi dan mantera (*incantations*) dan pengucapan-pengucapan magis yang lain. Pengucapan-pengucapan suci seperti ini dikenali sebagai *kalam musaja'* (*talk in rhymed prose*). Selanjutnya

Goldziher mengatakan:

*Scarcely different from this earliest type of saj' was the primitive type of Arabic poetry (shi'r). Its contents are best characterised by Arabic word for poet, shair, (knower by instinctive perception, one endowed with intuition) to whom magic power was attributed in his soothsaying. It was the poet who developed the saj' into a more disciplined and systematic rhythmical form. In course of time regular meters evolved; at first, they were very simple and thereby suitable to popular use. (hlm 8).*

Di sini bermakna shi'r dalam kesusasteraan Arab bukanlah suatu genre puisi yang tertentu strukturnya. Ia hanya berupa suatu bentuk pengucapan yang berima, yang mengandungi fungsi magis. Ini bermakna ia lebih kurang sama seperti jampi dan mantera dalam kesusasteraan Melayu. Dalam hal ini tentulah puisi Melayu tidak dipengaruhi oleh puisi Arab dalam zaman Jahiliyah itu kerana hubungan masyarakat Melayu dengan Asia Barat berlaku lebih tujuh abad terkemudian ketika mana Islam telah mencapai punca perkembangan tamadunnya. Jadi, jika syair Melayu dipengaruhi oleh puisi Arab-Parsi, tentulah daripada jenis atau genre yang terkemudian, khasnya yang telah berkembang di Asia Barat atau India dalam abad-abad ke-14 dan ke-15. Dalam tempoh waktu tersebut, puisi Arab-Parsi telah mempunyai struktur yang tersendiri, sesuai dengan struktur dan ciri-ciri prosodi bahasa itu yang lain. Dari zaman pra-Islam lagi, puisi Arab telah mempunyai 16 skema pola irama (*metrical schemata*), yang rumit tetapi artistik, yang dikenali sebagai *bahr* (bermakna laut atau sungai). Jumlah ini tidak termasuk '*bahr rajaz*' dan '*hasaj*' yang merupakan pola-pola yang sederhana dan permulaan. 16 pola yang dimaksudkan itu termasuk *kamil*, *wafir*, *tawil*, *basil*, *khafif* dan lain-lain, dengan tiap-tiap satunya mempunyai pula pelbagai variasi (Nicholson 1969, 76–77). Dalam zaman Islam pola irama puisi zaman Jahiliyah ini diperkembangkan dengan lebih sistematik dalam bidang filologi dan prosodi ('ilm al-'rud).

Dari segi jenis puisinya, antara yang permulaan ialah *hija* (*satire*, *lampoon* or *wine-song*) yang tumbuh daripada peristiwa-peristiwa permusuhan dan peperangan antara puak; iaitu suatu keadaan yang umum dalam masyarakat Jahiliyah itu. Selain daripada *hija* ialah *marthiya* atau *ritha* (*dirge*) yang berupa ratapan kematian yang dinyanyikan oleh keluarga perempuan si mati dengan maksud

supaya roh si mati akan diterima dengan baik oleh Tuhan. *Hija* dan *marthiya* ini mula-mulanya terdapat dalam bentuk *saj'* tetapi kemudiannya berkembang dengan pola irama yang lebih rumit.

Satu lagi jenis puisi yang sangat popular ialah qasidah (*ode*) yang merupakan puisi imaginatif yang lengkap dan panjang, tidak kurang daripada 25 baris dan biasanya lebih daripada 100. Puisi jenis ini berbentuk serima (*monorhyme*), sesuai dengan tradisi Arab yang menganggap rima bukan sahaja sebagai hiasan yang menyenangkan atau ikatan yang memberatkan tetapi adalah 'alat yang penting bagi puisi' (Goldziher 1966, 10–11; Nicholson 1969, 76–77). Dari segi isinya, qasidah mempunyai tiga skema (atau bahagian), iaitu:

1. *Nasib*, pemerian tentang alam sekitar, padang pasir, tempat-tempat yang telah ditinggalkan, kesan dan ingatan yang terperinci tentang masa yang silam.
2. *Wasf*, pemerian tentang pengalaman penyair dalam pengembalaan, suka dan dukanya, termasuk cerita tentang unta tunggangannya serta binatang-binatang yang ditemuiinya di padang pasir.
3. *Madih*, penyair pada akhirnya menyatakan hasratnya, memuji-muji orang yang memberinya layanan dan kesalnya kepada orang-orang atau puak yang memusuhiinya.

Daripada qasidah kita kenali 'kit'ah' yang merupakan fragmen daripada qasidah, atau puisi yang tersendiri menceritakan sesuatu topik, tetapi masih menggunakan struktur rima yang sama seperti qasidah. 'Ghazal' pula merupakan jenis puisi yang lebih menarik tercipta sekitar tahun 670 M. Puisi ini sebagai puisi kasih sayang (*love poetry*) menggunakan pola irama yang lebih ringan sesuai dengan muzik yang mengiringinya. Isinya hampir sama dengan bahagian *nasib* dalam qasidah; tetapi latar padang pasirnya telah dirubah. Gadis daripada suku yang berjiran diganti dengan puteri dari bandar atau istana untuk dijadikan objek dalam pencarian cinta. Demikian keadaan puisi Arab secara keseluruhan sehingga permulaan abad ke-14. Perkembangan kemudiannya, baik dari segi genre, bentuk maupun dari segi isi tidak menunjukkan kepelbagaian yang jauh daripada yang telah ada. Daripada beberapa antologi puisi Arab yang telah dikaji tidak ada yang didapati mendekati bentuk dan isi

syair Melayu. Kerana itu dapatlah dikatakan bahawa syair Melayu tidak dibuat beracuankan mana-mana genre puisi Arab, baik yang purba mahupun yang moden.

Jika syair Melayu tidak dicipta berdasarkan puisi Arab, ada kemungkinan ia dipengaruhi oleh puisi Parsi; kerana dalam perkembangan kebudayaan Islam di Asia Tenggara, termasuk Tanah Melayu, Parsi telah juga memainkan peranan yang penting (Syed Naquib al-Attas 1969, 13, 25). Dalam hal ini mungkin perlu pula memeriksa secara ringkas perkembangan dan ciri-ciri puisi Parsi. Dalam sejarah kesusastraan Parsi, puisinya dikatakan bermula dalam abad kesepuluh dengan karya-karya Rudaki yang dikenali sebagai 'Bapa Puisi Parsi'. Beliau telah mengarang beberapa buah puisi dalam bentuk qasidah, kit'ah, masnawi dan ghazal. Bentuk-bentuk ini diperkembangkan oleh penyair-penyair yang kemudian. Sepertimana qasidah Arab, qasidah Parsi ini juga terdiri daripada kuplet-kuplet yang berima dan sama dari segi pola irama; panjangnya antara 30–35 kuplet dan yang paling panjang ialah karya Qa'ani, terdiri daripada 337 kuplet.

Ghazal (*love lyrics*) terdiri daripada baris-baris yang mempunyai rima yang sama mengikut mana-mana pola meter dalam puisi Arab. Ia terdiri tidak kurang daripada lima atau lebih daripada 15 kuplet. Dua baris dalam kuplet pertama berima antara satu dengan yang lain dan kemudiannya dengan baris kedua dalam kuplet-kuplet berikutnya. Tiap-tiap kuplet dapat berdiri sendiri dan lengkap (dalam dua baris), tidak bergantung kepada kuplet-kuplet yang lain. Tema ghazal umumnya ialah cinta – murni dan berahi – dalam keseluruhan manifestasinya.

Berbeza daripada ghazal, masnawi adalah puisi naratif yang panjang dalam kuplet-kuplet yang berima dan amat sesuai untuk membawakan cerita-cerita epik dan romantik, bahkan mengenai hal-hal mistik, etika dan falsafah. 'Masnawi' yang baik kemudiannya ditulis oleh penyair-penyair mistik, antaranya yang terkenal ialah Sana'i, diikuti oleh Attar dan Rumi, yang menulis masnawi sepanjang 25 000 kuplet. Tema utama masnawi ialah cinta; tetapi Rumi memusatkan persoalan pada perlakuan, erti dan fungsi hidup.

Satu lagi jenis atau genre puisi Parsi – dan hanya inilah yang hampir sama dengan syair Melayu – ialah ruba'i yang dimulai oleh Omar Khayyam (M. 1229). Rubai terdiri daripada empat baris

(empat misra) dan seperti epigram, lengkap dalam satu untai. Dari segi rima keseluruhanya berbentuk a-a-b-a, tetapi kadang-kadang terdapat juga dengan skema a-a-a-a. Bentuk ini berasal daripada Parsi purba (pra-Islam) dan terpakai hingga kini. Tema ruba'i meliputi semua genre puisi, kecuali epih (Haidari 1971, 109–122).

Daripada apa yang dibincangkan di atas jelas tidak terdapat persamaan antara syair Melayu dengan mana-mana jenis puisi Parsi. Dan walaupun terdapat ciri-ciri yang hampir sama antara syair dan ruba'i, tetapi perbezaan antara keduanya amat jauh. Pertamanya, walaupun keduanya terdiri daripada empat baris serangkap, skema rima ruba'i adalah a-a-b-a, sedikit sekali a-a-a-a; sedangkan syair Melayu berbentuk a-a-a-a, tidak ada a-a-b-a. Keduanya, dari segi pembahagian unit, ruba'i lengkap dalam satu rangkap sedangkan syair memerlukan beberapa rangkap yang berurutan untuk suatu idea yang lengkap. Ketiganya, syair Melayu lebih banyak berupa naratif, cerita dan pengajaran, termasuk epih, sedangkan ruba'i mengandungi semua genre puisi, kecuali epih.

Daripada pemeriksaan yang ringkas itu dapatlah dibuat kesimpulan iaitu syair Melayu tidak dibuat berdasarkan puisi Arab atau Puisi. Jika demikian, nyatalah benarnya pendapat yang mengatakan syair Melayu sebagai ciptaan masyarakat Melayu. Kerana itu yang harus diperiksa dan dibuktikan hanya dua masalah sahaja lagi. Pertamanya, apakah syair itu merupakan bentuk puisi Melayu-Indonesia yang asli (purba), ertinya telah ada sebelum kedatangan Islam atau, keduanya, benarkah syair dikarang dan dicipta oleh Hamzah Fansuri dan hanya dikenali dan berkembang selepas Hamzah Fansuri (meninggal 1630 M).

Untuk memudahkan urutan perbincangan ini, ada baiknya diteliti lebih dulu pendapat yang menghubungkan asal usul syair Melayu dengan Hamzah Fansuri. Sesungguhnya ketiga-tiga tokoh yang disebutkan mula-mula tadi, iaitu Doorenbos, A. Teeuw dan Syed Naquib al-Attas masing-masing membuat kesimpulan ke arah itu; hanya dalam mengemukakan pendapat, masing-masing menggunakan pendekatan yang berlainan. A. Teeuw menggunakan pendekatan ekstensif iaitu dengan membuat perbandingan dengan bahan-bahan yang lain, sementara Syed Naquib dengan cara intensif iaitu melihat dari dalam karya-karya Hamzah sendiri. Titik tolak

pendapat Syed Naquib (1968) dapatlah dimulakan dari petikan di bawah ini:

*I have already mentioned my theory that Arabic and Persian poetry, whence the term shi'r originated and influenced the origin of the Malay syair, first came to the Malay Archipelago via Sufi literature. I have also suggested that we must examine closely first the Arabic and Persian sources of Sufi literature that were known in at least certain part of the Malay Archipelago in the sixteenth century. Aceh was the most relevant and logical part of the Malay Archipelago in the sixteenth century. That alone could have possibly been the locale for such sources. Since Hamzah's works, also according to my theory, are the earliest Malay works on Sufi literature, it is obviously from these works that the Arabic and Persian sources of initial influence could be gleaned and known precisely. (hlm 15)*

Selanjutnya Syed Naquib menunjukkan bahawa karya-karya Hamzah banyak sekali dipengaruhi oleh ahli-ahli Sufi yang terkenal seperti Muhyi'l Din ibnu'l-Arabi (1240 M), Abdu-karim al-Jili (1428 M) dan beberapa yang lain; bahkan mulai dari zaman Rasulullah S.A.W., misalnya Uways al-Qarani hingga Aynu'l-Qudatul-Humadani dan penyair Turki Hurufi Naimi (yang dipengaruhi oleh al-Hallaj), yang menerima hukuman mati di Aleppo pada tahun 1417-1418. Dalam karya-karya Hamzah dapat dikesan tidak kurang daripada 35 petikan puisi Sufi; lebih separuh daripadanya dikenal sebagai shi'r. Enam lagi daripada ruba'i dan beberapa kuplet yang tidak dikenali, mungkin masnawi, terutamanya daripada Sham-i Tabaris dan Attar, kemudian ghazal oleh Maghribi, kit'ah dan sebuah qasidah oleh Iraqi. Lebih menarik di sini shi'r yang dipetik oleh Hamzah kebanyakannya terdiri daripada empat baris seuntai. Dalam beberapa tempat hanya dua baris yang dipetik, tetapi sumbernya yang asal adalah empat baris; ini menunjukkan Hamzah mengutamakan shi'r yang empat baris dan kemudian ruba'i. Ini membuktikan Shi'r yang empat baris itu telah memberikan pengaruh yang besar kepada penciptaan syair Hamzah. Shi'r empat baris yang dipetik oleh Hamzah kebanyakannya karya Ibnu'l-Arabi dan Iraqi sedangkan ruba'i daripada karya Jami, kecuali sekurang-kurangnya satu daripada Shah Ni'matullah, Kirman. Kedua-duanya, Iraqi dan Jami dalam *Lama'at* dan *Law'ih* menggunakan shi'r dan ruba'i

seluas-luasnya dalam membicarakan pengajaran daripada Muhyi'l-Din ibnu'l-Arabi, khususnya seperti yang disampaikannya dalam Fasul'l-Hikam. Iraqi menghasilkan Lama'at selepas menghadiri kuliah-kuliah yang diberikan oleh Syaikh Sadru'l-Din al-Qanawi (1273 M), mengenai Fusus; dan Jami tidak saja menulis syarah (*commentary*) mengenai Lama'at, tetapi menulis pula Lawa'ih untuk menyaingi Fusus. Di sini tidaklah menghairankan mengapa Ibnu'l-Arabi menjadi sumber ilham kepada beberapa ramai ahli Sufi yang agung, bahkan lebih penting lagi kerana pemikiran dan idea-ideanya yang luas meliputi seluruh bidang tasawuf dengan cara yang tidak pernah berlaku sebelum dan sesudahnya:

*It is no exaggeration, then to assert, on the basis of what we now know, that his influence upon Hamzah does not only pervade the sphere of metaphysical doctrine, but extends itself to that of literature – in particular the shaping of the verse structure chosen by Hamzah. Indeed, why should not this influence extend itself to the domain of literature, seeing that the very same Ibnu'l-Arabi has radiated his influence even into medieval Christian mysticism and upon the ideas and writings of the Italian poet Ravenna? (Syed Naquib 1968, 58).*

Syair Hamzah, menurut Syed Naquib lagi, mendapat pengaruh yang asli atau *primary* tidak daripada ruba'i, tetapi daripada shi'r empat baris oleh Ibnu'l-Arabi dan Iraqi. Ruba'i mungkin juga mempengaruhinya dalam menulis syairnya tetapi hanya pada strukturnya yang empat baris itu sahaja, tidak dari segi tekniknya, ruba'i menekankan aturan-aturan dan syarat-syarat yang ketat dari segi susunan rima, jumlah suku kata dan pola irama; sementara shi'r lebih luwes (*flexible*), tetapi *versatile*. Hamzah dalam mencipta syairnya tidak mengikut sistem komposisi bait dalam empat baris syair, tetapi sebaliknya mencipta melalui kebolehannya sendiri komposisi satu bait untuk empat baris syair tanpa melanggar syarat-syarat kepuisian shi'r tersebut.

Syed Naquib juga menekankan bahawa puisi Hamzah dikenali secara teknik sebagai syair dari sejak mula dan bentuk puisinya dikenali secara teknik sebagai ruba'i, juga dari sejak mula dicipta. Istilah ruba'i di sini bermakna 'empat dan empat' atau 'empat dan empat bersama' atau 'empat sekali dan empat sekali'; ringkasnya 'urutan empat-empat'. Dengan demikian akan didapati persamaan

bagi ruba'i, *thulath* dan bagi ruba'i, *thulathi*.

Ringkasnya di sini, dapatlah dikatakan bahawa pemilihan Hamzah terhadap syair empat baris itu dipengaruhi oleh pelbagai keadaan termasuk, pertamanya kerana sesuainya bahasa Melayu dalam pembentukan puisi empat baris dengan rima a-a-a-a; keduanya, pengaruh shi'r empat baris Ibnu'l-Arabi dan Iraqi dan ruba'i Jami; ketiganya oleh konsep tentang bait dan shi'r dalam prosodi Arab dan Parsi; dan yang akhir, yang lebih penting, bakat kreatif yang ada pada diri penyair Hamzah Fansuri.

Kesimpulan daripada pendapat Syed Naquib ini, yang disampaikan dengan terperinci dalam 64 halaman itu, dapat diringkaskan dalam kesimpulan yang diberikannya sendiri:

*In making my concluding remarks, I would like once again to reiterate my assertion, with validity of which ought by now to have become self-evident, that Hamzah Fansuri was the inventor and originator of the Malay syair. In the entire vista of Malay literature – including even the Indonesian literature – he was unique. None rivalled him in originality and poetic genius; in Malay Sufi literature none excelled the clarity and flowing simplicity of his prose which none exceeded him in poetry, whether it be in terms of literary output or in terms of intellectual content. He was, as I have earlier shown, the first man to set forth in systematic writing the essential aspects of the Sufi doctrines in Malay, and not only impressed his influence upon certain historiographically important literary usages in Malay literature, but introduced as well new technical terminologies and concepts into the Malay language in general, and into Malay Sufi literature in particular, having to do with theology, metaphysics and philosophy. The Malay syair, then, can be considered to be of indigenous origin only if we apply the word 'indigenous' to refer to Hamzah Fansuri's invention and origination of the literary genre, which later became popular as medium for conveying subjects not necessarily restricted to the religious and metaphysical domains, and not to some vague, ever-receding chimera of a long lost and forgotten "syair type" form of poetry imagined to have existed in an equally vague "early Malay literature". (hlm 64).*

### Kemungkinan Syair Melayu Sebagai Suatu Bentuk Puisi Melayu-Indonesia yang Asli

Daripada hujah-hujah yang dikemukakan oleh Syed Naquib itu memang dapat diyakini bahawa syair Melayu adalah ciptaan

Hamzah Fansuri, berdasarkan pengetahuannya tentang puisi Arab-Parsi, khususnya melalui karya-karya Sufi daripada ahli-ahli Sufi yang penting. Proses penciptaan ini dibantu oleh kemahiran Hamzah sendiri dalam bahasa dan ciri-ciri prosodi puisi Arab-Parsi. Istilah syair itu juga sebagai istilah teknik kepada genre ini diberikan oleh Hamzah secara sedar, juga melalui pengetahuannya terhadap puisi Arab-Parsi itu, khususnya daripada bentuk yang dikenalinya sebagai shi'r.

Sesungguhnya pendapat-pendapat Syed Naquib itu selaras dengan pengkaji-pengkaji yang lain, sekurang-kurangnya pada soal pokok yang menghubungkan asal usul syair Melayu kepada Hamzah Fansuri. A. Teeuw misalnya mengemukakan dua bahagian pendapat yang bersamaan (walaupun banyak bahagian lain yang berkontras). Pertama, pada istilah syair, A. Teeuw (1966b) mengatakan:

*First of all that the application of the term syair to a particular literary genre in Malay is probably not earlier than 1600; and the name only acquired this technical meaning after, and possibly because of the poems of Hamzah Fansuri. (hlm 445)*

Dan kedua, pada perkembangan pemakaian genre syair di daerah alam Melayu, A. Teeuw mengatakan:

*The model found favour, however, and this extended syair was looked upon as a new genre. At this time syair became the technical term for the type. Other poets began to follow Hamzah's example, not confining themselves to religious poems. All kinds of subjects were dealt with in syair form. A swift distribution and popularization of this new genre is by no means unlikely if it is remembered how quickly and widely this spiritual influence from North Sumatera generally spread through the Archipelago. It is possible, although not essential to the argument, that the Javanese "singir" mentioned by Pigeaud also derives as a genre from the Malay syair, and the point is worth making that in Java too both name and genre were used for religious poetry and according to our hypothesis so was the original syair. It is in no way surprising that as early as 1670 a Malay in Macassar used the genre for what we would term a historical poem, although it did contain a religious element. (hlm 445 – 446).*

P.L. Amin Sweeney, dalam kajiannya mengenai syair yang terpahat pada sebuah meriam yang sekarang tersimpan di London,

membuat kesimpulan yang hampir sama dengan pendapat Syed Naquib. Menurutnya syair yang terpahat pada meriam tersebut dengan tarikhnya 1658 M, pada beberapa tempat menunjukkan pengaruh daripada syair-syair Hamzah Fansuri. Tetapi dalam kajian yang sama Sweeney juga mengemukakan kemungkinan yang lain, iaitu apakah telah ada suatu bentuk puisi Indonesia purba yang hampir sama dengan syair, sebelum zaman Hamzah, dan jika hal ini dapat dibuktikan, bermakna Hamzah bukanlah *inventor* atau *originator* dalam erti kata yang sebenar. A. Teeuw juga dalam makalahnya yang dibicarakan di atas mengemukakan kemungkinan yang sama; tetapi kemungkinan itu telah ditolak oleh Syed Naquib dengan bukti-bukti yang dirasakannya sebagai tepat dan muktamad. Penentangan Syed Naquib dalam hal ini ialah atas dasar tiadanya bukti-bukti yang menyokong kemungkinan itu; kerana sesuatu agakan atau *conjecture* seperti yang dikemukakan oleh beberapa pengkaji tidak dapat diterima sebagai bukti. Sebaliknya kemungkinan kedua, iaitu Hamzah Fansuri sebagai *inventor* dan *originator* telah dibuktikan dengan jelasnya melalui karya-karya Hamzah sendiri.

Walau bagaimanapun, dalam hal ini, bukti yang dimaksudkan oleh Syed Naquib itu masih boleh pula dipersoalkan. Dalam tradisi kesusastraan Melayu lama tidak semua teori dapat disokong dengan bukti-bukti yang konkret, sistematik atau saintifik. Dalam hal puisi ini, terdapat tidak kurang 12 genre yang lain, tidak termasuk genre-genre dari Arab-Parsi seperti ruba'i, kit'ah, masnawi, ghazal dan sebagainya. Dalam soal asal usulnya, tidak ada satu pun yang dapat dibuktikan dengan jelas tentang penciptanya, *originator* dan *inventor*, bahkan tentang tarikh dan lokasi penciptaan. Selama ini kita menerima hakikat bahawa pantun, syair, gurindam, seloka, talibun atau sesomba, mantera dan sebagainya adalah ciptaan masyarakat Melayu secara kolektif. Demikian pula puisi-puisi yang diadaptasi dari Arab dan Parsi, seperti nazam, zikir dan qasidah tidak diketahui siapa yang memulakannya sama ada dalam bentuk terjemahan, adaptasi atau saduran. Kerana itu percubaan untuk menamakan seorang tertentu sebagai *originator* dan *inventor* kepada sesuatu genre yang lain yang ternyata tidak dapat dilakukan demikian.

Sesungguhnya kajian ini tidaklah berhasrat menafikan bukti-bukti dan kesimpulan yang dikemukakan oleh Syed Naquib, ter-

utamanya pada soal yang dasar tentang pencipta dan masa terciptanya syair Melayu. Yang mahu disemak semula di sini ialah tentang sumber-sumber yang mendorong ke arah penciptaan itu. Menurut Syed Naquib, Hamzah Fansuri berjaya melahirkan suatu genre yang tersendiri, iaitu syair, semata-mata berpandukan shi'r Arab, terutamanya shi'r empat baris oleh Ibnu'l-Arabi dan Iraqi; dan mungkin juga ruba'i, dari segi struktur empat barisnya.

Ringkasnya Hamzah hanya menggunakan pengetahuannya terhadap kesusasteraan Arab-Parsi, khususnya puisinya; dan tidak puisi Melayu. Hal inilah yang perlu diperdebatkan; kerana dalam zaman Hamzah, puisi Melayu dan puisi Nusantara seluruhnya telah pun berkembang dan begitu luas penggunaannya dalam keseluruhan aspek kehidupan masyarakat Nusantara. Oleh itu penekanan yang akan diberikan di sini ialah kemungkinan Hamzah Fansuri, dalam mencipta syair-syairnya, di samping menggunakan pengetahuannya mengenai puisi Arab-Parsi, telah juga menyesuaikannya dengan puisi Melayu atau puisi Nusantara yang asli yang memang telah ada di rantau ini jauh terdahulu daripada kedatangan puisi-puisi Arab-Parsi itu. Untuk membuktikan kemungkinan ini haruslah diteliti lebih dahulu secara terperinci, ciri-ciri terpenting sebuah syair Melayu; iaitu:

- i. Terdiri daripada empat baris serangkap.
- ii. Tergolong ke dalam jenis puisi kata (*word verse*).
- iii. Dalam sebaris mengandungi empat kata dasar.
- iv. Memakai skema rima a-a-a-a, rima akhir tidak rima dalaman.
- v. Dalam satu baris, terdapat suatu hentian (*pause*), kerana itu adanya kolon sepertimana dalam sebaris pantun.
- vi. Seluruh empat baris merupakan satu kesatuan idea; ertiinya tidak terbahagi dua kepada sampiran dan maksud sepertimana seuntai pantun.
- vii. Suatu rangkap syair perlu diikuti oleh rangkap-rangkap lain untuk membina suatu idea yang lengkap, sesuai dengan isi dan tujuannya.
- viii. Isi sesebuah syair pada umumnya merupakan cerita yang panjang atau penerangan yang jelas mengenai

sesuatu subjek, termasuk agama, falsafah, pengajaran dan sebagainya.

Daripada senarai ciri-ciri yang digaris kasarkan di atas cubalah bandingkan dengan ciri-ciri puisi Melayu yang lain, iaitu pantun, gurindam, seloka, talibun atau sesomba, teromba, jampi dan mantera. Hasilnya akan didapati bahawa hampir seluruh ciri-ciri syair itu terdapat juga dalam genre-genre puisi Melayu yang lain itu yang kehadirannya di rantau ini terdahulu daripada kehadiran 'syair'.

### 1. Puisi empat baris serangkap

Bentuk puisi empat baris serangkap bukanlah suatu yang baru kepada puisi Melayu. Pantun pada umumnya terdiri daripada empat baris serangkap; dan selain daripada bahasa Melayu terdapat juga dalam bahasa-bahasa Nusantara yang lain, termasuk Minangkabau, Jawa, Sunda, Batak, Sumatera Tengah (*Middle Malay*) dan Aceh. Dan selain daripada pantun, bentuk empat baris terdapat juga dalam teromba, teka-teki, talibun, prosa berirama (prosa lirik), bahkan dalam jampi dan mantera. Mantera di bawah ini terdapat dalam masyarakat Talang Mama di Sumatera Tengah dan menampakkan unsur yang primitif baik dari segi bentuk maupun dari segi fungsinya:

Tepung, tepung jati  
Datang emas berkat-kati  
Tepungku tepung tawar  
Datang hidu dengan penawar.

Tepungku tepung duduk  
Duduk tergilung-gilung di batu  
Batu tapak timpang naga luka  
Baksina talang jukat.

Dapat padi mande urai  
Jadi patih dang setia  
Jati batin penunggu dusun  
Makan sirih saudara berjunjung.

(Zuber Usman 1975, 172–173)

Dengan alasan di atas tidaklah semestinya Hamzah mengambil ruba'i Parsi, semata-mata untuk mendapatkan struktur empat baris; sedangkan di dalam puisi bangsanya bentuk demikian telah terlalu umum.

## 2. Syair sebagai puisi kata

Syair Melayu adalah puisi perkataan; dan sebagai puisi perkataan unit minimum yang menjadi ukuran ialah perkataan, iaitu jumlah perkataan dalam sebaris dan pemilihan perkataan sebagai ukuran estetika. Keseluruhan puisi Melayu dan puisi Nusantara tergolong sebagai puisi perkataan; sedang puisi Arab-Parsi, termasuk shi'r, ruba'i, qasidah, kit'ah, masnawi dan lain-lain adalah puisi kuantitatif, sesuai dengan struktur bahasa Arab dan Parsi sebagai bahasa kuantitatif. Kerana itu syair Melayu tidak menampakkan apa-apa hubungan dengan puisi Arab-Parsi terutamanya dari segi bentuk, meter, timbangan rima, pola irama dan lain-lain yang merupakan ciri-ciri terpenting dalam puisi Arab-Parsi.

## 3. Empat perkataan sebaris

Sebagai puisi perkataan yang menggunakan ukuran daripada jumlah perkataan, syair terdiri daripada empat kata dasar dalam sebaris. Dan kerana perkataan-perkataan dalam bahasa Melayu-Indonesia kebanyakannya berupa dwisuku kata, menjadikan setiap baris syair mengandungi dari 8 hingga sepuluh suku kata, iaitu dengan tambahan imbuhan, kata tugas atau kata-kata fungsional yang umumnya daripada esa suku kata. Ciri seperti ini terdapat dalam genre-genre puisi Melayu yang lain, tetapi tidak terdapat dalam puisi Arab, baik shi'r mahupun ruba'i. Kebanyakan puisi Arab mengandungi lebih daripada empat perkataan sebaris dan apabila diterjemahkan ke bahasa Melayu, biasanya jumlahnya menjadi dua kali ganda.

## 4. Rima akhir a-a-a-a

Pemakaian rima akhir a-a-a-a atau *monorhyme* a-a-a-a dan seterusnya, bukanlah unsur yang baru dalam puisi Melayu. Dalam pantun-pantun Melayu, selain daripada rima, a-b-a-b, terdapat juga a-a-a-a, sebagai variasi. Dan apabila keempat-empat baris seuntai itu tidak terbahagi kepada sampiran dan maksud, oleh setengah-

setengah pengkaji digolongkan sebagai pantun seloka; misalnya sebuah 'pantun' dalam *Sejarah Melayu*:

Chau Pandan anak Bubunnya  
Hendak menyerang ke Melaka  
Ada cincin berisi bunga  
Bunga berladung si air mata.

(Shellabear 1975, 95)

Sesungguhnya, berdasarkan ciri-ciri sebuah pantun, puisi di atas bukanlah pantun, tetapi syair. Selain daripada skema rima a-a-a-a, pembahagian kepada sampiran dan maksud tidak jelas sama sekali. Daripada kisah yang diceritakan menunjukkan keseluruhan rangkap itu merupakan satu unit: kuplet yang kedua adalah urutan idea yang sama daripada kuplet pertama. Contoh-contoh di bawah ini digolongkan sebagai 'pantun seloka' walaupun dari segi struktur dan ideanya tidak lain daripada 'syair'.

Anak dara dua sepasang  
Pakai emas pakai keronsang  
Sebiji nanas sebiji pisang  
Belum tahu rezeki musang.

(Wilkinson dan Winstedt 1961, 1)

Bila bertemu kasih sayang  
Duduk berkurung malam siang  
Hingga setapak tidak renggang  
Tulang sendi habis bergoncang.

(Hooykaas 1965, 84–85)

Penggunaan bentuk serima (*monorhyme*) dalam kebanyakan puisi Arab, khususnya qasidah, juga terdapat dalam beberapa genre puisi Melayu. Dalam cerita-cerita rakyat Melayu, terutamanya di daerah utara Semenanjung, bentuk cerita tergolong sebagai prosa berirama (prosa lirik); dan setiap baris berakhir dengan vokal /a/. Keadaan demikian terdapat dalam cerita-cerita seperti *Sulung Jawa* dan *Puteri Lindungan Bulan Kedah Tua*. Di bawah ini dipetik sebahagian daripada cerita *Puteri Lindungan Bulan Kedah Tua*:

Setelah itu apakala mendengar titah perintah Duli Yang Maha Mulia Maharaja Jawa:

Dan lepas daripada itu Wak Selamat Tandang Desa  
Ia pun lalu keluar daripada kota  
Lalu ia pun terus pergi ke pintu kuala  
Pengiring-pengiringnya juga mana yang ada,  
Mereka itu pun sudah lengkap ada belaka,  
Dengan membawa segala alat senjata,  
Dan apakala mereka itu menanti di dalamnya bahtera,  
Menanti titah perintah Duli Yang Maha Mulia;  
Dan bilakah lagi akan berangkat pergi ke negeri Johor Tanah Jata.

(Ismail Hassan, Perlis 1976)

Keseluruhan cerita itu dari mula hingga akhir, berjumlah tidak kurang daripada 4 000 baris, berakhir dengan bunyi /a/; dari segi puisi, serima. Memang benar, dari segi teorinya keadaan demikian tidak dianggap sebagai rima; kerana setengah-setengah pengkaji meletakkannya sebagai frasa rangka (*frame phrases*) (Amin Sweeney, 1973, 26–27); tetapi secara praktiknya keadaan demikian membuktikan bahawa mengadakan bunyi sama di akhir baris-baris pengucapan adalah suatu kebiasaan di kalangan masyarakat Melayu. Kerana itu mengadakan rima a-a-a-a seperti dalam genre puisi seperti syair, bukanlah suatu yang baru. Kembali kepada contoh puisi yang terpahat di batu nisan di Minye Tujuh (Aceh), baik ia tergolong sebagai syair atau *upajati*, konsep yang sama telah pun ada. Puisi itu tertulis dalam dua rangkap. Tiap serangkap terdiri daripada empat baris, seluruhnya dalam skema-rima a-a-a-a dan serima (*monorhyme*). Ini membuktikan bahawa konsep, struktur dan bentuk syair telah pun ada sebelum tahun 1380; hampir tiga abad sebelum Hamzah Fansuri.

##### 5. Hentian dan caesura

Secara tekniknya sesuatu baris syair mempunyai hentian pendek (*pause*) di pertengahan baris, hingga baris itu terbahagi kepada dua kolon sepertimana yang terdapat pada suatu baris pantun. Dengan pembahagian ini menjadikan adanya timbangan dalam pengucapan dan apalagi dalam lagu dan nyanyian di mana pantun dan syair digunakan. Hentian seperti ini terdapat juga dalam genre-genre yang

lain, termasuk teka-teki, teromba, prosa berirama, jampi dan mantera. Bandingkan rangkap-rangkap puisi di bawah ini:

Syair:

Asyikmu itu / jangan bercawang.  
Meninggalkan dunia / jangan kepalang.  
Suluh Muhammad / yogya kaupasang.  
Pada Rabbu'l - 'Alamin' supaya kau datang.

(Syed Naquib 1968, 32)

Anak dara / dua sepasang  
Pakai emas / pakai kerongsang  
Sebiji nanas / sebiji pisang  
Belum tahu / rezeki musang.

(Wilkinson dan Winstedt 1961, 1)

Teromba:

Siapa menjala / dia terjun  
Siapa berhutang / dia membayar  
Siapa menggigit / dia kena gigit  
Siapa membunuh / dia kena bunuh.

(Mohd. Din bin Ali 1957, 11)

Mantera:

Pertama angin / si carik kapan  
Kedua angin / si tajam tembeling  
Ketiga angin / puting beliung  
Keempat angin / bedil berjanggut  
Kelima angin / payung Ali  
Keenam angin / si lautan tulang  
Ketujuh angin / si hampar rebah.

(Zuber Usman 1975, 167)

Daripada contoh-contoh di atas lebih jelas syair Melayu mempunyai bentuk yang sama dengan genre-genre yang lain dari segi perimbangan bunyi atau pembahagian kolon. Jika ciri pembahagian ini dianggap sebagai sebahagian daripada pola irama puisi Melayu,

bermakna syair telah disesuaikan dengan ciri-ciri prosodi puisi Melayu, tidak dengan pola irama puisi Arab-Parsi.

#### 6. Kesatuan idea dalam rangkap-rangkap

Ciri syair yang penting yang dikatakan berbeza dengan pantun dan genre puisi Melayu yang lain ialah kerana ia memerlukan beberapa unit yang berurutan untuk memberikan idea yang lengkap, sedangkan pantun memadai dengan serangkap. Sesungguhnya keterangan ini pun terlalu umum dan tidak semestinya benar; kerana syair juga mungkin memadai dengan satu rangkap, misalnya syair di bawah ini:

Buatlah baik ayuhai rakan  
 Ke dalam laut kamu campakkan  
 Kalau tidak dikenal ikan  
 Tuhanmu tahu iakah bukan.

(Za'ba 1962, 99)

Sebaliknya pantun juga memerlukan beberapa rangkap dalam seuntai bergantung kepada subjek atau topik yang dibicarakan. Pada praktiknya pantun membicarakan topik yang memerlukan perluasan, misalnya tentang cinta, setia, kasih yang putus; atau mungkin sindiran terhadap telatah ahli masyarakat itu. Dalam sesuatu topik mungkin mengandungi empat atau lima, bahkan mungkin sepuluh rangkap. Dalam lagu-lagu daerah seperti dondang sayang, canggung, bongai atau rodat, terdapat dari lima hingga 20 rangkap dalam satu untai yang membicarakan suatu topik atau judul; misalnya lagu "Petasih" dalam bongai, lagu "Laut" dalam dondang sayang, "Ayam Didik" dalam canggung atau "Tuntutlah Ilmu" dalam rodat. Pantun berkait merupakan pantun-pantun yang saling berbalas dalam lagu-lagu tersebut, atau yang sengaja dikarang untuk tujuan-tujuan tertentu. Bahkan pantun berkait telah digunakan dengan jayanya untuk menceritakan cerita sejarah, seperti dalam cerita "Raja Haji" yang terdiri daripada 248 rangkap pantun, mengisahkan peperangan Raja Haji menentang Belanda hingga kematiannya di Teluk Ketapang pada tahun 1784 (Maxwell 1890, 173–224).

Teromba atau perbilangan adat terdiri daripada beberapa rangkap puisi yang berhubungan dari segi makna dan isi, mengandungi pelbagai bentuk, ungkapan bersajak, seperti pantun atau bahasa berirama, berurutan dari baris ke baris dan dari rangkap ke

rangkap untuk memberikan suatu idea yang lengkap. Beberapa contoh teromba yang dikumpulkan di beberapa daerah di Negeri Sembilan menunjukkan ahli-ahli teromba atau terasul ini yang terdiri daripada ketua-ketua atau penghulu adat mempunyai kebolehan menghafal dan menurunkan berpuluhan-puluhan rangkap puisi yang berhubungan makna dan isinya, sesuai dengan apa yang difahamkan sebagai teromba. Selain daripada itu jampi dan mantera juga terdiri daripada beberapa untai puisi, mungkin mengandungi pelbagai bentuk, pantun dan syair; seluruhnya berhubungan maknanya dan menghasilkan satu idea yang lengkap.

Ringkasnya di sini, dapat dikatakan bahawa hampir keseluruhan ciri-ciri syair itu terdapat dalam kebanyakan genre puisi Melayu lama. Kerana itu seorang penyair yang berkemampuan dan berkeinginan mencipta sesuatu bentuk di dalam tradisi masyarakatnya, tidak semestinya mencari aspek-aspek yang sama daripada puisi asing, khasnya Arab dan Parsi. Sebaliknya, dalam puisi Arab-Parsi itu sendiri, baik di dalam shi'r dan ruba'i, apalagi qasidah, masnawi, ghazal dan yang lainnya mempunyai pula kelainan-kelainan yang jauh daripada syair itu sendiri.

Daripada alasan-alasan yang dikemukakan di atas dapatlah dikatakan bahawa Hamzah mencipta syairnya, lebih banyak berdasarkan tradisi puisi bangsanya yang memang telah ada dalam zamannya. Apa yang lebih jelas mempengaruhi Hamzah daripada tradisi Arab-Parsi ialah dari segi isi syair-syairnya, khususnya dalam peringkat permulaan, iaitu konsep-konsep dan ajaran Sufi itu sendiri. Dan oleh kerana Sufi itu mempunyai ciri-cirinya sendiri, keadaan itu lalu terbawa dengan begitu ketara dalam syair-syair Hamzah, terutamanya lambang-lambang dan konsep-konsep yang terbiasa dan begitu umum dalam bidang dan pembicaraan yang berkenaan (Syed Naquib 1968, 60–62). Hamzah juga dikatakan pernah menterjemah puisi-puisi Sufi daripada karya ahli-ahli Sufi yang terkenal, seperti al-Arabi, al-Rumi, al-Iraqi dan Jami. Tentu saja dalam proses penterjemahan itu Hamzah telah dipengaruhi atau terbiasa dengan bentuk bahasa dan struktur kalimat Arab atau Parsi; lihat misalnya dalam contoh di bawah:

Bahrayn itu terlalu ajib  
Barzakh di antaranya bi Nuri'l-Habib

Olehnya zahir terlalu qarib  
 Kelihatan jauh pada sekalian gharib.

Orang Qaba Qawsayn itu seperti Kandang  
 Tali di antaranya bukannya benang  
 Barzakh namanya di sana terbentang  
 Ketiganya wahid yogya kau pandang.

(Syed Naquib 1971, 15)

Kelihatan dalam contoh di atas, kata-kata Arab di dalamnya adalah lambang-lambang daripada doktrin Sufi itu yang sukar untuk diterjemah ke dalam bahasa Melayu. Dalam terjemahan Inggerisnya seperti yang dibuat oleh Syed Naquib – Bahrayn (*two seas*), Barzakh (*barrier*), bi-Nuri'l-Habib (*the light of the beloved*), Qarib (*near*) dan Gharib (*strangers*); ternyata terjemahan Inggeris itu tidak mudah untuk diMelayukan. Pada beberapa tempat Hamzah menggunakan Laut Nisa untuk Bahr al-Nisa, Orang untuk Rijal dan pedang untuk Saiful. Ertinya Hamzah cuba memberikan kata-kata istilah yang menghampiri perkataan yang asal, tetapi ternyata dalam kebanyakan tempat terjemahan itu tidak begitu tepat dan kurang berkesan sebagai yang dirasakan dalam sumber asalnya; justeru itu lebih baik dikenalkan saja. Jika keadaan ini benar, ertinya Hamzah tidak dipengaruhi sepenuhnya oleh bentuk dan struktur puisi, tetapi dipengaruhi oleh bentuk dan struktur bahasa, khususnya bahasa Arab.

Pengaruh tradisi puisi Melayu yang begitu menyeluruh dalam masyarakat Nusantara dapat dilihat dalam syair-syair yang dikarang dan berkembang dalam waktu-waktu yang singkat selepas Hamzah Fansuri. Amin Sweeney, dalam kajiannya yang disebutkan di atas tadi menarik kita kepada syair yang terdapat pada meriam yang dibicarakannya. Tarikh syair itu terpahat ialah 1658; dan tarikh kematian Hamzah tidak pun jauh dari tahun 1630 (Johns 1957, 9–10). Keseluruhan syair-syair Hamzah tertulis dalam bentuk manuskrip dan tersimpan dalam istana kesultanan Aceh; dan baru dalam zaman kegiatan pengkaji-pengkaji Barat, tulisan-tulisan Hamzah tersalin dan tersebar kepada umum. Amin menyebutkan tentang adanya beberapa persamaan syair itu dengan syair-syair Hamzah; tetapi meriam tersebut tidak dibuat di Aceh dan setakat ini

tidak ada bukti yang jelas tentang hubungan Aceh dengan Kedah dan Patani, yang dapat dianggap sebagai faktor utama dalam menyebarkan syair-syair Hamzah ke daerah-daerah tersebut dalam tempoh begitu singkat: tidak sampai 30 tahun.

Dalam keadaan-keadaan seperti itu, tentulah ada beberapa faktor yang mendorong kepada kemungkinan itu; satu daripadanya ialah pengetahuan terhadap puisi dengan bentuk yang demikian telah sedia ada di kalangan penyair dan penulis Melayu di seluruh Nusantara, sebelum, semasa dan sesudah zaman Hamzah Fansuri. Jadi, jika kemungkinan ini diterima, dapatlah ditimbulkan semula kemungkinan adanya suatu bentuk puisi Melayu-Indonesia yang asal yang mendekati bentuk syair, tetapi tidak berkembang dan tidak bernama; bentuk inilah yang kemudiannya diperkembang dan diberikan istilah yang khusus oleh Hamzah Fansuri. Keterangan dan bukti yang lebih jelas mungkin diperlukan dalam hal ini; tetapi sesungguhnya untuk maksud di atas telah memadai dan kerana itu tidak perlu dilanjutkan lagi.

### Bentuk dan Struktur

Dari segi bentuknya, syair tidak mempunyai banyak variasi seperti mana yang terdapat pada pantun. Secara umum, syair merupakan puisi empat baris serangkap dengan rima akhir a-a-a-a. Bagaimanapun daripada beberapa contoh yang ditemui setakat ini memperlihatkan adanya usaha penulis-penulis syair memberikan kelainan dari segi visual, antaranya memberikan variasi pada jumlah baris dalam serangkap dan pada skema rima. Di bawah ini diberikan beberapa contoh:

1. Syair dua baris serangkap, dengan rima a-b, a-b, a-b dan seterusnya:

Dihitung banyak tidak terkira  
Apabila dijumlahkan jadi satu.

Melompat ia seperti kera  
Hanya tak pandai memanjang pintu.

Menghidupi memelihara  
Tetapi orang benci bercampur bersatu.

Sungguhpun datangnya dari udara  
Tempat asalnya bukan di situ.

Lemah lembut tulus mesra  
Hairan orang takut bukan suatu.

Dihambatnya lari bercempera  
Tetapi bukannya dia syaitan dan hantu.

Kalau tak bersembunyi dengan segera  
Barulah menggelugut kita di situ.

(Za'ba 1962, 236)

Puisi di atas, dari segi bentuk, tergolong sebagai syair dua baris serangkap; dan dari segi isinya adalah teka-teki, kerana keseluruhannya mengandungi maksud meneka objek yang dimaksudkan, iaitu hujan.

2. Syair tiga baris dengan rima a-a-b, a-a-b dan seterusnya:

Islam kita wei kejatuhan  
Sebab karut masuk tambahan:  
Quran hadis terbulang-baling.

Hadis firman dapat ubahan  
Maksud hakiki perpecahan  
Punding bengkok kena perguling.

Ahwal ulama jadi penyudahan,  
Barang apa semuanya burhan,  
Orang kemudian ikut keliling.

Benar salah tidak payahan  
Semua Islam punya suruhan  
Terima tidak boleh menggeleng.

Kalau ada yang arif johan  
Ilmu dan akal bawa suruhan  
Dengan matanya kena hembaling.

Bidaah sesat jadi tuduhan  
Jadi hakim seperti Tuhan  
Ulama jadid disangka maling.

(Za'ba 1962, 235 – 236)

Dalam contoh di atas hanya skema rima yang berbeza; iaitu a-a-b, a-a-b dan seterusnya. Daripada ciri-ciri yang lain, jumlah kata dan jumlah suku kata dalam sebaris, sama saja dengan syair empat baris.

3. Syair empat baris dengan rima a-a-a-a:

Bismillah itu permulaan kalam  
 Dengan nama Allah Khaliqu alam  
 Adam diturunkan ke dalam alam  
 Dunia gelita semuanya kelam.

Adam terkejut tiada terperi  
 Turun di Pulau Serindit nama negeri  
 Menangis Adam berperi-peri  
 Mengenangkan nasib badan sendiri.

Jibril datang membawa wahi  
 Menyuruh Adam bersembahyang sendiri  
 Sembahyang Adam satu rakaat  
 Membawa iman dengan taat.

Fajar terbit waktu subuh  
 Adam duduk sedang bertelimpuh  
 Ia menyesal serta mengeluh  
 Badannya hangat serta berpeluh.

Bangkitlah Adam lalu berdiri  
 Membaca qunut sambil berperi  
 Mengangkat tangan menyusun jari  
 Matahari terbit sianglah hari.

(Haji Mohd. Wajib bin Abdul Rahman,  
 Slim River, Perak 1976)

Bentuk di atas ialah yang paling umum dan mewakili hampir keseluruhan syair Melayu. Bagaimanapun contoh di atas adalah yang disampaikan secara lisan; kerana itu dalam rangkap ketiga terdapat rima a-a-b-b. Kemungkinannya informan yang menurunkan syair ini telah lupa pada perkataan-perkataan yang tersebut, atau mungkin ia telah digabungkan dua rangkap syair yang berlainan rangkap; kerana itu rima a-a-b-b di sini tidak dapat dianggap sebagai

kelainan yang disengajakan untuk tujuan keindahan.

4. Syair empat baris dengan rima a-b-a-b:

Kamilah raja tuan di sini  
Harta pun kami tuan yang punya  
Orang yang duduk di bumi ini  
Mendengar kami gentar semuanya.

Bukalah pintu kami titahkan  
Nabi Sulaiman empunya perintah  
Jangan sekali kamu ingkarkan  
Derhaka kamu jika dibantah.

(Za'ba 1962, 234)

*Marilah Tuan*

Marilah tuan marilah bestari  
Kita berjabat tangan bersatu  
Walaupun tuan menarik diri  
Fikiran beta bukan begitu.

Terangkan tuan kerana saya  
Adakah duka melawat tuan  
Hinggakan tuan tidak menyapa  
Tuan reda hilang mengawan.

Jangan tuan jangan begitu  
Jangan turutkan kekerasan hati  
Adakah dosaku telah bertemu  
Padamu tuan rakan sejati.

Kiranya ada wahai saudara  
Tidakkah boleh belas kasihan  
Hamburkan pada kawanmu dura  
Ampun maaf jangan ditahan.

(Hassan Ahmad 1964, 82 – 83)

Dalam dua contoh di atas terdapat kelainan rima iaitu dalam bentuk a-b-a-b seperti pantun; hanya berbeza dengan pantun ialah kerana tiadanya pembayang maksud, hingga seluruhnya merupakan satu idea yang berurutan. Contoh kedua terdapat dalam jarak waktu

yang jauh terkemudian daripada syair-syair lain yang umum. Ertinya, telah ada pengaruh penciptaan moden dalam perkembangan puisi Melayu. Bentuk-bentuk yang demikian banyak sekali terdapat dalam peringkat awal perkembangan puisi moden, misalnya dalam sajak-sajak oleh Pujangga Baru di Indonesia dan penulis-penulis di Malaysia dalam zaman permulaan; misalnya dalam contoh di bawah:

Waktu senja burung terbang  
 Waktu dinda bersedih cinta  
 Hancur dan lebur di kalbu abang  
 Sedihkan adik panah dewata.

Waktu dinihari malam yang sunyi  
 Waktu kanak-kanak kehilangan ibu  
 Abang meratap pelbagai bunyi  
 Merindukan adik bernyala di kalbu.

Waktu subuh menysingsing di angkasa  
 Waktu tabuh bersahut-sahutan  
 Abang bermimpi pelbagai rasa  
 Adik disangka hanyut di lautan.

Waktu kabut menyambut siang  
 Waktu makhluk bangun bekerja  
 Abang terlalai waktu sembahyang  
 Asyikkan adik intan durja.

(Rosmera 1965, 49)

##### 5. Syair empat baris dengan rima a-a-b-b:

###### *Di Mana Kesenangan*

Di waktu petang hampirlah malam  
 Deretan gunung tinggi berbalam  
 Sang suria bersinar diri  
 Di tabir langit yang biru seri.

Ombak menderam di tengah segara  
 Air gelombang bagai gelora  
 Di tepi pantai yang putih safra  
 Di sanalah ombak datang menerpa.

Di laut yang dura aku melara  
Perahuku kecil duduk terpencil  
Seorang diri sedang melari  
Cinta terpangkah di manakah tempatku singgah.

Allah selamatkan aku yang lara  
Kerana terpaksa hidup sengsara  
Siang berpanas malam berembun  
Bilakah masanya cintaku rimbun.

Aku belseyari lihat pedoman  
Tidak bersaudara tidak berpaman  
Tatkala ribut datang menerpa  
Diriku sedikit tak boleh alpa.

Kupohonkan pada Ilahi  
Barang kasadku rahim limpahi  
Sampaikan aku ke karang cinta  
Di sanalah tempat berduakacita.

(Hassan Ahmad 1964, 65–66)

Contoh di atas memang dipengaruhi oleh kesedaran terhadap perkembangan puisi moden, khususnya dalam peringkat awal; misalnya bentuk di atas dikatakan sebagai sajak moden dalam peringkat permulaan, atau pantun yang telah mula diubah untuk tujuan pembaharuan. Namun dari segi strukturnya, jumlah baris dan jumlah kata, tetap seperti syair yang biasa, kecuali pada baris akhir rangkap ketiga, mengandungi lima kata dasar; hal ini dapat dianggap sebagai kekecualian.

6. Syair empat baris dengan skema rima a-a-a-b, c-c-c-b, d-d-d-b dan seterusnya:

Wahai Ramadan syahar berpangkat  
Tuan ke mana lenyap berangkat?  
Dukanya kami tidak tersukat  
Hendak mengikut tidak berdaya.

Sekali setahun tuan termegah  
Menjelang kami sebulan singgah  
Kita bercengkerama belum semenggah  
Tuan pun lenyap dari dunia.

Belumlah puas wajah ditentang  
 Dzauk membujur aradh melintang  
 Kami tertinggal golek gelantang  
 Tuan beredar apakan daya?

Nampaknya tuan selaku rintang  
 Menguliti kami bagai dipantang  
 Sempatkah kelak balik bertentang  
 Denganmu tuan usul belia?

(Za'ba 1962, 234–235)

7. Syair empat baris dengan skema rima a-a-a-b, c-c-c-d, e-e-f dan seterusnya:

Kalau kita ditanya orang:  
 Kemudi manusia apakah gerang?  
 Berilah jawab dengannya terang:  
 Akal, akal, akal, akal.

Kalau kita lagi ditanya:  
 Haluan manusia apa dianya?  
 Berilah jawab yang sempurna:  
 Hati, hati, hati, hati.

Kalau kita ditanya pula:  
 Perahu manusia nyatakan sila  
 Terangkan dengan berhati rela:  
 Ilmu yang sihat, ilmu yang sihat.

Kalau kita ditanya rakan  
 Laut manusia minta terangkan  
 Dengan segera jawab nyatakan:  
 Kehidupan, kehidupan, kehidupan.

Kalau kita disuruh sebut:  
 Antara itu manakah ribut?  
 Jawablah itu suruhlah sambut:  
 Nafsu, nafsu, nafsu, nafsu.

Kalau kita ditanya kawan:  
 Pancang manusia apakah tuan?  
 Jawablah jangan berhati rawan:  
 Iman, iman, iman, iman.

(Za'ba 1962, 107–108)

8. Syair empat baris serima (*monorhyme*):

Dengan kudrat Rabbi'l-buruji  
Melayangkan poskad syair pembaji  
Dari Seremban bandar terpuji  
Membawa Selamat Hari Raya Haji.

Setelah ditatap dikaji-kaji  
Didapati loklok mutu beruji  
Dengan ikatan kasih tersaji  
Diberilah pula balas beruji.

Barang kiranya Sang Yang Aji  
Tuhan yang tidak memungkirkir janji  
Mencurahkan rahmat ke atas yang rajai  
Pengirim yang mulia lagi khawaji.

Kiranya ada di hati terbiji  
Khilaf yang bebal kata yang keji  
Rasa yang masam bagai keranji  
Maaf hapuskan jangan setinji.

Kemudian selamatlah pulang ke Ting-ji  
Berjumpa tuk bilal di masjid 'Linji'  
Bertakbir jangan berasyik renji  
Halwa pengangan sama dipinji.

(Za'ba 1962, 235)

*Kebajikan*

('Yang harus diingatkan')

Kalau berkata akulah raja  
Enggan mengelak sebarang kerja  
Baktiku tidak bermuram durja  
Andai diriku seorang yang manja.

Jemaahku kertas dakwat jereja  
Inilah minyak timbalan seraja  
Ketiganya teratur di atas meja  
Agar mengaku tahanlah uja.

Nujum nan kami baginya baja  
Bertenung tilik pustaka dipuja

Insan yang belum sempurna remaja  
Nurnya menerusi di kelam senja.

Tatkala 'Bintang Timur' telah ditaja

Akan menjadi kolam seroa

Nuri, bayan, dan sebah raja

Gagak, tiong, di sana melenja.

Taman penghibur senteri khoja

Iram, lapang dari kerja

Murah bayaran tak banyak belanja

Orang hartawan tak sampai seraja.

Rencana warta Sultan Maharaja

Kepada budiman menjadikan baja

Enyahlah sia-sia tandak dan kinja

Perisai kecelaan nama terjaja.

Akan pangkal terpalu juga

Demi kebesaran segala raja

Akhbar nan laksana gemala sentaja

Orang tak suka tentulah sengaja.

Rempanai berakar pohon teja

Akar daunnya bukannya ganja

Narwastu harum tempat bermanja

Gemala memimpin kebijakan kerja.

(Hassan Ahmad 1964, 21)

#### 9. Syair empat baris dalam bentuk berkait:

##### *Ikat-ikatan Dua Belas Puji*

Tempat dakwat perak yang khalis

Kurnia gubernemen raja bangsawan

Patut dipakai di tengah majlis

Menjadikan sedap di mata tuan-tuan.

Kurnia gubernemen raja bangsawan

Kepada seorang fakir maulana

Menjadikan sedap di mata tuan-tuan

Sebab perbuatan terlalu kena.

PUISI MELAYU TRADISIONAL

Kepada seorang fakir maulana  
Diam di Penyengat di Kota Lama  
Sebab perbuatan terlalu kena  
Patut dijadikan zaman dan nama.

Diam di Penyengat di Kota Lama  
Tarikh dal-'ain-ra-ghain tahun Islami  
Patut dijadikan zaman dan nama  
Kurnia raja memuliakan kami.

Tarikh dal-'ain-ra-ghain tahun Islami  
Zulkaedah nama bulannya  
Kurnia raja memuliakan kami  
Patutlah dimasyurkan akan namanya.

Zulkaedah konon nama bulannya  
Menerima dia di balairung seri  
Patutlah dimasyurkan akan namanya  
Raja yang murah lagi jauhari.

Menerima dia di balairung seri  
Hari Sabtu pukul sembilan  
Raja yang murah lagi jauhari  
Itulah raja bangsa Nederland.

(Mohd. Taib Osman 1975b, 166–167)

*Syair Maulud*

Adalah zaman dahulukala  
Masa ada junjungan kita  
Seorang hamba Allah meninggal dunia  
Sudah dimandi dikafankan pula.

Sudah dimandi dikafankan dia  
Minta disembahyangkan Nabi kita  
Maka berkata junjungan kita  
Tidak boleh disembahyangkan dia.

Maka berkata Nabi kita  
Tidak boleh disembahyangkan dia  
Kerana dia ada meninggalkan hutangnya  
Dibayar dahulu baru disembahyangkan dia.

Begitu juga membuat rumah  
 Habis duit sekalian punah  
 Wang banyak bersepah-sepah  
 Hati di dalam bertambah susah.

Membeli pakaian beberapa suka  
 Begitu juga perhiasan rumahnya  
 Mauluddun Nabi sudah sampai masa  
 Di situlah mengatakan duit tak ada.

Mauluddun Nabi sudah sampai masa  
 Di situlah mengatakan duit tak ada  
 Itulah orang yang sangat celaka  
 Di dalam neraka tahlulah dia.

(Lebai Sani bin Bidin, Selangor 1978)

Teknik berkait dalam "Syair Maulud" di atas memperlihatkan keadaan yang tidak tekal, dibandingkan dengan "Ikat-ikatan Dua Belas Puji" karangan Raja Ali Haji. Dengan perkataan lain syair yang kedua itu tidak mengikut aturan berkait yang betul. Ini ialah kerana syair itu ditutur atau dinyanyikan lebih banyak berdasarkan ingatan penuturnya yang mungkin mengingat daripada sebuah karangan yang tidak betul pula. Walau bagaimanapun syair tersebut masih dalam bentuk dan struktur syair yang baik.

Daripada contoh-contoh yang dikemukakan itu, dapat dihamarkan bahawa ada sekurang-kurangnya sembilan variasi bentuk dalam syair Melayu; ertiinya tidak terhad kepada satu bentuk sahaja seperti anggapan umum iaitu seperti bentuk (3) di atas. Hal ini juga dapat memperlihatkan adanya usaha dan kebolehan mencipta di kalangan penyair tersebut dalam zaman yang berkenaan. Dan hasil daripada usaha itu dapat dirasakan bahawa dengan variasi demikian telah berjaya memberikan kepelbagaiuan kepada syair di samping menjadikannya lebih indah dan berkesan. Namun begitu pada praktiknya penyair-penyaier lebih senang kepada bentuk yang lebih bebas, terutamanya bagi syair-syair naratif yang memerlukan rangkap yang banyak jumlahnya dan dalam jalinan fikiran yang berurutan. Justeru itu syair empat baris dengan rima a-a-a-a lebih luas digunakan; bentuk ini memberikan kebebasan kepada pencerita kerana setiap rangkap tidak terikat kepada yang lainnya.

Sepertimana pantun, teknik berkait juga tidak begitu praktik dalam syair. Baris-baris a-c yang diulang dalam rangkap-rangkap berikutnya tidak membantu penggunaan ekonomi kata, sebaliknya menghalang jalinan fikiran yang lancar yang diperlukan semasa menuturkan syair itu dalam konteks fungsi dan peranannya dalam masyarakat. Dengan yang demikian bentuk-bentuk berkait dan beberapa yang lainnya, lebih kerap didapati dalam syair-syair yang ringkas, membicarakan sesuatu topik. Dalam fungsi-fungsi ini variasi dan kepelbagaiannya bentuk itu menjadi lebih indah dan lebih umum digunakan.

### Tema dan Isi

Dalam bahagian ini dibincangkan tentang isi dan tema syair-syair Melayu dengan maksud melihat sepintas lalu bidang yang dilingkupinya dan bagaimana luas pemakaianya dalam kesusastraan dan kehidupan masyarakat Melayu. Sebagaimana dengan pantun yang dibicarakan dalam bab yang lalu, pendekatan ini pun tidak dapat dianggap sebagai penjenisan atau klasifikasi; tetapi ialah isi dan kandungan yang umum dalam syair-syair itu. Bahan yang digunakan dalam tinjauan ini ialah sejumlah kira-kira 150 judul syair yang boleh didapati keterangannya melalui katalog-katalog dan dokumentasi-dokumentasi lain mengenai manuskrip-manuskrip Melayu baik di dalam maupun di luar negeri. Di samping itu, pertimbangan ini juga mengambil kira daripada sejumlah 50 judul yang dikumpulkan daripada bahan-bahan lisan berbentuk rakaman dan catatan yang telah didapati oleh penulis setakat ini. Daripada jumlah 200 judul ini sebahagian besar daripadanya merupakan cerita-cerita yang panjang dan lengkap mengenai sesuatu watak, peristiwa atau persoalan. Sementara yang lain merupakan topik-topik yang berasingan menceritakan sesuatu watak, peristiwa atau persoalan. C. Hooykaas dan Liaw Yock Fang masing-masing membahagikan isi syair Melayu kepada enam golongan. Syair panji, syair romantis, syair kiasan, syair sejarah dan syair-syair yang tidak dapat digolongkan. Bagaimanapun Liaw Yock Fang dalam pembicaraannya memasukkan syair saduran sebagai suatu jenis, tetapi tidak pula menyentuh apa yang digolongkannya sebagai "syair-syair yang tidak dapat digolongkan" itu. Untuk memudahkan tinjauan ini sengaja

dibahagikan tema atau isi syair-syair Melayu itu ke dalam tujuh bahagian yang besar:

1. Yang berupa cerita (*narratives*):
  - a. Cerita-cerita romantis
  - b. Cerita-cerita sejarah
  - c. Cerita-cerita keagamaan
  - d. Cerita-cerita kiasan.
2. Yang bukan cerita (*non-narratives*):
  - e. Agama
  - f. Nasihat
  - g. Tema-tema lain yang berasingan.

#### *Syair yang berupa cerita*

##### Cerita-cerita romantis

Daripada jumlah 150 judul yang disenaraikan, tidak kurang dari pada 70 (47 peratus) tergolong ke dalam kategori ini. Dari segi jenisnya, cerita-cerita itu digolongkan sebagai cerita-cerita romantis (*romances*) yang sama atau hampir sama dengan cerita-cerita rakyat, penglipur lara, hikayat atau epik dalam karangan-karangan prosa. Tema cerita-cerita ini pada umumnya berpusat pada suatu watak, biasanya daripada putera-puteri raja yang memerintah. Sebagaimana dalam cerita-cerita hikayat, watak tersebut akan menempuh pelbagai peristiwa, percintaan, peperangan, pengembalaan, dengki dan khianat atau malapetaka alam. Dengan bantuan sesuatu kuasa yang luar biasa – daripada makhluk atau daripada Tuhan – watak itu akhirnya berjaya menyelesaikan masalah yang dihadapinya dan seterusnya mendapatkan sesuatu yang wajar untuknya: kekasih dan takhta kerajaan.

Antara judul-judul yang terpenting dalam golongan ini termasuk beberapa buah syair dan cerita-cerita Panji seperti *Ken Tambuhan*, *Undakan Agung Udaya*, *Panji Semerang*, *Angreni*, *Jaran Temasa* dan lain-lain. Sementara cerita-cerita romantis yang lain termasuk *Bidasari*, *Damar Wulan*, *Puteri Handalan*, *Dandan Setia*, *Puteri Bunga Kamar*, *Siti Zubaidah*, *Si Lindung Delima*, *Ratu Juwita*, *Batu Belah Batu Bertangkup*, *Kumbang Mengindera* dan beberapa yang lain.

Secara keseluruhan, tema cerita dalam syair-syair Panji sama saja dengan hikayat-hikayat Panji lainnya, iaitu mengisahkan percintaan Raden Inu, Putera Kuripan, dengan kekasihnya, Raden Galuh Cenderakirana, Puteri Kediri. Kedua-duanya telah ditunangkan sejak kecil, tetapi dengan kehendak para dewa, kedua-duanya berpisah, masing-masing mengembara dan menemui pelbagai percubaan hingga akhirnya bertemu, berkahwin dan hidup bahagia.

*Syair Bidasari* yang tidak tergolong sebagai cerita Panji, mengisahkan penderitaan seorang puteri raja, ditinggalkan oleh ayah dan bondanya yang melarikan diri daripada serangan geroda. Ia ditemui oleh seorang saudagar, tetapi kerana kecantikannya, menimbulkan cemburu daripada permaisuri raja di negeri itu. Untuk menghindarkan daripada bahaya itu, Bidasari lalu ditempatkan di dalam rimba, untuk kemudiannya ditemui oleh seorang putera raja yang mengahwininya dan menyelamatkannya daripada malapetaka. Dengan usaha saudara lelakinya, Bidasari dapat bertemu semula dengan ayah dan bondanya.

*Syair Cinta Berahi* mengisahkan seorang puteri yang menjadi salah seorang daripada isteri-isteri raja. Seorang raja lain jatuh cinta kepadanya dengan menyamar diri dapat bersahabat dengan raja lalu bercumbu-cumbuan dengan sang puteri. Raja murka, tetapi bersedia memberikan isterinya itu jika wira dapat mengatasi percubaan-percubaan yang akan dihadapkan kepadanya. Namun, selepas wira berjaya, raja masih tidak berpuas hati, sebaliknya mengaturkan supaya wira dibunuh. Dengan kematian wira, sang puteri membunuh diri. Seluruh negara berduka cita dan raja juga mangkat kerana terlalu berduka cita.

Ringkasnya, cerita-cerita dalam golongan ini berkisar di sekitar wira dan wirawati yang terdiri daripada putera-puteri raja. Kedua-duanya bertemu dan bercinta tetapi harus menempuh pelbagai halangan; dan setelah berjaya, keduanya hidup dalam bahagia; dan kalau gagal mungkin keduanya mati untuk bertemu semula di alam yang lain.

Bentuk syair dalam golongan ini merupakan bentuk yang tipikal dan hampir sama antara sebuah cerita dengan yang lain. Perhatikan contoh di bawah yang dipetik daripada *Syair Angreni*,

mengisahkan kematian Angreni yang dibunuh atas perintah Sang Nata, Ratu Kuripan:

Angreni mengeluh seraya berkata  
Sambil menyapu air mata  
"Jangan tuanku sangat bercinta  
Ketika inilah perceraian kita".

Lalu dibuka dada sendiri  
Katanya "Tinggi sudahlah hari  
Pilihlah jalan yang dicari  
Kerjakan titah Ratu bestari".

Raden memandang kedayannya  
Kebo Tadas nama gelarnya  
Itu pun tahu pandang tuannya  
Lalu ia mencabut kerisnya.

Kebo Tadas hatinya bimbang  
Sebelah kanan keris dipegang  
Keris sempena matanya panjang  
Ditikam dada terus ke belakang.

Angreni rebah dengan perlahan  
Di bawah angsana kelisiran  
"Aduh Tuanku Seri Pengerahan  
Mati tak berdosa patik nan tuan".

(Harun Mat Piah 1977, 42–50)

#### Cerita-cerita Sejarah

Syair-syair dalam golongan ini juga bersifat cerita, tetapi pada umumnya berkisar pada suatu peristiwa dan peristiwa inilah yang menjadi persoalan dan seterusnya judul kepada cerita itu. Seharusnya pula dalam menceritakan sesuatu peristiwa akan melibatkan juga penceritaan tentang watak, tempat, negeri atau kota di mana peristiwa itu berlaku. Biasanya dalam cerita-cerita sejarah terdapat lebih banyak watak yang dikemukakan, selain daripada watak-watak utama. Secara umum cerita-cerita dalam golongan ini hampir sama dengan genre cerita-cerita sejarah (*chronicles*) dalam bentuk prosa. Suatu perkara yang agak menarik ialah penumpuan yang banyak terhadap peristiwa peperangan di sesuatu tempat; dan di sini

penceritaannya lebih terperinci dengan pelbagai watak yang terlibat dalam peristiwa-peristiwa itu.

Daripada jumlah 150 judul dalam senarai yang dikumpulkan, terdapat 38 (25 peratus) yang tergolong ke dalam kategori ini. Antaranya yang terpenting termasuk *Syair Perang Mengkasar*, *Perang Banjarmasin*, *Perang Johor*, *Perang Perak*, *Perang Turki dan Rusia*, *Pelayaran Sultan Iskandar*, *Bah Singapura*, *Singapura Terbakar* dan lain-lain, iaitu cerita-cerita yang berpusat pada sesuatu peristiwa. Syair-syair seperti *Syair Raja Siak*, *Sultan Abu Bakar*, *Sultan Mansur*, *Sultan Maulana*, *Residen de Brauw*, *Schouw Santvoort*, memusatkan cerita pada sesuatu watak, sementara *Syair Moko-Moko*, *Syair Bangkahulu* dan lain-lain sepertinya berkisar pada sesuatu tempat.

Pada umumnya dapat dikatakan cerita-cerita sejarah yang dikemukakan dalam syair-syair ini berdasarkan peristiwa yang benar-benar berlaku, tempat-tempat dan watak-watak yang pernah wujud, hidup dan dikenali dalam sejarah Nusantara. Di dalamnya agak kurang unsur-unsur mitos yang menonjolkan kesaktian atau keadaan-keadaan yang luar biasa seperti yang terdapat dalam setengah-setengah prosa sejarah.

Tema cerita-cerita ini dapat difahamkan daripada judulnya; misalnya *Syair Perang Mengkasar* (terkarang dalam tahun 1670), menceritakan peperangan yang benar-benar berlaku antara orang-orang Mengkasar dengan Kompeni Belanda, antara tahun-tahun 1669–1671. Cyril Skinner yang mengkaji syair ini telah berjaya menunjukkan dengan tepatnya peristiwa-peristiwa yang diceritakan dalam syair ini dengan yang tercatat dalam *Dag Regiter* orang-orang Belanda di Betawi (Skinner 1963, 1–46), serta karya-karya sejarah lain yang telah diterbitkan. Sebahagian daripada syair tersebut berbunyi demikian:

Welanda sampai ke Bantaeng  
Belayarlah kapal si kuffar anjing  
Mengadirkan senjata pedang dan lembing  
Setinggar rentaka meriam berkancing.

Terlalu ramai serunai dan genderang  
Senjata dan sunderik lembing dan pedang  
Setinggar pun hadir sepucuk seorang  
Ingaunya sangat bukan kepalang.

Sikap lakunya seperti helang  
Bertikamkan keris, lembing dan pedang  
Hatinya tetap bukan kepalang  
Sedikit pun tidak menaruh mamang.

Bercakaplah ia terlalu ingat  
Kerana si Buton berani sangat  
Tambahna Welanda kafir laknat  
Istimewa Buton yang mengkhianat.

Tiadalah fakir berbanyak kata  
Gharib tak muhu berbuat dusta  
Kerana tewas perangnya kita  
Dapatlah benteng di mata-mata.

(Skinner 1963, 128–132)

Sebuah lagi syair perang yang masyhur ialah *Syair Himop* atau *Syair Kompeni Welanda Berperang dengan Cina*. Syair ini mengisahkan dengan terperinci peperangan Belanda dengan orang-orang Cina di Betawi dalam tahun 1740. Himop ialah Van Imhoff, Gabenor Jeneral Belanda yang mengelapai peperangan itu. Dan sepetimana *Syair Perang Mengkasar*, syair ini pun mencuba menggambarkan peristiwa-peristiwa yang sebenarnya berlaku; tetapi oleh kerana syair ini sebahagian besarnya ditulis berdasarkan ingatan dan pengetahuan penulisnya, tentu saja terdapat pelukisan-pelukisan yang kurang tepat atau mungkin tidak dapat diterima daripada ukuran sejarah yang kita kenali sekarang. Sebahagian daripada *Syair Himop* berbunyi demikian:

Indelir Himop sangatlah murka  
Merah padam warnanya muka  
Tutup timah segera dibuka  
Sekalian meriam di atas kota.

Konetabel mayor mengerti  
Segenap meriam orang berdiri  
Ubat peluru banyak diberi  
Perintah juga lagi dinanti.

Idelir Himop berkata manis  
Kepada mayor wakilnya habis

'Dipasang sudah sekalian baris  
Ganti-gantikan yang tiga lapis'.

Titah perintah sudah diberi  
Segala kutipan bangkit di kerusi  
Mayor berjalan berpayung tinggi  
Berkinjang di atas kerusi berdiri.

(Hooykaas 1965, 474)

### Cerita-cerita Keagamaan

Tergolong ke dalam kategori ini ialah syair-syair yang bersifat cerita (naratif) mengenai sesuatu watak atau peristiwa yang ada hubungannya dengan agama Islam. Kebanyakan tokoh yang diceritakan pernah wujud dalam sejarah Islam; tetapi dalam perkembangannya yang panjang telah ditokok tambah dengan unsur-unsur dongeng dan mitos dari Parsi, India dan Nusantara. Sepertimana yang terdapat dalam bentuk prosanya, cerita-cerita syair ini juga bertujuan menyampaikan pengajaran agama, menunjukkan keistimewaan watak-watak yang terkenal dalam sejarah Islam dan seterusnya kelebihan dan keagungan agama Islam. Antara syair-syair yang tergolong ke dalam kategori ini termasuk yang mengenai Nabi-nabi; antaranya *Syair Nur Muhammad*, *Syair Nabi Allah Adam*, *Syair Nabi Allah Ibrahim*, *Syair Nabi Allah Yusuf*, *Syair Anbia*, *Syair Adham*, *Syair Abdassaman* dan lain-lain.

*Syair Nabi Allah Yusuf* menceritakan dengan terperinci kisah hidup Nabi Yusuf, daripada sejak kecilnya, zaman kanak-kanaknya, seksa yang diterimanya daripada orang-orang yang menganiayainya, pemilihan Tuhan menjadikannya Nabi, kisahnya dengan saudara-saudaranya, dengan kekasihnya, Zaleha dan kisah-kisah lain yang menunjukkan kelebihihannya sebagai Nabi dan keimanannya kepada Allah. Sedikit daripadanya berbunyi demikian:

Firman Tuhan azzawajalla  
"Hai malaikatku semua segala  
Ini seorang Nabi a'la  
Lagipun anak anbiaku pula.

Sesungguhnya telah meminta ia  
Pertolongan aku Tuhan yang kaya  
Tentulah aku menolongi dia  
Tiap-tiap permintaan tiada sia-sia.

Hai Jibril pergilah dapat  
Kepada pesuruhku yang baik sifat  
Jibril pun turun bersegera cepat  
Kepada Yusuf hampir dan rapat.

Berkata Jibril alaihis-salam  
"Tuhan engkau berkirim salam  
Bagimu firman Khaliqul-alam  
Nanti sedikit wahai pualam."

Telah menangis malaikat segala  
Isi langit tujuh petala  
Tatkala permintaan kamu menghalau  
Kepada Tuhanmu azzawajalla.

Adakah kiranya engkau kehendakkan  
Langit dan bumi aku balikkan?  
"Tiada kehendakku", Yusuf jawabkan  
"Lemah-lembut engkau kerjakan".

(Syair Nabi Allah Yusuf atau  
Kejayaan Taat, tp, tt 48-49)

### Syair-syair Kiasan atau Alegori

Syair-syair alegori ialah cerita-cerita yang disampaikan dalam bentuk perlambangan atau kiasan. Di sini watak-watak manusia digantikan oleh watak-watak binatang dan tumbuh-tumbuhan dengan maksud melindungkan watak-watak dan peristiwa-peristiwa yang sebenarnya. Umumnya peristiwa-peristiwa itu berlaku di kalangan bangsawan dan orang-orang atasan yang berkuasa; hingga, jika diceritakan dengan terus terang mungkin akan membahayakan pencerita atau penulisnya. Sebahagian besar daripada cerita-cerita ini bertemakan kegagalan cinta antara orang-orang yang berlainan status, antara golongan bangsawan, saudagar kaya dan orang-orang atasan dengan golongan bawahan yang miskin dan tidak berdaya.

Hans Overbeck dalam satu kajiannya mengenai syair-syair ini, mengatakan bahawa syair jenis ini adalah ciptaan masyarakat Melayu, tidak ditiru atau disadur dari Arab, India atau Parsi seperti yang pernah dikemukakan oleh Chauvin dan Van Ronkel. Dalam

kajian itu juga Overbeck membahagikan tema syair-syair golongan ini ke dalam lima bahagian:

- i. Peristiwa negara (*an affair of state*), misalnya *Syair Ikan Terubuk Berahikan Puyu-puyu*.
- ii. Percintaan antara pasangan daripada golongan atasan (*love in higher circles*), misalnya *Syair Burung Pungguk*, *Syair Nuri*, *Syair Kumbang dan Melati*.
- iii. Percintaan di kalangan saudagar (*the amours of the travelling merchant*); misalnya *Syair Ikan Tembera*, *Syair Cinta Berahi*, *Paksi Dewata*, *Syair Bunga Air Mawar*, *Syair Nyamuk dan Lalat*.
- iv. Syair Deduktik, misalnya *Syair Unggas* atau *Syair Burung*, *Syair Bayan Budiman*.
- v. Syair-syair Melayu yang berasal dari Jawa; misalnya *Syair Buah-buahan*, *Syair Sang Kupu-kupu dengan Kembang dan Balang*, *Syair Bunga Melur Cempaka Gading*, *Syair Pelanduk Jenaka*, *Syair Kumkuma*, *Syair Ikan Baharu*, *Syair Jentayu* dan *Syair Tawon*.

Bagaimanapun, pada pendapat penulis, pembahagian demikian tidak begitu penting dan mungkin tidak meyakinkan. Cerita yang di-golongkan sebagai peristiwa negara juga merupakan percintaan dalam golongan atasan yang umumnya berakhir dengan kegagalan, samalah juga dengan yang diceritakan dalam golongan-golongan (ii) dan (iii). Untuk golongan (v) tidak begitu dapat dipastikan asal usul syair-syair jenis ini, apakah dari Jawa atau dari daerah lain di Nusantara. Demikian pula cerita-cerita dalam kebanyakan syair dan dalam genre prosa adalah juga bersifat deduktif; jadi tidak saja terbatas pada dua buah syair yang disebutkan. Pada umumnya *Syair Unggas* dan *Syair Bayan Budiman* mengandungi juga unsur-unsur yang lain, di samping bersifat deduktif; demikian pula syair-syair yang lain dalam kategori yang sama.

Kerana itu secara umum dapat dikatakan syair-syair kiasan atau alegori adalah menceritakan kisah percintaan antara golongan bangsawan dengan golongan bawahan dan cinta itu gagal lantaran

status yang berlainan itu. Peristiwa seperti ini memang umum berlaku dalam kalangan masyarakat Melayu yang mempunyai sistem stratifikasi yang menonjolkan perbezaan status yang signifikan antara golongan atasan dan golongan bawahan. *Syair Burung Pungguk* (Raja Iskandar 1964) misalnya, jelas sekali menggambarkan keadaan ini. Pungguk sebagai watak pemuda keluaran mencintai Bulan, seorang gadis bangsawan. Bulan telah bertunangan dengan Geroda dan sesudah kahwin dibawa suaminya ke Tanah Seberang, tetapi Pungguk terus mengharap untuk dapat bertemu Bulan. Akhirnya kedua-duanya dapat bertemu mesra dengan bantuan sahabat-sahabat mereka; namun pertemuan itu diketahui oleh Geroda dan Rajawali, bapa Bulan; kedua-duanya dengan mudah dapat menewaskan dan membunuh Pungguk.

*Syair Ikan Terubuk Berahikan Puyu-puyu* menggunakan ikan-ikan sebagai pelaku. Ikan terubuk yang berkuasa di Laut Melaka mencintai ikan puyu-puyu yang hidup di sebuah kolam di hulu sungai dekat Tanjung Pinang. Hal ini membimbangkan ikan-ikan darat yang lain kerana mungkin ikan terubuk akan memusnahkan mereka jika lamaran itu ditolak. Puyu-puyu menolak lamaran itu kerana berlainan bangsa dan adat resam. Dengan pertolongan nenek moyang mereka, Puyu-puyu dan orangnya dapat berpindah dari kolam tersebut, dan apabila terubuk mengetahui hal itu ia pun membawa dirinya dengan rasa hampa dan kecewa.

Bahagian akhir daripada syair itu berbunyi demikian:

Raja muda yang bijaksana  
Duduk bertakhta di dalam istana  
Hati di dalam gundah-gulana  
Makan tak sedap tidur tak lena.

Ada kepada suatu masa  
Muda bermain suka temasya  
Terpandang kepada ikan Gelasa  
Bersahabatlah Muda guna biasa.

Itu pun tidak hatinya lupa  
Akan puteri muda yang sofa  
“Hatiku ini tuan pengapa  
Seperti bumi digerak gempa”.

Duduklah baginda di tempatnya sedia  
Hilanglah budi loput upaya  
Dihiburkan dengan ikan raya  
Leka bergaul bersuka ria.

Demikianlah konon ceritanya  
Pulang Terubuk kepada tempatnya  
Dengan segala anak isterinya  
Kembalilah ia dengan khidmatnya.

Tamatlah syair Terubuk merayu  
Dagang menyurat berhati sayu  
Tidaklah dapat puteri Puyu-puyu  
Ke mana naik ke puncak kayu.

(Antologi Syair Simbolik...:tt  
hlm 166)

Menurut Hooykaas, syair ini merupakan sindiran terhadap suatu kisah yang sebenarnya berlaku antara seorang anak raja Melaka dengan seorang puteri Siak. Penulisnya ingin menurunkan cerita ini untuk melepaskan perasaan yang dirasakannya terhadap kejadian itu dan yang dapat pula dijadikan teladan oleh masyarakatnya; tetapi tidak dapat menyatakannya dengan terus terang kerana takut akan menghadapi tindakan yang mungkin diambil oleh pihak-pihak yang berkenaan. (Hooykaas 1965, 75–76).

Selain daripada bertemakan cinta yang gagal dan perbezaan status sosial masyarakat, syair-syair ini juga bersifat deduktif, iaitu dengan maksud menyampaikan pengajaran kepada pembaca. *Syair Burung* atau *Syair Unggas* dan *Syair Burung Budiman* mengambil watak-watak dari alam burung-burung. Burung-burung itu berhujah dan bertindak seperti manusia dalam membincangkan pengajaran agama Islam. Di sini masyarakat burung menggambarkan masyarakat manusia yang mengandungi pelbagai golongan, yang beribadat dan taat kepada Tuhan dan yang jahil, yang tidak mengendahkan ajaran agama.

#### *Syair-syair Bukan Cerita*

Dalam golongan ini syair-syair tidak seluruhnya berbentuk cerita sepertimana dalam golongan pertama. Kebanyakan syair bukan cerita merupakan keterangan-keterangan yang terperinci mengenai

sesuatu aspek, dengan maksud menyampaikan pengajaran, yang sebahagian besar daripadanya merupakan hukum-hukum agama Islam, meliputi ilmu-ilmu fikah, tauhid, tasawuf, usul, falsafah dan lain-lain. Selain itu terdapat juga pengajaran dan nasihat untuk hidup bermasyarakat, khususnya berdasarkan nilai-nilai agama. Bagaimanapun tidak jarang pula kita temui dalam kedua-dua jenis itu – syair nasihat dan syair agama – cerita-cerita pendek atau panjang dengan tujuan memberikan contoh yang sesuai dengan persoalan yang dikemukakan. Di bawah ini dibincangkan dengan ringkas beberapa judul yang penting dalam kategori ini.

### *Syair-syair Agama*

Daripada jumlah 150 judul yang disenaraikan, 30 (20 peratus) daripadanya merupakan pengajaran agama. Dengan meneliti judul-judulnya sepantas lalu dapat dikatakan hampir keseluruhan aspek agama Islam telah disentuh dan dibicarakan dalam bentuk syair. *Syair Ibadat*, *Syair al-Salat*, *Syair Rukun Nikah*, *Syair Mekah atau Haj* merupakan pengajaran tentang ibadat; *Syair Alam Tasawuf*, *Syair Makrifat Allah*, *Syair Sifat Dua Puluh* dan lain-lain memberikan pengajaran tentang mengenal dan mendekatkan diri dengan Tuhan; sementara *Syair Kiamat*, *Syair Neraka* dan *Syair Cetera di Dalam Kubur* mengingatkan umat Islam tentang akhirat, azab yang ditempuh di dalam kubur dan di dalam neraka sebagai balasan kepada orang-orang yang meninggalkan ibadat dan mengerjakan maksiat. Dalam aspek pengajaran yang lebih umum kita temui judul-judul seperti *Syar Islam*, *Syair Injil*, *Syair Cermin Islam*, *Syair Orang Berbuat Amal* dan beberapa yang lain.

Tema dan isi yang digarap dalam syair-syair ini, seperti yang dapat difahamkan daripada judul-judulnya, seluruhnya membicarakan kepentingan ibadat manusia sebagai tugasnya kepada yang menjadikannya; dan tugas ini meliputi dari memelihara turut kata, tindak laku, iman dan perasaan sebagai seorang Islam hingga kepada mengagungkan-Nya, mengenal-Nya, mencintai-Nya dan seterusnya mendekatkan diri kepada-Nya.

*Syair Ibadat* dan *Syair al-Salat* misalnya menerangkan pentingnya beribadat, mengerjakan sembahyang, syarat dan rukunnya serta amalan-amalan yang sunat dan harusnya. Di samping itu disebutkan juga dengan ringkas tentang sifat dua puluh, dengan pengertian dan

ulasan bagi memahaminya. *Syair Rukun Haji* dan *Syair Mekah dan Madinah* memperincikan kepentingan mengerjakan haji, syarat dan rukunnya, wajib dan sunatnya bersama aturan-aturan lain yang berkenaan untuk panduan dan amalan dalam mengerjakan haji. Demikian dalam *Syair Hukum Tajwid* dibicarakan kaedah dan sistem bunyi bahasa Arab yang penting diketahui dan diikuti dalam membaca *al-Quran*; perhatikan antara isinya sebagai gambaran:

- i. Fasal idgham ma'al ghunnah
- ii. Fasal idgham mithlayn
- iii. Fasal lam jalalah
- iv. Fasal akan ha al-dhamir
- v. Fasal hukum qalqalah
- vi. Fasal hukum madnya.

Kepentingan dan ketinggian mutu penulisan dalam golongan syair-syair ini lebih jelas dapat dilihat dalam karya-karya Hamzah Fansuri, seorang ahli sufi yang agung dalam permulaan abad ke-17 di Aceh. Beberapa buah syairnya yang amat terkenal termasuk *Syair Si Burung Pingai*, *Syair Sidang Fakir*, *Syair Syarab al-Asyikin*, *Syair Dagang* dan *Syair Perahu*. Keseluruhan tema syair-syair Hamzah Fansuri adalah ketuhanan: hubungan manusia dengan dirinya dan dengan manusia lain seterusnya hubungannya dengan Tuhan. Seorang manusia yang sempurna, (insanul kamil), ialah yang telah membersihkan kehidupannya sehingga diterima Tuhaninya. Dan dalam menempuh kehidupan itu, baik di dunia maupun di akhirat, seorang insan akan mengalami pelbagai percubaan dan rintangan. Kerana itu seseorang manusia haruslah mempersiapkan dirinya untuk mengatasi rintangan-rintangan itu hingga mencapai kejayaan.

Dalam *Syair Si Burung Pingai* jiwa manusia dilambangkan sebagai burung, dan jiwa itu perlu dibersihkan untuk mendekatkan diri dengan Tuhan dan seterusnya mencapai ketenteraman di akhirat. Falsafat yang sama terdapat semula dalam *Syair Dagang*, di mana kehidupan manusia dilambangkan sebagai anak dagang di rantau orang, menempuh pelbagai rintangan dan cubaan yang hanya akan selamat dengan bertakwa dan menyerahkan diri kepada Allah. Demikian pula dalam *Syair Perahu*, kehidupan manusia dilambangkan sebagai perahu dalam sebuah lautan yang bergelora; justeru itu

haruslah dilengkapkan sebaik-baiknya:

Wahai muda, kenal dirimu  
Ialah perahu tamsil tubuhmu  
Tiadalah berapa lama hidupmu  
Ke akhirat juga kekal diammu.

Hai muda arif budiman  
Hasilkan kemudi dengan pedoman  
Alat perahumu jua kerjakan  
Itulah jalan membetuli insan.

Perteguh jua alat perahumu  
Hasilkan bekal air dan kayu  
Dayung pengayuh taruh di situ  
Supaya laju perahumu itu.

(Doorenbos 1933, 16)

Dalam menempuh cubaan, hanya Allah yang akan menentukan dan menyelamatkan kehidupan itu jika Ia mengkehendakinya; kerana itu kembalilah kepada Allah dengan mengingat, mengesa dan mengagungkan-Nya:

Lailahaillallah jangan kaulalaikan  
Siang dan malam jangan kausunyikan  
Selama hidup juga engkau pakaikan  
Allah dan Rasul juga yang menyampaikan.

Lailahaillallah itu kata yang teguh  
Memadamkan cahaya sekalian rusuh  
Jin dan syaitan sekalian musuh  
Hendak membawa dia bersungguh-sungguh.

Lailahaillallah itu kesudahan kata  
Tauhid makrifat semata-mata  
hapuskan hendak sekalian perkara  
Hamba dan Tuhan tiada berbeza.

(Doorenbos 1933, 20).

### Syair Nasihat

Syair-syair nasihat juga bertujuan menyampaikan pengajaran kepada anggota-anggota masyarakat; hanya dalam golongan ini

pengajaran itu tidak terbatas kepada persoalan agama seperti dalam golongan syair-syair agama. Di sini mesej yang disampaikan lebih umum, merupakan ingatan dan panduan kepada para pembaca dan pendengar. Antara yang terpenting dalam senarai yang dikumpulkan, termasuk *Syair Nasihat*, *Syair Amanat*, *Syair Pengajaran*, *Syair Kenang-kenangan Yapsai Taman Penghiburan*, *Syair Orang Makan Madat* dan beberapa yang lain.

Nasihat yang disampaikan kepada pembaca melalui syair-syair ini meliputi hampir keseluruhan kegiatan hidup manusia, terutamanya kanak-kanak dan kalangan remaja, mulai dari mentaati perintah ibu bapa, hormat pada orang tua, rajin belajar, berfikir dahulu sebelum berkata dan bertindak, menghormati hak orang lain, menjaga moral dalam pergaulan terutama antara kaum yang berlainan (lelaki-perempuan), taat beragama, beriman dan mengamalkan segala yang baik serta meninggalkan yang ditegah; pendeknya mencuba membina rasa penilaian yang tinggi dan sempurna dalam diri sendiri. Dan sebagaimana syair-syair yang lain itu, nada dan cara penyampaiannya masih lebih banyak menampakkan cara berkhutbah; misalnya dalam "Nasihat Kepada Anak", oleh Raja Ali Haji di bawah ini:

Dengarkan tuan ayahanda berperi  
Kepada anakanda muda bestrai  
Jika benar kepada diri  
Nasihat kebajikan ayahanda beri.

Ayuhai anakanda muda remaja  
Jika anakanda mengerjakan raja  
Hati yang betul hendaklah disahaja  
Serta rajin pada bekerja.

Mengerjakan gubernemen janganlah malas  
Zahir dan batin janganlah culas  
Jernihkan hati hendaklah ikhlas  
Seperti air di dalam gelas.

Jika anakanda jadi besar  
Tutur dan kata janganlah kasar  
Janganlah seperti orang sasar  
Banyaklah orang menaruh gusar.

Tutur yang manis anakanda tuturkan  
 Perangai yang lembut anakanda lakukan  
 Hati yang sabar anakanda tetapkan  
 Kemaluan orang anakanda fikirkan.

(Mohd. Taib Osman 1975b, 113)

*Syair Kenang-kenangan Yapsai Taman Penghiburan* diterbitkan pada tahun 1951, merupakan karya syair yang agak baharu, dibandingkan dengan yang lain yang kebanyakannya masih dalam bentuk manuskrip tersimpan di perpustakaan-perpustakaan di dalam dan di luar negeri. Namun demikian syair ini masih menunjukkan ciri-ciri penulisan syair yang tipikal, dan sebagaimana yang lain dalam kategori ini, ia juga bertujuan memberi nasihat melalui cerita-cerita menarik. Ringkasnya syair ini memberikan gambaran bahawa sesuatu itu tidak akan kekal; yang berkuasa akan hilang kuasanya, yang kaya akan jatuh miskin kecuali orang yang berkenaan beringat-ingat akan kemungkinan itu dan berusaha mengelakkannya dengan beriman kepada Allah:

Ayuhai anakku muda teruna  
 Begitulah adat di dunia yang fana  
 Jangan pulak jadi terkena  
 Menyesal di belakang tiada berguna.

Bala yang lepas umpama mimpi  
 Tidur malam melihat mimpi  
 Berapa berdoa serta berjampi  
 Terkejut juga semuanya napi.

Demikianlah juga umpama wayang  
 Di kanan kelir gambar ditayang  
 Habis cerita tiada terbayang  
 Tinggal kelir tiada bergoyang.

Sabarlah anakku ke bala Allah  
 Syukurlah tuan ke nikmat Allah  
 Berbanyak anakku astaghfirullah  
 Begitu pesanku ya Abdullah.

Fajar menyingsing awan bersurai  
 Ayam berkокok terbanglah murai  
 Embun berpecak kabut berburai  
 Di sinilah kalam kertas bercerai.

(Barharun Ahmad 1951, 34–35)

*Syair-syair dengan tema yang berasingan*

Ke dalam golongan ini dimasukkan syair-syair yang berpusat pada pelbagai tema, selain daripada yang telah disebutkan dalam golongan-golongan yang lalu. Dari segi jumlahnya karya-karya syair dalam golongan ini agak banyak dan sukar sekali menentukan jumlahnya, kerana kebanyakannya tidak tertulis dalam sebuah buku yang khusus seperti syair-syair dalam golongan lainnya. Hanya sedikit syair-syair ini yang tertulis dalam buku yang tersendiri, seperti *Syair Raksi*, *Syair Takbir Mimpi*, *Syair Rakis*, *Syair Perlembagaan Negeri Brunei* dan *Syair Bunga Rampai*. Yang lain kebanyakannya diselitkan dalam buku-buku tertentu, yang berbentuk prosa dan dengan judul-judul yang lain. "Syair Sultan Abdul Jalil Terbunuh", oleh Raja Ali Haji terdapat di dalam buku *Silsilah Melayu dan Bugis* (1956), karangan penulis yang sama; dan "Cerita Sultan Perak Melawat Jajahan Takluknya" diselitkan dalam *Misa Melayu* oleh Raja Chulan (Mohd. Taib Osman 1975, 103–112).

Tema dan isi syair-syair golongan ini bergantung kepada topik yang dibicarakan; dan ini meliputi hampir keseluruhan penglibatan dan perasaan masyarakat, dari yang bersifat cerita, teka-teki, puji-pujian, nasihat atau sebagai pernyataan kasih sayang, rindu, harapan dan sebagainya. Syair Raksi, misalnya membicarakan sama ada 'rasi' atau tidaknya perhubungan perkahwinan suami isteri atau silaturrahim antara dua orang sahabat. *Raksi* atau *rasi*, berasal dari pada bahasa Sanskrit, bererti 'kesesuaian' (Wilkinson 1901, 333) dan ada hubungannya dengan kepercayaan terhadap perhubungan nasib manusia dengan peredaran dan perubahan cakerawala, khususnya bintang-bintang. Dalam masyarakat Melayu tradisional memang merupakan kelaziman – walau bukan suatu kemestian – mencari atau menilik kerasian antara dua orang yang akan mendapat jodoh berdasarkan nilai huruf-huruf Arab (atau Jawi) yang membina nama-nama mereka. Misalnya antara Hasan (حسن) dengan Meriam (مریم) masing-masing bernilai 118 dan 290. Keduaduanya dibahagi sembilan memberikan baki 1 dan 2; satu keadaan yang dianggap sangat baik:

Jika esa samanya dua  
Terlalu baik raksinya kedua  
Kepada yang lain tiada kecewa  
Umpama Adam dengannya Hawa.

Sangat muafakat sebarang kira  
 Turut menurut apa bicara  
 Pekerjaan baik sukar bersegera  
 Tiap-tiap pekerjaan tiadalah bersikara.

Inilah jodoh bersama setia  
 Kasih dan sayang kepada manusia  
 Orang melihat bersukaria  
 Tiada memperbuat pekerjaan aniaya.

(Overbeck 1923, 282–307)

Seterusnya, baki empat dianggap tidak serasi, bahkan mungkin berakhir dengan perceraian. Dalam keadaan yang ekstrem atau bagi masyarakat yang mengikuti amalan ini secara *rigid*, mungkin mereka akan membatakan hasrat berjodohan itu atau berusaha membuat sesuatu, misalnya dengan menukarkan nama atau ejaan salah seorang atau kedua-dua yang terlibat; semata-mata kerana khuatir kalah salah satu daripada perkara-perkara di bawah ini berlaku:

Fasal empat bersama empat  
 Tiadalah berapa baik muafakat  
 Kerjanya sehingga jalan mengumpat  
 Bercerai juga, tiada akan lekat.

Jika empat bersama lima  
 Kasih itu tiada berapa lama  
 Tiada memikirkan binasa nama  
 Tiada akan kekal keduanya sama.

Jika empat bersama enam  
 Tiada baik berniaga bertanam  
 Hatinya lemas marah menanam  
 Akhirnya itu jadi jahanam.

Jika empat bersama tujuh  
 Siang dan malam berhati gaduh  
 Umpama rumah yang kurang teguh  
 Tujuh hari sekali runtuh.

Jika empat dengan delapan  
 Antara keduanya tiada ketetapan  
 Setengah pula mengata kebajikan  
 Kaul yang satu tiada menetapkan.

(Overbeck 1923, 289)

Selain itu terdapat sejumlah besar syair-syair yang tidak berjudul, diselitkan dalam karangan-karangan prosa yang diterbitkan dalam waktu-waktu yang terkemudian, misalnya dalam *Hikayat Setia Asyik kepada Maksyuknya: atau Syafik Affendi dengan Faridah Hanum*, oleh Syed Syeikh al-Hadi; *Hikayat Percintaan Kasih Kemudaan* oleh Ahmad Kotot; *Hikayat Perjumpaan Asyik* dan beberapa yang lain. Umumnya babak-babak yang diselitkan dalam bentuk syair itu merupakan pemerian yang terperinci dalam sesuatu babak tertentu, misalnya adegan kamar yang dirasakan kurang manis ditulis dalam bentuk yang biasa; justeru itu lalu diolah dalam bentuk simbolik dengan ekspresi dan bahasa yang indah. Diberikan contoh di bawah yang dipetik daripada *Hikayat Setia Asyik kepada Maksyuknya: atau Syafik Affendi dengan Faridah Hanum*:

Datanglah hati tidak siuman  
Bangunlah Syafik muda beriman  
Berhenti di jalan ke pintu taman  
Lupakan janji usul budiman.

Kudrat Tuhan Ilahul Ali  
Awan dan mega tersingkap sekali  
Bintang zaharah nampak tajalli  
Zahirlah kubah keramat dan wali.

Syafik pun khayal di situ sebentar  
Seluruh anggota rasa menggeletar  
Mengucap dianya ya Rabbi ya Sattar  
Ampunkan dosaku Ilahi ya Ghaffar.

Mabuklah Syafik dibaham gelora  
Hilanglah peringatan hilanglah kira-kira  
Anak kunci kubah dipadukan segera  
Merebutkan sementara Faridah yang cedera.

Dirasanya pintu besi khursani  
Syafik menyeru ya Allah ya Rahmani  
Kurniakan rahmat hamba-Mu ini  
Masukkan ke syurga janat adnani.

Malaikat rahmat turun berterbangan  
Muda yang sabar sampailah angan-angan  
Terbukalah olchnya pintu kayangan  
Lazatnya meliputi tubuh dan tangan.

Masuklah Syafik ke jannat tunnaim  
Menerima nikmat Ilahul Azim  
Lazatnya mesra ya Rabbi ya Rahim  
Seluruh anggota mengucap ya Karim

(hlm 286 – 287)

Dalam babak yang sama Ahmad Kotot menceritakan dengan lebih ghairah, melalui perlambangan-perlambangan yang menarik dan tersembunyi dengan demikian menjadikannya lebih berkesan dalam imaginasi pembacanya:

Masa sempurna khabarnya tentu  
Hasyim pun datang fikiran buntu  
Kerana pelayaran sampailah waktu  
Hendak menyeberang ke lautan satu.

Layar digulung kemudi dipaut  
Kapal belayar di tengah laut  
Di pintu kuala kapal tersangkut  
Nakhoda yang muda sangat terkejut.

Terkejut berdebar dada gementar  
Kapal dipusing haluan dikisar  
Kerana lautan ombaknya besar  
Mulut nakhoda sangatlah besar.

Puaslah ikhtiar jurangan bestari  
Kapal tak dapat bergerak bergeri  
Hilang fikiran lenyaplah budi  
Nakhoda sebagai memintal tali.

Nakhoda pun marah kelasi ditampar  
Juragan tersenyum duduk bersandar  
Melihat nakhoda sangatlah gusar  
Kapal tak dapat hendak dikisar.

Juragan bangun naik gembira  
Lalu dipautnya tiang bendera  
Tali-temali diikat segera  
Kapal pun dapat belayar segera.

(hlm 68 – 69)

Perkembangan syair dalam zaman yang terkemudian kelihatan lebih pesat setelah adanya alat cetak dan bermulanya penerbitan-penerbitan akhbar dan majalah. Melalui ruangan-ruangan yang disediakan dalam penerbitan-penerbitan itu, para penulis dapat menyampaikan pelbagai mesej melalui puisi. Sesungguhnya zaman ini adalah permulaan kepada perkembangan puisi Melayu moden; dan dalam peringkat permulaan itu genre syair masih amat popular sebagai media untuk menyampaikan pelbagai tema dari rasa rindu dan kasih sayang hingga kepada semangat kemajuan dan nasionalisme Melayu; perhatikan sebuah contoh:

*Kebangsaan Melayu*

Kebangsaan Melayu cuba kuseru  
Supaya kehidupan sama menderu  
Kacau-bilau lama dan baharu  
Buangkan dia supaya tak keliru.

Kebangsaan Melayu, Melayu jati  
Satu tubuh satu hati  
Sama merebut sama menanti  
Kerana kemajuan kita berbakti.

Kebangsaan Melayu biar berjasa  
Sama menolong menjaga bangsa  
Sama membantu memelihara nusa  
Khidmatkan diri setiap masa.

Kebangsaan Melayu sama menghala  
Sama menyerbu sama memula  
Tali kemajuan samalah hela  
Ketinggian nusa bangsa membela.

Kebangsaan Melayu nusa Malaya  
Mulia permai gemilang cahaya  
Bersatu mutu bersetia jaya  
Itu simpulan wajib percaya.

(Hassan Ahmad 1964, 76-77)

Sehingga pertengahan abad ini, bahkan lewat tahun-tahun 60-an berpuluhan-puluhan judul syair, terutamanya yang berbentuk cerita telah dicetak dan diterbitkan, baik di Semenanjung Malaysia maupun di

Indonesia. Pelbagai tema yang khususnya berkisar di sekitar kehidupan masyarakat; suka dan duka, cinta dan kasih sayang, dengki dan khianat, krisis dan kejatuhan akhlak dan lainnya yang jelas menggambarkan pengalaman, sikap dan nilai masyarakat sebagai akibat daripada pertembungan mereka dengan nilai dan cara hidup yang dikenali sebagai 'moden'. Penggembangan mencipta ini tidak sahaja berlaku dalam kalangan penulis keturunan peribumi, bahkan juga kaum pendatang khususnya peranakan Cina di Malaysia dan Indonesia. Hasil daripada penggembangan ini kita menemukan pelbagai judul yang sekaligus menggambarkan kepelbagaiannya tema, isi dan fokus pembicaraan. Antara judul-judul ini – yang dipetik secara rambang sahaja – termasuk *Syair Si Banso Urai* (1931), *Syair Si Pahit Lidah* (1938), *Syair Kili Buku Bemban* (1949), *Syair Cahaya Kebenaran* (1929), *Syair Puteri Hijau* (1962), *Syair Puteri Bunga Kamar* (1965), *Buku Sa Li Chua* dan *Syair Singapura* (1910) dan *Suara Zaman: Syair dan Pantun Pada Masa Perang Ini* (1945). *Buku Sa Li Chua* ditulis oleh Tan Chay Yan, peranakan Cina Malaysia dan *Suara Zaman*, oleh Koryo Yakahasi, seorang Jepun.

Sebagai contoh, perhatikan sebahagian daripada syair dalam *Buku Sa Li Chua* yang dipetik di bawah ini:

Sungulah betol suda ku kera  
Meniaganya gutta di Singa-nya-pura  
Millianlah ringgit datang di chura  
Banyaklah orang mendapat kaya.

Dengarlah encik dengarlah tuan  
Dengarlah sekalian muda-mudaan  
Saya yang karang ininya zaman  
Disebutkan sekali baba Tan Chay Yan.

Inilah baba yang murahnya jeriki  
Hati pun berisi sebagai dicuci  
Paranya-rubba dia yang mulie-E  
Makalah menjadi sekarangnya ini.

Mulia yang tanam baba Tan Shay Yan  
Anaknya Malaka orang bangsawan  
Kaya pun cukup intan dan berlian  
Hati pun murah bercampur kawan.

Baba Tan Chay Yan hatinya murah  
Suka dia tanam guttanya para  
Mulut pun manis sebagai gula  
Belumlah pernah nampaknya mara.

(Tan Chay Yan 1910, 22)

Kepelbagaiannya tema dan daya cipta lebih jelas dilihat dalam bahan-bahan yang dikumpulkan daripada sumber-sumber lisan. Di sini, syair dan genre lainnya dicipta untuk memenuhi sesuatu tujuan; dan tujuan inilah yang menentukan isi ciptaan itu. Untuk sambutan maulud, misalnya, dicipta sebuah syair, beberapa rangkap, untai, malah memenuhi sebuah buku. Gunanya untuk dibaca, dilagukan atau diterbitkan dan diedarkan sebagai usaha, sumbangan untuk tujuan pengajaran atau dengan tujuan mendapatkan wang untuk maksud-maksud kebaikan. Dengan berkeadaan begitu, syair maulud, di samping mengisahkan keputeraan dan kehidupan Rasulullah, akan memberikan juga pengajaran, nasihat dan kritik masyarakat. Demikian juga terdapat dalam "Endoi", "Surat Pengantin", "Surat Nasi", "Menitik Inai", "Sambutan Kemerdekaan" dan lain-lainnya.

Lebih menarik pula, apabila pengarang-pengarang tempatan yang tidak bernama, menuliskan syair-syair mengenai tempat, kampung atau daerahnya, misalnya dalam "Syair Sungai Perak", "Syair Kampung Behrang Ulu", "Syair Keramat Teluk Rubiah", "Syair Kisah Perang Rokam" dan sebagainya. Contoh di bawah ini dipetik daripada "Syair Kisah Perang Rokam" yang dikarang oleh seorang anak tempatan yang dikenali sebagai Encik Jasin, dari Kampung Serkam Laut, Melaka. (Sementara contoh dan keterangan yang lain, dibincangkan lagi dalam aspek fungsi dan penyebaran, di bawah):

*Syair Kisah Perang Rokam*  
Bismillah itu mula dikarang  
Syair sudah dibuat orang  
Sebab kampung jadi berperang  
Cukai lama sudah terbuang.

Alhamdulillah mula disurat  
Syair ini sudah dibuat

Tahun ini hikmat berat  
Datang daripada kasir murtad.

Hukuman datang berdetap-detap  
Itu tanda hukuman tetap  
Orang mendengar banyak meratap  
Bangsal dibuat tiada beratap.

Hukuman ini amat derhaka  
Banyak orang tiada suka  
Hingga meninggalkan rumah tangga  
Raja dimakan api neraka.

Tatkala anak dara Syamsuddin duduk di pintu  
Pegang penyapu scorang satu  
Tuan Rokam datang naik ke situ  
Hendak dipukul dengan penyapu.

(Ihsan Tuan Hj. Omar, Serkam, Melaka 1978)

### Fungsi dan Penyebaran

Dalam perbincangan di atas dapat dilihat bagaimana luasnya pemakaian syair dalam kehidupan masyarakat Melayu; dan ini juga dapat menggambarkan fungsi puisi itu dalam masyarakat, khususnya dalam konteks keadaan dan zaman yang berkenaan. Tetapi dalam zaman itu juga kebolehan membaca di kalangan masyarakat itu amat terbatas; kerana itu hasil-hasil sastera yang telah tertulis, termasuk yang berbentuk syair hanya dapat disampaikan kepada pendengar melalui seseorang yang boleh membaca. Umumnya pula pembaca itu tidak sahaja dapat membaca dengan lancar tetapi mungkin juga boleh menyanyi dengan suara yang baik. Di sinilah letaknya keistimewaan puisi ini: dengan sifatnya yang natural dan bersahaja, ia dapat disesuaikan dengan lagu yang mengiringinya dan suasana yang mahu ditimbulkan daripadanya. Biasanya syair-syair yang berbentuk cerita (naratif) disampaikan dalam duă variasi lagu: cepat dan perlahan. Pada bahagian yang terbesar yang merupakan penceritaan biasa, syair dilakukan dalam rentak cepat, hampir seperti berzikir (*incantation*). Tetapi pada bahagian-bahagian yang lain: permulaan, penutup, pada menggambarkan suasana sedih, kematian atau kekecewaan, syair dilakukan perlahan dengan nada

sedih dan merayu. Dalam masa-masa yang kemudian apabila syair dibaca dalam keramaian, pesta atau pertandingan, lagu-lagu akan diiringi dengan muzik terutamanya daripada biola, armian, akordian, piano dan gitar.

Bagi syair-syair yang bukan cerita, terutamanya yang bertemakan agama dan nasihat, lagu-lagu yang digunakan lebih beragam dan biasanya disampaikan dengan paduan suara. Sebahagian besar daripada aspek-aspek pengajaran agama Islam dari rukun iman, rukun sembahyang, zakat, puasa dan haji hingga kepada pengajian yang lebih tinggi seperti ilmu usul dan tasawuf, tertulis dalam bentuk syair dan disampaikan dalam bentuk nyanyian. Dengan demikian isi atau seni katanya lebih mudah dihafal dan seterusnya diingat dan diamalkan.

Selain daripada fungsinya yang umum seperti di atas, iaitu sebagai hiburan dan alat menyampaikan pengajaran melalui cerita dan lagu, syair lebih jauh mempunyai fungsi sosial yang luas dan berkesan. Sebagaimana pantun yang tersebar luas dalam kegiatan-kegiatan seni dan kebudayaan masyarakat, syair juga mempunyai ruang dan kemampuan yang sama. Walaupun tidak banyak jumlahnya dari segi jenis dan variasi, tetapi dari segi penyebaran syair dapat dikatakan lebih dominan tempatnya daripada pantun. Hal ini ialah kerana aktiviti-aktiviti kesenian yang mengandungi syair lebih bersifat '*quasi-religious*' iaitu berhubungan dengan agama dan dakwah yang dapat diisi dalam kebanyakan aktiviti kehidupan masyarakat. Di bawah ini akan ditinjau dengan ringkas sebahagian daripada aktiviti-aktiviti kesenian masyarakat yang mengandungi fungsi dan peranan syair.

#### *Endoi atau Dondang Siti Fatimah*

Endoi bermakna buaian (Wilkinson 1901, 47); dan istiadat berendoi ialah istiadat membuat anak kecil, menurut cara yang telah sedia tersusun dan yang telah diwarisi oleh masyarakat itu. Biasanya istiadat ini dimulai dengan istiadat mencukur rambut, turun tangga atau memijak tanah, mengikut pilihan dan rancangan keluarga yang menjalankannya. Berendoi jua mungkin dijalankan sekaligus dengan kegiatan yang lebih besar, misalnya akikah, khatam Quran, bertindik dan lain-lain, yang boleh pula merupakan sebahagian daripada istiadat perkahwinan yang diadakan. Jika istiadat berendoi itu

merupakan majlis yang tersendiri, ia diadakan setelah bayi itu menamatkan tempoh berpantang bersama ibunya, iaitu kira-kira selepas enam minggu dari tarikh kelahiran. Sehingga ini istiadat berendoi masih diamalkan hampir di seluruh Semenanjung, terutamanya di Kedah, Perak, Selangor, Negeri Sembilan, Pahang, Melaka dan Johor.

Lagu "berendoi" dinyanyikan ketika bayi dibuai di dalam buaian yang berhias, oleh bidan atau seorang anggota keluarga, dengan irungan lagu daripada satu kumpulan penyanyi yang khusus untuk tujuan itu. Lagu-lagu itu terdapat dalam rentak dan cara persempahan yang beragam daripada satu daerah dengan yang lain, tetapi seni katanya tetap dalam bentuk syair. Suatu perkara yang menarik di sini, iaitu lagu dan seni kata itu hampir sama antara daerah-daerah itu; ini menunjukkan adanya buku-buku atau sumber-sumber yang sama yang digunakan.

Isi dan tema lagu-lagu endoi ialah nasihat dan pengajaran; iaitu dengan maksud menasihatkan anak-anak supaya taat setia dan membalias budi ibu bapanya. Daripada beberapa contoh yang telah dirakam di beberapa buah daerah di Kedah, Perak, Negeri Sembilan dan Melaka, struktur isi lagu-lagu endoi dapatlah diringkaskan begini:

- Pendahuluhan: mengandungi salasilah keturunan dan riwayat kelahiran Rasulullah S.A.W:

Bismillahir-Rahmanir-Rahim  
Lailla-Haillallah  
Muhammadar-Rasulullah.

Asalnya Nabi nur yang mulia  
Dijadikan Allah Tuhan yang Kaya  
Dahulu daripada alam dunia  
Aras dan Qursi belum sedia.

Daripada nur Nabi alaihissalam  
Asalnya jadi sekalian alam  
Langit dan bumi terang dan kelam  
Jin dan manusia kafir dan Islam.

Langit dan bumi sempurna dijadikan  
Nabi Allah Adam pula dilahirkan

Dialah permulaan manusia dijadikan  
Di dahinya nur yang dipancarkan.

Nabi Muhammad anaknya Abdullah  
Bondanya bernama Siti Aminah  
Nabi yang jadi di dalam Mekah  
Cahayanya terang segenap daerah.

b. Mengenai kelahiran seorang anak:

Bismillah itu permulaan nama  
Keadaan zatnya bersama-sama  
Zahirnya sifat menyatakan isma  
Qadim dan taat sedia lama.

Asalmu dari lembaga Adam  
Keturunan dari murul-khatam  
Dipecah empat anasir insan  
Untuk menjadi sekaliannya Islam.

Salbi bapamu rahim ibumu  
Empat puluh hari nutfah namamu  
Delapan puluh hari alkah namamu  
Seratus dua puluh hari nazrah namamu.

c. Kesusahan ibu bapa memelihara anak:

Setelah kamu sudahlah ada  
Siang dan malam ibumu jaga  
Tidur pun tidak barang seketika  
Makan dan minum tidak berasa.

Aduhai anak jangan engkau bantah  
Ibumu peliharakan terlalu susah  
Alih ke kiri kanan pun basah  
Berlumur dengan kencing dan muntah.

Dilabuhnya tirai ribut pun lalu  
Pelita dipasang di dalam kelambu  
Sembur dan barut datang bertalu  
Meminta jauhkan syaitan dan hantu.

d. Taatkan ibu bapa dan suami:

Jikalau anak hendak bahagia  
Amanah dan pesan ialah percaya  
Walau miskin walaupun kaya  
Diperbuat juga sehabis daya.

Jikalau engkau sudahlah besar  
Pengajaran ibumu hendaklah dengar  
Perkataan bapamu jangan diingkar  
Itulah menjadi kota dan pagar.

Wahai anakku yang setiawan  
Engkau ini anak perempuan  
Jikalau ada jodoh pertemuan  
Suamimu itu jangan dilawan.

Barang siapa melawan suami  
Terlalu sakit rasanya hati  
Mukanya hitam seperti babi  
Di dalam neraka tempat berhenti.

e. Menuntut Ilmu:

Jikalau menuntut engkau mendapat  
Terpujilah engkau dunia akhirat  
Berhimpun sekalian handai dan sahabat  
Mana yang jauh bertambah dekat.

Jikalau dapat ilmu yang teguh  
Engkau amalkan bersungguh-sungguh  
Tertutup pintu neraka yang tujuh  
Teranglah jalan seperti bersuluh.

Jikalau terang jalan ke mati  
Baharulah kamu bersuka hati  
Kepada Tuhan engkau terpuji  
Mendapatlah engkau syurga tertinggi.

f. Mengerjakan ibadat:

Barang siapa meninggalkan firman  
Putuslah harap ayuhai teman  
Itulah orang tiada beriman  
Di dalam neraka tempat kediaman.

Barang siapa meninggalkan hadis  
Tubuhnya hitam bercampur kudis  
Dimakan api semuanya habis  
Dari kepala sampai ke betis.

Sakit tiada lagi berkala  
Digigit ular, halipan dan kala

Di dalam neraka badan tersula  
Harapkan tolong azzawajalla.

g. Penutup:

Ya Allah Malik-al-Manan  
Doa kami minta perkenangan  
Siang dan malam sepanjang zaman  
Bala dan fitnah minta jauhkan.

Tamatlah tuan anak sambil diayunkan  
Sanak saudara kami mengayunkan  
Serta meminta kami doakan  
Supaya terang anak budiman.

Telah selesai kami nyanyikan  
Kami meminta serta selamatkan  
Kami membuat jangan dimudahkan  
Seumur hidup anaku ingatkan.

Selain daripada lagu di atas terdapat sebuah lagu yang lain yang juga dinyanyikan dalam istiadat berendoi ini, iaitu apa yang dikenali sebagai "Dendang Siti Fatimah". Di beberapa tempat di negeri Perak, lagu endoi itu sendiri menjadi sinonim kepada "Dondang Siti Fatimah", walaupun daripada kedudukan yang sebenar, lagu "Dondang Siti Fatimah" itu hanya merupakan variasi kepada beberapa buah lagu lain yang biasanya dinyanyikan dalam istiadat berendoi. Sebahagian daripada lagu ini yang kerap dinyanyikan dipetik di bawah sebagai contoh:

Dengan Bismillah kami mulai  
Alhamdulillah wassala tannabi  
Dengan takdir Ilahi Rabbi  
Sampai maksud yang dicitai.

Seorang anak cita yang lama  
Sekarang kami sudah terima  
Seorang anak diberi nama  
Kami ayunkan bersama-sama.

Emas dan perak kami ayunkan  
Anak ditaruh di dalam buaian  
Tali ayunan kami pegangkan  
Emas dan perak kami nyanyikan.

Dipanggil orang kami sekalian  
 Olehnya ibu bapamu tuan  
 Serta diberi minum dan makan  
 Menyatakan syukur kepada Tuhan.

(Rakaman, Tanjung Malim 1976)

Demikian seterusnya hingga 120 rangkap dengan isi yang hampir sama, iaitu menasihatkan anak-anak supaya taatkan ibu bapa, rajin menuntut ilmu, mengerjakan ibadat dan menjadi manusia yang berguna. Ibu bapa juga menasihatkan supaya melengkapkan anaknya dengan ilmu pengetahuan dan memberikan panduan yang baik untuk kehidupan dan masa depan anak-anaknya.

Di negeri Pahang, khasnya dalam daerah Raub, puisi seperti ini dikenali sebagai 'nazam' dan acara menyanyikannya disebut 'bernazam'. Dalam istiadat berendoi, yang dikenali di daerah ini sebagai "kenduri membuat anak", terdapat lagu-lagu yang sama seperti dalam daerah-daerah yang lain dan seni kata yang hampir sama bentuk dan isinya. "Nazam membuat anak laki-laki" dinyanyikan untuk anak lelaki dan "Nazam membuat anak perempuan" untuk anak perempuan. Bentuk puisinya tetap syair dan isinya juga mementingkan nasihat dan memberikan pimpinan kepada kanak-kanak supaya besar dan dewasa menjadi orang yang berguna:

Nazam membuat anak lelaki:

Wahai anak muda bangsawan  
 Pengajaran ibumu jangan dilawan  
 Pelihara daripada ribut dan taufan  
 Takut terkena penyakit dan syaitan.

Dari kecil dipelihara ibumu  
 Sehingga sampai sudah umurmu  
 Diserahkan mengaji ke hilir ke hulu  
 Kerana besar hajat ibumu.

Jikalau engkau tamat mengaji  
 Baharulah ibumu bersuka hati  
 Tiada diberinya ke sana ke mari  
 Sehingga kitab habis dikaji.

(Nainu bt Hassan, Raub 1978)

Nazam membuat anak perempuan:

Wahai anak yang setiawan  
Engkau ini anak perempuan  
Jikalau engkau ada pertemuan  
Suamimu itu jangan dilawan.

Wahai anak kami berpesan  
Kepada engkau di dalam buaian  
Ibu bapamu jangan kaulawan  
Jangan diikuti iblis dan syaitan.

Di atas kepala kamu junjungkan  
Di dalam hati engkau taruhkan  
Ya Allah Malik-ul-Rahman  
Budak ini besarkan Tuhan.

(Nainu bt Hassan, Raub 1978)

*Sambutan Maulud, Syair Maulud dan Nasyid*

Perayaan menyambut Mauludun-Nabi diadakan setiap tahun dalam bulan Rabiulawal sebagai mengingati ulang tahun keputeraan Rasulullah S.A.W. pada 12 Rabiulawal 571. Keramaian diadakan di masjid, surau atau di rumah seseorang tertentu dan biasanya diuruskan bersama oleh jawatankuasa masjid, surau atau yang dilantik khas untuk tujuan itu. Pelbagai acara diadakan termasuk syarahan agama, bacaan Quran, berzikir maulud, nasyid dan menyanyikan lagu "Syair Maulud". Seni kata "Syair Maulud" ini sebahagiannya menceritakan keturunan dan keputeraan Rasulullah dan yang lainnya memberi nasihat kepada pendengar supaya memuliakan Rasulullah dan mentaati perintah Allah dan Rasul. Sedikit daripadanya diberikan di bawah:

Malam ini tersangat mulia  
Rabiulawal nama bulannya  
Memuliakan nai akan dicitra  
Memuliakan Nabi junjungan kita.

Memuliakan Nabi junjungan kita  
Ialah sultan segala anbia  
Kekasih Tuhan yang sangat mulia  
Tiada bandingan di dalam dunia.

Mauludun Nabi kita muliakan  
Membesarkan hari Nabi diperanakkan  
Dapat manfaat hari yang kemudian  
Diberi pahala tidak terperikan.

(Lebai Sani bin Bihin, Kuang, Selangor 1977)

Nasyid Pembukaan Majlis:

Selamat malam kami ucapkan  
Para hadirin semua jemputan  
Selawat salam kami junjungkan  
Ke hadrat Nabi Rasul pilihan.

Di majlis ini kami bermadah  
Mengucap puji alhamdulillah  
Nasyid ini nasyid pembuka(h)  
Semoga majlis dikurniakan limpah.

Ke hadrat Allah kami sembahkan  
Agar majlis dapat keredaan  
Salah silap pohon ampunkan  
Semoga majlis dapat keampunan.

Di malam ini kita berjumpa  
Di lain masa bersama pula  
Dengan berkat selamat sejahtera  
Semoga bahagia harapan kita.

Kepada hadirin yang budiman  
Sudinya datang tuan dan puan  
Dengan segala puji-pujian  
Sekalian budi jadi ingatan.

Dengan berkat salam sejahtera  
Semoga bahagia harapan kita.

(Maskinah bt Mohd. Dom,  
Johor Bahru 1978)

Hadrah

Hadrah dapat digolongkan sebagai satu jenis zikir yang disampaikan dengan iringan rebana; terdiri daripada tujuh hingga sembilan orang

yang memukul rebana sambil menyanyi. Permainan ini boleh diadakan dalam semua keramaian termasuk majlis perkahwinan, mengiringi dan menerima kedatangan pengantin, menyambut tetamu kehormat, pesta dan keramaian kampung, daerah dan negeri, serta hampir semua acara yang berhubung dengan agama. Lagu-lagu yang dinyanyikan sebahagian besarnya dalam bahasa Arab, dipetik umumnya daripada buku *Majmual Syarif al-Anam* dan yang lainnya dalam Bahasa Melayu, dikarang sendiri oleh kumpulan itu untuk sesuatu tujuan, atau daripada mana-mana seni kata yang diketahui. Hampir keseluruhannya yang di dalam bahasa Melayu ialah dalam bentuk syair dan isinya meliputi pelbagai tema, dari lagu pembukaan (bertabik), menyambut dan memuji hadirin, hingga kepada soal-soal semasa, khususnya yang berhubung dengan majlis yang diadakan. Perhatikan contoh di bawah yang dikarang untuk suatu sambutan Hari Kebangsaan.

*Hari Kebangsaan*

Semoga hidup penuh kemakmuran  
Hari Kebangsaan kita rayakan  
Peringkat daerah yang mengadakan  
Segenap rakyat mengambil bahagian.

Kepada Tuhan kami berperi  
Panjangkan usia Perdana Menteri  
Semoga bimbingan tambah diberkati  
Rakyat hidup penuh dedikasi.

Rakyat hidup berdedikasi  
Mengikut rancangan Perdana Menteri  
Rancangan Buku Hijau telah disertai  
Semoga menambah pendapatan negeri.

Sambutan diadakan di sana sini  
Janganlah lupakan keselamatan negeri  
Perajurit bertugas di sempadan negeri  
Bakti mereka mestilah dihargai.

(Rakaman daripada Kumpulan Hadrah,  
Tg. Malim 1976)

Dan untuk satu upacara berinai menjelang majlis perkahwinan yang akan dijalankan:

**Menitik Inai**

Malam ini menitik inai  
Inai dititik di anak jari  
Wajah pengantin berseri-seri  
Diinaikan oleh saudara-saudari.

Pengantin duduk seorang diri  
Di atas pelamin indah berseri  
Membuka tangan sepuluh jari  
Diinaikan keluarga berganti-ganti.

Diinaikan keluarga berganti-ganti  
Lekatlah inai di anak jari  
Tanda ikatan telah dimiliki  
Rukun dan damai suami isteri.

Kami bermain berkawan-kawan  
Majlis berinai kita adakan  
Kepada Tuhan kami pohonkan  
Semoga pengantin hidup berkekalan.

Selesailah sudah upacara malam ini  
Pengantin diiringi seorang puteri  
Pengantin bermohon mengundur diri  
Menantikan persandingan di esok hari.

(Rakaman Hadrah, Tg. Malim 1976)

**Dabus**

Dabus ialah sejenis tarian beramai-ramai dengan irungan rebana dan mempunyai konotasi magis. Penari-penarinya menari dalam rentak tertentu dan pada suatu peringkat menikam dirinya dengan besi tajam yang dikenali sebagai 'anak dabus', hingga mengeluarkan darah tetapi tanpa sakit dan meninggalkan kesan luka. Lagu yang dinyanyikan dengan irungan rebana, kebanyakannya masih dalam bahasa Arab, umumnya dipetik daripada buku *Majmual Maulud Syaraf al-Anam*. Tetapi, di beberapa tempat di Perak, Selangor dan Melaka, terdapat juga beberapa rangkap dalam bahasa Melayu

berselingan dengan Arab. Dalam seni kata yang dalam bahasa Melayu itu pula, terdapat rangkap-rangkap syair, pantun dan ungkapan-ungkapan yang bebas, tidak terikat pada mana-mana genre yang tertentu; sebahagian daripadanya berbunyi demikian:

Sailala Tengku di Kelang  
Menempa rantai dengan gelang  
Tuanlah sungguh telah terbilang  
Patik berdabus sampailan siang.

Faya saalaman habbakum  
Fasil'a qibah qadrahji.

Tabiklah encik tabiklah tuan  
Tabik dengan orang sekalian  
Saya bermain berkawan-kawan  
Kerana memainkan seni kebudayaan.

Tarannam bidhkrin-rabiyi  
Waharrid bihi summasih.

Berempat duduk di pentas  
Berlima dengan gurunya  
Macam dakwat dengan kertas  
Macam pelita dengan sumbunya.

Allaya nabiyalhuda  
Aghisman bidhikrik yulhi.

Tabik encik tabiklah tuan  
Tabik kepada lelaki perempuan  
Patik bermain berkawan-kawan  
Mana yang salah harap maafkan.

(Rakaman daripada Kumpulan Dabus,  
Banting, Selangor 1976)

### Boria

Boria yang lebih terkenal di daerah utara Semenanjung, terutamanya di Pulau Pinang, Kedah, Seberang Perai dan Perak Utara, dikatakan berasal dari Parsi dan diperkembangkan di sini oleh pedagang-pedagang India. Tarian ini juga merupakan tarian beramai, berunsur hiburan, diadakan di majlis-majlis keramaian, pesta dan perkahwin-

an. Dengan irungan muzik dan irama lagu yang disesuaikan dengan perkembangan semasa, penari-penari menari sambil menyanyi; bentuk puisi yang dinyanyikan ini kebanyakannya dalam bentuk syair yang tergolong sebagai syair yang baik. Sebahagian daripadanya diberikan di bawah sebagai contoh:

*Kisah Asal-usul Boria*

Asal Boria yang mula pertama  
Dari India datang menjelma  
Orang Melayu bercampur  
Ria Sungai Pinang mengesan sejarah lama.

Dahulukala makmur dan senang  
Permainan Boria di Pulau Pinang  
Sejarah lama yang patut dikenang  
Beratus tahun sudah tercanang.

Asal permainan dari India  
Diberi nama gelaran Boria  
Karang mengarang bermacam gaya  
Sehingga kini masih berjaya.

Bulan Muharam sampailah waktu  
Orang Melayu masuk bersekutu  
Ditubuhkan Boria di sini di situ  
Dasar perkauman nyatalah tentu.

Segenap mukim, kampung dan desa  
Diadakan jenaka berbagai bangsa  
Berpakaian indah sutera dan kasa  
Setahun sekali setiap masa.

Tidak saya panjangkan kalam  
Permainan dimain waktunya malam  
Berbagai acara karangan disulam  
Memuji penonton luar dan dalam.

Sailor ramai semua berdiri  
Di hadapan laman yang indah berseri  
Tukang karang memuji hormat diberi  
Selesai karang diadakan tari.

Orang hartawan lagipun kaya  
Tiap-tiap tahun disambut Boria

PUISI MELAYU TRADISIONAL

Dipasang gaslin terang bercahaya  
Bersama wang pula disedia.

Sekalian bangsa hati berkenan  
Menyaksi Boria ganjil permainan  
Berdiri melihat kiri dan kanan  
Berserta jualan bermacam makanan.

(Daud bin Ibrahim, P. Pinang 1977).

Ada satu ikan yu  
Isi banyak tulang tengah satu  
Jual ia sebakul suku  
Suka makan orang Hindu.

Ada satu ikan terubuk  
Isi sikit tulang berserabut  
Budak-budak makan suka berebut  
Orang tua makan nyawa tercabut.

Ada satu buah ulu  
Pecah telur di dalam pasu  
Pukul dia dengan bilah penyapu  
Bila masak sangat gebu.

(Abd. Rahman Jirim 1977)

*Syair Dalam Majlis Perkahwinan*

Di beberapa tempat di Semenanjung, misalnya di Perak, Kedah, Johor dan Selangor, terdapat kebiasaan membacakan perutusan bersama dengan sesuatu istiadat dalam satu-satu majlis perkahwinan; misalnya apa yang dikenali sebagai 'surat serah', dibacakan ketika menghantar serah atau pemberian kepada pihak perempuan, 'surat nasi' dibacakan ketika kedua-dua pengantin sedang bersanding. Surat tersebut diselitkan pada bunga-bunga yang menghias nasi kunyit yang diarak bersama pengantin lelaki. Di bawah ini dipetik contoh daripada istiadat itu:

Sebahagian daripada 'surat nasi':

Adalah seperti perjalanan kami  
Bolehlah dikatakan jauh dari sini

Kami bertolak pukul sebelas tadi  
Sekarang ini barulah sampai ke mari.

Berjalanlah kami berhemat-hematan  
Berserah sahaja kepada Tuhan  
Tiadalah apa-apa halnya di tengah jalan  
Selamatlah sampai kami sekalian.

Kampung Kepayang tempatnya indah  
Banyak rumah penduduknya ramai  
Kebanyakan kami ke mari langsung tak pernah  
Sekarang ini barulah sampai.

Wah sukanya hati tidak terperi  
Memandangkan puak kaum berhimpunan di sini  
Jikalau tidak sabit perkara ini  
Barangkali harus kami tak berjumpa di sini.

Tidaklah lagi dipanjangkan peri  
Bersama pengantin dihantar ke mari  
Sedikit serah kami memberi  
Kerana perkaranya pun sudah terhajat di hati.

Serah pun ada jangan tidak  
Maklumlah tuan khatannya ke mari  
Rupanya pun tak berapa semiaik  
Maklumlah membuatnya susah anak cucu kiuk kiak.

Serah pun tidak berapa sempurna  
Satu bekas sirih tiga cerana  
Berbungkus dengan kain keputihan warna  
Inilah perbuatan orang-orang tua di sana.

Dalamnya konon cembul teratur  
Cukuplah lengkap gambir dan kapur  
Sirih dan pinang disusun beratur  
Entahkan layu entahkan lecur.

(Herman bin Uda Tasir, Kampar 1976)

*Selamat Bersanding*

Selamat bersanding saya ucapkan  
Dipanjangkan jodoh ditetapkan iman  
Murah rezeki Tuhan kurniakan  
Limpah makmur berzaman-zaman.

Selamat bersanding pengantin baru  
Di atas pelamin duduk bersatu  
Suami isteri bersatu padu  
Rukun muafakat setiap waktu.

Selamat pengantin kedua-dua  
Di atas pelamin muda remaja  
Seperti pinang dibelah dua  
Sama muafakat sampai ke tua.

Burung jelatik burung jeladan  
Anak tekukur terbang tinggi  
Sudahlah cantik samalah padan  
Semacam diukur samalah tinggi.

Tuan pengantin orang budiman  
Mudah-mudahan ditetapkan iman  
Limpah makmur sentosa dan aman  
Selamat berkekalan zaman-berzaman.

(Mishah bt Hamid, Batu Pahat 1978)

*Syair dalam Rejang*

Seperti "Pantun Rejang", syair ini juga menggunakan nama-nama hari dan bulan Islam yang ada kaitannya dengan kepercayaan terhadap raksi dan nilai-nilai pada hari dan bulan. Syair rejang bertemakan pengajaran agama, tentang ibadat dan mengerjakan amalan yang baik sebagai Mukmin sejati. Syair ini dilagukan dalam majlis-majlis perkahwinan, sambutan-sambutan yang berhubung dengan agama atau mungkin juga dinyanyikan sebagai hiburan sambil kerja seperti waktu membersihkan padi, membuat emping dan sebagainya.

*Rejang Si Padi Emping*

Bismillah itu permulaan kata  
Alhamdulillah puji semata  
Berkat syafaat penghulu kita  
Sekalian kembali ke Tuhan yang ada.

Barang siapa berpadi empin(g)  
Padi empin huma di tengah  
Barang siapa berhati Mukmin  
Berhati Mukmin istana Allah.

Padi empin huma di tengah  
Sayang geliga di punca kain  
Berhati Mukmin istana Allah  
Masuk syurga jannatun naim.

Sayang geliga di punca kain  
Orang bertanak di bawah sentul  
Masuk syurga jannatun naim  
Itulah anak baginda Rasul.

Orang bertanak di bawah sentul  
Sayang cerana berisi timah  
Itulah anak baginda Rasul  
Yang bernama Siti Fatimah.

(Hj Mohd. Wajib Hj Abd. Rahman,  
Slim River 1976)

*Rejang Tujuh Hari*

Sukanya Adam tidak terperi  
Ke sana ke mari berlari-lari  
Mencari Hawa isteri sendiri  
Dari pagi malamlah hari.

Erek dibilang hari Sabtu  
Lepas Sabtu berganti Ahad  
Tuntut ilmu biarlah mutu  
Hendaklah dibuang perangai yang jahat.

Dibilang pula hari Ahad  
Lepas Ahad berganti Isnin  
Hendaklah dibuang perangai yang jahat  
Supaya boleh menjadi Mukmin.

Dibilang pula hari Isnin  
Lepas Isnin berganti Selasa  
Supaya boleh menjadi Mukmin  
Jikalau mati tidak berdosa.

Dibilang pula hari Selasa  
Lepas Selasa berganti Rabu  
Jikalau mati tidak berdosa  
Boleh berjumpa Tuhan yang satu.

## PUISI MELAYU TRADISIONAL

Dibilang pula hari Rabu  
Lepas Rabu berganti Khamis  
Boleh berjumpa Tuhan yang satu  
Jangan diikut syaitan iblis.

Dibilang pula harinya Khamis  
Lepas Khamis berganti Jumaat  
Jangan diikut syaitan iblis  
Hendaklah beriman dengan taat.

Dibilang pula hari Jumaat  
Lepas Jumaat tamatlah sudah  
Hendaklah beriman dengan taat  
Di dalam syurga tempat yang indah.

(Hj Mohd. Wajib Hj Abd. Rahman,  
Slim River 1976)

Daripada pembicaraan dan contoh-contoh yang dikemukakan dalam bab ini jelas terlihat bagaimana popularnya puisi syair itu dalam masyarakat Melayu, bukan saja di Semenanjung Tanah Melayu, bahkan di seluruh Kepulauan Nusantara juga. Syair sebagai genre puisi telah diberikan bentuk dan ciri yang memperlihatkan kepelbagaiannya yang tinggi nilainya. Bentuk itu digunakan untuk menyatakan segala isi dan maksud, perasaan dan emosi masyarakat, yang dapat dilihat dan dirasa melalui tema-temanya yang pelbagai. Dan dalam kehidupan sehari-hari genre syair digunakan, diperluas dan diperkaya dengan pelbagai warna dan nada, sesuai dengan konteks dan suasana kehidupan masyarakat yang menggunakannya. Melihat keadaan begini, lebih memperkuatkan keyakinan kita, bahawa syair Melayu adalah tradisi Melayu yang asli, bukan diimport daripada kebudayaan asing dan bukan semestinya ciptaan seorang individu. Syair, sebagaimana genre-genre puisi Melayu yang lain adalah hak masyarakat, lahir daripada citarasa dan daya cipta masyarakat Melayu secara kolektif.

## NAZAM

### Tradisi dan Asal Usul

Nazam ( نظم ) dalam bahasa Arab bermakna puisi (*poem*) atau (*poetry*) secara umum, samalah seperti syair dalam bahasa Arab

bermakna puisi (*poem*) dan (*poetry*) (Hava 1970). Dalam senarai genre-genre puisi Arab-Parsi, tidak didapati istilah 'nazam' yang bermakna sebuah genre puisi yang tersendiri sebagaimana genre-genre yang lain seperti ruba'i, kit'ah, masnawi, ghazal dan lain-lain. Dan ia juga tidak tergolong sebagai salah satu pola irama puisi Arab seperti *basit*, *kamil*, *thawil*, *madid*, *wafir* atau yang lain.

Dalam bahasa Melayu, perkataan 'nazam' pada mulanya tidak juga pasti sebagai suatu genre puisi yang tersendiri. Di beberapa daerah negeri Pahang, istilah nazam memberi makna lagu atau zikir, dan 'bernazam' ialah melagukan suatu jenis puisi untuk satu tujuan, sambutan atau keramaian. Daripada contoh-contoh yang telah dikumpulkan dari daerah-daerah itu puisi yang dikatakan nazam itu, dari segi bentuk dan strukturnya, tidak lain daripada syair, iaitu terdiri daripada empat baris serangkap, empat perkataan sebaris dan dengan rima a-a-a-a. Sementara fungsinya pula, samalah seperti 'endoi' dalam daerah-daerah lain di Semenanjung Malaysia termasuk Kedah, Perak, Selangor, Negeri Sembilan dan Melaka.

Perkataan nazam digunakan sebagai istilah teknik kepada suatu jenis puisi yang mula-mula ditemui dalam *Tajus Salatin* atau *Mahkota Segala Raja-Raja*, terkarang kira-kira dalam tahun 1603 oleh Bokhari al-Jauhari. Contoh nazam yang diberikan berbunyi demikian:

Bahawa bagi raja sekalian  
Hendak ada menteri demikian.

Yang pada suatu pekerjaan  
Sempurnakan segala kerajaan.

Menteri inilah maha tolan raja  
Dan peti segenap rahsianya sahaja.

Kerana kata raja itu katanya  
Esa ertinya dan dua adanya.

Maka menteri yang demikianlah perinya  
Ada keadaan raja dirinya.

Jika raja dapat adanya itu  
Dapat peti rahsianya itu.

(Simandjuntak 1965, 60)

Sesungguhnya itulah sahaja contoh yang selalu dikutip dan diulang oleh beberapa orang pengkaji dan penulis dalam bidang puisi Melayu lama. Ini seolah-olahnya menyatakan bahawa puisi yang dikenali sebagai nazam itu tidak berkembang dalam masyarakat dan kesusastraan Melayu, justeru tidak adanya contoh-contoh untuk membuktikan perkembangan itu. Pendapat-pendapat yang berlainan antara para pengkaji dalam memberikan definisi dan pemerian tentang ciri-ciri puisi ini juga menunjukkan kurangnya pengetahuan masyarakat terhadapnya. Simorangkir Simandjuntak (1965) dalam bukunya yang disebut di atas, mengatakan nazam adalah:

Ikatan yang terdiri daripada 12 baris. Sajaknya dalam dua-dua dan adakalanya empat-empat pada baris suku karangannya. Nazam menceritakan perihal hamba sahaya istana yang setia serta budiman. (hlm 59).

Pemerian yang diberikan di atas semata-mata berdasarkan contoh yang dikemukakan yang tidak tepat pula\*susunannya. Nazam itu pula ialah terjemahan Bokhari al-Jauhari daripada sebuah puisi Parsi yang secara kebetulan mempunyai isi demikian; sedang sebahagian besar nazam Melayu menyentuh persoalan yang lebih luas terutamanya dalam aspek pengajaran agama Islam. Bagaimanapun keadaan itu masih belum diperhatikan oleh para pengkaji dan ulama Islam; misalnya seperti yang terbayang dalam keterangan Hamka yang paling baru, iaitu dalam tahun 1977:

Syair atau nazam, kemudian itu ghazal atau ruba'i adalah nukilan yang kita ambil daripada sastera Arab dan Persia ....

Adapun yang mereka namai Nazam ialah berbentuk syair juga, empat baris. Tetapi bilangan suku kata tidak tetap sepuluh suku dan akhir kalimat hanya sama bunyinya tetapi tidak sama hurufnya, misalnya:

Manalah saudara taulan dan sahabat  
Bersama ini hamba kirim surat  
Berisi pengajaran bersama nasihat  
Silakan baca dengan cermat.

(Hamka 1977, 17-174)

Walau bagaimanapun terdapat sekurang-kurangnya satu untai

puisi yang agak panjang, yang sesungguhnya berbentuk nazam, tetapi tidak pernah dibicarakan sebagai nazam. Puisi tersebut di-dapati sebagai sebahagian daripada pendahuluan kepada *Kitab Tajul-Muluk*, terkarang dalam pertengahan abad ke-19 atas perintah Sultan Mansur bin Sultan Johor Alamsyah. Gazali Dunia menganggap puisi tersebut sebagai syair dan memberikan contohnya dalam bentuk syair empat baris, dengan rima: a-b-c-b (Gazali Dunia 1969, 115 – 117). Sesungguhnya, jika diatur semula dalam susunan yang betul, puisi tersebut adalah nazam, terdiri daripada dua baris serangkap, dengan rima yang umumnya berbentuk a-b, c-b, d-b dan seterusnya. Perhatikan sebahagian daripada contohnya di bawah ini:

Kami mula dengan nama Allah  
Dengan Bismillah ambil sempurna.

Alhamdulillah sekalian puji  
Tuhanku Rabbi amat kuasa.

Kemudian selawat akan Nabi  
Sahabat sari sama serta.

Mula-mula kami surat  
Ilmu Hisab wahai saudara.

Siraju'zzulam nama kitab  
Wahai sahabat, bukan perbula.

Asal tarekat ilmu nujum  
Nabi Idris guru cetera.

Lagi tersebut dalam kitab ini  
Arta yang hilang di sini nyata.

(Gazali Dunia 1969, 116)

Keterangan Hamka dan contoh-contoh yang diberikannya menunjukkan seolah-olah nazam tidak berbeza daripada syair sama ada dari segi bentuk atau isi. Ini menyatakan bahawa nazam masih tidak dikenali dengan pasti oleh umum. Definisi dan contoh nazam yang dapat dianggap paling tepat ialah yang diberikan oleh Za'ba

dalam bukunya, *Ilmu Mengarang Melayu*:

'Seorang manakala hati dia  
Dengan angan-angannya tertipu daya.

Dan bergaduh gundah dengan loba akan  
Kaya dunia yang bukannya tempat kaya.

Dan berkelam-kabut dengan asap jahil  
Serta 'wujub suma'ah takbur dan ria'.

Mempersedar ia akan amal  
Ibadat dan ma'si melekaskan dia.

Lupa ia hari huru-hara mata  
Padanya yang tidak ia bersedia.

(Za'ba 1962, 239)

Za'ba kemudian memberikan huraian demikian:

Syair di atas, dalam bahasa Melayu biasanya disebut nazam; rangkapnya dihitung dua-dua kerat serangkap. Misal yang di atas itu terkarang mengikut timbangan yang dinamai 'bahar rajaz' dalam kaedah syair Arab. Pertentangan bunyinya yang biasa dibuat dalam bahasa Arab ialah dinamakan buni hujung antara dua kerat yang menjadikan bait itu sahaja; lain bait lain pula bunyinya yang sama itu. Tetapi dalam bahasa Melayu kerap dibuat seperti dalam contoh itu tadi, iaitu buni hujung kerat yang keduanya sahaja disamakan antara tiap-tiap bait hingga seberapa banyak. (Za'ba 1962, 239).

Seterusnya Za'ba mengemukakan: "contoh nazam yang lebih biasa dibuat, iaitu tiap-tiap bait disamakan buni hujung antara dua keratnya sahaja, tetapi berlainan dengan buni hujung yang sama pada bait-bait yang lain":

Aku mula nazam ini dengan nama  
Allah yang memberi fahamkan agama.

Puji itu bagi Allah dan salamnya atas Nabi  
Muhammadin yang Hashimi lagi Arabi.

Demikian lagi atas aulia yang berbahagia  
Dan sahabat Nabi kita yang mulia.

Waba'duhu kata fakir, "Hai saudara,  
Laki-laki perempuan anak dara".

"Barang siapa takut dia akan cedera  
Dan kehinaan akhirat yang bermara.

Dan mengharap akan untung yang bahagia  
Dan kepujian yang megah dan mulia.

Maka hendaklah mengajar dan mengaji  
Dan beramal, jangan leka umpat puji ...."

(Kitab *Tajul-Muluk*; dipetik  
dari Za'ba 1962, 239–240).

Keterangan-keterangan yang diberikan oleh Za'ba di atas itu menimbulkan beberapa kesimpulan:

1. Bahawa dalam puisi Melayu memang ada suatu bentuk puisi yang dapat dijeniskan sebagai nazam. Dengan perkataan lain, walaupun perkataan itu dalam bahasa asalnya bermakna susunan, atau puisi secara umum, dalam bahasa Melayu ia merupakan satu istilah teknik untuk satu genre puisi yang tersendiri.
2. Memang ada perbezaan antara nazam dengan syair dan genre puisi Melayu yang lain, bukan saja dari segi bentuk dan struktur tetapi juga daripada segi tema dan isi.
3. Bahawa dalam puisi Melayu, genre nazam ini telah juga berkembang hampir setara dengan genre-genre yang lain, walaupun tidak seluas pantun dan syair.

Kesimpulan (1) dan (2) akan dibuktikan melalui perbincangan dan contoh-contoh yang akan dikemukakan. Dan pada kesimpulan (3) memang dapat dikatakan bahawa nazam juga telah berkembang dalam bidangnya sendiri, terutama untuk tujuan dakwah dan pengajaran agama. Al-Syed Muhammad bin Syed Zainal Abidin al-Idrus, yang terkenal dengan nama Tuk Engku Tuan Besar Terengganu telah mengarang beberapa buah buku agama yang ditulis dalam bentuk nazam. Sebuah daripadanya berjudul *Kitab Kanz al-'Ula*, telah diterbitkan beberapa kali dan luas sekali penyebarannya,

khususnya di negeri Terengganu. Nazam ini mengandungi kisah hidup Nabi Muhammad S.A.W. dari sejak baginda dilahirkan hingga menjadi Rasul dan berpindah ke Madinah.

Sebuah lagi karangan Tuk Engku Tuan Besar Terengganu ialah *Nazam al-Jawahir al-Saniyyah*, juga menceritakan kehidupan Rasulullah, terutamanya mengenai mukjizat-mukjizat dan kelebihannya, di samping pengajaran-pengajaran agama dan ibadat yang lain. Beberapa salinan daripada buku ini didapati tersebar di seluruh Semenanjung. Bahagian permulaan nazam ini berbunyi demikian:

*Alhamdulillah*

Puji itu bagi Allah yang tunggal  
Yang tiada ada baginya itu misal.

Yang menunjuk atas wajib wujudnya  
Itu oleh ni kainat samuhanya.

Maka salatul-Llah dan salam-Nya  
Itu turun kedua atas Rasul-Nya.

Muhammadin yang dibangkit akan dia  
Dengan surah tauhid Tuhan yang sedia.

Pada masa sangat umum syiriknya  
Dengan sebab sangat banyak jahilnya.

Maka menunjuklah ia akan kita  
Dengan bujuk lagi nasihat yang nyata.

Tunjuk pula hingga perang dengan pedang  
Maka nyatalah agama putih terang.

(*Nazam al-Jawahir al-Saniyyah*, 4 - 5)

Dari Terengganu juga didapati sebuah karya nazam yang tidak diketahui judul dan pengarangnya, tetapi daripada segi bentuk dan isinya hampir sama dengan teks-teks yang telah disebutkan di atas. Sebahagian besar isinya membincarakan ilmu tauhid, iaitu mengenal dan memahami sifat 20 dengan lebih terperinci. Bahagian permulaan

daripada buku itu telah hilang; tetapi ‘mukadimah’nya berbunyi demikian:

*Mukadimah*

Wajib atas tiap-tiap mukalaf

Makrifat akan Tuhan dengan yakin.

Dengan kenalkan yang wajib baginya  
Dan yang harus dan mustahil atasnya.

Wajib pula kenal seumpama itu  
Bagi Rasul atas dia dengan tentu.

Wajib itu maka barang ada ia  
Tidak dapat pada akal ilmu dia.

Yang mustahil itu barang pula ia  
Tidak dapat pada akal wujud dia.

Harus itu barang sahih adanya  
Pada akal dan tiada pulanya.

Taklid pada ‘aqaid-al-iman itu  
Ditakuti tidak pada iman tentu.

(Ihsan Tuan Hj Salleh Hj Awang, Terengganu)

Selain daripada yang berbentuk manuskrip atau buku yang telah diterbitkan itu, terdapat pula beberapa teks yang merupakan helai-helai yang berasingan sebagai bahagian daripada sebuah manuskrip, atau sengaja berbentuk topikal seperti itu. Selain daripada terkumpul dalam simpanan perseorangan teks-teks demikian mungkin dapat ditranskripsi daripada penutur atau penzikir nazam di Terengganu. Secara keseluruhan isi teks-teks ini hampir sama dengan mansukrip atau buku-buku yang telah dibicarakan tadi, misalnya dengan *Kitab Kanz al-'Ula*, oleh al-Syed Muhammad al-Idrus; iaitu mengenai peri hidup Muhammad S.A.W. Satu salinan yang telah dirakam dan ditranskripsi (oleh penulis) tidak memberikan apa-apa keterangan tentang judul, pengarang atau tarikh; seluruh isinya menceritakan kelahiran Nabi Muhammad dan kehidupannya semasa kecil di bawah jagaan ibu susunya, Halimah

(Halimathun Sa'diah), hingga kepada kisah Jibril membelah dada dan membasuh hati baginda.

Bahagian permulaan nazam itu berbunyi demikian:

Dengar olehmu encik dan tuan  
Inilah kisah hamba khabarkan dia.

Tatkala Nabi hendak dilahirkan  
Tahulah habis laut dan daratan.

Cahaya rata sekalian alam  
Dijadikan Tuhan sekalian alam.

Nur Muhammad jatuhkan Abdullah  
Jadilah dok terlalu indah.

Perempuan muda di dalam Mekah  
Hendak melihat rupanya indah.

Lalu melihat rupa Abdullah  
Hendak menerima cahaya nubuwah.

Abdul Mutualib datanglah susah  
Mencari yang patut dengan Abdullah.

Kisah Nabi Muhammad S.A.W. dalam zaman ini berakhir dengan, (rangkap 143 – 150):

Habislah kisah Halimah Sa'diah  
Ibu susuan Nabi yang indah.

Allahumma Solli Ala Muhammad  
Ya Rabbi Solli alaihi wasallam.

Segeralah besar Nabi Muhammad S.A.W.  
Siang dan malam dengan selamat.

Sakit dan deman tiada yang sangat  
Makan dan minum tidak sangat.

Laku selakuan anbia  
Sama kawan budak jauhlah dia.

Diri sendiri melahirkan dia  
Dikehendaki Allah menjadi sendiri.

Dengan budak lain berlainan  
Tidaklah masuk bermain-mainan.

Umur empat puluh tahun bonda pun wafat  
Tidaklah hamba panjangkan kalam.

(Hj Awang bin Muhammad, Kuala Terengganu 1976)

Dan akhir nazam tersebut berbunyi begini:

Padalah kamu mendengarkan nazam  
Agamanya juga manfaat sekalian.

*Kanz al-Ula* dengan bab dan sifat  
Betul aturan Tuk Ku tu buat.

Fikir olehmua akan bermartabat  
Nabi Muhammad S.A.W. yang punya syafaat

Allahullazi khaliquna  
'Ala dinihi yan fa'una

Ertinya Allah Taala jua menjadikan sekalian  
kita.

Agama-Nya juga memberi manfaat akan sekalian  
kita.

Termaktub alai syahra Zulkaedah al-yaumi  
Anha rawal Ayyam fiddin Amin  
Tammatal qalam bil-khairil ajmain.

(Hj Awang bin Muhammad, Kuala Terengganu 1976)

Walaupun judul dan pengarang nazam ini tidak dapat dipastikan kerana tidak didapati keterangannya daripada informan atau teks tersebut, tetapi pada rangkap-rangkap yang mengakhiri nazam itu – seperti yang diberikan di atas – menunjukkan ia mungkin juga berjudul "*Kanz al-'Ula*" dan dikarang oleh Tuk Engku Tuan Besar Terengganu, kerana ada dikatakan:

*Kanz al-'Ula* dengan bab dan sifat  
Betul aturan Tuk Ku tu buat.

Apabila dibandingkan dengan *Nazam al-Ula* yang disebutkan tadi terdapat persamaan yang jelas dari segi bentuk puisi, susunan perkataan dan isinya terutama pada bab yang menceritakan Nabi

Muhammad S.A.W. dibelah dadanya oleh *Jibril: Kitab Kanz al-'Ula* menceritakannya demikian:

Maka sanalah mula belah dada yang mulia  
Dengan perintah Tuhan yang sangat mulia.

Pada masa yang ada dari umur yang mulia  
Dua tahun dan dua bulan belahkan dia.

Maka datangkan dia malaikat yang mulia  
Dengan suatu batil dari emas yang mulia.

Maka dipenuhkan dia dengan embun yang hening  
Maka seorang lain pegang kain yang mulia.

Maka mengambil oleh mereka itu yang mulia  
Akan Rasul tu pula dengan sangat mulia.

Maka dibelah akan itu dada bahagia  
Dari lubang lehernya hingga pusat yang mulia.

Maka dibelah pula akan hati yang mulia  
Maka darah yang jahat itu dibuang dia.

Maka dibasuh dia dengan embun yang sedia  
Maka dipenuh dia dengan iman dan cahaya.

Maka dicapkan pula atas hati yang mulia  
Maka berasa sejuk dan teranglah ia.

Maka mengatup pula oleh Jibril yang mulia  
Dengan kainnya itu akan dada yang mulia.

Maka ditimbang dia dengan amat yang mulia  
Maka beratnya jua tidak samakan dia.

(*Kitab Kanz al-'Ula*, 22)

Dalam "Nazam Kanz al-'Ula" (?), pada bahagian yang sama, menceritakan demikian:

Umur dua tahun Nabi Muhammad S.A.W.  
Turun bermain sekeliling rumah.

Dengan Dhamrah anak ni hamba  
Tiba terkam Dhamrah kan hamba.

"Hai Mak aku sudahlah sudah  
Tiga orang datang membunuhkan Muhammad S.A.W.

Hamba pun terkam berdebar lenyap  
Tatkala sampai suka Muhammad S.A.W.

Hamba pun tanya 'mu kena apa?'  
Menjawab Muhammad, "Orang pegang hamba.

Membelahkan dada, hati dibasuh  
Air pun ada sudah ditaruh."

Dengan perintah Tuhan yang Qadir  
Tidak rasa sakit tidak rasa pedih.

Jibril pun katup dengan segera  
Satu pun tidak menjadi cedera.

Kemudian dari itu hantarkan Mekah  
Akan nenek dan bonda barulah sudah.

(Awang bin Muhammad)

Walaupun kelihatan sedikit perbezaan pada babak-babak yang dibandingkan itu, tetapi hanya dari segi perkataan dan susunan ceritanya; sedangkan pada kisah yang diceritakan secara keseluruhan adalah sama. Oleh itu besar kemungkinannya bahawa nazam yang dimaksudkan itu adalah juga karangan Syed Muhammad bin Syed Zainal Abidin al-Idrus, sama ada perluasan yang kemudian, atau yang lebih terdahulu daripada karyanya yang paling hampir, iaitu *Kitab Kanz al-'Ula* tadi.

Bahan-bahan dan contoh-contoh yang dikemukakan di atas adalah daripada yang didapati di Terengganu, khususnya karya pengarang yang sama, iaitu al-Syed Muhammad bin Syed Zainal Abidin al-Idrus. Di tempat-tempat lain di Semenanjung tidak terdapat teks-teks demikian, yang dipergunakan seperti yang terdapat di Terengganu. Namun demikian ada sebuah teks nazam yang didapati di Melaka dengan judul *Tanbih al-Kusla* (terjemahan daripada *Nazam Arzal-an-Nas*), oleh Ahmad bin Haji Abdul Rauf, mufti negeri Melaka, pada tahun Hijrah 1344 (Hj. Muhammad Idris

1925). Bahagian permulaan nazam tersebut diberikan di bawah:

Allah Allah azzawajalla Tuhan kami  
Kami minta ampun akan dosa kami.

Dengan Allah kami mula zaman ini  
Sebab dengan Dia jadi kitab ini.

Hai saudara kami khabar akan kamu  
Mengenal Allah fardu ain atas kamu.

Sabda Nabi awwaluddin ai makrifat  
Bukan salat bukan siam bukan zakat.

Dan yang wajib bagi Allah dua puluh  
Jangan kurang jangan lalai biar sungguh.

Wujud itu erti ada Tuhan kita  
Yang mustahil sudah nyata pada kita.

Qidam itu yang kedua sifatnya  
Sedia Tuhan tiada mula maknanya.

(Ahmad bin Hj Abdul Rauf)

Daripada contoh-contoh yang dikemukakan di atas membuktikan puisi nazam telah berkembang dan berperanan dalam menyebarkan agama Islam, di samping mengisi perbendaharaan sastera Melayu, khususnya dalam memberikan kepelbagaiannya bentuk, imaginasi dan daya cipta masyarakat Melayu.

### Bentuk dan Struktur

Bertitik tolak daripada keterangan Za'ba di atas tadi dan dibandingkan dengan contoh-contoh yang telah dikumpulkan, dapatlah dikatakan bahawa nazam, dalam bahasa Melayu adalah puisi yang terdiri daripada dua baris serangkap, tiap-tiap sebaris mengandungi lima atau enam perkataan, menjadikan jumlah suku katanya antara sepuluh hingga 12. Dalam contoh yang lain, jumlah perkataan dalam sebaris mungkin lebih daripada enam dan jumlah suku katanya menjadi lebih daripada 20. Dalam semua keadaan, unit minimum bagi sebuah nazam ialah satu rangkap yang terdiri daripada dua baris; sementara unit maksimum, tidak ditentukan, mungkin sebuah buku

mengandungi lebih 1 000 rangkap.

Dari segi rima, umumnya nazam Melayu memakai skema rima a-a, a-a dan seterusnya iaitu serima, atau a-b, c-b, d-b dan seterusnya, iaitu berima pada setiap baris akhir dalam semua rangkap; selain itu ialah a-a, b-b, c-c dan seterusnya, iaitu berima dalam setiap baris dalam serangkap, tetapi tidak berima antara serangkap dengan yang lain.

Di bawah ini dikemukakan beberapa contoh dengan sedikit variasi pada sesuatu bentuk rima yang diterangkan di atas:

1. Rima a-a, a-a, a-a dan seterusnya iaitu serima:

Dan menghabarkan oleh bonda Rasul yang mulia  
Dengan tiada berat pada mengandungkan dia.

Maka datangkan dia dalam tidur yang mulia  
Oleh satu yang datang menghabarkan dia.

Dengan mengandungkan anak sangat bahagia  
Lagi pula penghulu bagi alam ni ia.

Lagi pesankan pula dengan beberapa petua  
Dengan dibaca dia dengan lidah yang mulia.

Maka jadilah ia ulang-ulangkan dia  
Hingga sampai kepada masa zuhur yang mulia.

Lagi pula terangkat haid itu yang nyata  
Maka yakinlah ia dengan mengandungkan dia.

Datang pula kepada Aminah bondanya  
Pada segala bulan oleh Rasul yang mulia.

Dengan khabar yang baik dan menyuka dia  
Dengan mendapat anak yang sangat bahagia.

(*Nazam Kanz al-'Ula*, 11)

2. Rima a-b, c-d, d-e dan seterusnya:

Dengan nama Tuhanmu Allah jua kumula  
Akan nazamku ini dengan tolongnya ia.

Allah jua kupuji dengan lidah dan hati  
Atas nikmatnya atasku dan lain ku pula.

Dan atas bangkitnya akan Rasul yang mulia  
Dengan menunjuk kita bagi jalan bahagia.

Dan salawat dan salamnya tu turun kedua  
Atas kasihnya juga Ahmad Rasul yang mulia.

Dan atas keluarganya yang suci  
Dan sahabat yang punyai martabat yang mulia.

Dan atas segala isterinya yang suci  
Dan anak dan cucunya pula yang mulia.

Dan atas segala yang mengikut baginya  
Dengan amal yang salih dengan sunah yang mulia.

3. Rima a-a, b-b, c-c dan seterusnya:

(blm 1)

A'raf itu di antara syurga ia  
Dan neraka sangat tinggi puncak dia.

Sangat banyak laki-laki pada situ  
Yang bersama baik jahat mereka itu.

Pandang oleh mereka itu sekalian  
Akan isi neraka dan syurga Tuhan.

Akan isi syurga kenal mereka itu  
Dalam neraka sebab ada tanda situ.

Dengan putih muka orang yang mukmin  
Dengan hitam muka orang yang kafirin.

Seru oleh orang yang di atas a'raf itu  
Akan isi syurga Tuhan dengan tentu.

Dengan salam atas kami hai Muslimin  
Dan bahagia nyawa kamu hai mukminin.

(*al-Jawahir al-Saniyyah*, 112)

4. Ulangan baris dan ulangan kata; juga dalam rima a-a, a-a dan seterusnya:

Ulangan baris:

Maka tuanlah juga tempat harapan hamba  
Pada masa yang maut itu hadirkan hamba.

Tuan itulah pula tempat harapan hamba  
Pada masa yang syaitan itu fitnahkan hamba.

Tuan itulah pula tempat harapan hamba  
Pada masa malaikat itu tanyakan hamba.

Tuan itulah pula tempat harapan hamba  
pada masa yang kubur itu mengapit hamba.

Tuan itulah pula tempat harapan hamba  
Pada hari yang anak itu lupakan hamba.

Tuan itulah pula tempat harapan hamba  
Apabila matahari itu gelaplah ia.

Tuan itulah pula tempat harapan hamba  
Pada hari berhambur bintang langit yang mulia.

(*al-Jawahir al-Saniyyah*, 14)

(Baris pertama setiap rangkap diulang hingga 38 rangkap)

5. Ulang kata:

Maka maadat ia akan nisak yang mulia  
Pada masa kecilnya serta sukakan dia.

Lagi bersunyi bagi diri yang mulia  
Pada tempat yang sunyi pada Hira yang mulia.

Maka itulah adat bagi orang yang mulia  
Yang menuntut ia akan untung bahagia.

Maka rajin anggota pada nisak yang mulia  
Apabila ditunjuk akan hati yang mulia.

Maka masa yang empat dari tahun yang mulia  
Maka wafatlah bonda bagi Rasul yang mulia.

Pada hujan yang ada pada Mekah yang mulia  
Pada masa baliknya dari Taibah yang mulia.

(*Nazam Kanz al-'Ula*, 16)

6. Jumlah perkataan yang lebih banyak dalam sebaris:

Contoh-contoh yang dikemukakan di atas memperlihatkan bentuk dan struktur yang sama, iaitu terdiri daripada dua baris serangkap, dengan skema rima a-a, a-a; a-b, d-b dan a-a-a atau serima. Dari segi jumlah kata dalam sebaris, umumnya dari empat hingga enam perkataan, sedangkan jumlah enam perkataan merupakan ciri nazam yang tipikal. Tetapi mungkin juga berlaku keadaan yang terkecuali; misalnya terdapat suatu contoh yang mempunyai bentuk dan struktur yang sama dengan sistem rima a-a-a atau serima, tetapi dalam sebaris mengandungi lebih daripada enam perkataan. Hitung panjang, jumlah kata dalam nazam ini antara 10-12 dan jumlah suku kata hingga 30, dalam sebaris. Nazam ini tidak mempunyai judul dan tidak diketahui pengarangnya, tetapi isinya juga membicarakan Sifat 20, di samping pelajaran-pelajaran agama yang lain. Bahagian permulaan nazam tersebut berbunyi demikian:

Dan daripada Allah jua kuharap akan menunjuk  
kepada yang betulnya.  
Dengan kemegahan penghulu kita dan segala  
keluarganya.  
Maka mula-mula wajib atas tiap-tiap mukalaf  
pada agamanya.  
Ini mengenal akan Allah dengan yakin  
dan tetap hatinya.  
Dengan mengenal akan yang wajib dan yang  
mustahil atasnya.  
Demikian lagi yang harus dan akan makna  
sekaliannya.  
Demikian lagi wajib mengenal akan umpama  
yang demikian itu pada segala Rasul-Nya.  
Maka tuntutlah olehmu jangan berhenti  
daripadanya.

(hlm 1)

Ringkasnya, dari segi rima, seluruh buku itu, yang mengandungi 342 rangkap, seluruhnya berakhir dengan vokal /a/: ia, dia, mulia, aulia, cahaya, hamba, baginda dan lain-lain. Dan dalam mengekalkan sifat serima ini dapat dilihat ulangan-ulangan kata yang sama, ia, dia, mulia dan aulia; pada beberapa tempat perkata-

an-perkataan itu tidak mempunyai fungsi sewajarnya, selain dari pada pengekalan rima. Keadaan seperti ini umum terdapat dalam nazam yang lain, kecuali, (kalau boleh dikecualikan) Nazam Tanbih al-Kusla, yang lebih bebas ikatan rimanya.

### Analisis Tema dan Isi

Dari segi penyebaran tema dan pencakupan isi, nazam tidaklah seluas pantun dan syair yang dapat dikatakan meliputi seluruh bidang kehidupan masyarakat Melayu. Nazam, secara keseluruhan merupakan alat untuk menyampaikan pelajaran agama Islam pada peringkat yang paling dasar yang perlu diketahui oleh seorang pelajar atau setiap mukalaf untuk menunaikan kewajipan agamanya. Hal ini jelas disebutkan oleh pengarang *Kitab Kanz al-'Ula* pada bahagian akhirnya:

Kadar inilah sahaja barang yang muta'lif akan dia oleh al-'alim  
al-'alimat al-khabar al-fahamat,  
al-Syed Muhammad bin Zainal Abidin al-Idrus.  
Saqi Allahu tharahu saibal rahmat waqada 'alaifi  
sajal-il-nimat. Tetapi sekadar ini pun  
memadailah  
dahulu bagi awam Melayu yang berkehendak  
mengetahui akan perjalanan junjungan kita saidul mursalin.  
Adapun bagi orang yang berpengaruh bolehlah ia  
membaca akan kitab-kitab siarah dan tawarikh  
yang  
panjang-panjang di dalam karangan bahasa Arab.

(Syed Muhammad Zainal Abidin al-Idrus 1931,45)

Demikian juga daripada *Tanbih al-Kusla*:

Telah tamat nazam ini dengan berkat  
Nabi kita yang dibenarkan mukjizat  
Aku nama nazam ini Mukadimah  
Bagi orang baru belajar ilmu Allah.

(Ahmad Hj Abd. Rauf 1925, 12)

Secara keseluruhan pengajaran yang disampaikan melalui

karya-karya nazam yang telah diketahui setakat ini ialah:

1. Menceritakan peri hidup Nabi Muhammad S.A.W., mengenai keturunannya, mukjizatnya, kehidupannya semasa kecil hingga menerima wahi dan menjadi Rasul.
2. Pengajaran ilmu tauhid iaitu mengenal Allah, keterangan yang terperinci mengenai sifat 20, sifat-sifat yang wajib, yang harus dan yang mustahil bagi Rasul.
3. Pengajaran ilmu fiqah, mengerjakan ibadat, syarat-syarat sah bersuci, rukun sembahyang, syarat-syarat sah dan batalnya.
4. Rukun iman, dengan huraian yang terperinci tentang syarah dan maknanya.

Riwayat hidup Rasulullah diberikan dengan panjang lebar dalam *Kanz al-'Ula*. Selain daripada selawat dan mukadimah, nazam itu seluruhnya mengisahkan riwayat Rasulullah mulai dari Nur Muhammad yang diturunkan oleh Allah dari Adam sehingga Abdullah dan Aminah. Nabi Muhammad S.A.W. dalam kandungan hingga dilahirkan, sifat-sifatnya yang ajaib semasa lahir, tentang ibu susunya Halimatun Sa'diah, kehidupan Nabi Muhammad S.A.W. semasa kecil, kisahnya dibelah dada dan dibersihkan hatinya oleh Jibril Alaihissalam, perkahwinannya dengan Khadijah, seterusnya menerima wahi dan memulakan seruannya, tentangan yang diberikan oleh kaum Quraisy di Mekah hingga baginda berhijrah ke Taibah. Dari Taibah Nabi Muhammad S.A.W. memperkuuhkan Islam, memerangi kaum Quraisy dan kaum Yahudi di Taibah. Peperangan terakhirnya dengan Quraisy ialah peperangan Badar; dan nazam ini berakhir dengan menceritakan kematian puteri Rasulullah, Rukiah.

Motif yang terpenting dalam cerita ini ialah ketinggian dan kelebihan Nabi Muhammad S.A.W. sebagai Rasul pada akhir zaman, melebihi nabi-nabi yang lain:

Saidina Muhammad tu lah Rasul yang tinggi  
Zat dan sifat dan nisab dan perangai yang mulia.

Dan iaitulah langit yang ke atas bandingnya  
Dan anbia lainnya tu bawahnya ia.

Dia iaitu matahari yang lebih cahayanya  
Dan anbia lainnya tu bintangnya ia.

Mana samakan dia oleh Rasul yang lain  
Pada tingginya itu dan murahnya ia.

Dan ialah laut yang sangat luasnya  
Dan ombaknya limpah pada alam ni ia.

Dan ialah awan yang menghamburkan hujan  
Pada daratan rata dan lautnya ia.

Lagi ialah angin yang dilepaskan dia  
Dengan tiada hingga pada alam ni ia.

(Syed Muhammad Zainal Abidin al-Idrus, 1931, 5)

Nabi Muhammad S.A.W. digambarkan sebagai manusia yang paling unggul dan istimewa di sisi Tuhan. Walaupun baginda disekska oleh musuh-musuhnya dan Tuhan memberikannya peluang untuk memintakan balasan yang buruk kepada mereka. Rasulullah sebaliknya mendoakan supaya Allah menyedarkan mereka kepada kebenaran:

Maka membaca doa oleh Rasul yang mulia  
Dengan mengadu diri bagi Tuhan yang kaya.

Maka datangkan dia Jibril itu yang mulia  
Dengan disuruh oleh Tuhan yang sedia.

Maka samakan dia oleh malaikat yang lain  
Yang pegangkan bukit dengan meruntuhkan dia.

Maka serulah ia akan Rasul yang mulia  
“Allah suruhkan hamba ikut tuan yang mulia.

Jika sukalah tuan hamba tindahkan bukit  
Atas kepala Ta'if hamba tindahkan dia”.

Maka jawabkan dia oleh Rasul yang mulia  
Dengan jawab yang baik dan kata yang mulia:

“Tapinya kuharap dari Tuhan yang Kaya  
Mengeluarkan anak yang mengesakan Dia.

Daripada salbi itu yang cela  
Lagi tidaklah pula mensyirikkan dia”.

(Syed Muhammad Zainal Abidin al-Idrus, 1939, 18 – 19)

Kelebihan Nabi Muhammad S.A.W. dan keluarganya dan orang-orang yang membantunya ketika dia masih kecil diceritakan dengan terperinci dalam sebuah karya nazam yang lain, yang tidak berjudul, tapi mungkin dikarang oleh penulis yang sama. Di sini juga ditunjukkan kelebihan ibu susu Nabi Muhammad S.A.W., Halimatun Sa'diah dan berkat yang didapatinya daripada khidmatnya yang mulia itu. Bahagian akhir nazam itu seolah-olah memusatkan kepada aspek menyusukan Nabi Muhammad S.A.W, lebih dari pada aspek-aspek yang lain:

Selamatlah kami menyusukan Muhammad  
Barang dibuat boleh selamat.

Selamatlah kami menyusukan Muhammad  
Badan yang kurus menjadi gemuk.

Selamatlah kami menyusukan Muhammad  
Barang yang mahal menjadi murah.

Selamatlah kami menyusukan Muhammad  
Isi negeri datang mengkhidmat.

Selamatlah kami menyusukan Muhammad  
Ditetapkan Allah iman dan taat.

Selamatlah kami menyusukan Muhammad  
Cerah dan terang malam yang kelam.

(Teks daripada Hj Awang bin Muhammad,  
rangkap 151 – 156)

Dalam nazam-nazam *al-Jawahir al-Saniyyah* dan *Tanbih al-Kusla* dihuraikan juga tentang kelebihan Rasulullah di dalam pembicaraan mengenai rukun iman, percayakan Rasul-Rasul Allah. Dalam kedua-dua buku itu diceritakan tentang kelahiran Nabi Muhammad, kelebihan mukjizatnya, isteri-isteri dan anak-anaknya dan para sahabat yang dimuliakan.

Mengenai mukjizat Nabi, *al-Jawahir al-Saniyyah* menceritakan kannya demikian:

Dalil benar mereka tu sekalian  
Tu mukjizat yang menurun oleh Tuhan.

Turun ia menepati firmannya  
Hambaku ni sangat benar khabarnya.

Yang terlebih besar dari sekalian  
Tu mukjizat Nabi kita itu Quran.

Lagi pula israk dan mikrajnya  
Tu mukjizat sangat besar keduanya.

Dan matahari tu ditahan akan dia  
Masa balik Rasul dari mikraj dia.

Dan dibelahkan bulan baginya  
Dan dibalikkan matahari pulanya.

Dan mengalir air dari selang jari  
Pada masa sahabat adu dan berlari.

Dan berkat pada makanan yang ada  
Yang sedikit akan orang banyak pada.

(Syed Muhammad Zainal Abidin al-Idrus 1939, 18–19)

Walau bagaimanapun *al-Jawahir al-Saniyyah* tidak seluruhnya menceritakan perihal Rasulullah; tetapi sebahagian besar daripadanya memasukkan pelajaran tauhid, dengan sifat 20, sifat-sifat yang wajib bagi Rasul, rukun-rukun iman yang lain, percayakan kitab-kitab dan malaikat, hari kiamat dan loh mahfuz di mana untung baik dan jahat telah sedia tersurat. Dihuraikan juga tentang maut, peristiwa hari kiamat dan penyeksaan di neraka; perhatikan sebahagian daripada contohnya di bawah:

Neraka itu sangat keras apinya  
Dengan banyak ganda atau lainnya.

Pada seribu tahun dinyalakan  
Hingga putih warna dia dipandangkan.

Maka dinyalakan pula akan dia  
Pada seribu yang lain merah ia.

Pada seribu yang tidak dinyalakan  
Hingga jadi hitam gelap dipandangkan.

Maka jadi hitam gelap apinya  
Tidak dapat dirupakan gelapnya.

Manusia dan belerang umpan dia  
Atau batu yang disembah akan dia.

(Syed Muhammad Zainal Abidin al-Idrus 1938, 98 -99)

*Tanbih al-Kusla* lebih jelas merupakan buku permulaan dalam ilmu fikah, khususnya untuk kanak-kanak sekolah dan orang-orang dewasa yang tidak dapat menamatkan pelajaran mereka di peringkat sekolah rendah. Penerangannya jelas dan kalimat-kalimatnya mudah difaham; misalnya dalam menerangkan rukun mandi:

Rukun mandi fardu mandi dua bilang  
Yang pertama hendak niat yang terbilang.

Sekurang-kurangnya 'sahaja aku mandi fardu'  
Semua hadas memadai niat ini satu.

Yang kedua merata air pada badan  
Sunat pula bergosok-gosok jangan segan.

Sunat pula mengambil wuduk dahulunya  
Berapa banyak pula sunat baginya.

(Ahmad Hj Abdul Rauf 1925, 20)

Huraian tentang '*Aqaid al-iman*' lebih jelas dan luas di dalam sebuah nazam yang berkenaan. Buku ini tidak mempunyai judul, tetapi mungkin lebih tepat untuk dikenali sebagai 'Nazam 20' atau '*Aqaid al-Iman*'. Kalimat-kalimatnya lebih panjang dan penerangannya lebih tinggi daripada yang diterangkan dalam buku-buku yang lain. Dalam membahaskan 'kudrat', dikatakan:

Lagi kuasa pada mengadakan mumkanat  
atau meniadakan sekalian.

Atau muafakat iradat dengan kehendaknya  
Sama yang menyertakan dia oleh kudrat yang  
baharu atau sebab yang beradatnya.

Atau yang sunyi daripada kedua seperti langit  
dan buminya.

Maka mumkanat yang tiga itu takluklah dengan  
dia kudrat dan iradat Tuhananya.

Tiada memberi bekas sekalian kali  
oleh kudrat yang lain padanya.

Maka Wal-Llahu 'ala kulli syai'in qadir  
itulah dalilnya

Telah menyebutkan dia oleh Allah pada Qurannya.

(*Aqaid al-Iman*, 32)

Dalam membahaskan sifat 'qiamuhu binapsih', nazam ini menentang dengan keras faham Wujudiah; katanya:

Dan tiada daripada nur dan tiada daripada  
zalimatnya.

Maka tiadalah sampai kepadanya oleh pendapat  
segala makhluknya.

Maka kafirlah Wujudiah yang zindik  
lagi celakanya.

Kerana mendakwa akan wujud Allah  
itulah wujud darinya.

Maka tertegahlah hati daripada mengadakan  
hakikat zatnya.

Demikianlah lagi mata seperti yang tersebut  
pada Qurannya.

Dan kelulah lidah daripada menyatakan dia  
dengan hakikatnya.

Maka berhatilah olehmu daripada memfikirkan  
kiah zatnya.

(*Aqaid al-Iman*, 2-9)

### Fungsi dan Penyebaran

Fungsi dan penyebaran nazam tidaklah seluas pantun dan syair. Ini ialah kerana peranan nazam agak terbatas pada bidang yang berhubungan dengan agama sahaja. Dalam penyebarannya, puisi nazam disampaikan dalam dua bentuk: pertama dalam bentuk nasyid dan kedua, dalam bentuk zikir. Namun, kedua-duanya bertujuan menyampaikan pelajaran agama melalui lagu-lagu, bukan sahaja kepada pelajar-pelajar yang menyertai kumpulan itu tetapi juga pendengar-pendengar yang kebanyakannya tidak boleh

membaca atau tiada kesempatan membaca.

Lagu-lagu nasyid dalam bentuk paduan suara atau koir (*choir*), biasanya disampaikan oleh murid-murid sekolah atau pelajar kelas-kelas agama rakyat. Aktiviti menyanyi seperti ini merupakan sebahagian daripada kurikulum pelajaran agama di sekolah atau di kelas itu; dan tujuan pokoknya untuk memudahkan pelajar-pelajar mengingati dan menghafal bahan-bahan yang dipelajarinya. Kumpulan-kumpulan nasyid ini juga mengambil bahagian dalam acara-acara dan keramaian yang diadakan oleh masyarakat termasuk majlis perkahwinan, khatam Quran, membuat anak (berendoi), sambutan Maulud, bahkan pesta-pesta kebudayaan. Di negeri Melaka, bahan yang digunakan dalam nyanyian ini yang biasanya disebut 'nazam', seluruhnya diambil daripada *Kitab Tanbih al-Kusla*, yang telah dibincangkan di atas tadi.

Terdapat beberapa kumpulan yang aktif, terutamanya dalam daerah Serkam, Kampung Tehel, Kampung Teluk Mas dan lain-lain, yang boleh mempersembahkan nazam dan yang selalu dijemput untuk tujuan-tujuan perayaan, perkahwinan, berkhataf Quran, menyambut mauludun Nabi dan sebagainya. Lagu bagi nazam di Melaka adalah dalam bentuk nasyid dan sama antara satu kumpulan dengan yang lain. Irama lagunya juga dapat dikatakan 'monotonous', sama dari awal hingga ke akhir buku. Aktiviti bernazam di Melaka merupakan antara aktiviti kesenian yang popular. Lagu dan seni kata nazam dapat dihafal dan dilakukan oleh kanak-kanak dan orang-orang dewasa termasuk yang telah berumur, bahkan yang buta huruf. Petikan di bawah ini dirakamkan daripada seorang tua yang buta huruf dan cacat anggota, berusia lebih 70 tahun:

Alhamdulillahi'l qadim kita puji  
Sebab dia boleh beri taufik kami.

Hai saudara ini satu nasihat fakir  
Faham kamu baik-baik sambil fikir.

Kita ini akan mati sudahnya  
Tiada tahu bila datang ajalnya.

Ambil bekal kamu pergi negeri orang  
Kalau tidak kami hina pada orang.

Kalau sungguh kamu yakin pada mati  
Jangan kamu pada lalai pada mati.

Baran tidak bila ada bekal kamu  
Puas hati tiada lagi kesal kamu.

Sabda Nabi huru-hara pada kubur  
Masuk rantai pada mulut sampai dubur.

Rantai itu merah pula dengan api  
Hangus perut, hangus otak, hangus hati.

Hairan kami akan kamu punya fikir  
Kamu kata kamu mati tapi mungkir.

Pahit mati itu bukan macam jadam  
Bukan pula macam api boleh padam.

Lagi pula huru-hara di akhirat  
Tiada dapat kami khabar dengan loghat.

(Fatimah bt Lembing, Melaka 1978)

Di Terengganu, lagu nazam menampakkan kepelbagaian yang lebih banyak daripada yang terdapat di Melaka. Dari segi lagu, nazam disampaikan dalam bentuk zikir dan membaca nazam dikenali dengan nama 'bernaban' (bernazam). Terdapat beberapa kumpulan yang biasa mempersembahkan nazam ini terutamanya dalam daerah Kuala Terengganu, Besut, Kemaman dan Dungun. Kumpulan-kumpulan ini kerap dijemput ke majlis-majlis dan perayaan-perayaan yang diadakan, baik di peringkat kampung maupun di peringkat daerah dan negeri. Bahan yang digunakan untuk membaca atau menzikirkan nazam di Terengganu ialah *Kitab Kanz al-'Ula*, sama ada dalam bentuk buku atau fragmen-fragmen berupa salinan tulisan tangan yang kemudian.

Satu hal yang istimewa mengenai nazam Terengganu ialah adanya kepelbagaian dalam lagu-lagu yang dinyanyikan. Satu bab atau 'surah' dinyanyikan dengan rentak atau irama yang berlainan daripada surah yang lain. Menurut informan-informan kami di Terengganu, pada masa nazam mencapai puncak perkembangannya, terdapat 17 buah lagu yang berlainan; tetapi pada masa ini telah tidak ada lagi kumpulan atau ahli nazam perseorangan yang dapat mempersembahkan lagu-lagu tersebut. Daripada kumpulan-kumpulan yang telah dikaji, hanya didapati tiga variasi lagu yang

agak sukar dibezakan oleh pendengaran, terutamanya bagi orang yang belum biasa mendengar lagu-lagu nazam.

Selain daripada *Kitab Kanz al-'Ula*, terdapat juga petikan-petikan daripada *Kitab al-Jawahir al-Saniyyah*, atau bahagian-bahagian yang tidak diketahui judulnya, seperti misalnya, contoh yang diberikan oleh Haji Awang bin Muhammad di atas tadi. Walau bagaimanapun, dari segi lagu dapat dikatakan sama dengan yang terbiasa (seperti yang diterangkan di atas), baik apa pun juga bahan yang digunakan. Petikan di bawah ini ialah sebahagian daripada rakaman yang dibuat dalam daerah Sungai Tong, Besut, dan ternyata merupakan sebahagian daripada *Kitab Kanz al-'Ula*:

Maka sangat segera besar Rasul yang mulia  
Pada malam dan siang serta sentosa ia.

Maka besarlah ia dalam harinya itu  
Banding budak yang lain pada sebulan ia.

Maka berdirilah ia atas kaki yang mulia  
Pada bulan yang tiga dari umur yang mulia.

Maka pada bulan yang lima dari bulannya itu  
Maka berjalan lambat dan perlahan ia.

Maka gagahlah ia serta fasih berkata  
Pada sembilan bulan dengan nyata dan mulia.

Ya rabbi salli 'alal mustafa  
Wa alihu salliman wasahbihi'l-syarfa.

(Hajah Maimunah Hj Ramli, Besut 1978)

Aktiviti bernazam didapati juga di beberapa tempat di Pahang dan di Perak. Di Pahang, dalam daerah Ulu Tembeling, bahan yang digunakan adalah juga daripada *Kitab Kanz al-'Ula* dan lagunya hampir sama dengan yang umum di Terengganu; bezanya mungkin terletak pada tinggi rendahnya suara dan panjang pendeknya suku kata. Tetapi dalam daerah Raub, Pekan dan Rompin, perkataan 'nazam' atau 'bernazam' merujuk kepada istiadat membuat anak atau 'berendoi'; dan puisi yang dinyanyikan, tidak berbentuk nazam, tetapi syair; iaitu sama dengan syair-syair endoi yang didapati juga di negeri-negeri lain.

Di negeri Perak, nazam dikenali di beberapa daerah termasuk Kampar, Ipoh dan Taiping, tetapi menggunakan bahan-bahan yang lain misalnya daripada kitab *Tajul-Muluk*, atau bahagian-bahagian tulisan tangan daripada buku-buku agama. Lagunya pula hampir sama dengan yang di Melaka dan penyebarannya lebih umum di sekolah-sekolah agama dengan tujuan menyampaikan dan mengingat bahan-bahan pelajaran. Petikan di bawah ini merupakan sebahagian daripada rakaman yang dibuat di daerah Parit, Perak. Informan berusia 78 tahun, boleh membaca tetapi yang diturunkannya di sini adalah daripada ingatannya sendiri:

Kami mula dengan nama Allah  
Dengan Bismillah ambil sempurna.

Alhamdulillah sekalian puji  
Tuhanku rabbi amat kuasa.

Kemudian selawat akan Nabi  
Sahabat sari sama serta.

Amma ba'du wahai tuan  
Inilah karangan ajab semua.

Mula-mula kami surat  
Ilmu Hisab wahai saudara.

Siraj al-Dzalam nama kitab  
Wahai sahabat bukan perbola.

Asal tarekat ilmu nujum  
Nabi Idris guru citra.

..... dan seterusnya

(Hajah Teh Mariatul Qibtiah, Perak 1979)

Ringkasnya, daripada contoh-contoh yang telah dikumpulkan setakat ini menunjukkan kegiatan bernazam terdapat dalam beberapa daerah di Semenanjung Malaysia, walaupun bahan yang digunakan mungkin berlainan, bukan sahaja dari segi teks bahkan juga dari segi genre yang dimaksudkan. Ini juga sekali lagi membuktikan bahawa masyarakat masih memahamkan 'nazam' sebagai mewakili dua pengertian; pertama, puisi secara umum dan kedua, nazam sebagai satu jenis puisi tertentu yang mempunyai ciri-cirinya sendiri.

## BAB V

### GURINDAM, SELOKA DAN TEKA-TEKI

DALAM Bab II telah diberikan kesimpulan bahawa puisi Melayu tradisional dapat digolongkan ke dalam dua kategori:

1. Genre yang tertentu bentuk dan strukturnya; iaitu pantun, syair dan nazam.
2. Genre yang tidak tertentu bentuk dan strukturnya; iaitu gurindam, seloka, teka-teki, talibun atau sesomba, prosa berirama atau prosa lirik, teromba, mantera dan dikir (zikir).

Dengan perkataan lain, puisi dalam golongan (2) di atas adalah daripada bentuk bebas, atau ikatan puisi bebas dengan pengertian tidak mempunyai struktur tertentu dari segi baris, rangkap dan rima. Walaupun begitu masih dapat dibahagikan ke dalam genre-genre yang tersendiri berdasarkan isi dan ciri-ciri lain puisi tersebut.

Dalam bab ini akan dibincangkan tiga genre yang pertama dalam golongan ini, iaitu gurindam, seloka dan teka-teki. Pengelompokan ketiga-tiga genre itu dalam satu bab dirasakan sesuai kerana ketiga-tiganya dapat dikatakan mempunyai beberapa persamaan. Dari segi bentuk, ketiga-tiganya tergolong sebagai ikatan bebas, dengan ciri-ciri puisi bebas yang disebutkan di atas. Dan selain daripada itu seolah-olah adanya suatu struktur dalaman yang ada dalam setiap genre tersebut. Sebuah gurindam, khususnya yang telah terpakai sebagai bidalan, atau yang mempunyai bentuk seperti "Gurindam Dua Belas" oleh Raja Ali Haji, dikatakan terbahagi

kepada dua unit. Unit atau baris pertama dalam setiap rangkap dapat dianggap sebagai syarat (*condition, protasis*), dan baris kedua sebagai jawab (*answer, apodosis*); misalnya dalam contoh-contoh di bawah ini:

Persiapan yang indah-indah  
Itulah ilmu yang memberi faedah.

Pekerjaan marah jangan dibela  
Nanti hilang akal di kepala.

Janji itu sebagai hutang  
Ingatkan dia pagi dan petang.

Kunci hati ialah iman  
Bagi kelakuan jadi pedoman.

Kadaan yang hampir sama terdapat juga dalam teka-teki yang dari segi idea mempunyai dua bahagian yang saling melengkapi iaitu soal dan jawab. Jawapan itu mungkin dalam bentuk yang dapat dilihat, dibaca atau didengar, atau tidak dapat dilihat, dibaca atau didengar tetapi pada kenyataannya tetap ada iaitu pada objek yang dimaksudkan oleh sesuatu rangkap teka-teki itu.

Misalnya:

Dah naik tak turun  
Dah bertambah tak kurang.

atau dalam bentuk pantun:

Harum sangat bunga melati  
Tanam mari di tepi kota  
Hairan sangat di dalam hati  
Putih hitam pandai berkata.

Kedua-dua rangkap teka-teki di atas boleh ditulis semula dalam kalimat prosa yang mudah, misalnya: apakah bendanya, bila telah naik tidak lagi turun dan bila telah bertambah tidak lagi berkurang. Jawapan yang dimaksudkan ialah umur atau usia. Sedangkan yang

kedua, objek yang dimaksudkan ialah surat; iaitu suatu benda yang putih dan hitam, pandai berkata-kata: putih merujuk kepada kertas dan hitam kepada dakwat. Benda atau objek yang dirujuk dalam sesebuah teka-teki tidak diperlihatkan dalam ungkapan-ungkapan-nya, tetapi sebahagian daripada rangkap itu atau seluruhnya telah memberikan situasi, syarat atau *condition* untuk pendengarnya meneka objek yang dimaksudkan.

Dalam sesebuah seloka, walaupun tidak jelas mempunyai pembahagian yang demikian, namun masih dapat dikatakan mempunyai idea yang sama; khususnya dalam ungkapan-ungkapan seloka yang terbina oleh peribahasa berangkap, misalnya dalam seloka "Pak Kaduk" dan "Pak Pandir" yang telah diberikan contohnya dalam bab yang berkenaan. Bahkan, dalam contoh yang lebih umum, seperti "Mak Si Randang" itu juga merupakan dua keadaan yang seimbang: suatu keadaan yang dikemukakan, menjadi pembanding kepada keadaan yang sebenarnya. Sifat yang terlalu pemurah dan boros Mak Si Randang memberikan bandingan, sindiran, kritik dan seterusnya teladan kepada golongan yang lebih besar; masyarakat atau bangsa. Dengan sifat-sifat yang hampir sama ini, ketiga-tiga genre ini agak sulit dibezakan; terutamanya antara gurindam dan seloka. Oleh itu dalam bab ini ketiga-tiga genre tersebut akan dibincangkan satu per satu.

## GURINDAM

### Definisi dan Bentuk

Dalam Bab II telah dibincangkan kekeliruan tentang istilah dan definisi gurindam. Sebahagian besar daripada kekeliruan itu berpunca daripada pendekatan-pendekatan yang berbeza-beza antara seorang pengkaji dengan yang lain dan contoh-contoh yang mungkin bertindan-tindih dengan genre-genre yang lain. Sebagaimana yang telah diketahui, pemakaian istilah 'gurindam' sebagai istilah teknis kepada suatu bentuk puisi dimulakan oleh Raja Ali Haji, dengan karyanya, "Gurindam Dua Belas", terkarang kira-kira dalam tahun 1846 (Netscher 1854, ll - 32).

Penerangan Raja Ali Haji berhubung dengan hal itu berbunyi demikian:

Adalah beza antara gurindam dengan syair itu aku nyatakan pula: bermula erti syair Melayu itu perkataan yang bersajak yang serupa dua berpasang pada akhirnya dan tiada berkehendak pada sempurna perkataan pada satu-satu pasangannya, bersalahan dengan gurindam. Adapun erti gurindam itu perkataan yang bersajak juga pada akhir pasangannya, tetapi sempurna perkataannya dengan satu pasangan sahaja. Jadilah seperti sajak yang pertama itu syarat dan sajak yang kedua itu jadi seperti jawab.

Raja Ali Haji juga memberikan contoh syair dan gurindam:

Bermula inilah rupanya syair:

Dengarkan tuan suatu rencana  
Mengarang di dalam gundah-gulana  
Barangkali *gurindam* tiada kena  
Tuan betulkan dengan sempurna.

Inilah erti gurindam yang di bawah syair ini:

Persimpangan yang indah-indah  
Iaitulah ilmu yang memberi faedah.

Aku hendak bertutur  
Akan *gurindam* yang teratur.

(Netscher 1854, II)

Dalam petikan di atas perkataan gurindam disebut beberapa kali; untuk perbincangan, digariskan tiga daripadanya. Yang pertama itu sesungguhnya dimaksudkan kepada genre gurindam yang dicipta oleh pengarang; dan huraian yang diberikannya sesuai dengan contoh dan keseluruhan puisi yang dimaksudkannya sebagai gurindam. Ringkasnya, menurut Raja Ali Haji, gurindam ialah satu bentuk puisi Melayu, terdiri daripada dua baris yang berpasangan, bersajak atau berima dan memberikan idea yang lengkap atau sempurna dalam pasangannya. Dengan keadaan yang demikian, baris pertamanya dapat dianggap sebagai syarat (*protasis*) dan baris kedua sebagai jawab (*apodosis*), seperti contoh yang diberikan. Sebaliknya perkataan-perkataan yang sama yang digaris selepasnya

tidak merujuk kepada genre gurindam yang dibicarakannya. Dalam kedua-dua kedudukan, perkataan itu tidak bermaksud sebagai istilah teknik kepada sesuatu genre tertentu, tetapi bermakna ciptaan, karangan, sajak, puisi (*poetry*) secara keseluruhan: "barangkali gurindam tiada kena" dan "akan gurindam yang teratur" masing-masing dapat diganti dengan perkataan 'karangan', 'sajak' atau 'puisi'.

Dalam beberapa contoh yang lain, oleh pengarang-pengarang yang kemudian atau daripada cerita-cerita rakyat, bahkan daripada *Sejarah Melayu*, perkataan gurindam dipakai dengan makna puisi, lagu, nyanyian atau ungkapan-ungkapan bahasa yang indah, berlainan daripada ucapan biasa, karangan prosa atau 'nathar'. Perhatikan beberapa contoh di bawah:

Dalam *Sejarah Melayu*, pada kisah Sultan Mahmud Syah meminang Puteri Gunung Ledang, ada dikatakan:

Setelah dilihat Tun Mamat, segala burung-burung di dalam taman itu pun berbunyi, pelbagai bunyinya: ada yang seperti orang bersiul, ada yang seperti orang berbangsi, ada yang seperti orang bersyair, ada yang seperti orang berseloka, ada yang seperti orang bergurindam.

(Shellabear 1975, 208)

Dalam *Hikayat Malim Deman*, sebuah cerita rakyat Melayu yang terkenal, terdapat juga istilah gurindam:

"... seperti gurindam orang dahulukala;  
Awak tua banadar terbuka  
Emas habis dagangan murah  
Kerbau kambing sesak di padang  
Itik angsa tenang kuala  
Merpati lindungan langit  
Rengkiang tujuh sejarar  
Teman dengan sekerat kota  
Emas perak penuh di rumah  
Tangga rumah emas bertuang  
Ibu tangga emas bertitik  
Batuan sawa mengulur  
Penuh sesak hamba sahaya  
Ada yang empat senama

Ada yang lima senama  
Dilaung di rumah di tanah menyahut  
Dilaung di tanah di rumah menyahut.

(Mohd. Taib Osman 1975b, l28 – 131)

Pengarang *Sejarah Melayu*, iaitu Tun Seri Lanang, tidak memberikan contoh puisi yang dinamakannya gurindam, seperti mana yang dilakukannya kepada pantun. Banyak sekali disebutkannya istilah pantun dan contoh-contoh pantun yang tipikal, dalam petikan yang sama dan di beberapa tempat dalam buku tersebut. Bagaimanapun, patut disebutkan juga, Tun Seri Lanang tidak memberikan contoh-contoh puisi yang lain, selain daripada pantun.

Contoh puisi yang diberikan oleh pengarang *Hikayat Malim Deman*, yang dipetik di atas, dan di beberapa tempat dalam buku itu, bukanlah gurindam seperti yang difahamkan oleh Raja Ali Haji. Dalam kajian ini, puisi di atas tergolong sebagai talibun atau sesomba, suatu bentuk puisi bebas yang umum terpakai dalam genre cerita-cerita penglipur lara Nusantara. Dari sini dapatlah dibuat kesimpulan, bahawa sebelum tahun 1864, perkataan gurindam bukanlah satu istilah teknik untuk satu bentuk puisi yang tertentu, tetapi adalah apa jua karangan puisi, atau ungkapan-ungkapan yang indah, mengandungi perasaan yang indah, atau sekurang-kurangnya berbeza daripada pertuturan prosa.

Percubaan menentukan batas dan pengertian gurindam sebagai genre puisi, dilakukan kemudiannya oleh Za'ba khususnya dalam bukunya, *Ilmu Mengarang Melayu*, yang mula-mula diterbitkan pada tahun 1934. Dalam bab yang membicarakan "Karangan-karangan berangkap atau Puisi, Gurindam, Seloka dan Sajak" (Za'ba 1962, 242) memberikan huraian yang lanjut tentang gurindam; dipetik sebahagian yang berkenaan:

Perkataan gurindam itu daripada bahasa Sanskrit menerusi bahasa Tamil. Ertinya biasa difahamkan "rangkap yang telah jadi bidalan" atau sebutan biasa pada orang ramai, ataupun, "sesuatu pepatah berangkap yang disebutkan berpadanan dengan tempatnya".

Dalam kaedah karang-mengarang Melayu, yang dikatakan gurindam itu ialah suatu jenis syair melarat yang tiada tetap

sukatannya atau rangkapnya, isinya mengandungi fikiran-fikiran yang berasas dengan bahasa yang riang dan suka sebagai nyanyian.

Ciri-ciri gurindam menurut Za'ba (1962) ialah:

1. Bahasanya seperti bahasa menyanyi atau sekurang-kurangnya membawa imbas-imbas nyanyi, serta menunjukkan ada kesempatan boleh melengah-lengahkan masa dan menyuka-nyukakan hati.
2. Perkataannya banyak menggambarkan keindahan alam dan mengambil perbandingan daripada keindahan itu seolah-olah untuk melukiskan isinya dengan warna yang cantik.
3. Perasaan di dalamnya kebanyakannya perasaan suka dan terkadang perasaan bermain-main dan jenaka.
4. Isinya dan maksudnya terus-menerus sahaja seperti syair, tidak ada apa-apa yang boleh dikatakan pembayang maksud.
5. Gurindam tua-tua yang telah tetap tersusun semenjak beberapa lama telah jadi seolah-olah bidalan iaitu diketahui dan lancar di mulut orang ramai.

Dalam definisi dan sifat-sifat gurindam yang digarisskasarkan oleh Za'ba, ternyata beliau tidak mengambil sebagai pertimbangan definisi dan contoh gurindam oleh Raja Ali Haji, sehingga dengan itu "Gurindam Dua Belas Fasal" karya Raja Ali Haji seolah-olah tertolak daripada penggolongan sebagai gurindam. Za'ba pada dasarnya hanya bertolak daripada pengertian yang diberikan oleh R.J. Wilkinson (1901), daripada kamusnya, yang seterusnya mengambil daripada John Crawfurd (1852). Baik Wilkinson mahupun Crawfurd, kedua-duanya memberikan definisi yang dapat dikatakan kabur dan tidak mengkhusus. Demikian daripada contoh-contoh yang diberikan seterusnya Za'ba memberikan definisi gurindam sejajar dengan konsepnya sebagai puisi secara umum, seperti yang difahami oleh masyarakat Melayu sehingga itu.

Dalam huraiannya, Za'ba membahagikan gurindam

kepada beberapa jenis, berdasarkan bentuk dan isiinya. Di bawah dipetik beberapa contoh untuk dibincangkan.

1. Gurindam yang memakai pertentangan bunyi hujung:

Wahai harap - ghairah  
Pengharapan yang beralaskan hasrat  
Ringanlah bumi, maksudku berat.  
Aduh kalau tak rahim jadi mudarat  
Hanyutlah kelak ke timur ke barat  
Dilambung ombak surat sarat  
Terhempas terbentang - pecah berkerat-kerat  
Akhirnya hancur binasa masuk ke jirat.  
Tanjung darat padang seringan  
Dekat taman raja berjuntai  
Harapku berat langit nan ringan  
Mati kempunan lamun tak sampai.

(Za'ba 1962, 97, 243)

2. Gurindam tiada pertentangan bunyi:

Kelebihan nabi dengan mukjizat  
Kelebihan umat dengan muafakat  
Bulat air kerana pembetung  
Bulat manusia kerana muafakat  
Air melurut dengan bandarnya  
Benar melurut dengan muafakatnya.

(Perbilangan Adat Perpatih)

3. Gurindam tiada bersukat:

Duduk berpelarasian  
Dekat rumah dekat kampung  
Halaman satu sepermainan  
Seperigi sepermandian  
Segayung sepergiliran  
Sejamban setepian  
Muafakat tak berubah  
Rahsia tak bertukar.

Ibarat labu menjalar ke hulu  
Ibarat kundur menjalar ke hilir:

Pangkalnya sama dipupuk  
Pucuknya sama digetis  
Buahnya sama ditarik.

Ke bukit sama didaki  
Ke lurah sama dituruni  
Ke laut sama direnangkan.

Yang berat sama dipikul  
Yang ringan sama dijinjing  
Hati gajah sama dilapah  
Hati kuman sama dicecah.

(Za'ba 1962, 245)

#### 4. Gurindam

Tiada lagi kerat-kerat tertentu, hanya seperti karangan prosa, sekadar isinya sahaja gurindam:

Maka beredarlah kalam yang runcing di atas kertas oleh setitik dakwat yang kelabu lalu bergurindam membukaan pintu mengalu-alukan sekalian yang sudi datang berulit dengan lukisannya. Yang demikian ialah pada ketika malam yang masih gelap dan udara pelajaran dan pengetahuan di antara kaum Melayu masih mengerang dengan kesemputan.

(Za'ba 1962, 246)

Daripada contoh-contoh yang dikemukakan oleh Za'ba ternyata tidak semuanya dapat digolongkan sebagai gurindam seperti yang difahamkan dalam kajian ini. Bagaimanapun, yang jelas menunjukkan ciri-ciri gurindam ialah contoh (2), yang merupakan sebahagian daripada perbilangan Adat Perpatih. Dibandingkan dengan "Gurindam Dua Belas" yang digunakan sebagai ukuran di sini, contoh tersebut mendekati sifat gurindam, khususnya apabila

baris-baris puisi itu disusun semula ke dalam pasangan-pasangan yang sejajar dan berima:

Kelebihan nabi dengan mukjizat  
Kelebihan umat dengan muafakat.  
Bulat air kerana pembetung  
Bulat manusia kerana muafakat.  
Air melurut dengan bandarnya  
Benar melurut dengan muafakatnya.

Bandingkan dengan "Gurindam Dua Belas", fasal yang kesepuluh:

Dengan bapa jangan derhaka  
Supaya Allah tidak murka.  
Dengan ibu hendaklah hormat  
Supaya badan dapat selamat.  
Dengan anak janganlah lalai  
Supaya boleh naik ke tengah balai.

(Netscher 1854, 19)

Selain daripada adanya rima akhir dalam setiap pasangan, dapat juga dirasa baris pertama setiap pasangan berkedudukan sebagai syarat (*protasis*) kepada baris kedua sebagai (*apodosis*). Jelasnya, dari segi bentuknya memang dapat dianggap sebagai gurindam; tetapi dari segi tema, isi dan fungsinya, puisi tersebut adalah teromba atau perbilangan adat. Oleh kerana kebanyakan genre puisi Melayu mendapat ketentuan genrenya melalui isi dan fungsi (hanya sedikit melalui bentuk dan struktur), puisi tersebut lebih tepat digolongkan sebagai teromba atau perbilangan adat.

Contoh (3) oleh Za'ba di atas tidak juga sesuai digolongkan sebagai gurindam; sebab yang penting ialah kerana dari segi isi dan fungsinya ia tergolong sebagai teromba; dan dari segi bentuk ia lebih dekat kepada talibun atau sesomba, hampir sama susunannya dengan ungkapan-ungkapan yang terbiasa dalam cerita-cerita penglipur lara Melayu. Contoh (4) yang dianggap 'gurindam' (secara umum), oleh Za'ba tidak pun tergolong sebagai puisi, melainkan "hanya seperti karangan prosa, sekadar isinya sahaja gurindam".

Kerana itu bentuk tersebut tidak termasuk ke dalam bidang kajian ini.

Daripada perbincangan dan contoh-contoh di atas; hanya contoh (1) yang dapat digolongkan sebagai gurindam; dan ini merupakan bentuk yang lain daripada "Gurindam Dua Belas" oleh Raja Ali Haji. Bentuk ini juga berlainan daripada contoh-contoh yang telah digolongkan ke dalam genre yang lain, sebelum dan selepas ini. Dari segi isi dan fungsinya, contoh tersebut sejahtera dengan ciri-ciri gurindam yang dapat difahamkan daripada huraian Za'ba, Alisjahbana dan khususnya gurindam oleh Raja Ali Haji; iaitu "isinya mengandungi fikiran-fikiran yang bernalas, maksudnya menyampaikan pengajaran yang berguna dan bahasanya juga bersungguh-sungguh, tidak jenaka dan bermain-main seperti dalam seloka".

Jika alasan-alasan di atas itu diterima, dapatlah disenaraikan ciri-ciri yang khusus kepada puisi gurindam, iaitu:

1. Puisinya masih tergolong sebagai puisi bebas, dengan pengertian ia tidak terikat dari segi berangkap atau tidak; jika berangkap tidak tertentu jumlah barisnya dalam serangkap atau jumlah perkataan dalam sebaris.
2. Jika bentuk yang dipilih itu daripada bentuk yang terikat, iaitu seperti "Gurindam Dua Belas", ikatan yang dipatuhi hanya pada pasangan-pasangan yang berima; sementara daripada aspek yang lain, jumlah baris dalam serangkap, gabungan beberapa bentuk rima dan sebagainya adalah bebas, seperti yang disebutkan dalam (1) di atas.
3. Walaupun bebas, puisinya masih menunjukkan ciri-ciri puisi tradisional, misalnya mengadakan rima antara baris-baris yang sejahtera atau unsur-unsur asonansi dan aliterasi antara kerak-kerak yang sejahtera dalam satu baris.
4. Dalam satu untai gurindam mungkin dimulai, diselangi atau diakhiri dengan bentuk-bentuk yang lain, umumnya pantun.

5. Dari segi isi, contoh-contoh ini memperlihatkan keadaan yang benar dan serius, perasaan yang berat, tidak dengan maksud jenaka atau bermain-main.
6. Dari segi fungsinya contoh-contoh ini juga sesuai digolongkan sebagai gurindam; ia tidak mengandungi maksud bercerita seperti dalam prosa berirama, berteka-teki seperti dalam teka-teki, sindir dan giat seperti dalam seloka, undang-undang atau peraturan adat seperti dalam teromba, atau perbomohan dan pengubatan seperti dalam mantera.

Berdasarkan ciri-ciri yang diberikan di atas, dapatlah diberikan kesimpulan, bahawa gurindam Melayu terbahagi kepada dua bentuk:

1. Yang terikat.
2. Yang tidak terikat.

#### 1. Bentuk terikat:

Terdiri daripada dua baris yang berpasangan dan berima; baris pertama sebagai syarat (*condition, protasis*) dan baris kedua sebagai jawab (*answer, apodosis*). Contoh yang dijadikan ukuran ialah "Gurindam Dua Belas" oleh Raja Ali Haji; sebahagian daripadanya dipetik secara rambang di bawah ini:

Ini Gurindam Fasal Yang Pertama:

Barang siapa tiada mengenal agama  
Sekali-kali tiada boleh dibilangkan nama.

Barang siapa mengenal yang empat  
Maka ia itulah orang yang makrifat.

Barang siapa mengenal Allah  
Suruh dan tegahnya tiada ia menyalah.

Barang siapa mengenal diri  
Maka telah mengenal Tuhan Yang Yazi.

Barang siapa mengenal dunia  
Tahulah dia barang yang terpedaya.

PUISI MELAYU TRADISIONAL

Barang siapa mengenal akhirat  
Tahulah dia dunia mudarat.

Ini Gurindam Fasal yang Kedua:

Barang siapa mengenal yang tersebut  
Tahulah ia makna takut.  
Barang siapa meninggalkan puasa  
Tiadalah mendapat dua termasa.  
Barang siapa meninggalkan zakat  
Tiadalah hartanya mendapat berkat.  
Barang siapa meninggalkan haji.  
Tiadalah ia menyempurnakan janji.

Ini Gurindam Fasal yang Kesebelas:

Hendaklah berjasa  
Kepada yang sebangsa.  
Hendaklah jadi kepala  
Buang perangai yang cela.  
Hendaklah memegang amanah  
Buanglah khianat.  
Hendak marah  
Dahulukan hujah.  
Hendak dimalui  
Jangan melalui.  
Hendak ramai  
Murahkan perangai.

(Netscher 1854, 15 – 19)

2. Bentuk yang tidak terikat:

Iaitu yang bebas. Dengan pengertian ia tidak berpasangan atau berangkap, jika berangkap tidak tertentu jumlah baris dalam serangkap, jumlah perkataan dalam sebaris, memakai rima atau tidak. Mungkin dalam satu untai gurindam terdapat bentuk-bentuk yang lain yang telah tergolong ke dalam genre yang lain. Contoh di

bawah ini merupakan gurindam, bahkan antara puisi Melayu yang tertua dalam bentuk tertulis:

Ayuhai dara Zulaikha Tingkap  
Bangun apalah engkau  
Kerana engkau penghulu gundikku  
Bergelar Tun Derma di Kara.

Bangun apalah engkau  
Tidakkah kaudengar bunyi  
Genderang perang di Tukasan?  
Palu tabuh-tabuhan  
Hari dinihari bulan pun terang.

(Winstedt 1960, 178)

Puisi di atas digolongkan oleh Winstedt sebagai 'bahasa berirama' (*rhythrical verse*), tetapi mengikut pendekatan kajian ini, "bahasa berirama" telah diberikan istilah yang baru, iaitu talibun atau sesomba, dalam konsep yang sama seperti yang difahamkan dalam pengertian *descriptive* atau *metrical passages*, iaitu ungkapan-ungkapan pemerian yang terbiasa dalam cerita-cerita penglipur lara. Oleh itu puisi di atas tidak lagi sesuai untuk digolongkan sebagai talibun atau sesomba; sebaliknya dalam kajian ini ia digolongkan sebagai gurindam. Dengan penggolongan begitu, dan dengan memakai konsep yang sama, dapatlah ditambah satu ciri yang lain pada gurindam, iaitu sifat individualiti, dengan pengertian puisi itu ditujukan pada suatu individu tertentu, dalam cerita dan konteks yang khusus. Sifat ini juga sesuai dengan konsep individualiti yang difahamkan dalam puisi moden. Jika ukuran begini dapat diterima, puisi di bawah ini yang digolongkan oleh Za'ba sebagai "seloka khayal" dapat pula, bahkan lebih tepat dianggap sebagai gurindam:

Ia keluar pada waktu malam yang gelap-gelita  
Maka terpancarlah siang terang-benderang,  
Segala pohon-pohon kayu bersinar kilau-kilauan oleh cahayanya.

Daripada gilang-gemilangnya ketika ia menzahirkan diri  
Terbit beberapa matahari  
Dan mengambang beberapa buah bulan.

Seluruh alam sujud di hadapannya  
Apabila ia menunjukkan muka  
Dengan menyingkapkan tudung kelambunya.

Jika terpancar kilat merah dari ekor matanya  
Merebaslah hujan air mata  
Dari tangisan orang-orang sekalian berdukacita.

(Za'ba 1962, 248 - 249)

Sebagai lanjutan daripada pendekatan di atas akan dapat pula digolongkan semua puisi dalam bahasa Melayu, baik asal atau terjemahan, daripada puisi asing yang tiada terang bentuknya dan tidak juga disertai dengan rangkapnya yang asal; dengan syarat ia memiliki ciri-ciri yang lain, seperti yang disebutkan terdahulu. Di bawah ini diberikan sebuah contoh lain yang dipetik daripada sumber yang sama, iaitu *Hikayat Alfu Laila wa Lailah*:

Berhentilah sebentar di depan gambar sebuah negeri  
dan carilah berita tentang hal kami  
Janganlah dikira kami berada di dalam negeri  
sebagai sediakala.

Sebenarnya kekuatan persatuan orang lain  
telah menghancurkan kekuatan kami  
Hingga puaslah hati mereka  
yang dendki kepada kami.

Seorang wanita durjana  
menyeksaku dengan cemeti  
Hatinya penuh dengan bengisan  
hasad dendki pada dirinya.

(Abu Ridwan 1963, 3; 103)

Suatu contoh gurindam yang diberikan oleh Za'ba dan sesuai dengan pengertian gurindam yang digunakan dalam kajian ini, ialah yang berjudul "Harapan yang Besar" yang telah diberikan di atas tadi. Dan selain daripada itu dapat pula dimasukkan bentuk yang

sama di bawah ini, yang membawa nada yang sama dan oleh pengarang yang sama pula:

*Kehilangan Adat Melayu*

Aduhai resam, wahai adat  
Lembaga di mana telah berpadat?  
Wah, hilang adat lenyaplah bahasa  
Ghaib seperti tiada berbisa  
Semakin mengerang sentiasa  
Seperti dipagut tedung yang bisa  
Amboi, adat tiruan resam terpaksa,  
Umpama gajah menjadi rusa  
Oleh ragi campuran bangsa  
Adat tertib habis binasa.

Sayang sayang  
Merajuk ke manakah adat Melayu?  
Laksana debu dipupuk bayu  
Wallahu aklam entahkan jatuh ke laut,  
Gerangan disambar yu.

(Za'ba 1962, 98)

Dibandingkan contoh di atas dengan beberapa buah sajak atau puisi Melayu moden, khususnya yang dalam peringkat-peringkat awal, akan dapat dilihat beberapa persamaan. Ini ialah kerana puisi-puisi dalam zaman itu masih menunjukkan sifat-sifat yang konvensional iaitu masih terikat kepada bentuk-bentuk yang telah dikenali. Selain daripada pantun dan syair yang telah diubahsuai kepada puisi-puisi moden dari Indonesia dan Barat, terdapat contoh-contoh yang mendekati konsep gurindam dalam bentuk yang bebas atau tidak terikat. Perhatikan sebuah puisi karangan Za'ba dalam tahun 1957, di bawah:

*Zaman Maju*

Aku dan kamu  
Hidup sekarang di zaman maju  
Zaman pendapat baharu, zaman baharu  
Tidak lagi seperti dahulu  
Zaman kebesaran dan perkembangan ilmu  
Manusia tidak lagi boleh diperlembu.

### PUISI MELAYU TRADISIONAL

Buangkanlah segala perasaan kungkungan  
Segala fikiran beku yang keras kaku  
Segala kepercayaan karut yang hanya jadi belenggu  
Segala-galanya, yang kini tidak lagi kaku  
Lemparkanlah, tinggalkanlah sekaliannya itu,  
Supaya kita senang lalu.

Kita mesti berani menggudam mengetuk  
Meruntuh meroboh segala yang lapuk  
Memotong yang busuk, memangkas yang bengkok  
Mengganti, membaharu dengan yang lebih elok  
Mengikut panduan sebenar-benar petunjuk  
Timbang sendiri, tidak mengikut telunjuk.

Hapuskan segala kepercayaan  
Yang tak mempunyai kenyataan kebenaran  
Ingat, hati-hati: kita mestilah berani  
Dengan tekad menurut suluhan abadi  
Memecahkan sekatan kolot, walau seperti besi  
Segala yang berkarat dikikis diganti.

(Za'ba 1962, 134)

Puisi di atas dibicarakan sebagai 'sajak' atau puisi moden oleh Za'ba, bersama contoh-contoh lain yang memang jelas tergolong sebagai puisi moden. Namun demikian bila dipertimbangkan susunannya yang masih terikat kepada konvensi yang umum dalam puisi tradisional iaitu dari segi jumlah baris serangkap, jumlah perkataan sebaris dan skema rima a-a-a-a setiap rangkap – puisi di atas dapat dianggap sebagai puisi tradisional, iaitu dalam genre gurindam. Penggolongan demikian amat sesuai, kerana dalam perkembangan yang terkemudian, istilah gurindam dengan pengertian yang lebih luas dan umum telah juga digunakan sebagai istilah teknik kepada sajak atau puisi moden. Suatu contoh yang dapat dianggap sebagai permulaan kepada sajak Melayu moden, masih menggunakan istilah gurindam; dan pemakaian istilah itu di sini bersesuaian dengan cara penggolongan yang dilakukan dalam kajian ini. Perhatikan puisi tersebut yang diberikan di bawah ini:

*Angan-angan dengan Gurindam*  
Bangkitlah bangkit!  
Mengapa tidur lama sangat?

Di mana dapat mencari negeri yang sekaya negeri kita?  
Bangkitlah bangkit!  
Timah dimasak sudahlah hangat  
Mengapa dibiarkan bangsa lain mengambil bijih kita?  
Bangkitlah bangkit!  
Mengapa dibiarkan bangsa lain bertanam getah di tanah kita?  
Bijih dan getah! Bijih dan getah!  
Inilah jalan kekayaan yang tentu  
Hasil negeri kita yang besar dapat di situ  
Bijih dan getah! Bijih dan getah!  
Dari sebab itu bangkitlah bangkit!  
Janganlah asyik dengan berjoget  
Lihatlah kekayaan Loke Yew Chow Kit!  
Hartanya beribu bermilion ringgit  
Segeralah tuan jangan lengah  
Segera berbudi kepada tanah  
Kerana tanah baik budinya  
Lambat-laun usaha dan penat kita dibalasnya.

(Pyan Hussain dan Suhaimi Hj. Muhammad 1981, 151)

Dengan cara dan pendekatan yang diambil dalam penggolongan ini mungkin dapat diselesaikan masalah istilah dan pencirian gurindam dan genre-genre yang lain; kerana hampir semua puisi yang tidak dapat digolongkan ke dalam genre yang lain, pantun, syair, nazam, seloka, talibun atau sesomba, teromba dan mantera, dapat dimasukkan ke dalam genre gurindam, dengan syarat puisi tersebut memiliki seberapa banyak ciri dari segi bentuk, isi, bahasa, sifat-sifat individualiti dan lain-lain yang telah diterima sebagai ciri-ciri sebuah gurindam.

### Isi dan Fungsi

Dengan jumlah pembicaraan dan contoh-contoh yang amat terbatas mengenai gurindam, amat sukar untuk membincangkan pencakupan isi, fungsi dan penyebarannya dalam masyarakat dan kesusastraan Melayu. Kerana itu sebahagian besar penganalisisan terhadap gurindam akan tertumpu kepada "Gurindam Dua Belas" oleh Raja Ali Haji; dan hanya sedikit daripada sumber-sumber yang lain. Walau bagaimanapun, secara keseluruhan isi dan fungsi gurindam ialah pengajaran; iaitu menunjukkan jalan untuk hidup yang sempurna. Dalam "Gurindam Dua Belas" dapat dilihat pelbagai aspek

pengajaran yang membimbing manusia untuk mencapai taraf yang sempurna, '*perfect*' atau '*insanul-kamil*', antaranya: beragama, memelihara anggota dan hati, berbudi bahasa, merendahkan diri, bertimbang rasa, menghormati ibu bapa dan orang tua, berbuat jasa dan seterusnya. Perhatikan beberapa contoh di bawah:

1. Beragama, beribadat:

Barang siapa meninggalkan sembahyang  
Seperti rumah tidak bertiang.

Barang siapa meninggalkan puasa  
Tidaklah mendapat dua termasa.

Barang siapa meninggalkan zakat  
Tiadalah hartanya beroleh berkat.

Barang siapa meninggalkan haji  
Tidaklah ia menyempurnakan janji.

2. Memelihara anggota dan hati daripada melakukan kejahatan:

Apabila terpelihara mata  
Sedikit cita-cita.

Apabila terpelihara kuping  
Khabar yang jahat tidaklah damping.

Apabila terpelihara lidah  
Nescaya dapat daripadanya faedah.

Bersungguh-sungguh engkau memeliharkan tangan  
Daripada segala berat dan ringan.

dan seterusnya.

Hati itu kerajaan di dalam tubuh  
Jikalau zalim segala anggota pun roboh.

Apabila dengki sudah bertanah  
Datanglah daripadanya beberapa anak panah.

Mengumpat dan memuji hendaklah fikir  
Di situlah banyak orang yang tergelincir.

## GURINDAM, SELOKA DAN TEKA-TEKI

Pekerjaan marah jangan dibela  
Nanti hilang akal di kepala.

Jika sedikit pun berbuat bohong  
Boleh diumpamakan mulutnya itu pekung.

### 3. Berbudi bahasa, berperangai mulia:

Jika hendak mengenal orang berbangsa  
Lihat kepada budi dan bahasa.

Jika hendak melihat orang yang berbahagia  
Sangat memeliharaikan yang sia-sia.

Jika hendak mengenal orang mulia.  
Lihatlah kepada kelakuan dia.

dan seterusnya.

Cari olehmu akan isteri  
Yang boleh dimenyerahkan diri.

Cari olehmu akan kawan  
Pilih segera orang yang setiawan.

Cari olehmu akan abdi  
Yang ada baik sedikit budi.

### 4. Memelihara diri daripada perbuatan yang boleh mendatangkan akibat yang tidak baik:

Apabila banyak berkata-kata  
Di situlah jalan masuk dusta.

Apabila banyak berlebihan suka  
Itulah tanda hampirkan duka.

Apabila kita kurang siasat  
Itulah tanda pekerjaan hendak sesat.

Apabila anak tidak dilatih  
Jika besar bapanya letih.

dan seterusnya.

PUISI MELAYU TRADISIONAL

Lidah yang suka membenarkan dirinya  
Daripada yang lain dapat sekaliannya.

Daripada memuji diri hendaklah sabar  
Biar daripada orang datangnya khabar.

Orang yang suka menempakan jasa  
Setengah daripada syirik mengaku kuasa.

Kejahatan diri sembunyikan  
Kebajikan diri diamkan.

Keaiban orang jangan dibuka  
Keaiban diri hendaklah sangka.

5. Hormat, bertimbang rasa dan berbuat jasa:

Dengan ibu hendaklah hormat  
Supaya badan dapat selamat.

Dengan anak janganlah lalai  
Supaya boleh naik ke tengah balai.

Dengan isteri dan gundik janganlah alpa  
Supaya kemaluan jangan menerpa.

Dengan kawan hendaklah adil  
Supaya tangannya jadi kafil.

6. Taat setia dan tanggungjawab antara raja dan rakyat:

Raja muafakat dengan menteri  
Seperti kebun berpagarkan duri.

Betul hati kepada raja  
Tanda jadi sebarang kerja.

Hukum adil atas rakyat  
Tanda raja beroleh inayat.

Kasihkan orang yang berilmu  
Tanda rahmat atas dirimu.

Hormat akan orang pandai  
Tanda mengenal kasa dan cindai.

(Netscher 1854, II - 32)

Dalam ungkapan-ungkapan gurindam yang lain, seperti yang didapati dalam Volksalmanak (Alisjahbana 1971, 86 – 90), isi dan pengajaran yang sama terdapat juga dalam ungkapan-ungkapan bahkan dengan nada yang sama; perhatikan sebahagian daripada contoh-contohnya di bawah ini:

1. Pentingnya menjaga diri, tindak laku dan kata-kata:

Kurang fikir, kurang siasat  
Tentu dirimu kelak tersesat.

Fikir dahulu sebelum berkata  
Supaya terelak silang sengketa.

Kalau mulut tajam dan kasar  
Boleh ditimpa bahaya besar.

Silang selisih jangan dicari  
Jika bersua janganlah lari.

(Alisjahbana 1971, 86)

2. Norma-norma yang baik dalam perhubungan suami isteri:

Isteri cantik permainan mata  
Isteri budiman tajuk mahkota.

Perempuan bagus suntungan dunia  
Perempuan beriman sangat mulia.

Suami isteri harus sekata  
Jauh segala silang sengketa.

Suami tempat isteri bergantung  
Kepadanya serahkan nasib dan untung.

Jika suami tak berhati lurus  
Isterinya kelak menjadi kurus.

Sungguh suami pegang kuasa  
Jika seorang ia binasa.

Suami isteri tubuh yang dua  
Sekata hendaknya sampaikan tua.

(Alisjahbana 1971, 88)

Dalam contoh-contoh yang lain masih dapat dilihat unsur-unsur deduktif, selain daripada sifat yang serius dan keinginan menyatakan kebenaran. Hanya di sini pengajaran itu mungkin tersembunyi di sebalik pengertian yang dimaksudkan; misalnya dalam gurindam "Harapan yang Besar" seolah-olah menyatakan juga bahawa berharap kepada sesuatu hendaklah berpatutan dan mempunyai kemungkinan untuk mendapatkan; jika tidak, akhirnya akan menyusahkan diri sendiri:

Umpama rakit putus pendarat  
Hanyutlah kelak ke timur ke barat.

dan,

Harapku berat langit nan ringan  
Mati kempunan lamun tak sampai.

Dalam "Kehilangan Adat Melayu", tema pengajaran jelas diterapkan dalam sikap dan pendapat pengarang terhadap kepentingan adat dan lembaga yang merupakan teras keperibadian bangsa:

Wah, hilang adat lenyapliah bahasa  
Ghaib sepi tiada berbisa  
Semakin mengerang sentiasa  
Seperti dipagut ular yang bisa  
Amboi, amboi, adat tiruan resam terpaksa  
Umpama gajah menjadi rusa  
Oleh ragi campuran bangsa  
Adab tertib habis binasa.

Motif dan tujuan yang sama masih terdapat dalam "Zaman Maju" oleh Za'ba. Dia mengingatkan bangsanya supaya meninggalkan sikap dan fahaman yang kolot, yang telah lapuk untuk menghadapi dunia yang memerlukan sikap bertanding dalam mencapai kemajuan dan kebahagian hidup:

Hapuskan segala kepercayaan  
Yang tak mempunyai kenyataan kebenaran  
Ingin, hati-hati: kita mesti berani  
Dengan tekad menurut suluhan abadi

Memecahkan sekatan kolot, walau seperti besi

Segala yang berkarat dikikis diganti.

Dalam contoh-contoh yang tidak secara langsung menyampai-kan pengajaran mungkin memiliki sifat-sifat yang lain, misalnya pernyataan kebenaran, perasaan yang berat, serius, terdesak dan tertekan, cinta, kecewa, ngeri atau apa jua pernyataan pengalaman hidup yang secara tidak langsung menimbulkan kesan yang positif kepada pembaca dan masyarakat umum.

Dari segi fungsi ternyata gurindam amat sempit bidangnya dan terhad pula penyebarannya. Ini ialah atas dasar puisi ini tidak di-gunakan dalam kegiatan-kegiatan seni dan kebudayaan atau dalam kegiatan yang lain seperti yang berlaku pada pantun, syair, teromba, mantera dan zikir. Dalam persembahan-persembahan lagu dan tari-an, permainan-permainan kesenian seperti canggung, dondang sayang, lotah dan lain-lain seni kata lagu tidak daripada bentuk gurindam. Demikian juga dalam perbualan hari-hari, sebagai menguatkan hujah atau sekadar menghiasi percakapan, ungkapan-ungkapan yang digunakan tidak daripada jenis gurindam, tetapi pada umumnya daripada peribahasa, berangkap atau tidak, pantun-pantun dan teromba; walaupun teromba, pada suatu segi digolong-kan oleh setengah-setengah pengkaji sebagai gurindam.

Ringkasnya, dengan perkataan lain, gurindam tidak digunakan secara praktis dalam kegiatan kesenian dan kehidupan masyarakat sehari-hari. Kerana itu dapatlah dianggap gurindam lebih berupa karya yang tertulis untuk dibaca dan diperdengarkan. Melalui pembacaan inilah isi gurindam itu disampaikan dan dipraktiskan dalam kehidupan masyarakat. Dibandingkan dengan puisi yang lain, fungsi gurindam itu disampaikan dan dipraktiskan dalam kehidupan masyarakat. Dibandingan dengan puisi yang lain, fungsi gurindam dapat dianggap sebagai pasif, tidak digunakan secara aktif seperti dalam penggunaan pantun, syair, nazam dan teromba, lebih-lebih lagi mantera. Keadaan seperti ini hampir dapat disamakan dengan fungsi sajak-sajak moden yang ada sekarang. Ia tidak diabadikan dalam nyanyian dan tarian, dalam cerita-cerita atau sebagai rujukan kepada adat dan undang-undang seperti teromba. Ia tidak dibaca, dihafal, difahami dan diaplikasikan kepada perlaku-an tertentu seperti dalam jampi dan mantera. Dan sepertimana puisi

moden, gurindam hanya digunakan sesekali sebagai mengisi acara dengan dideklamasikan kepada para pendengar. Gurindam "Harapan yang Besar" yang diberikan di atas tadi pernah dideklamasikan di sebuah pesta kebudayaan peringkat kebangsaan; mungkin satu dua yang lain pernah dilakukan demikian dengan maksud yang sama dalam sesuatu perayaan tertentu.

## SELOKA

### **Erti dan Bentuk**

Perkataan 'seloka' berasal daripada bahasa Sanskrit, *shloka* atau *anustubh* yang memberi makna suatu bentuk puisi yang terdiri daripada dua baris (dua kerat, dua *hemistichs*), tiap-tiap satunya mengandungi 16 suku kata, tersusun dalam empat unit; unit yang terakhir selalunya berbentuk 'diambus' sementara unit-unit yang lain dalam bentuk-bentuk yang digemari, dari susunan suku-suku kata panjang dan pendek (guru dan lagu). Misalnya, ikatan yang standard pada sebuah seloka, yang terdiri daripada lapan suku kata dalam suatu 'pada', suku kata yang keenam selalunya panjang, yang kelimanya pendek dan yang ketujuh, pendek. Susunan ini memberikan kadensa iambik (*iambic cadence*). Dalam pada itu terdapat juga suku kata ketujuh yang panjang yang memberikan kadensa trochaik (*trochaic cadence*). Walau bagaimanapun, seperti kebanyakan puisi Timur – termasuk Sanskrit – aspek yang penting ialah "perasaan seloka" (*sloka feeling*) itu juga yang lebih penting untuk menjadikan sesuatu ungkapan itu sebagai seloka yang sebenarnya (Preminger 1965, 774). Puisi dengan susunan dan pola irama beginilah yang membina epik-epik India yang terbesar iaitu Mahabharata (100 000 rangkap seloka) dan Ramayana (24 000).

Dalam kesusasteraan Melayu perkataan seloka dimaksudkan kepada sejenis puisi yang tidak mempunyai struktur yang tertentu, tetapi mempunyai ciri-ciri yang dapat diasingkan daripada genre-genre yang lain. Justeru itu dalam menentukan ciri-ciri ini telah timbul perbezaan pendapat antara para pengkaji:

1. Menurut Simorangkir Simandjuntak (1965), seloka adalah

bidalan atau pepatah yang diberi bersampiran, tegasnya dalam bentuk pantun empat baris.

Anak agam jual sutera  
Jual di Rengat tengah pekan  
Jangan digenggam seperti bara  
Terasa hangat dilepaskan.

2. Zuber Usman (1975) pula berpendapat seloka hampir sama dengan gurindam, tetapi dalam seloka yang dipentingkan ialah kelucuannya:

Malang celaka Raja Genggang  
Tuak terbeli tunjang hilang.

Gigi tanggal rawan pun murah  
Awak tua gadis bermusim.

3. Menurut Hooykaas (1965), seloka adalah pantun yang memakai rima yang sama a-a-a-a seperti syair:

Candu dibungkus kain palas  
Makan dia mata bilas  
Mandi segan kerja malas  
Harta orang hendak digalas.

4. Amir Hamzah mengatakan seloka ialah pantun yang mempunyai perkataan erti antara sampiran dan maksudnya:

Jalan-jalan sepanjang jalan  
Singgah-menyinggah di pagar orang  
Pura-pura mencari ayam  
Ekor mata di anak orang.

(Hooykaas 1965, 73-85)

5. Za'ba yang memberikan huraian dan contoh-contoh yang banyak mengenai seloka dan gurindam, mengatakan seloka adalah sejenis karangan yang lebih kurang sama seperti gurindam; sebab itu kebanyakan sifat-sifat gurindam ada kepadanya. Sekadarkan lainnya dalam seloka itu ada tercampur kelakar,

menggeli hati, gurau senda, giat, ejek dan terkadang perasaan nyanyi, asyik, berahi, hiba, rawan, khayal dan mimpi; sebagai contoh:

(dalam jenis seloka melarat)  
Maka baginda pun mengejutkan tuan  
puteri sambil berulit:  
'Adinda tuan. Bangunlah tangkai hati  
abang dan penglipur lara kekanda, urat  
rambut batu kepala abang' – serta  
beberapa cumbu yang membaharui kasih  
dan memulihkan mesra. Maka tuan puteri  
pun bangunlah sambil memalis scumpama  
bunga sempaka kembang pagi lemah lembut  
dalam taman puspa sari adanya.

6. Dalam bahasa Jawa, seloka dikenal dan diasosiasikan dengan peribahasa, misalnya seloka Jawa:

Rindik asu digitik  
(Ertinya, lari seperti anjing dipukul)  
Kutik marani sunduk  
(Gabus mendapatkan tusuk)  
Kebo kebotan sungu  
(Kerbau keberatan tanduk).

Ternyata daripada contoh-contoh di atas, genre seloka telah dikelirukan dengan genre-genre yang lain yang sewajarnya telah mempunyai bentuk dan struktur yang khusus. Pembicara-pembicara yang menyentuh soal ini, khususnya dari aspek yang dimaksudkan di sini, telah memberikan definisi dan contoh berdasarkan bentuk yang ditemui mereka ketika itu dan pemahaman masyarakat yang terlalu umum di tempat dan waktu yang tertentu. Daripada ukuran dan pendekatan yang kita gunakan dalam kajian ini, seluruh contoh yang dikemukakan itu tidak dapat digolongkan sebagai seloka, kerana bentuknya yang telah tertakluk kepada genre yang lain. Contoh (1) oleh Simandjuntak ialah pantun empat baris yang mengandungi peribahasa; ia masih pantun dari segi bentuknya dan dari segi isi dan fungsi sebagai peribahasa berirama atau bidal. Contoh (3) dan (4) adalah syair empat baris, memakai rima a-a-a-a, mempunyai makna yang berurutan dan lengkap dalam rangkap-

nya masing-masing. Contoh (5) yang diberikan oleh Za'ba bukanlah puisi, tetapi prosa menurut ukuran universal, kerana itu bukan juga seloka. Contoh (6) adalah peribahasa, sama ada sebagai perumpamaan, bidalan, pepatah atau kiasan; dan tidak puisi. Yang ada iras-iras seloka ialah contoh (2) oleh Zuber Usman; kerana dalam ungkapan-ungkapan itu terkandung erti peribahasa, puitis, berangkap dan berima dan yang penting mengandungi maksud jenaka, sindir dan perasaan bermain-main. Hanya kelainannya dengan seloka kerana ungkapannya pendek, terjadi daripada dua baris serangkap, lebih merupakan pantun dua kerat atau ungkapan-ungkapan bersajak yang boleh sahaja merupakan sebahagian daripada sejenis puisi; misalnya sebahagian daripada seloka atau talibun seperti contoh di bawah:

Awak tua bandar terbuka  
Emas habis dagangan murah  
Kerbau kambing sesak di padang  
Itik angsa tenang kuala  
Merpati lindungan langit,  
... dan seterusnya.

atau sebahagian daripada bidal atau peribahasa berirama:

Berniaga buluh kasap:  
Pangkal hilang hujung lesap  
Hujung hilang pangkal lesap.

Daripada contoh di atas dan yang akan diberikan seterusnya, memang jelas terlihat pertalian seloka dan peribahasa; tetapi peribahasa itu sendiri, terutamanya yang tidak tergolong sebagai puisi seharusnya tidak dianggap sebagai seloka kerana seloka pada prinsipnya adalah sebuah puisi; sedang pada peribahasa, misalnya peribahasa berirama sekalipun, masih belum tergolong sebagai seloka jika tidak mempunyai ciri-ciri yang penting bagi genre seloka.

Hasil daripada perbincangan dan contoh-contoh yang dikemukakan di atas, dapatlah diambil kesimpulan tentang ciri-ciri seloka Melayu; sebahagian daripada ciri-ciri itu sesuai dengan yang diberikan oleh Za'ba:

1. Ia adalah karangan berangkap (puisi) yang memakai pertentangan bunyi hujung (rima) yang tiada tetap.
2. Perkataan menyindir atau mengejek, dikatakan dengan cakap yang berangkap.
3. Percakapan gurau-senda dan jenaka semata-mata, istimewa jika bercampur dengan rangkap atau pertentangan bunyi di mananya.

Ringkasnya seloka Melayu tidak mengandungi cerita seperti seloka Sanskrit dan tidak juga ada persamaan struktur di mananya. Seloka Melayu adalah sejenis puisi bebas, tidak mempunyai bentuk tertentu dari segi rangkap, jumlah baris dalam serangkap, jumlah perkataan dalam sebaris, sama ada berima atau tidak. Yang penting ia terdiri daripada ungkapan yang sejajar, lebih daripada dua baris, mempunyai kadensa yang sama dengan talibun atau prosa berirama; dan isinya mengandungi maksud mengejek, menyindir sama ada serius atau jenaka, atau mungkin juga mengandungi perasaan-perasaan berahi, asyik, khayal dan mimpi.

Berdasarkan definisi dan ciri-ciri seloka yang diberikan di atas, dapatlah dicontohkan beberapa bentuk seloka; iaitu:

Dari segi bentuk sama seperti talibun atau prosa berirama, iaitu terdiri daripada baris-baris yang berurutan: isinya jenaka, tetapi mengandungi sindiran yang tajam:

a. Emak Si Randang

Baik budi emak Si Randang  
Dagang lalu ditanakkan  
Tiada berkayu rumah diruntuh  
Anak pulang kelaparan  
Anak di pangku diletakkan  
Kera di hutan disusui.

(Za'ba 1962, 248)

b. Pak Kaduk

Aduhai malang Pak Kaduk  
Ayamnya menang kampung tergadai  
Ada nasi dicurahkan  
Awak pulang kebuluran

Mudik menongkah surut  
Hilir menongkah pasang;  
Ada isteri dibunuh  
Nyaris mati oleh tak makan  
Masa belayar kematian angin  
Sauh dilabuh bayu berpuput  
Ada rumah bertandang duduk.

c. Pandai Pak Pandir

Anak dipijak dagang dijinjing  
Kucing dibunuh tikus dibela  
Harta habis bawaan tergadai  
Mendengar gelagak dagang  
Tak sedar bertelanjang  
Mendengar guruuh di langit  
Air di tempayan dicurahkan  
Mulut kena suap pisang  
Buntut kena cangkuk onak  
Gunting makan di hujung  
Pak Pandir juga yang menanggung.  
Apa didengar gelagak dagang  
Gelagak rambutan jantan:  
Orang berbunga, dia berbunga  
Orang berbuah dia haram  
Kilat memancar hujan tak jadi  
Awak juga berkecundangan.

Daripada contoh-contoh di atas dengan jelas dapat dilihat hubungan yang rapat antara seloka dan peribahasa. Dalam contoh (a) ungkapan 'emak Si Randang' itu sendiri sudah merupakan peribahasa yang telah sedia difahami ertiinya oleh masyarakat yang berkenaan, (di sini masyarakat Minangkabau) yang memang telah mesra dengan cerita dan latar belakang Mak Si Randang.

Dagang lalu ditanakkan  
Anak pulang kelaparan.  
Anak di pangku diletakkan  
Kera di hutan disusui.

Seluruhnya telah difahami sebagai peribahasa menunjukkan sifat kebodohan seseorang yang mementingkan orang lain dan membela-kangi kepentingan diri dan keluarganya sendiri.

Dalam (b), ungkapan-ungkapan peribahasa didapati dalam

"Pak Kaduk", "Seperti Pak Kaduk", ditujukan kepada seseorang yang menerima nasib malang kerana sifatnya yang bodoh, tamak dan gelojoj, sepetimana dalam ceritanya yang juga telah diketahui oleh anggota-anggota masyarakat; demikian juga halnya dengan ungkapan-ungkapan yang lain:

Hilir menongkah pasang  
Mudik menongkah surut.

Masa belayar kematian angin  
Sauh dilabuh bayu berpuput.

Ia sama saja nadanya dengan ungkapan yang disebutkan oleh Zuber Usman di atas tadi, iaitu:

Gigi tanggal rawan pun murah  
Awak tua gadis bermusim.

Dalam contoh (c), seluruhnya adalah ungkapan-ungkapan peribahasa, khususnya bidal atau peribahasa berirama:

Anak dipijak dagang dijinjing  
Kucing dibunuh tikus dibela.

Sama dengan peribahasa Mak Si Randang:

Anak di pangku diletakkan  
Kera di hutan disusui.

Mendengar guruh di langit  
Air di tempayan dicurahkan.

Contoh di atas adalah peribahasa yang telah diketahui ertiinya; iaitu orang yang terlalu mengharapkan keuntungan yang besar lalu membuangkan apa yang ada. Demikianlah ungkapan-ungkapan lainnya, masing-masing berfungsi sebagai peribahasa dan dalam bentuk berangkap atau berirama:

Mulut disuap pisang  
Buntut dicangkuk onak.

Gelagak rambutan jantan:  
 Orang berbunga dia berbunga  
 Orang berbuah dia haram.

Dalam keadaan-keadaan di atas seolah-olah mahu menyatakan bahawa seloka sama bentuknya dengan bidal atau peribahasa berirama yang di dalam kajian ini digolongkan ke dalam satu genre yang tersendiri. Hal ini tidak akan mengelirukan; kerana peribahasa berirama tetap merupakan ungkapan-ungkapan yang tersendiri dalam untai-untai yang terasing; sedang seloka merupakan susunan ungkapan-ungkapan yang sejajar, sebagiannya dipetik daripada peribahasa, berangkap atau tidak, tersusun dalam baris-baris yang berurutan hingga hampir membina suatu cerita. Dan secara keseluruhannya pula seuntai seloka merujuk kepada suatu cerita yang telah benar-benar dikenali oleh masyarakat Melayu. Atas ukuran ini mungkin masih ada atau mungkin dapat dicipta untai-untai seloka berdasarkan cerita-cerita yang sama isinya, seperti Mat Jenin, Si Luncai, Si Kebayan, Si Kembang Cina, Ali Baba (atau Ali dan Baba) dan beberapa yang lain.

### **Isi dan Fungsi**

Tema dan isi seloka sungguh terbatas, seperti terbatasnya contoh-contoh yang didapati di dalam sumber-sumber tertulis dan dalam penggunaannya sehari-hari. Sesuai dengan cirinya yang dasar sebagai sindiran dan jenaka lalu tema dan isinya juga berupa sindiran, ejekan atau hanya cetusan perasaan, kagum atau benci terhadap seseorang atau perlakuannya. Bagaimanapun, jika dihalusi lebih teliti akan mudah diinsafi, bahawa ejekan dan jenaka di dalamnya tidaklah terhenti dengan maksud berhibur, bermain atau bersuka-suka semata-mata. Sebaliknya masih boleh pula diberikan interpretasi yang lebih wajar, iaitu pengajaran dan panduan kepada anggota-anggota masyarakat dalam menghadapi sesuatu keadaan yang mungkin mengancam kesejahteraan diri dan masyarakat.

Seloka "Emak Si Randang" jelas menggambarkan seorang watak yang terlalu pemurah, memberikan segala yang ada padanya kepada orang lain, hingga menafikan orang yang lebih berhak iaitu suami dan anaknya sendiri. Sindiran dan ejekan itu tentunya tidak terhenti di situ saja. Ia masih boleh ditujukan kepada seseorang, satu

kelompok masyarakat, satu bangsa atau satu golongan yang berkuasa yang mungkin bersifat bagai "Mak Si Randang"; dan seloka ini memberikan pengajaran dan ingatan supaya golongan yang berkenaan jangan bersikap terlalu murah dan terlalu pemurah, membiarkan kaum dagang meraih apa yang mereka mahu. Akibatnya itulah yang dikatakan "itik mati kehausan di air, ayam mati kelaparan di kepuk padi"; dan kaum bangsanya sendiri yang berhak, menjadi pengemis di negerinya sendiri. Motif yang sama ditemui pula dalam "Pak Kaduk" dan "Pak Pandir". Kiranya Pak Pandir bersamaan sifatnya dengan Mak Si Randang yang lebih mengutamakan 'orang dagang' daripada anak isterinya sendiri. Jelas sekali kedua-dua seloka mengecam sifat 'orang dagang' yang mengambil kesempatan dan mencari keuntungan diri sendiri, menjanjikan pelbagai kesenangan kepada Pak Pandir tetapi kemudian memungkiri janjinya, menyebabkan Pak Pandir tergadai dan telanjang bulat.

Pak Kaduk juga sebagai watak yang bodoh dan tamak hingga tidak dapat memperhitungkan akibat daripada tindakannya; isterinya dibunuh dan dia hampir mati kebuluran. Ternyata watak-watak yang dikemukakan daripada golongan yang tidak rasional, negatif dan perosak. Dalam kenyataannya memang ada watak-watak demikian dalam satu kelompok masyarakat atau satu rumpun bangsa. Dan adalah menjadi sempadan kepada golongan yang berkenaan jangan mengamalkan sikap demikian dan jangan membiarkan watak-watak seperti itu berterusan wujud dalam masyarakat yang ingin membangun.

Daripada gambaran yang diberikan, mungkin masih ada untai-untai seloka seperti itu mengenai watak-watak yang lain, seperti Si Luncai, Mat Jenin, Pak Belalang, Abu Nawas dan sebagainya, tertulis atau diucapkan di mana-mana, tetapi telah dilupai atau masih belum ditemui. Dan jika agakan itu tidak berlaku, menunjukkan seloka tidak begitu berkembang dan tidak pula luas penyebarannya dalam masyarakat dan kesusteraan Melayu.

Fungsi seloka dalam kesusteraan seperti yang diterangkan di atas hanya merupakan fungsi yang umum, sepertimana genre-genre puisi dan karya-karya sastera yang lain. Fungsinya yang khusus dalam hal ini ialah peranan dan tempatnya dalam konteks sesebuah cerita. Dengan diberikan untai-untai seloka, di bahagian permulaan, dalam cerita dan penutup, konteks yang berkenaan atau keseluruhan

cerita itu menjadi lebih berkesan, sementara penuturannya mungkin akan lebih menarik. Dalam keadaan ini hampir sama pula fungsinya seperti untai-untai puisi yang lain, pantun, gurindam atau prosa berirama yang juga berperanan demikian.

Fungsi seloka secara praktis, iaitu yang tersebar dan terpakai dalam kegiatan-kegiatan kesenian dan kebudayaan, sehingga ini amat sedikit yang diketahui. Daripada beberapa permainan kesenian yang telah ditinjau dari beberapa daerah di Semenanjung, tidak diketemukkan puisi seloka sebagai seni kata lagu dan nyanyiannya. Tegasnya seloka tidak dinyanyikan seperti pantun-pantun dalam dondang sayang, beduan atau bongai dan tidak dituturkan dalam cerita-cerita penglipur lara seperti talibun atau sesomba. Namun begitu, mungkin juga terdapat baris-baris ungkapan yang mendekati bentuk dan mengandungi nada yang sama seperti seloka, dalam dikir barat atau yang lain, tetapi secara keseluruhan seni kata tersebut tidaklah tergolong sebagai seloka.

## TEKA-TEKI

### Bentuk dan Struktur

Teka-teki merupakan satu genre puisi yang tersendiri, khususnya dari segi isi dan fungsinya; bagaimanapun dari segi bentuk dan struktur ia tergolong sebagai bentuk bebas yang terdiri daripada ungkapan-ungkapan yang mungkin tergolong ke dalam genre yang lain, terutamanya syair dan pantun. Selain daripada itu, bahkan bahagian yang terbesarnya, teka-teki terdapat dalam bentuk prosa, merupakan kalimat-kalimat yang sederhana atau yang lebih panjang. Untuk mendapatkan gambaran secara menyeluruh, bentuk-bentuk teka-teki itu dapat dibahagikan ke dalam beberapa bahagian:

1. Teka-teki yang terdiri daripada ungkapan-ungkapan yang tidak puitis; di dalamnya mengandungi satu soalan pendek merujuk kepada suatu benda yang konkret dan jawapan kepada soalan itu mungkin terdiri daripada satu atau beberapa perkataan:

Tinggi duduk dari berdiri.

(anjing)

Malam ke tengah siang ke tepi.  
(kelambu)

Sekeping papan, paku beribu-ribu.  
(parutan)

Besar sebesar emping, makannya sebuah negeri.  
(mata)

Hendak dikatakan orang bukan orang, hendak  
dikatakan binatang bukannya binatang, kaki enam  
kepala dua, ekor satu mata empat, telinga empat  
hidung dua.

(orang menunggang kuda)

2. Kalimat prosa yang lebih panjang, berkerat-kerat tetapi sejajar dan tidak puitis. Soalannya lebih panjang, merujuk kepada suatu objek atau idea, sama ada konkrit atau abstrak. Jawapannya juga mungkin satu atau beberapa perkataan:

Ada satu binatang, hairan, ia berekor panjang  
bukannya kera, terlalu berahi pada anak dara.  
(jarum)

(Dussek 1918, 15)

Abang peluk adik, adik peluk abang; kalau tak  
masuk yang sekerat tak lelap mata tidur.  
(pengancing pintu)

(Dussek 1918, 18)

Tatkala diapit telinga oleh hendak mendengar bunyi suara yang amat merdu itu, konon, maka pada ketika itu pula berbangkitlah kekasaran dengan bertegang-tegang tiada menurut kata tuannya, akal tuannya itu pun hilanglah; maka segeralah dirampaskannya serta dicekikkan batang lehernya dengan menonggengkan kepalanya ke bawah lalu disembelihnya pula, pada masa itu baharulah binatang yang tiada ekor itu berteriak-teriak dengan nyaring suaranya, memberi pilu belas mendengar dia disembelih itu, terlantarlah ia dengan tiada bergerak-bergeri, tiada kelihatan dadanya yang luka dengan tiada satu

GURINDAM, SELOKA DAN TEKA-TEKI

bekas pun pada lehernya, baharulah diketahui orang binatang  
itu tiada berhati perut adanya.

(orang menghisap rokok)

(Dussek 1918, 37)

3. Kalimat-kalimat sejarar, terdiri daripada kerat-kerat yang pendek, sama ada berima atau tidak, tetapi mempunyai ciri-ciri puisi. Idea yang dirujuk mungkin konkret atau abstrak dan jawapannya mungkin lebih daripada satu perkataan:

Satu kuda sakti  
Ekornya dempak, giginya besi.  
(kukuran)

(Dussek 1918, 18)

Sungguhpun ada tetapi tak ada  
Dapat pula tetapi tak dapat.  
(mimpi)

(Dussek 1918, 54)

Selilit akar mati  
Dililit kayu mati  
Dicampakkan dia hidup  
Ditarik ia mati.  
(gasing)

Satu batang dua belas dahan  
Satu dahan tiga puluh carang  
Satu carang dua puluh empat daun.  
(kalendar)

(Dussek 1918, 54)

Berdengung bukannya kumbang  
Mengaum bukannya harimau  
Berbelalai bukannya gajah  
Nakalnya lebih daripada ketiganya.  
(nyamuk)

(Dussek 1918, 26)

4. Bentuk pantun dua baris atau empat baris yang sederhana; sekerat pembayang sekerat maksud yang mengandungi jawapan. Bagi pantun empat baris, dua kerat pembayang sebagai soalan atau *suggestive* kepada jawapan dan dua baris lagi jawapan:

(Dussek 1918, 52)

Sim Lenggang kaca bawahnya  
(Jawab): Kening melintang mata bawahnya.

(Dussek 1918, 30)

Tutup pintu tutup lampu  
Buka kain terus main

(wayang gambar)

(Inen Shahruddin 1979, 69)

Cap celicit  
Cecawan balik pintu  
(Jawab): Pandang ke langit  
Awanlah nampak dulu.

Buk bang bu  
Teratai berterabir  
(Jawab): Janggut di dagu  
Misai di bibir.

(Inon Shaharuddin 1979, 61)

Putus lanjut putus binjai  
Putus dahan rawa-rawa,  
Cukur janggut cukur misai  
Pinanglah anak dara.

(Ihsan Hashim bin Mat I979)

Baju koteng celana pendek  
Masuk kampung curi bcbck.

(Hose 1933, 27)

GURINDAM, SELOKA DAN TEKA-TEKI

5. Bentuk pantun empat baris, keseluruhannya merujuk kepada suatu benda, konkrit atau abstrak. Di situ jawapan kepada yang disoal tidak terkandung dalam pantun, seperti dalam pantun empat baris di atas:

Birah hitam keladi hitam  
Hitam juga jadi ujinya  
Putih merah menanti hitam  
Hitam juga baik budinya:

(buah manggis)

(Dussek 1918, 110)

Raja bujang raja gentala  
Raja melihat di pohon janggi  
Ekornya terselit di celah gua  
Mulutnya menganga di gua api.

(ogah)

(Dussek 1918, 34)

Sehari-hari adik ditatih  
Dibawa dia ke rumah abang  
Berapa tinggi terbang Cik Putih  
Ke kerbau juga atau ke kubang.

(burung bangau)

(Dussek 1918, 140)

Sayang beramai digulai langit  
Digulai dengan daunnya bawang  
Antara bumi dengannya langit  
Sama tengah terawang-awang.

(lampa)

(Dussek 1918, 149)

Harum sangat bunga melati  
Tanam mari di dalam kota

PUISI MELAYU TRADISIONAL

Hairan sangat di dalam hati  
Putih hitam pandai berkata.

(suratan)

(Sulaiman Muhammad Nur 1907, 34)

Rumah tinggi balik bertingkat  
Atap dinding sama serupa  
Lamun puncanya sudah terikat  
Haram tak takut digoyang gempa.

(sarang tempua)

(Sulaiman Muhammad Nur 1907, 24)

6. Bentuk syair yang pendek, lengkap maksudnya dalam serangkap atau dua rangkap, seluruhnya merujuk kepada suatu objek konkret atau abstrak:

Panjang pendek boleh ditampa  
Ada sehasta ada sedepa  
Mulut dan mata sama serupa  
Makan bersorak sebarang berjumpa.  
(gergaji)

Buatan hakim lagi menentukan  
Buah tidak boleh dimakan  
Bukannya siput ataupun lokan  
Tabiatnya suka ditekan-tekan.  
(jam)

Matilah makhluk yang empat kaki  
Berhimpun kejadian yang enam kaki  
Meratap melawat membanyak-banyakai  
Sukalah makhluk yang tiada berkaki.

Setengah kaum benci meluat  
Yang dua kaki sempurna sifat  
Menyumpah, memaki, nista dan umpat  
Haram tak gemar duduk setempat.

(bangkai, lalat, ulat dan manusia).

Kesemua contoh di atas adalah daripada O.T. Dussek, 1918.

7. Syair yang lebih panjang, mengandungi beberapa rangkap dalam seuntai, seluruhnya merujuk kepada suatu benda atau objek yang dihuraikan secara terperinci. Pemerian demikian menjadi bayangan (*clue*) kepada objek yang dimaksudkan. Jawapannya juga merupakan syair yang panjang, mengulas dan menjelaskan bayangan yang diberikan; misalnya mengenai lukah, bubu atau tengkelak, di bawah ini:

Soalan:

Ke hadrat al-mukaram tuan yang pokta  
Kitab teka-teki masyhur berita  
Tolong selitkan karangan beta  
Di celah ruangan harap dipinta.  
Dua sifat dualah nama  
Tetapi keduanya pekerjaan sama  
Menduga harus kerja selama  
Diam setempat beberapa lama.

Apatah lagi di tempat sempit  
Kenyanglah perut buncit bersepit  
Melulur menelan seperti sumpit  
Siapa termasuk badan terapit.

Yang suatu bertekak pula  
Keluar tidak ke mulut semula  
Ke belakang jua pintu terkala  
Tiadalah lepas daripada tersula.

Yang lagi satu tiada tekaknya  
Ke mulut jua kembali keluarnya  
Dari kecil pula dilihat sifatnya  
Lagi tidak banyak yang dimakannya.

Seperti buaya menganga ia  
Seperti sawa berendam sedia  
Dikasih pula oleh manusia  
Kerana pekerjaannya sungguhlah jaya.

Selesailah hamba empunya reka  
Bodoh dan bebal berhati duka  
Mengarang syair beberapa ketika  
Hati yang bodoh semoga terbuka.

Habislah teka-teki empunya peri  
Ke dalam taman hikayat berseri  
Maaf dan ampun harap diberi  
Silap dan salah yang dikhuatir.

Dari sebab itu berharaplah fakir  
Kepada tuan-tuan dura dan hampir  
Berilah jawapan yang mana terfikir  
Janganlah segan atau khuatir.

(Mohd. Taib Osman 1975, 120–121)

Jawapan:

Ayuhi encik yang punya teka-teki  
Berbuat ihsan setiap pagi  
Sahaya menjawab syair teka-teki  
Jikalau salah harap dimaafi.

Namanya dua sifat pun dua  
Kalau tidak salah pada petua  
Di kampung-kampung ada semua  
Berguna kepada muda dan tua.

Dua benda sifat serupa  
Berlainan perbuatan mula ditempa  
Di kampung di paya ada terjumpa  
Laksana orang duduk bertapa.

Yang satu itu lukah namanya  
Bertekak bermulut pada dianya  
Ikan itu konon makanannya  
Di belakang jua tempat keluarnya.

Yang satu lagi terubin namanya  
Berinsang bertekak tidak padanya  
Ikan jua makanannya  
Tidak banyak yang dimakannya.

Keluar dianya ke mulut tentu  
Kerana adatnya sahaja begitu  
Kalau tidak, tak jadi tentu  
Kerana di belakang lubang bersatu.

Habis jawapan teka-teki ini  
Rangkap tidak betul perbuatan ini  
Jika tidak betul jawapan ini  
Jangan dimurkai kemudian hari.

Kerana sahaya sangat bodohnya  
Sekadar mencuba menjawab teka-tekinya  
Sajak janggal banyak tidak kenanya  
Maaf dan ampun akhir kalamnya.

(Mohd. Taib Osman 1975, l23–124)

8. Bentuk bebas seperti talibun atau sesomba, iaitu tidak tertentu jumlah barisnya dalam serangkap, jumlah perkataan dalam sebaris, berrama atau tidak. Za'ba menggolongkan bentuk ini sebagai gurindam; demikian juga pengarang puisi ini, Munsyi Sulaiman. Berdasarkan penjenisan dalam kajian ini bentuk ini adalah gurindam yang mengandungi teka-teki atau teka-teki dalam bentuk gurindam:

Sungguhpun ia itu diseksakan dengan  
diikat, diapit, dihimpit-  
digelek, dicerut-  
kerana menyuruh ia sujud,  
Tetapi engganlah ia melainkan sekadar rukuk.  
Sungguhpun demikian tiada pula ia membongkok  
Melainkan berdirilah ia dengan menunjukkan  
kesombongan –  
sekutu luak sekutu ditokok.  
Sehingga kedua bukit yang berhampiran  
dengan dia itu pun selalu kelihatan  
menjadi lekuk.  
Pada akhirnya dikembirikan dia lalu digelar  
namanya si puntung  
licin tiada bertakuk  
Kemudian dihalau pula ke tempat yang hina  
daripada mulia  
Maka di sana bersahabatlah ia dengan  
Pak Pekok.

(Sulaiman Muhd.Nur 1907, 55–56)

9. Bentuk talibun atau sesomba yang lebih bebas, tiada unsur-unsur rima; bentuk ini digolongkan oleh Za'ba (1962) sebagai

PUISI MELAYU TRADISIONAL

gurindam, dan oleh penulisnya, Munsyi Sulaiman, sebagai seloka:

Ada kepala telinga tidak  
Ada kaki tiada bertangan  
Masa banyak tak boleh memandang  
Adapun daging tiada berdarah  
Banyak urat tiada bertulang  
Atas bawah sama senama  
Tiada kulit banyak beroma  
Baharu bertemu berkasih-kasihan  
Bertambah benci semakin lama.

(kain sarung)

(Sulaiman Muhammad Nur 1907, 29)

Orang dagang makan tersepit  
Berkepak sebagai lang taji dengan belalang  
Hinggap bukannya belalang  
Matanya satu, makan melintang.

Wah setahun sekali makan  
Lain waktu tubuhnya tersimpan  
Matanya merah sebab tak makan.

(tuai)

(Dussek 1918, 29)

Empat pun dia satu pun dia  
Empat ditolak tiga, tinggal satu,  
tiada berguna;  
Dan tiga ditolak empat tinggal tiga,  
menumpanglah ia;  
Empat dan tiga diambil satu,  
Jadi jayalah pekerjaan yang sebelas  
dengan sempurnanya.

(tungku)

(Dussek 1918, 76)

10. Bentuk yang lebih bebas; puisi seperti talibun diikuti dengan

karangan prosa. Za'ba (1960) menggolongkan bentuk ini sebagai selok melarat.

Beberapa ekor daripada sotong yang berjari lima  
Barahu menjelma  
Duduk bersama  
Meninjam nama  
Menumpang tak lama  
Selalu ia berenang dengan tenggelam timbul  
dalam tasik zalmat  
Maka apabila keluarlah ia dari sana lalulah  
muntah di padang tekukur  
Dipandang ia tersungkur  
Bahkan memang menyungkur.

Hairan, sekonyong-konyong kelihatanlah muntahnya itu bertumbuh jadi rumput hayat, penuh sepanjang-panjang padang itu. Maka rumput itu terlalu besarlah faedahnya, dapat menghidupkan yang mati, dan mencelikkan yang buta, serta mencerdikkan yang bodoh, dan mengubahkan dari pangkat yang hina kepada mulia. Dengan dialah terutama dapat memudahkan segala pekerjaan yang sukar-sukar, lagi ialah penawar yang amat besar. Oleh yang demikian banyaklah berhimpun di sana suatu macam daripada makhluk yang memungut akan rumput-rumput itu dengan mulutnya, tetapi sekaliannya itu bukannya daripada jenis binatang sekali-kali.

(kalam)

(Sulaiman Muhd. Nur 1907, 56-57)

### Tema dan Isi

Berbanding dengan pantun dan syair, isi dan bidang yang diliputi oleh puisi teka-teki tidaklah begitu luas dan menyeluruh. Hal ini hampir sama pula dengan gurindam dan seloka yang masing-masing mempunyai peranan dan fungsinya dalam masyarakat yang melahirkan dan menggunakaninya. Secara umum fungsi teka-teki lebih jelas sebagai hiburan untuk mengisi waktu lapang bersama keluarga dan sahabat handai dalam suasana dan nada jenaka, tetapi kreatif dan puitis. Sementara seloka, tidak sahaja membawa maksud berjenaka dan bergurau senda, tetapi memberikan sindiran yang sinis kepada masyarakat. Sebaliknya gurindam lebih jelas mengandung maksud

deduktif, menyampaikan panduan dan pengajaran kepada masyarakat, khususnya kanak-kanak dan orang muda-muda supaya menjadi manusia yang sempurna dan berguna kepada masyarakat. Bertolak dari fungsi-fungsi dasar yang disebutkan itu, akan dapat pula dilihat tema dan isi setiap genre itu secara berasingan, seperti yang telah dilakukan terhadap gurindam dan seloka di atas tadi.

Sebagaimana yang telah dibicarakan, teka-teki terdiri daripada ungkapan-ungkapan yang berasingan, dari sebaris hingga beberapa baris kalimat, sejajar atau tidak, puitis dan terikat seperti pantun atau syair, atau yang tidak terikat seperti talibun atau prosa berirama, atau beberapa rangkap puisi yang membentuk satu keseluruhan yang panjang. Suatu rangkap mengemukakan satu tema atau objek; misalnya dalam teka-teki "Dah naik tak turun, dah bertambah tak kurang" di atas tadi, subjek yang dirujuk ialah usia. Di sini, subjek tersebut telah diberikan pemerian yang puitis dan perlambangan yang menyembunyikan ertinya. Demikian dalam teka-teki di bawah:

Berdengung bukannya kumbang  
 Mengaum bukannya harimau  
 Berbelalai bukannya gajah  
 Nakalnya lebih daripada ketiganya.

Objek yang dimaksudkan dalam teka-teki di atas ialah nyamuk. Tetapi dalam pemeriamnya binatang-binatang lain juga dirujuk sebagai perbandingan; dan perbandingan ini amat tepat dengan objek yang dimaksudkan. Secara umum teka-teki menggunakan hampir seluruh objek dan kejadian alam sebagai rujukan, baik objek yang konkret mahupun yang abstrak.

Antara objek-objek konkret yang umum dalam kebanyakan teka-teki adalah:

1. Bahagian-bahagian anggota manusia dan haiwan: kepala, mata, telinga, daun telinga, gigi, lidah, biji mata, kelopak mata, hidung, batang hidung, kaki, tangan, ruas jari, anak tekak, dada, kuku, rambut, jari tangan, ekor dan lain-lain.
2. Binatang dan serangga: kura-kura, udang galah, bangkai,

- lalat, ulat, gelang-gelang, anjing, lebah, itik, nyamuk, kutu, tuma, ikan dan lain-lain.
3. Tumbuh-tumbuhan: periuk kera, nanas, buah kabung, durian, jagung, tebu, kapas, kelapa, padi, manggis, peria, tembakau, gajus dan lain-lain.
  4. Benda-benda: kalam, dapur, periuk, belanga, senduk, tempayan, pelita, sumbu pelita, suratan, dacing, senapang, api, parutan, gergaji, parang, batu asah, kain, kelambu, kabu-kabu, bantal, jarum, jam, cermin mata, kertas dengan dakwat, mesin jahit, payung, papan loh, buah melaka, gunting, gelang, pahat, pisau cukur, mancis, peti dan kunci, ayakan, papan hitam, tungku, rokok, cerut, rebana, kisaran, kail, upih, antan dan lesung, cat dan kayu, besi, sumpit dan lain-lain.
  5. Kejadian-kejadian lain: manusia, siang dan malam, bulan, bintang, Adam dan Hawa, jalan raya, hujan, angin, asap dan lain-lain.
  6. Kejadian-kejadian lain yang bukan benda: Bismillah, tala suara, Alif-Wau-Ya, cajaan Arab, nyawa, kosong, hari, orang asing, mimpi, luka, genting, lapang dan lain-lain.

Daripada senarai di atas dapat dilihat penumpuan yang lebih banyak kepada benda-benda yang paling hampir dengan kehidupan manusia sehari-hari, alat-alat dapur, alatan yang berhubung dengan pekerjaan bertani, bertukang, menangkap ikan dan lain-lain, bahagian-bahagian pada anggota manusia dan haiwan, alam tumbuh-tumbuhan, haiwan dan serangga, kejadian-kejadian alam yang mempengaruhi kehidupan manusia, hingga kepada yang abstrak, perbuatan, pemikiran dan lain-lain.

Suatu hal yang amat menarik dalam teka-teki ini ialah gambaran-gambaran di dalamnya yang memperlihatkan bagaimana pekanya pemerhatian penciptanya terhadap alam kelilingnya. Setiap benda yang dirujuk, diberikan sifat yang menarik, berbeza daripada yang lain, gerak-geri dan kelakuannya (jika ia daripada benda-benda yang hidup) disampaikan dalam ungkapan yang puitis, ringkas,

tepat, tetapi indah. Perhatikan contoh teka-teki di bawah ini yang merujuk kepada gigi.

Terbenam  
ia bukan ditanam  
Hanya ia bertumbuh, tetapi tiada pula daripada mata  
Berakar, berumbi, tiada berdaun, bukannya pula ia daripada jenis pokok  
Sungguhpun bukannya tembok  
Boleh ia diperbuat kota  
ialah senjata  
Besar kegunaan kepada kita  
Lamun ia malas berserta  
Datang musuh sangat bercinta..

(Sulaiman Muhd. Nur 1907, 3)

Ringkasnya, seorang pencipta teka-teki adalah pemerhati yang sensitif terhadap kehadiran pelbagai benda di kelilingnya yang mempunyai potensi yang baik untuk dijadikan bahan persoalan. Ia juga pemerhati kepada sifat-sifat sesuatu objek yang dipilihnya yang mungkin terlepas daripada pemerhatian orang lain. Dan yang lebih penting ia adalah seniman yang dapat menggunakan kata-kata, baik dalam bentuk prosa maupun puisi, dalam suatu bentuk yang khusus untuk menjadikan ciptaannya tergolong ke dalam genre sastera yang dikenali sebagai teka-teki.

Daripada kepelbagaiannya yang didapat dari kumpulan-kumpulan yang telah ada dan yang kami kumpulkan, dapat dilihat berbagai-bagi teknik yang digunakan oleh pengarang dalam mencipta teka-tekinya. Satu cara yang umum ialah dengan menggunakan unsur perorangan kepada benda tersebut, menjadikannya beraksi, berfikir dan berbahasa seperti manusia:

Sekali sebut, jadilah ia dua  
Ada jua satu terkadang, maka bergeraklah ia  
dengan tiada bernyawa  
Ke mana pergi boleh dibawa  
Kejadiannya daripada nafsu dan hawa.  
Dua kali sebut pula jadilah ia satu  
Ada juga banyak, tetapi serupa begitu

Dan bergerak ia dengan nyawanya yang tertentu

Boleh dibawa ke sini ke situ

Kejadiannya daripada hawa dan nafsu.

(Jawabnya: gelang, gelang-gelang)

(Sulaiman Muhd. Nur 1907, 36-37)

Unsur personifikasi akan lebih jelas dan menarik apabila diberikan dalam dialog yang kadang-kadang berunsur jenaka, menggambarkan kehidupan hari-hari, pertuturan antara pelbagai kaum yang menunjukkan keadaan yang harmonis antara anggota masyarakat berbilang bangsa; misalnya dalam teka-teki "udang galah" di bawah:

"Hai Cina tua,  
Lu berjalan bongkok apa dibawa?  
Lu makan bersepit empatkah atau dua?"

"Fasal makan gua tak pilih  
Dua jadi empat pun boleh  
Lu jangan banyak bising sama gua  
Sungguhpun gua bongkok, kalau silap lu kecewa."

"Kecewa kerana lu?  
Mulut ramos penuh berbulu  
Duduk termenung bagai Si Tolu  
Undur buntut laku pemalu.

Ada senjata, mengapa tak bersarung?  
Duduk, mengapa gemar berkurung?  
Ke hulu ke hilir berjalan mengharung  
Tak ada kerja, diam termenung."

"Hai lu, jangan banyak ugut  
Bukan bulu, ialah janggut  
Kalau lu berani cuba, nanti gua renggut."

"Hai ya, Cina bongkok  
Kalau janggut, mengapa tak di bawah daguk?  
Halmu bangsat bagai Pak Plikuk

Tak ada makanan duduk membongkok  
Taujang lu terdiri, mengapa pakai songkok.

"Hai bukan taujang, gua punya misai

PUISI MELAYU TRADISIONAL

Tak usah berlepeh, boleh senang diselesai  
Gua ada satu pedang, dan dua perisai."

"Ho mia Teh, lu junjung pangsa."  
"Hai orang tua, janganlah marah  
Badan lu gemuk mengapa pucat tak berdarah?"

Hai, lu tak tahu, nanti lu tengok gua bolch merah."  
Hai ya, mengapa pula lu kuat menjarah?

Berjumpa simpanan orang, habis lu cekik muntahkan  
darah  
Bertemu tuannya nyawa merah."

"Lu pandai  
Bukan orang simpan, dia taruh dalam kedai  
Gua datang beli berdedai-dedai  
Tetapi tak ada wang atau barang pun yang hendak  
gua gadai."

"Apa guna lu makan kalau tak ada duit?  
Orang minta, lu buat terkuit-kuit  
Bibir lu sahaja tercuit-cuit?"

"Lu apa peduli?  
Gua tak ada duit mau beli  
Gua sudah makan gua mau ikut kembali  
Biar gua jadi kuli  
Tak apalah, biar gua tunggu belanga atau kuali."

(Sulaiman Muhd. Nur 1907, 14-15)

Satu ciri yang amat menarik dalam teka-teki Melayu ialah unsur jenakanya. Melalui kalimat-kalimat yang ringkas, yang memberi saranan atau dwerti (*double meaning*), pendengarnya akan dapat merasakan sesuatu yang lain daripada maksudnya yang sebenar. Oleh kerana salah satu daripada fungsinya untuk hiburan terutamanya di kalangan anak-anak muda dan orang dewasa, ungkapan-ungkapan tersebut dengan sendirinya menimbulkan minat, melalui pengalaman atau pengetahuan mereka terhadap "erti yang lain" itu. Selalunya unsur jenaka yang demikian tersemat dalam pengertian berunsur seks, merujuk kepada pemahaman terhadap objek seks atau perlakuan yang berhubungan dengannya:

## GURINDAM, SELOKA DAN TEKA-TEKI

### 1. Perhatikan sebahagian daripada teka-teki "pengancing pintu":

Terkangkang terkoyak, kalau tak dapat  
tak sedap hati tuan.

Abang peluk adik, adik peluk abang  
Kalau tak masuk nan sekerat,  
tak lelap mata tidur.

Terbuka terkangkang  
Abang peluk adik, adik peluk abang  
Sudah kena harta abang  
Baharu sedap hati adik.

(Dussek 1918, 18)

### 2. Alatan dalam rumah:

Temban longkang berlubang tengahnya  
kesukaan laki-laki  
Tirus runcing berbulu pangkalnya  
kesukaan perempuan.

(sarung parang, jarum)

(Dussek 1918, 15)

### 3. Lain-lain:

Tutup pintu tutup lampu  
Buka kain terus main.  
(wayang gambar)

Bila matahari dah jatuh  
Semuanya jadi gelap  
Bulu pun bertemu bulu  
Rasanya sangat sedap.  
(tidur)

(Inon Shaharuddin 1979, 65)

### Fungsi dan Penyebaran

Teka-teki atau *riddles* adalah daripada jenis sastera lisan yang sama fungsi dan penyebarannya dengan genre-genre sastera lisan khususnya yang berbentuk puisi. Dan sebagaimana pantun, teka-teki juga

adalah alat untuk berkomunikasi antara anggota-anggota masyarakat, selain daripada fungsinya yang utama sebagai alat hiburan. Penggunaan teka-teki yang paling ketara ialah dalam kalangan kanak-kanak dan orang-orang muda; kerana peringkat generasi inilah yang mempunyai lebih banyak masa dan peluang untuk berkomunikasi dalam suasana yang sesuai dengan genre ini. Namun demikian penggunaannya di kalangan kanak-kanak masih memerlukan peranan orang-orang dewasa, bahkan yang lebih tua, kerana golongan inilah yang berperanan dalam menyampaikan dan memperkembangkan teka-teki itu kepada generasi yang lebih muda.

Seperti cerita-cerita lisan, penglipur lara, cerita jenaka dan lain-lain, teka-teki juga berperanan dalam mengisi masa lapang dan mengadakan interaksi antara anggota-anggota keluarga. Dalam satu contoh kehidupan masyarakat Melayu tradisional yang tipikal, waktu-waktu seperti itu mungkin terluang ketika anggota-anggota keluarga itu duduk berkumpul bersama-sama, selepas makan malam atau sementara menanti waktu tidur. Pada waktu tersebut kanak-kanak mungkin bermain-main sementara yang dewasa dan lebih tua berbual, bercerita atau berteka-teki. Dalam hal berteka-teki kanak-kanak mungkin mengulang ungkapan-ungkapan yang telah diketahui dan yang dapat diingatnya dalam bentuk nyanyian atau bersoal jawab sesama mereka. Dan batas teka-teki yang digunakan dalam konteks ini akan meliputi juga unsur-unsur lisan yang lain, seperti kepercayaan, pantang larang, mitos dan legenda. Sebagai contoh, penulis menemukan soal dan jawab seperti di bawah ini:

Kalau lepas makan berdiri?

Jawab: untut

Kalau lepas makan baring?

Jawab: beguk

Kalau tidur tak basuh kaki?

Jawab: mimpi dikejar harimau

Kalau melangkah Quran?

Jawab: burut

Kalau anak dara menyanyi di dapur?

Jawab: kahwin dengan orang tua

Kalau makan dalam periuk?

Jawab: bila kahwin hari akan hujan.

Nyatanya di sini berteka-teki dan bersoal jawab adalah juga cara menyampaikan pelajaran kepada anak-anak tentang adab sopan dan tindak laku yang baik.

Suasana seperti itu, selain daripada menggambarkan penggunaan teka-teki secara praktis, memperlihatkan juga interaksi yang harmonis antara anggota-anggota keluarga dan waktu yang terluang untuk suasana begitu. Sayangnya suasana itu hanya dapat terjadi pada masa-masa lampau atau dalam daerah-daerah pedalaman iaitu ketika kanak-kanak mempunyai masa yang panjang, tanpa kesibukan menyediakan kerja sekolah dan tidak pula ada radio dan televisyen, yang dewasa ini tidak lagi menggalakkan suasana seperti itu daripada berlaku.

Di kalangan anak-anak muda, teka-teki digunakan dalam perbualan ketika bermain gasing, layang-layang, catur atau terup (*cards*), atau ketika duduk-duduk berehat setelah penat bekerja, misalnya menyediakan keperluan untuk satu majlis perkahwinan. Ungkapan-ungkapan teka-teki yang digunakan lebih dewasa sifatnya, misalnya penggunaan baris-baris yang berima, mengandungi unsur jenaka, sama ada pada objek dan idea yang dimaksudkan atau pada dwerti yang dapat difahami. Contoh-contoh di bawah ini dipetik daripada pelbagai konteks yang benar-benar berlaku:

1. Teka-teki daripada permainan bunyi:

Tuk tali perahu

(Jawabnya) Belum kena belum tahu.

Kapal belayar dalam semak

(Jawabnya) Perut lapar semua lemak.

Tapak kecil dalam hutan

(Jawabnya) Perut lapar belum makan.

Dek terkodek-kodek

(Jawabnya) 'Ndak kakak bodek adik.

Alilazi nakafaru

(Jawabnya) Apa cari katak puru.

Omar, Othman, Ali, Abu Bakar  
Empat ditanam satu dibakar  
(Jawabnya) Batang makan sirih.

Batangnya dila-  
Daunnya disa-  
Buahnya dima-  
(batang, daun dan buah pinang)

'Rus' makannya  
'Kong' dadanya  
Sa- namanya  
(sabit)

2. Jenaka melalui saranan seks:

Usik kepada tuan  
Teresa kepada tuan  
Diketuk emak tuan  
Merah padam muka tuan.  
(senapang)

Kertup-kertap tersingkap kain kakak  
Tercangkuk kemaluhan abang  
Merah padam muka kakak  
Baru sedap hati abang.  
(senapang)

Jilat bulu cucuk lubang  
Tajam di ulu bulat di belakang.  
(jarum)

Secara diakronis, teka-teki tidak sahaja tersebar di kalangan rakyat, kanak-kanak dan orang-orang muda sebagai hiburan dan pengisi waktu luang, sebagaimana yang telah dibicarakan di atas tadi. Daripada sumber-sumber sejarah, cerita-cerita rakyat dan cerita-cerita romantis Melayu dan Jawa terdapat bukti-bukti bahawa teka-teki telah juga digunakan di istana-istana, bukan saja sebagai unsur hiburan, tetapi juga untuk menunjukkan kebolehan raja-raja dan para pembesar istana mencipta puisi di samping menguji kebijaksanaan mereka. Dan tradisi ini bukan saja terdapat di daerah Nusantara, bahkan juga dalam kerajaan-kerajaan Yunani dan Romawi di Eropah.

Sayangnya tidak didapati keterangan mengenai bentuk teka-teki, prosa atau puisi yang pernah digunakan di istana raja-raja Melayu, misalnya dalam zaman kegemilangan Melaka. Tome Pires, di dalam bukunya yang terkenal, *Suma Oriental*, pada bab yang mengisahkan keadaan Melaka sebelum kedatangan Portugis, antara lain mengatakan Melaka adalah negara kota yang aman dan makmur. Penduduknya, daripada kalangan saudagar dan golongan bangsawan, tinggal di dalam rumah-rumah kawasan yang luas dan indah. Dalam majlis-majlis dan keramaian yang mereka adakan, mereka minum arak dengan banyak, bergembira dan beraksi mengikut kebiasaan orang-orang Jawa: *Both men and women are fond of mines after the fashion of Java*" (Pires 1967, 268). Melihat kepada contoh-contoh yang masih boleh didapati, termasuk daripada yang terdapat dalam kesusasteraan Jawa, ada kemungkinan antara bentuk teka-teki yang digunakan termasuk daripada jenis pantun, talibun atau sesomba dan permainan kata daripada teka-teki separuh perkataan yang sebahagiannya telah diberikan di atas tadi.

Dalam beberapa buah cerita rakyat Melayu terdapat pula kisah-kisah bagaimana teka-teki digunakan sebagai satu cara pertaruhan atau untuk menguji kebijaksanaan raja, pembesar istana, ahli nujum atau sesuatu watak tertentu dalam cerita tersebut. Dalam cerita "Pak Belalang", Pak Belalang selaku ahli nujum istana, telah beberapa kali diminta oleh raja untuk menyelesaikan teka-teki yang dikemukakan oleh pencabar-pencabar dari negeri asing: juragan atau nakhoda. Taruhannya negeri dan takhta kerajaan raja dan bagi nakhoda, semua kapalnya serta segala isi di dalamnya. Demikian Pak Belalang harus meneka jantan dan betina daripada sekumpulan anak-anak itik yang baru menetas. Dengan secara kebetulan, iaitu setelah mengintip dan mendengar perbualan nakhoda dan isterinya, Pak Belalang berjaya menyelesaikan masalah itu dengan melepaskan anak-anak itik itu ke air, yang lebih dulu menyelam seharusnya jantan; yang kemudian, betina. Pada waktu yang lain dia sekali lagi dikemukakan dengan masalah yang hampir sama, iaitu menentukan hujung dan pangkal kayu-kayu yang telah ditaruh sedemikian rupa. Lalu dengan cara yang sama pula Pak Belalang menyelesaikannya dengan menimbang dan melepaskan kayu-kayu itu ke dalam air: yang cepat tenggelam, pangkal; yang kemudian, hujung (Winstedt dan Sturrock 1970, 61-71).

Perbuatan bertaruh melalui pertandingan berteka-teki ini didapati lebih umum dan lebih jelas dalam Cerita-cerita Panji Melayu dan Jawa. Cerita-cerita ini dikatakan berasal dari Jawa, menggunakan latar Jawa dan sesuai dengan tradisi dan kebudayaan Jawa. Satu daripada babak-babak yang tipikal dalam cerita-cerita itu ialah pertandingan 'cengkeriman', iaitu sejenis teka-teki. Dalam salah sebuah cerita Panji, *Hikayat Dewa Asmara Jaya*, babak tersebut diceritakan kira-kira begini:

Selepas itu datang pula Kelana Brahmana, seorang ahli cengkeriman yang cerdik cendekia. Banyak negeri yang telah dialahkannya dalam bercengkeriman dan taruhan yang dimintanya ialah puteri raja negeri itu dan segala harta yang mahal-mahal. Sehingga itu dia telah memiliki empat puluh orang puteri yang telah dimenanginya dalam pertandingan bercengkeriman. Apabila dia mengemukakan cengkerimannya kepada Ratu Daha, tidak ada seorang pun yang sanggup menjawabnya. Ratu Daha meminta tempoh tujuh hari dan mengumumkan akan mengahwinkan puterinya, Galuh Cenderakirana dengan sesiapa yang berjaya menjawab cengkeriman itu nanti. Tentu saja tidak ada yang sanggup selain daripada Panji. Pada hari yang ditentukan, dengan mudah Inu menyelesaikannya dan ini amat memerlukan sekalian yang hadir.

(Harun Mat Piah 1980a, 47)

Cengkeriman yang dikemukakan oleh Kelana Brahman itu berbunyi demikian: Ada sebentuk cincin, di dalamnya dua biji permata yang tidak ternilai harganya. Dan jawapannya juga mudah: Cincin itu ialah Ratu Daha; dua biji permata itu ialah Gunung Sari dan Galuh Cenderakirana (Raden Gunung Sari ialah putera Ratu Daha).

Satu lagi babak bercengkeriman ialah dalam *Hikayat Misa Sususpan*, di mana diceritakan kisah Sira Panji (Raden Inu Kertapati) ditukarkan menjadi perempuan oleh para dewa. Dia hanya boleh kembali kepada sifatnya yang asal jika dia dapat menjawab cengkeriman yang dikemukakan oleh anaknya sendiri, Wira Numan, yang telah lama ditinggalkannya dan pada waktu itu sedang mengembara mencari bapanya. Dalam babak itu Panji berjaya, lalu kembali menjadi lelaki dan pertarungan itu menjadi pertemuan anak

dan bapa yang membahagiakan keduanya (Harun Mat Piah 1980a, 78–80).

Daripada contoh-contoh cengkeriman di dalam hikayat-hikayat di atas, ternyata ia berbeza daripada wangsalan Jawa yang juga tergolong sebagai *riddles*. Tetapi wangsalan Jawa adalah sejenis permainan bunyi yang agak sukar difahami oleh pendengar biasa; sedang cengkeriman yang dibicarakan di sini hampir menyerupai teka-teki Melayu dan dalam bentuk prosa. Namun, mungkin juga terjemahan dalam bahasa Melayunya telah mengubah bentuk yang asal, yang dalam bahasa Jawa tergolong sebagai puisi, tembang atau kidung.

Benar atau tidaknya konteks dan kisah daripada cerita-cerita tersebut, tidak perlu dipersoalkan. Bukti yang dipentingkan di sini ialah tradisi pemakaian teka-teki itu telah lama wujud dan begitu mesra dalam masyarakat Melayu hingga diabadikan dalam cerita-ceritanya, baik dalam tradisi lisan maupun tulisan. Pun tradisi dan kebiasaan tersebut masih kekal ke dewasa ini dengan fungsi dan peranan yang hampir sama pula.

## BAB VI

# TALIBUN DAN PROSA BERIRAMA

### TALIBUN

#### Istilah dan Pemakaian

DALAM Bab II telah disebutkan dengan ringkas penggunaan istilah 'talibun' atau 'sesomba' sebagai menggantikan istilah bahasa berirama yang telah digunakan sebelum ini. Hal ini dilakukan kerana istilah bahasa berirama itu dirasakan tidak menepati konsep puisi atau genre yang dimaksudkan dan tidak dapat disejajarkan penggunaannya dengan keseluruhan genre puisi Melayu tradisional itu. Alasan pertamanya ialah bahawa istilah itu dipadankan daripada perkataan *rhythrical verse* yang digunakan oleh Winstedt, yang dimaksudkannya sebagai mewakili semua bentuk puisi Melayu lama, selain daripada pantun dan syair. Ia juga dimaksudkan sebagai *rhythrical passages* dan *descriptive passages* yang terdapat dalam kebanyakan cerita-cerita rakyat Melayu. Dengan penggunaan seperti itu menjadikan istilah itu terlalu umum hingga tidak lagi berjaya memberikan pengertian yang khusus, sesuai dengan bentuk puisi yang diwakilinya.

Kedua, istilah ini digunakan supaya dapat disejajarkan dengan pengertian prosa berirama (*rhythrical prose*) atau prosa lirik (*lyric prose*), yang digunakan dalam kajian ini. Dengan demikian istilah 'talibun' atau 'sesomba' dalam kajian ini akan membawa konsep dan pengertian yang sama dengan *rhythrical passages* yang digunakan oleh Winstedt pada tempat-tempat yang berkenaan. Dan oleh kerana istilah ini baru dikemukakan dalam kajian ini, mungkin lebih

baik dibicarakan dengan ringkas konsep dan penggunaannya sebelum dan sesudah ini.

Sebagai bahasa berirama (*rhythmical verse*), R.O. Winstedt menyamakannya dengan puisi Anglo-Saxon, seperti yang terdapat dalam Beowulf (lihat Highet 1967, 23–28), di mana bahasanya tersusun dalam bentuk yang tidak teratur, baris-barisnya berirama tetapi tidak mempunyai pola irama yang tertentu dan di sana sini dipenuhi dengan *stock tags* yang digunakan oleh penuturnya bila inspirasi dan ingatannya kabur atau hilang. Kerat-kerat kalimatnya yang hampir sama panjangnya lebih merupakan pengaruh dari tekanan-tekanan suku kata atau perkataan; dan keadaan ini hampir sama bentuknya dalam keseluruhan cerita. Keadaan seperti itu terdapat juga dalam puisi Melayu yang dikatakannya sebagai ‘bahasa berirama’:

*Anglo-Saxon verse, therefore, was very similar to the rugged rhythmical verse that seems to have been the Malay's first essay in poetry, a form still chanted by medicine man in his incantations and preserved in the legal maxims, songs of origin and rhapsodist tales of the Minangkabaus, who in their highland Sumatera home were slow to become literate and late to adopt Islam and the Perso-Arabic scripts, so that even their version of the story of Queen Sheba takes the form of rhythmical recital.*

(Winstedt 1960, 178)

Dengan tanggapan demikian, Winstedt memberikan beberapa contoh; satu daripadanya, puisi dari *Hikayat Raja-Raja Pasai*, di bawah ini:

1. Ayuhai dara Zulaikha Tingkap  
Bangun apalah engkau  
Kerana engkau penghulu gundikku  
Bergelar Tun Derma di Kara  
Bangun apalah engkau  
Tidakkah kaudengar bunyi  
Genderang perang di Tukasan?  
Palu tabuh-tabuhan  
Hari dinihari bulan pun terang.

(hlm 178)

Sebagai *legal maxims*, Winstedt memberikan contoh daripada genre yang kita kenali di sini sebagai teromba:

2. Allah belum bernama Allah  
Muhammad belum bernama Muhammad  
Bumi belum bernama bumi  
Langit belum bernama langit  
Langit bernama payung negeri  
Bumi itu segedang talam  
Langit itu segedang payung

(hlm 180)

Contoh yang lain ialah yang tergolong sebagai mantera:

3. Assalamualaikum  
Puteri si tikung besar  
Si gedebah mayang  
Puteri tujuh  
Dara dang mayang  
Mari kecil ke mari  
Mari senik ke mari  
Mari burung ke mari  
Mari halus ke mari  
Aku memaut lehermu  
Aku menyanggul rambutmu  
Aku membawa sadap gading  
Aku membasuh mukamu  
Sadap gading merancung kamu  
Kaca gading menadahkan kamu  
Kolam gading menanti di bawahmu  
Bertepuk berkecar di dalam kolam gading  
Kolam bernama Maharaja Bersalin.

(hlm 181)

Daripada pengertian dan contoh-contoh yang dikemukakan oleh Winstedt itu menunjukkan istilah *rhythrical verse* itu tidaklah mewakili sesebuah genre puisi yang khusus, tetapi digunakan sebagai menamakan semua puisi yang tidak mempunyai bentuk atau struktur tertentu, iaitu puisi bebas, selain pantun dan syair. Dan perlu pula diingatkan di sini, dalam kajian Winstedt yang ringkas mengenai puisi Melayu (satu bab mengandungi 30 halaman) beliau tidak

menyentuh genre-genre puisi Melayu yang lain seperti teka-teki, peribahasa berangkap, gurindam, seloka, teromba, mantera dan zikir; dan beliau tidak juga menyinggung puisi Melayu saduran atau terjemahan dari Arab-Parsi, seperti bayt, ruba'i, nazam, kit'ah, masnawi dan ghazal. Jelasnya di sini, pengertian *rhythrical verse* yang digunakan dalam kajiannya itu telah menggolongkan semua genre puisi Melayu, selain daripada pantun dan syair ke dalam satu tanggapan; sedang pada kenyataannya masih dapat diasingkan menurut ciri-ciri masing-masing.

Kerana itu pengertian talibun atau sesomba yang digunakan dalam kajian ini yang pada dasarnya menggantikan konsep ‘bahasa berirama’ itu, tidaklah sama dengan pengertian *rhythrical verse* yang digunakan oleh Winstedt. Dalam huraian dan contoh-contoh yang akan diberikan seterusnya, talibun atau sesomba lebih mendekati pengertian sesomba yang dikemukakan oleh Zuber Usman (1975) dan talibun, dalam contoh “Talibun Persisir” yang dikemukakan oleh Dada Meuraxa (lihat Zuber Usman 1975, 159) dan seperti apa yang dikenali sebagai rangkap ulang (*runs*) dalam istilah puisi Inggeris dan cerita-cerita Gaelic (Sweeney 1973, 29). Ringkasnya secara analisis, sesuatu untai talibun atau sesomba akan mengandungi sebahagian besar daripada ciri-ciri di bawah:

1. Ia tergolong sebagai puisi (dengan mempunyai ciri-ciri kepuisian sebagaimana yang telah disebutkan terdahulu) tetapi ia tidak mempunyai bentuk atau struktur tertentu dari segi jumlah baris dalam serangkap (selain daripada mempunyai beberapa baris yang berurutan seperti yang diperlukan dalam talibun). Ia tidak semestinya berangkap, dan kalau berangkap, tidak tertentu jumlah barisnya dalam serangkap, jumlah rangkap dalam sebuah untai dan jumlah perkataan dalam sebaris. Dan ia tidak mempunyai sistem rima yang tertentu.
2. Dalam sesuatu untai talibun/sesomba, mungkin terdapat ungkapan atau rangkap daripada genre yang lain, misalnya pantun, syair, peribahasa berangkap, gurindam, seloka, teromba atau mantera; tetapi rangkap yang demikian tetap merupakan sisipan dan dianggap sebahagian daripada suatu untai talibun yang dibicarakan.

3. Fungsi, peranan atau kedudukan untai puisi itu (talibun atau sesomba) adalah sebagai sisipan atau selingan dalam sesebuah cerita, khususnya yang tergolong sebagai penglipur lara. Fungsinya di situ merupakan ungkapan-ungkapan pemerian (*descriptive passages*) kepada cerita yang berkenaan dan adalah sebagai sebahagian daripada cerita tersebut.
4. Sehubungan dengan (3) di atas, tema dan isi puisi itu akan merupakan pemerian tambahan kepada konteks yang tertentu, misalnya keindahan sebuah kota, kecantikan seorang putera atau puteri, kesaktian sejenis senjata, keadaan sesuatu perlakuan dan sebagainya.
5. Suatu ciri yang penting pada puisi talibun atau sesomba ini, bahawa ia merupakan satu set (ungkapan, rangkap atau untai) yang tetap, digunakan secara berulang-ulang, dalam konteks dan maksud yang sama dalam sebuah cerita, bahkan dalam cerita-cerita yang lain yang tergolong sebagai cerita-cerita penglipur lara.

Sesungguhnya dari segi bentuk dan struktur, talibun atau sesomba memang tidak jauh bezanya dengan genre-genre lain yang tergolong sebagai puisi bebas, khasnya teka-teki, gurindam, seloka, prosa berirama (*rhythmical prose*), teromba dan mantera. Tetapi berdasarkan konsep yang telah dipakai dalam menentukan genre ini, bahawa puisi Melayu lama tidak saja ditentukan oleh faktor-faktor luaran iaitu bentuk dan struktur, tetapi juga oleh faktor-faktor dalaman iaitu tema, isi dan fungsi.

Berdasarkan konsep di atas, contoh (1), "Ayuhi dara Zulaikha Tingkap" yang dipetik oleh Winstedt, tidak kita golongkan sebagai talibun atau sesomba kerana ia berlawanan dengan ciri (5) di atas, yang dianggap penting dalam penggolongan ini. Untai puisi tersebut, walaupun merupakan sisipan dalam sebuah cerita, tetapi cerita yang berkenaan bukan daripada genre penglipur lara, dan ia tidak diulang dalam konteks-konteks yang lain dalam cerita yang sama dan tidak juga terdapat dalam mana-mana cerita, baik dalam genre historiografi seperti *Hikayat Raja-Raja Pasai*, apalagi dalam cerita-cerita penglipur lara, di Sumatera atau di Semenanjung. Dengan keadaan

demikian puisi tersebut telah mempunyai sifat-sifat perseorangan (individualiti), iaitu khusus ditujukan kepada seseorang, Zulaikha Tingkap dalam hikayat yang tertentu dan dalam konteks yang tertentu. Kerana itu, dalam kajian ini, puisi tersebut digolongkan sebagai gurindam.

Demikian pula contoh (2) yang dipetik oleh Winstedt (halaman 180), tidak kita golongkan sebagai talibun, kerana ia lebih tepat berkedudukan sebagai teromba; sementara contoh (3) adalah mantera, sesuai dengan mantera-mantera yang lain yang sama isi dan fungsi-nya; kerana itu ia bukan juga talibun (Winstedt: 'bahasa berirama').

Kesimpulan daripadauraian dan contoh-contoh yang dijelaskan di atas memperlihatkan persamaan tanggapan yang diberikan di sini mengenai talibun atau sesomba, dengan pendapat Mohd. Taib Osman mengenai genre yang sama yang disebutkannya sebagai 'bahasa berirama'.

Dalam hubungan ini suka saya menarik perhatian bahawa kebanyakannya daripada ikatan bahasa berirama itu lahir kerana dorongan untuk menggambarkan sesuatu. Lazimnya pula ikatan-ikatan puisi ini diperlukan untuk menghiasi cerita. Bagi mereka yang pernah melihat drama tradisional orang-orang Minangkabau, iaitu 'Randai', ataupun mendengar penuturan 'kaba', atau cerita-cerita rakyat Minangkabau, jelas kepada mereka bahawa tutur kata keseluruhannya adalah bahasa berirama atau bahasa puisi. Dalam cerita rakyat Melayu, bahagian-bahagian tertentu dalam cerita merupakan daya menggambarkan sesuatu objek seperti pakaian, sebuah negeri atau kota, perlakuan seperti menyembah; atau sikap seperti taat setia rakyat kepada rajanya; sifat seperti kebesaran, kelajuan, kecantikan ataupun kehebatan; atau suatu yang lebih abstrak seperti perasaan kesedihan atau kegembiraan.

(Mohd. Taib Osman 1975b, 136)

### **Analisis Bentuk dan Struktur**

Daripada contoh-contoh yang didapati daripada berbagai-bagi sumber, dapat dikatakan, dari segi bentuk dan struktur, talibun atau sesomba tidak mempunyai variasi yang banyak seperti dalam pantun dan syair. Hal ini mungkin kerana sifat dan peranan puisi itu sebagai sebahagian daripada cerita-cerita lisan yang disampaikan oleh penu-

turnya dengan suara yang *monotonous* atau intonasi yang tidak banyak berubah. Kerana itu apabila puisi itu dituliskan menjadikan bentuknya terdapat hanya dalam baris-baris yang berurutan, tidak ada kepelbaaan dalam penyusunan baris dan rangkap sehingga menghilangkan aspek keindahan visualnya dari segi susunan baris dan rangkap seperti yang ada pada beberapa genre yang lain. Walau bagaimanapun, keadaan demikian mungkin sebagai pilihan sahaja kepada penulis atau penyair yang menurunkan puisi itu; kerana dalam beberapa keadaan, puisi tersebut masih boleh disusun semula ke dalam baris-baris dan rangkap berdasarkan beberapa aspek.

Perhatikan contoh-contoh di bawah ini:

1. Berdasarkan objek yang dihuraikan:

Mengangkat kadam kepak yang indah  
 Kuncup seperti sulur bakung  
 Sayap seperti susun sirih  
 Tertanggam paruh yang keemasan  
 Tertiupuh kaki yang kiri  
 Terdiri kaki yang kanan  
 Sembah bergelar lela sembah  
 Tiga tapak mara ke hadapan  
 Dua tapak undur ke belakang.

(Mohd. Taib Osman 1975b, 141)

Puisi di atas itu dapat disusun semula ke dalam baris dan rangkap sehingga dapat memberikan bentuk yang tersendiri pula, misalnya seperti di bawah ini:

Mengangkat kadam kepak yang indah  
 Kuncup seperti sulur bakung  
 Sayap seperti susun sirih.

Dari jauh menjunjung duli  
 Sudah dekat langsung menyembah  
 Terangkat kadam jari sepuluh  
 Kuncup bagi sulur bakung  
 Jari seperti susun sirih  
 Tertanggam paruh yang keemasan

Tertimpuh kaki yang kiri  
Terdiri kaki yang kanan.

Sembah bergelar lelah sembah  
Tiga tapak mara ke hadapan  
Dua tapak undur ke belakang.

Penyusunan baris-baris itu ke dalam rangkap-rangkap yang terdiri daripada 3 : 8 : 3, selain daripada memberikan sedikit kepelbagaiuan visual, dapat pula mengasingkan aspek-aspek yang dihuraikan. Rangkap pertama merupakan penceritaan yang umum daripada satu perlakuan menyembah. Rangkap kedua ialah pemerian kelakuan itu, bagaimana sembah itu dilakukan, dari selangkah ke langkah yang lain. Dan rangkap ketiga sebagai penutup pemerian dan penjelasan bahawa sembah yang tersebut mempunyai namanya yang tersendiri, iaitu 'lela sembah', sesuai dengan langkah dan perlakuan-nya, tempatnya dan kepada siapa sembah itu dihadapkan.

Lihat contoh yang lain yang telah disusun semula menurut ukuran di atas:

*Pakaian Malim Dewa*

Seluar intan dikarang  
Karangan Hasan dan Husin  
Jikalau dititiup angin selatan  
Menghabis tahun berbalik musim.

Bajunya baldu ainul banat  
Kain kembang kampuh pelangi  
Bukannya kain di bawah angin  
Kain kelambu Rasulullah.

Berikat pinggang kain cindai  
Panjang tengah tiga puluh  
Tiga puluh dengan rambunya.

Keris bersarung emas sepuluh  
Hulunya manikam sembilan warna  
Keris bernama jalak jantan  
Berkerawang pamur di pangkalnya  
Subhanallah di hujungnya.

Pedang jenawi lantai balai  
Selebar daun padi  
Solek belah mumbang di kukunya.

Tengkolok bernama tengkolok alang  
Tepi bertelepuk perada terbang  
Azimat bertulis kalimah Arab  
Sekian hikmat pelias peperangan  
Dipandang musuh tak dapat ditentang.

(Mohd. Taib Osman 1975b, 143)

2. Bentuk yang dapat diasing berdasarkan rangkapan dari genre yang lain:

Seluar intan dikarang  
Karangan Hasan dengan Husin  
Tidak dapat masa sekarang  
Nantikan angin beralih musim.

Bajunya baldu bertengkuk kuning  
Selepong kain Bugis Kembayat.

Kerisnya jalak jantan  
Berkerawang di pangkalnya  
Di hujungnya 'Subhanallah'.

Tengkolok kampuh pelangi  
Bukan pelangi zaman ini  
Pelangi zaman dahulu.

Tiap sudut ada hikmat  
Tiap sudut ada azimat.

(Winstedt dan Sturrock 1957a, 43)

Penyusunan ke dalam baris dan rangkap dalam bentuk 4 : 2 : 3 : 5 di atas berdasarkan dua ukuran; pertamanya dengan adanya bentuk dari genre lain dalam kedudukan permulaan, iaitu satu dari pada variasi syair yang menggunakan rima pantun a-b-a-b. Dan kedua, ukuran yang digunakan dalam (1) di atas, iaitu berdasarkan objek atau bahagian yang dihuraikan: baju dan selempang, keris dan

tengkolok. Masih ada beberapa contoh yang dapat disusun semula dengan menggunakan ukuran yang sama; misalnya:

*Talibun Pesisir*

Jip, Jip, badrun ya ... maulai  
Dengarkan saya hendak bertalibun  
Bukan umpat bukan sindiran  
Bukan dipetik dari fikiran.

Dengarkan benar jelas-jelas  
Saya papar saya huraikan  
Bagai menyusun buah ratap:

Atap nan tidak teratapkan  
Atap nan dari kebun salak  
Mata nan tidak terlelapkan  
Mendengar kokok ayam jalak.

Si Jalak burung Si Jalai  
Anak murai pandai berkata  
Usah berkata dua kali.

Sekali pasang gemuruh  
Dua kali pasang tenggiri  
Sudah putus tali tundanya  
Sebab kami datang ke mari  
Ada gerak asal mulanya.

(Zuber Usman 1957, 167–168)

Dalam contoh di atas penyusunan menggunakan kedua-dua ukuran tadi. Rangkap-rangkap 3 dan 5 adalah pantun, sementara yang lain, sama seperti baris-baris talibun yang umum, dan baris pertama sebagai pendahuluan, yang di dalam persembahannya dinyanyikan dengan nada dan melodi yang berlainan daripada rangkap-rangkap yang lain. Rangkap 5 merupakan pantun lima baris yang hampir sama dengan pantun rejang atau pantun naratif seperti "Si Busu Pandai Membilang Malam" yang disebutkan terdahulu.

3. Urutan yang tidak dapat diasingkan:

Selain daripada dua bentuk yang diberikan di atas, hampir

seluruh puisi ini merupakan urutan baris-baris yang tidak dapat diasingkan. Pertama, kerana keseluruhan untai merupakan pemerian suatu objek atau aspek sahaja; dan kedua, keseluruhan penceritaan merupakan urutan idea yang berasingan, hingga tidak sesuai dipisahkan ke dalam rangkap-rangkap yang teratur, menurut dua ukuran di atas, misalnya:

- a. Keris sempana ganja iras  
 Retak diturut panjut putih  
 Besi dititik besi ditinting  
 Serpai besi kharsani  
 Sebulan dagang menggalas  
 Jejak ditikam mati juga  
 Setitik darah ke daratan  
 Setahun padi tak jadi  
 Setitik darah ke lautan  
 Setahun ikan tak main.
  
- b. Dikenakan langkah sidang budiman  
 Anak ular berbelit di kaki  
 Anak helang terbang menyongsong angin  
 Selangkah ke hadapan  
 Dua langkah balik ke belakang  
 Selangkah ke hadapan tanda meninggalkan  
 negeri  
  
 Dua langkah ke belakang tanda berbalik  
 Selangkah kaki yang kanan  
 Berderik canggai di kiri  
 Selangkah kaki yang kiri  
 Berderik canggai di kanan  
 Terayak dada yang bidang  
 Terlampai jari yang halus  
 Dikenakan langkah meruku kacang  
 Terkana lenggang menabur bayam.

(Mohd. Taib Osman 1975b, 146)

Daripada contoh (b) yang dikemukakan di atas, dan sebahagian yang disebutkan terdahulu, penyusunan baris ke dalam rangkap-rangkap seperti yang diberikan pada bentuk-bentuk (1) dan (2) lebih

bersifat subjektif dan tertakluk kepada penilaian perseorangan; sebagai contoh, contoh 3 (b) di atas masih boleh diasingkan menurut rangkap, sesuai dengan bentuk (1); hanya dalam contoh yang akhir ini keadaan itu tidak begitu jelas untuk diasingkan dengan teratur.

### Analisis Tema dan Isi

Tema dan isi talibun atau sesomba, sesuai dengan fungsinya, dapat dikatakan luas dan beragam. Ini ialah kerana pemakaianya sebagai ungkapan-ungkapan pemerian, berulang-ulang dan tipikal sifatnya, dalam cerita-cerita penglipur lara atau sebagai nyanyian dalam suatu persembahan seni. Umumnya tema dan isi sesebuah untai talibun akan selalu bergantung kepada konteks yang diberikan dalam cerita yang berkenaan. Dan antara aspek-aspek yang umum yang diberikan pemerian demikian dapatlah disenaraikan seperti di bawah:

1. Sebuah negeri, kota, istana, bandar dan sebagainya; keindahan, keistimewaan dan keajaibannya.
2. Senjata seorang raja, atau lambang sebuah negeri, seperti keris, pedang, tombak, meriam dan lain-lain.
3. Kenderaan raja, bahtera, kapal atau lancang, keistimewaan dan kesaktiannya, kelajuannya dan lain-lain.
4. Pakaian wira, wirawati dan pelaku-pelaku utama, kehebatannya, hikmat dan keajaibannya.
5. Rupa, sifat, kehebatan dan kecantikan pelaku-pelaku utama; sifat-sifat fizikal, termasuk panau di tubuh, gerak-geri dan kelakuan yang istimewa.
6. Keadaan sesuatu perlakuan, adat menyembah, melangkah untuk berjalan, raja berangkat dan sebagainya.
7. Keadaan dan gejala alam yang ajaib, atau sesuatu waktu yang menarik; ketika kelahiran putera raja, waktu hari akan siang dan lain-lain.

8. Perasaan yang berhubung atau akibat daripada sesuatu kejadian; sedih, gembira, marah; dengan sebab kematian, perceraian, tercabar, mendapat malu dan sebagainya.
9. Suatu tradisi, salasilah adat atau kepercayaan; suatu peristiwa ringkas yang berhubungan dengan sebuah kelompok masyarakat atau sebagainya, disampaikan dalam nyanyian sebagai satu persembahan seni.
10. Pemerian-pemerian yang lain.

Untuk menggambarkan tema dan isi sesuatu pemerian di atas, di samping mengemukakan keragaman bentuk dan stail, di bawah ini diberikan contoh-contoh pemerian di sekitar seorang watak. Memang pada kenyataannya juga hampir keseluruhan pemerian tentang aspek, objek, perlakuan dan lain-lain, berkisar di sekitar seorang watak, iaitu watak istimewa: tanda-tanda alam akan kelaahirannya, lahirnya bersama senjata atau haiwan yang sakti, ketangkasan dan kecantikannya apabila telah besar, cinta dan pengembaraannya, kegagahannya menentang musuh dan pancaroba-pancaroba lain, tindak lakunya, adil, bijaksana, pemurah; adat istiadat yang diadakannya dan sebagainya. Perhatikan beberapa contoh yang setengah-setengahnya diberikan dalam konteks yang berkenaan:

#### 1. Kelahiran Malim Deman:

Hari Ahad bertimpa Isnin  
Dua belas haribulan  
Dua belas tapak bayang-bayang  
Menderam-deram hujan panas  
Panah memanah petir  
Sabung-menyabung kilat  
Berbunyi sekalian bunyi-bunyian.

(Winstedt dan Sturrock 1957a, 48)

#### 2. Kisah kelahiran Raja Donan:

Maka berjampilah bidan 'ngan tujuh;  
Dijampi sirih tiga kapur  
Dijampi minyak selusur.

## TALIBUN DAN PROSA BERIRAMA

Maka minyak selusur itu dituskan pada ubun-ubun, dicalitkan pada pusat. Kemudian bernyanglah bidan 'ngan tujuh, "Ya Allah, ya Tuhanmu Rabbi. Jikalau ya aku bidan 'ngan tujuh, melancarlah anak raja ini:

Bagai belut diketil ekor  
Bagai mayang mengurai.

Tidak beberapa lama, setelah lepas di mulut, lepas di hati, maka meluncurlah anak raja itu:

Bagai belut diketil ekor  
Bagai mayang mengurai  
Jatuh ke tikar, tikar roboh  
Jatuh ke lantai, lantai parah.

Lalu jatuh ke tanah. Maka berlariyah bidan 'ngan tujuh, berdahulu-dahuluan cepat, pergi mendapatkan kanak-kanak itu. Setelah dekat dengan kanak-kanak itu maka dilihat oleh bidan 'ngan tujuh pada kanak-kanak itu ada:

Pedang sebilah di tangan kanan  
Telur sebiji di tangan kiri  
Bedil selaras di bahu kanan.

(Zaharah Khalid 1963, 39-40)

### 3. Maka anak raja itu pun membesar:

Besar siang besar malam  
Besar bagai dititiup-tiup  
Besar bagai dihembus-hembus  
Dari mengiring sampai meniarap  
Dari meniarap sampai menjalar  
Dari menjalar sampai merangkak  
Dari merangkak sampai berdiri lepas  
Dari berdiri lepas sampai berjalan jatuh  
Lama-lama pandailah ia berlari  
Berlari ke hulu  
Berlari ke hilir.

(Zaharah Khalid 1963, 42)

Si anak membesar dan menjadi seorang yang amat cantik, kacak atau tampan; segalanya istimewa, termasuk tompokan panau pada tubuhnya:

4. Kecantikan Sabai Nan Aluih:

Rupanya kuning kemerahan  
Bak tebu di dalam ladang  
Bak udang kepalang panggang  
Tak dapat ditentang nyata.

Rambut kerinting gulung tiga  
Telinganya jerat tertahan  
Bulu mata semut beriring  
Hidung bagai dusun tunggal  
Dagunya awan tergantung  
Bibirnya limau seulas  
Keningnya bentuk tajian  
Lidahnya bagai mempelam masak  
Betisnya bak perut padi  
Tumit nan bagai telur burung  
Induk kaki bungkal setahil  
Bentuk badan lemah dan lampai  
Penglihatan pelita padam  
Jari halus kuku berinai  
Tampan sudah langgam terbawa  
Bagai dilukis digambarkan.

(Hooykaas 1965, 322 – 323)

5. Kecantikan panau di tubuh:

Panau di keping bintang bertabur  
Panau di pipi pauh dilayang  
Panau di leher berintik kuang  
Panau di tangan bergelang puyuh  
Panau di rusuk bersiku keluang  
Panau di belakang bertapak catur  
Panau di dada boleh buat ganti hikayat Jawa

(Mohd. Taib Osman 1975b, 145)

6. Bandingkan dengan kecantikan panau seorang watak dalam lagu "Gebang Panjang".

Selaga memintal jala  
Pecah sepiring dilayangkan  
Bertabur panau di dada  
Panau di keping abang bayangkan.  
Setabur panau di dada  
Panau di tengkuk abang bayangkan.

## TALIBUN DAN PROSA BERIRAMA

Panau di tengkuk perintik balam  
Panau di jari pemintal jala  
Panau di tengkuk perindu dendam  
Panau di pipi panau menghela.

Menghela di hulu menghela di hilir  
Menghela di tengah berderik-derik  
Panau di pipi panau di bibir  
Panau berjejer menambah cantik.

(Abd. Latif Oyek, Kuala Pilah 1978)

Tibalah waktunya wira akan mengembara kerana suatu tujuan, berburu, mencari sesuatu untuk ubat, atau puteri yang dilihatnya dalam mimpiinya, atau diilhamkan oleh seorang wali Allah supaya berbuat demikian. Ia pun mengenakan pakaian yang amat istimewa untuk pergi menghadap ayahanda bondanya di istana:

### 7. Pakaian Raja Seri Rama:

Terambil seluar berdewanggi  
Perak berpesong sendirinya  
Beratus-ratus cermin di pinggang  
Beribu-ribu cermin di kaki  
Menabur merata-rata badan  
Cermin besar menurut pesak.

Kain cindai jantan panjang tengah tiga puluh  
Tiga puluh dengan rambu-rambunya  
Tiga kali sehari berubah warnanya  
Pagi-pagi warna embun  
Tengah hari warna lembayung  
Petang-petang warna minyak.

Baju baldu kesumba murup  
Tiga kali menolak seri  
Tujuh kali menolak pati  
Tiga tahun dagang belayar  
Pati lekat di tapak tangan.

Keris sempana ganja iras  
Ganja menumpang puting berputar sendirinya  
Retak mayat dua seanjur di pangkalnya  
Pamur janji di tengah

Lam jilalah dituntung  
Pamur alif terdiri sendirinya  
Bersambut panjut putih  
Bukannya besi sebarang besi  
Besi lebih pengancing pintu Kaabah Allah  
Ditempa anak Nabi Allah Adam dulu  
Dihancur di tapak tangan  
Ditempa di hujung jari  
Disepuh di dapur Cina  
Turun bisanya dari atas langit  
Diasam di hulu air  
Ikan di ekor air mati berkaparan.

Terambilah tengkolok bulang bulu  
Bulang pelangi bersalut alai  
Rembang tengah dendam tak sudah  
Ada satu punca tak sudah  
Jika sudah, dunia kiamat  
Bukannya tenun sebarang tenun  
Tenun bonda dari muda  
Cukup perindu dengan perindang  
Cukup hikmat semula jadi  
'Asyik Sekampung', 'Siputar Leman'  
'Asam garam, 'Ahadan Mabuk'.

(Hooykaas 1965, 329 – 330)

Setelah itu wira pun pergila mengembara:

#### 8. Pengembaraan Malim Deman

Tempat jin yang banyak  
Tempat syaitan yang banyak  
Masuk hutan keluar hutan  
Masuk padang keluar padang  
Masuk rimba keluar rimba  
Bertemu cangkat didakinya  
Bertemu lurah sama diturun  
Habis hari berganti hari  
Habis malam berganti malam  
Habis bulan berganti bulan  
Habis tahun berganti tahun  
Bukan ia mencari buruan  
Gajah dijumpa tiada ditembak

## TALIBUN DAN PROSA BERIRAMA

Rusa dijumpa tiada dikejar  
Budak dijumpa tiada diturut.

(Winstedt dan Sturrock 1957a, 24–25)

Dalam pengembaraannya, wira menemui pelbagai cubaan, menentang musuh yang gagah, binatang yang ajaib dan sebagainya; misalnya:

### 9. Raja Bidurai Putih

Tujuh hasta bidang dadanya  
Tujuh cap pokok lengannya  
Gerahamnya empat serumpun  
Segantang makan daging  
Dua cupak lekat di giginya.

(Gazali Dunia 1969, 43)

Wira atau musuhnya mungkin mempunyai sesuatu alat yang istimewa, bahtera, kapal atau senjata; misalnya:

### 10. Kapal Raja Bidurai Putih:

Kapal petolo kapal petolai  
Siang berbaju layang malam berbaju rantai  
Makan kerbau orang di haluan  
Melayangkan surat ke buritan  
Makan kerbau orang di buritan  
Melayangkan surat ke haluan  
Tujuh buah rumah berhala di dalamnya  
Tujuh buah mahligai di dalamnya.

(Gazali Dunia 1969, 43)

### 11. Pelayaran dan kelajuan Kapal Petolo Kapal Petolai:

Turun angin selatan Tuk Panji  
Angin yang bergambar orang  
Yang mencabut cekur di halaman  
Dan mencabut malai-malai di lumpur  
Dan merebahkan kerbau di padang  
Dan menyapu nyiur dara di halaman

PUISI MELAYU TRADISIONAL

Angin berkerusi karang tembaga  
Belanak main di pintu karang  
Yu bermain di pintu kurung.

Tiang agung angguk-mengangguk  
Tiang topang imbas-mengimbas  
Gada-gada cemuk-mencemuk  
Ulai-ulai lilit-melilit  
Liang kumbang sembur-menyerbur  
Tidak terpada lajunya kapal  
Bagai pucuk dilancarkan  
Bagai kumbang putus tali  
Jikalau tidak sama yang burung  
Burung bersayap kapal belayar.

(Gazali Dunia 1969, 44)

Mungkin wira dapat menggunakan kenderaan yang lebih ajaib:

12. Malim Deman mengenderai burung buraq naik ke kayangan:

Hilang disaput awan yang putih  
Hilang disaput awan yang kuning  
Hilang disaput awan yang biru

Sekali membawa idar ke kaki  
Dua kali membawa idar ke kanan  
Tiada bolch membawa idar lagi  
Hilang disaput semega-mega.

(Winstedt dan Sturrock 1957a, 61)

Dalam pengembalaan itu wira mungkin menemui apa yang dicarinya; seorang puteri yang diilhamkan melalui mimpiinya. Alangkah cantiknya Sang Puteri: sebarang yang dilakukannya pun terlalu indah, hingga cara dan bunyi ketimpungnya juga:

13. Puteri Bongsu berketimpung:

Berketimpung ke hulu  
Berketimpung ke hilir

Berketimpung kaki  
Berketimpung tangan.

Bunyi bukan alang-kepalang  
Bunyi serunai dengan nasiri  
Bunyi gendang dengan gong  
Bunyi rebab dengan kecapi.

Suaranya berlagu-lagu  
Kera di dahan jatuh mendengar  
Burung terbang berhenti-henti  
Air hilir berbalik mudik.

(Winstedt dan Sturrock 1957a, 33)

Wira juga dikatakan mempunyai kepandaian yang istimewa, misalnya memainkan alat bunyi-bunyian. Untuk memenangi hati kekasihnya dia mungkin menggunakan kepandaian itu.

14. Malim Deman bermain bunyi-bunyian:

Tangan kiri memukul gendang  
Tangan kanan meningkah  
Kepalanya memukul gong  
Kakinya memukul telimpung  
Sikunya memukul canang  
Mulutnya meniup serunai.

(Winstedt dan Sturrock 1957a, 63)

15. Raja Donan bermain bunyi-bunyian:

Dua belas ragam di dalamnya  
Air hilir berbalik mudik  
Burung terbang terhenti-henti.

Selepas itu pergi pula dia mendekati orang bermain bunyi-bunyian dan bermainlah dia:

Kepalanya pandai memukul tetawak  
Tangannya pandai memukul gong  
Kakinya pandai memukul gendang  
Mulutnya pandai meniup serunai.

Setelah beberapa lama bermain itu maka:

Pesoklah gendang  
Robohlah tetawak  
Pecahlah serunai

Maka dicubit, diketil lagi oleh:

Orang peniup serunai  
Orang pemukul gendang  
Orang pemukul tetawak.

Maka menangis merindu dan merawanlah dia:

Dua belas ragam di dalamnya  
Air hilir berbalik mudik  
Burung terbang terhenti-henti.

(Zaharah Khalid 1963, 48)

Dalam memenangi puteri yang dicintai, wira harus menghadapi tentangan daripada seorang musuh atau tunangan Sang Puteri:

16. Malim Deman menentang Raja Mambang Molek:

Ditikam ke kiri dia ke kanan  
Ditikam ke kanan dia ke kiri  
Ditikam ke hadapan dia ke belakang  
Ditikam ke atas dia ke bawah  
Ditikam ke bawah dia melompat ke atas.

(Winstedt dan Sturrock 1957a, 61)

17. Raja Donan setelah mengalahkan Raja Mambang Bongsu yang telah membunuh ayahnya dan ingin pula mengambil ibunya sebagai isteri:

Raja Mambang Bongsu:  
Ayahanda ditipu ada  
Diperdaya ada oleh Awang.

Raja Donan:

Hai ayahanda  
Anakanda tertipu ada  
Terpedaya ada  
Sebaik-baik bapa tiri  
Sejahat-jahat bapa benar  
Manakah sama dengan bapa benar?

Orang bermain gelanggang dengan ayahnya  
menyembelih kerbau

Anakanda bermain gelanggang dengan ayahanda  
Anakanda menyembelih ayahanda.

(Zaharah Khalid 1963, 48)

Atau wira harus mencari sesuatu yang dikehendaki sebagai syarat mendapatkan sang puteri; atau melepaskan orang yang dikasihinya daripada sumpah dan malapetaka:

18. Awang terpaksa mencari Burung Mat Canggal untuk menyelamatkan ibunya:

Amboi cantik sungguh anak raja pandai  
mengaji

Tuan puteri pandai menuji  
Duduk di pintu kecik  
Jorong Batu, Naga Taru  
Sirih tak layu  
Pinang tak kusi, sudah ada  
Subang bergenta, sudah ada  
Balai seni ganding pun sudah ada  
Kalaualah ada;  
Burung Mat Canggal alangkah cantiknya  
Duduk bertenggek di atas balai seni gading  
Riuh sahaja berkata-kata.

(Zakaria Hitam 1966, 37–38)

19. Wira berjaya mendapatkan barang yang dicari, dengan kesaktiannya atau mungkin kepandaianya berpuisi:

Marilah encik marilah tuan  
Burung Mat Canggal dapatkan tuan

Anak raja pandai mengaji  
Tuan puteri pandai menyuzi  
Duduk di pintu kecil  
Tunangan kepada Raja Malin Said.

(Zakaria Hitam 1966, 44)

Setelah berjaya mendapatkan barang yang dicari, wira membangunkan negerinya sendiri; mungkin dengan menciptanya melalui kesaktiannya dengan restu para dewa.

20. Raja Donan mencipta sebuah negeri:

Cukup lengkap dengan orangnya  
Cukup dengan kerbaunya  
Cukup dengan kambingnya  
Cukup dengan lembunya  
Cukup dengan angsanya.  
Hamba sahaya  
Dua senama, tiga senama  
Diteriak di rumah, di tanah menyahut  
Diteriak di tanah, di rumah menyahut.

(Zaharah Khalid 1963, 61)

21. Dan negeri itu pun terlalu indah dan makmurnya:

Medannya indah bukan kepalang  
Rantaunya luas bagai dibentang  
Tebingnya tinggi bagai diraut  
Pasirnya serong bentuk taji  
Batunya ada besar kecil  
Yang kecil pelontar balam  
Jikalau untung kena ke balam  
Jikalau tidak kena ke tanah  
Menderu selawat ibu ayam  
Helang disambar punai tanah:

(Winstedt dan Sturrock 1957a, 11)

22. Seumpama kundur dengan labu  
Kecil pohon besar buahnya  
Negerinya beruntung bandaraya bertuah.

Cari di darat boleh di darat  
Cari di laut boleh di laut  
Ayam itik penuh di reban  
Lembu kerbau penuh di tengah padang  
Gajah badak penuh tengah hutan  
Sejuk dingin seperti ular cintamani  
Di negeri Teluk Bidung Kota Lama.

(Mohd. Taib Osman 1975b, 145)

Apabila negeri telah terbina, wira dan wirawati berkahwin atau dikahwinkan sekali lagi dengan penuh istiadat; selepas itu raja dan permaisuri diarah dalam satu perarakan yang besar:

23. tombak bagi bunga lalang  
Pedang bagi daun nanas  
Bedil kecil merendang garam  
Bedil besar sederam sederam  
Sebelah kanan orang berdikir  
Sebelah kiri orang menyanyi  
Sebelah kanan orang memancak  
Sebelah kiri orang bersilat.

(Winstedt dan Sturrock 1957a, 44)

Dalam keramaian seperti itu mungkin ada sesuatu kejadian yang terpencil yang menarik perhatian; misalnya seorang pekung mengusik seorang buta:

24. Si pekung berkata kepada si buta:

"Orang melihat dengan mata  
Kamu apa gunanya nyata  
Hanya sedar mendengar cerita".  
Si Buta menjawab madah:  
"Wahai si pekung jangan membuat lidah  
Jikalau sekiranya memakan juadah  
Bersama engkau kurangnya indah".

(Hamsiah Abd. Hamid 1964, 41)

Tiada lama kemudian permaisuri pun hamil, lalu, dengan nasihat tuk bidan dilakukan istiadat melenggang perut. Dimasyurkan hasrat raja kepada sekalian rakyat:

25. Rakyat pun datanglah menghadap raja:

Dengan patah datang bertongkat  
Dengan buta datang berpimpin  
Dengan pekak terteleng-teleng  
Dengan kurap menyiah jalan  
Dari jauh berserang dekat  
Sudah dekat berserang sampai  
Tersanjung lutut 'ngan dua  
Terangkat jari sepuluh.

26. Rakyat bertanya maksud raja:

Di manakah atap berbintang-bintang  
Di manakah kota yang roboh  
Di manakah parit dengan sebu  
Di manakah dinding dengan rabang  
Di manakah lantai 'ngan jongkang-jongket?

Jawab raja:

Tak ada kota dengan roboh  
Tak ada parit dengan sebu  
Tak ada dinding dengan rabang  
Tak ada atap berbintang-bintang  
Tak ada lantai 'ngan jongkang-jongket.

"Kami memanggil awak semua kerana kami hendak memberi sirih melenggang perut puteri permaisuri. Kami hendak meminta kepada awak semua:

Lembu seekor seorang  
Ayam seekor seorang  
Itik seekor seorang  
Beras segantang seorang  
Kunyit sebuah seorang  
Serai sebatang seorang.

Setelah genap tiga hari maka adalah rakyat jelata sekalian membawakan yang diminta:

Kerbau penuh di padang  
Lembu penuh di padang  
Kambing penuh di padang

Ayam penuh di bawah rumah  
Itik penuh di bawah rumah  
Beras membusut jantan  
Kunyit membusut jantan  
Serai membusut jantan.

(Zaharah Khalid 1963, 37–38)

Demikianlah seterusnya, anak yang dikandung itu pun lahir dengan tanda-tanda alam yang menunjukkan kesaktiannya. Dia pun membesar pula, mengaji dan berguru, mengembara, menemui kekasih atau tunangannya, menghadapi cabaran dan rintangan lalu akhirnya berkahwin dan beranak pula. Setiap peristiwa diceritakan kembali dengan ungkapan-ungkapan pemerian yang terperinci dalam bentuk yang tipikal, berulang-ulang dalam sebuah cerita, bahkan dalam cerita-cerita yang lain pula. Namun, setiap ulangan tidak menimbulkan kebosanan, malah menjadikan cerita semakin menarik dan berkesan.

### Fungsi dan Penyebaran

Fungsi talibun atau sesomba dapat dilihat dari tiga kedudukan:

1. Sebagai ungkapan-ungkapan pemerian (*descriptive passages*), selingan dan hiasan dalam cerita-cerita rakyat, khususnya cerita-cerita penglipur lara.
2. Sebagai selingan dan hiasan dalam perbualan dan ucapan.
3. Sebagai nyanyian dalam persesembahan kesenian.

#### *Sebagai selingan dan pemerian*

Inilah fungsi terpenting ungkapan-ungkapan yang kita golongkan sebagai talibun atau sesomba (dulunya, ‘bahasa berirama’). Di sini, sesuatu untai talibun digunakan sebagai selingan dalam cerita-cerita yang lebih panjang yang umumnya dalam bentuk prosa dan tergolong sebagai cerita-cerita penglipur lara. Antara yang terpenting dalam golongan ini termasuk Hikayat Awang Sulung Merah Muda, Hikayat Malim Deman, Hikayat Malim Dewa, Hikayat Raja Donan, Hikayat Anggun Cik Tunggal, Hikayat Bongsu Pinang

Peribut, Hikayat Seri Rama dan beberapa yang lain. Cerita-cerita tersebut mungkin telah ditulis dan diterbitkan dalam bentuk buku, atau masih dalam bentuk lisan; tetapi kedua-duanya terus mengekal-kan ciri-ciri penceritaan yang demikian. Dengan adanya selingan dalam bentuk puisi itu, yang selalunya dinyanyikan atau disampaikan dengan irama, atau intonasi yang berlainan daripada bahagian yang lain dalam cerita itu, penyampaian cerita tersebut menjadi lebih menarik dan berkesan, terutamanya dalam bentuknya yang asal iaitu cerita yang disampaikan secara lisan. Dalam keadaannya yang biasa pemerian-pemerian yang lanjut dan terperinci pada sesuatu konteks, dapat pula mempertegas dan memperkuat isi ceritanya.

Selain daripada itu, bahkan mungkin yang lebih penting, seperti yang dapat dilihat dalam bentuknya yang praktis, penggunaan untai-untai pemerian dalam kedudukan itu lebih jelas sebagai keindahan; sekurang-kurangnya dalam pengertian keindahan pada masyarakat dan pada masa yang berkenaan. Perhatikan, misalnya, konteks yang menceritakan keriangan seorang puteri kayangan yang sedang mandi dan bermain air bersama kakak-kakaknya di sebuah sungai terpencil, sedang hatinya berkocak mengingatkan mimpiinya yang memberikan petanda yang kurang menyenangkan. Keriangan dan kelincahan sang puteri diintip dengan penuh minat oleh seorang wira yang telah pula mengenali sang puteri melalui mimpiinya. Dia terus jatuh cinta kepada puteri itu, sebelum dia melihatnya dan telah mengembara beberapa lama untuk menemuiinya. Sekarang dia telah berhadapan dengan puteri yang selama itu menguasai ingatannya. Bagaimanakah pencerita akan menimbulkan suasana itu dengan berkesan: kecantikan seorang puteri dalam pandangan seorang wira yang sedang ghairah menikmati keindahan yang memang telah diatur untuknya. Pemerian yang indah atau *literary* seperti yang kita sahami mestinya di luar daripada kemampuan dan pengalaman pencerita yang umumnya buta huruf. Di sinilah berperanannya se-untai puisi yang memberikan keindahan itu:

Berketimpung ke hulu  
 Berketimpung ke hilir  
 Berketimpung kaki  
 Berketimpung tangan.

## TALIBUN DAN PROSA BERIRAMA

Bunyi bukan alang-kepalang  
Bunyi serunai dengan nafiri  
Bunyi gong dengan gendang  
Bunyi rebab dengan kecapi.

Suaranya berlagu-lagu  
Kera di dahan jatuh mendengar  
Burung yang terbang terhenti-henti  
Air yang hilir berbalik mudik.

(Winstedt dan Sturrock 1957a, 33)

Rangkap pertama menimbulkan kesan daripada gambaran ke riangan sang puteri, pencerita dan pendengar menghayati pemerian itu berdasarkan imaginasi mereka melalui pengalaman sebelumnya. Rangkap kedua memberikan bandingan indahnya ketimpung sang puteri. Dalam pengalaman pendengar tidak ada yang lebih indah daripada suara alat bunyi-bunyian yang telah mereka kenali melalui persembahan-persembahan yang lain: gamelan, wayang kulit, mak-yung atau dalam persembahan sendiri. Dan rangkap ketiga bukanlah imaginasi semata-mata; kerana adanya legenda buluh perindu. Dalam ungkapan yang lain, pencerita mengatakan "suaranya seperti buluh perindu", kerana daripada legendanya, hanya buluh perindu yang dipercayai dapat membuat keadaan seperti itu berlaku:

Kera di dahan jatuh ke bumi  
Burung terbang terhenti  
Air di sungai berhenti mengalir  
Bunga di taman berhenti berkembang  
Angin bertiup juga berhenti.

Tegasnya alam menjadi kaku untuk menikmati keindahan suara yang dimaksudkan. Pencerita masih boleh menggunakan ungkapan-ungkapan yang lain untuk menimbulkan kesan yang sama. Dan dengan lumrahnya pemerian-pemerian dan alat keindahan yang digunakan, dapat menimbulkan minat dan rangsangan audiennya untuk menikmati ceritanya hingga berakhir. Harus pula diingat sesuatu sesi cerita mungkin mengambil masa sepanjang malam atau disambung ke malam-malam yang berikutnya sehingga cerita yang berkenaan tamat atau kontrak pencerita dengan pihak yang

menjemput berakhir sebagaimana yang telah dipersetujui sebelumnya.

Fungsi ungkapan talibun atau sesomba dalam kedudukan di atas dapat dikatakan pasif dan abstrak, iaitu tidak dapat dilihat dengan pasti, lalu terdedah kepada penilaian dan tanggapan perseorangan. Keadaan begini dapat juga dilihat dalam keadaan yang lain. Sesuatu konteks dan pemerian mungkin dapat menjelaskan sesuatu realiti pada sesuatu masa dalam sesebuah masyarakat. Contoh (25) yang diberikan terdahulu, mungkin dapat memberikan gambaran tentang tradisi 'raja berkerah' ketika akan mengadakan sesuatu upacara, istiadat, kenduri berkhatan, perkahwinan dan lain-lain. Rakyat dikehendaki menghantar 'serah' kepada raja, secara langsung seperti dalam konteks tersebut atau melalui pembesar, penghulu atau ketua-ketua daerah masing-masing. Jadinya kenduri raja adalah kenduri rakyat, dengan bahan-bahan benda dan makanan yang diserahkan oleh rakyat. Dengan adanya tradisi itu, seolah-olah memberikan justifikasi kepada rakyat jelata untuk bersama-sama meraikan majlis itu selama 40 hari 40 malam "makan minum bersuka-sukaan".

Tradisi menghantar serah seperti itu bukanlah imaginasi atau warisan purba yang telah lampau; ia masih berlaku sehingga permulaan abad ini; dan bukan saja kepada raja yang memerintah tetapi juga kepada pembesar daerah, penghulu atau ketua. W.W. Skeat menyentuh peristiwa yang sama semasa beliau berada di Selangor dalam tahun-tahun 1890-an. Seorang kaya menghantarkan serahan kepada seorang pembesar yang akan mengadakan majlis perkahwinan. Hadiah itu termasuk beberapa ekor kerbau yang diberikan hiasan yang berlebihan; dan perjalanannya ke rumah pembesar tersebut mengambil jalan melalui kampung Sultan. Perlakuan itu tidak dipersetujui baginda; dan akibatnya, sesuai dengan kepercayaan terhadap 'daulat' dan 'ditimpa daulat', pihak yang menerima hadiah telah mengalami kesusahan, bahkan menemui kematian yang mengejut dalam keadaan yang menakjubkan (Skeat 1967, 38–39).

*Selingan dan hiasan dalam ucapan dan perbualan*

Fungsi talibun atau sesomba secara aktif seperti yang didapati dalam genre-genre yang lain amat sedikit diketahui. Hanya dalam beberapa

contoh yang ditemui secara kebetulan, didapati puisi jenis ini digunakan dalam perbualan atau ucapan oleh orang-orang tertentu di kampung-kampung, khususnya ketua adat atau seseorang "yang terpakai", misalnya seorang yang selalu dilantik mewakili masyarakat kampung untuk sesuatu perundingan yang beradat. Di sini, ungkapan-ungkapan yang digunakan selalunya terdiri daripada yang telah terkenal dan terpakai dalam masyarakat umum, seperti dalam teromba atau daripada ciptaan sendiri, sama ada secara spontan atau disediakan khusus untuk sesuatu tujuan. Zuber Usman memberikan sebuah contoh 'sesomba' bersenda gurau dalam peralatan atau pertemuan makan-makan:

Biduk lompong pengayuh lompong  
 Ambil ke rakit goreng pisang  
 Bertongkat lemang sebatang  
 Tegakkan tiang gula tarik  
 Kembangkan layar kuih dadar  
 Turun ke lurah agar-agar  
 Mendaki bukit kuih baulu  
 Turun sekoci putu kering.

Datang berantai kuih telur  
 Masuk ke rimba sarang balam  
 Terkembang seperti kuih sepit  
 Duduk termenung kuih abuk  
 Tambah penukut dalam negeri  
 Apakan tenggang lepat dagang  
 Anak meriam ondeh-ondeh  
 Habis fikirnya kuih lapis  
 Berlabuh tentang air kopi.

(Zuber Usman 1975, 161-162)

Sesomba atau talibun di atas, menurut Zuber Usman, "biasa timbul untuk bersenda gurau, untuk berkelakar beriang-riang, menghadapi makanan yang serba macam, terutama ketika pertemuan hari raya, peralatan perkahwinan dan sebagainya". Dalam puisi itu kuih-kuih tersebut diberikan bandingan menurut keadaannya masing-masing; goreng pisang yang seperti rikit, lemang seperti tongkat, kuih dadar seperti layar dan kuih baulu seperti bukit. Zuber, bagaimanapun tidak menyatakan apakah puisi itu spontan atau di-

sediakan lebih dulu; tetapi melihat susunan dan rapinya ungkapan-ungkapan tersebut dapat kita pastikan bahawa puisi tersebut telah dikarang begitu rupa untuk ucapan sambutan dalam sebuah majlis tertentu.

Dalam perbualan yang spontan, seorang ketua adat atau seorang ahli pidato dapat saja menggunakan ungkapan-ungkapan yang berima atau berirama, seperti pantun, peribahasa berangkap atau pelbagai bentuk dalam satu atau beberapa keadaan yang berlainan. Tidak banyak contoh yang telah tertulis berkenaan ini; contoh di bawah ini ditemui secara kebetulan dan dipetik pada yang berkenaan sahaja:

Informan, (setelah diberi salam):

Waalaikum salam,  
Siapa di luar saya di dalam.

Oh, nak! Naiklah sayang  
Rumahnya buruk, tangga pun goyang.

(setelah bertanya-tanya khabar):

Apa khabar, apalah maksud.  
Jauh, jauh datang ke mari  
Mak Cik Tua, rupa dah lisut  
Jalan tak lalu, terkisut-kisut  
Duduk tertonggok semacam busut  
Tak habis-habis diserang semput.  
(Ketawa, mesra dan jenaka, dan  
setelah diterangkan maksud hendak  
mendengar pantun-pantun lama);

Oh, nak! Nak kutip pantun  
Apalah gunanya lagi  
Pantun lama orang bahari  
Orang sekarang dah tak pakai lagi.

Mak Cik pun banyak dah lupa  
Maklumlah, uban dah putih atas kepala  
Kalau dulu tu, memanglah juara,  
Tapi, ialah, bak kata pantun:

Pulau Pinang bandar baharu  
Kapten Inggeris jadi raja

Dikenang-kenang masa yang lalu  
Tak sedar mengalir si air mata.

Anak Cina main di papan  
Mati seekor dilanggar bendi  
Pantun lama pantun bersopan  
Buat menunjuk akal dan budi.

(Perbualan dengan Fatimah Lembing, Melaka 1979)

Demikian lancarnya informan menggunakan ungkapan-ungkapan yang puitis, spontan dan bersahaja, daripada talibun dan pantun; dan hampir seluruh perbualan selanjutnya merupakan pantun-pantun yang baik yang bukan sahaja mengisi maksud penulis tetapi sesuai pula dengan tajuk dan konteks perbualan.

#### *Talibun sebagai persembahan seni*

Amat sedikit yang diketahui penggunaan puisi talibun yang digunakan sebagai seni kata lagu dalam permainan-permainan kesenian. Setakat ini hanya ditemui dua contoh yang menunjukkan penggunaan bentuk itu sebagai seni kata nyanyian. Satu di Perak, iaitu di Kampung Behrang Ulu Tanjung Malim dan satu di Kuala Pilah, Negeri Sembilan. Walau bagaimanapun, bahan yang didapati di Perak lebih merupakan cerita dan lebih jelas tergolong sebagai prosa berirama (*rhythrical prose*).

Sementara yang di Negeri Sembilan pula terdapat dalam nyanyian "Gubang Panjang" yang merupakan pendahuluan kepada permainan bongai atau donak donai. Seni kata lagunya terdiri daripada ungkapan-ungkapan yang sejarah, berima atau tidak, kadang-kadang dalam bentuk pantun, empat baris atau lima baris; dinyanyikan dalam nada yang menarik dengan irungan muzik daripada biola, bangsi dan gendang. Sebahagian daripada seni kata bahagian itu diberikan di bawah, setelah dipinda dan disesuaikan dengan penyebutan bahasa Malaysia yang standard.

#### *Gubang Panjang*

I Ahai ... hai ...  
Lancang kuning lancang pusaka  
Lancang Datuk Batin Alam

Rimbun bernama lama seranti  
Batang bernama raja berdiri  
Urat bernama raja bersela  
Kulit bernama raja selimut  
Dahan bernama si ara menyampai  
Peting bernama si ular lidi  
Daun bernama si layang-layang  
Pucuk bernama si tuan tunggal  
Pucuk malam pucuk pagi  
Pucuk air di dalam talam.

II Ahai ... hai...

Dibakar kemenyan putih  
Merak berasap ke langit  
Turun ke udara berkasih  
Turun ke abang ke abang jua  
Turun ke tarah ke tarah jua  
Ketam ketam jua  
Pahat memahat jua  
Cukup hari nan tujuh  
Siap sudah lancang kuning  
Hendak teman di dalam parit  
Mati ditembak anak kuda  
Kalau ada teman yang baik  
Sedang, sedang cakap jadi nakhoda  
Tanah merah  
Tebang dengan pisau raut  
Ambil surat tengok darah  
Berapa pulau di dalam laut  
Semilang merah matanya  
Mati dilepak buku buluh  
Habis sudah bilang pulaunya  
Pulau seratus sembilan puluh.

III Ahai ... hai ...

Hijab jurumudi  
Ara tinggi gedungan angin  
Empat setinggi alam  
Angin golek angin golai  
Turun angin kepak kepoi  
Turun angin tarik lembu jantan  
Kiri datang kanan datang  
Depan datang belakang datang  
Sekali melambung lancang kuning  
Berderak terang tembaga

Sekali merantak lancang kuning  
Pecah rembeaga  
Sekali menggelek lancang kuning  
Dua tiga tebing terlampau  
Sekali menggelek lancang kuning  
Dua tiga tebing nan putus  
Bagai pucuk dilancarkan  
Macam belut ketil ekor  
Macam kumbang putus tali  
Macam kucing lepas senja  
Begitulah lamanya lancang kuning  
Belayar bak kini  
... dan seterusnya.

(Ihsan Abdul Latif Oyek dan Tair Kuteri,  
Kuala Pilah 1978)

Contoh yang dikemukakan di atas, dari suatu segi, masih mendekati prosa berirama (atau prosa lirik), iaitu daripada sifatnya yang menceritakan sesuatu babak yang lengkap dan tidak merupakan seluruhnya sebagai ungkapan-ungkapan pemerian, seperti yang umum dalam talibun atau sesomba. Namun demikian dari segi bentuknya, ungkapan-ungkapan pemerian di dalamnya dan fungsi-nya dalam konteks yang sebenar, petikan itu masih jelas tergolong sebagai talibun. Ia digunakan berulang kali, diselitkan ke dalam persembahan seluruhnya dan digunakan juga dalam konteks yang lain apabila berkenaan.

Contoh-contoh yang telah dikemukakan dalam bahagian ini jelas memperlihatkan genre talibun atau sesomba berperanan penting dalam masyarakat dan kesusastraan Melayu, khususnya dalam konteks puisi tradisionalnya, yang masih tersebar dalam kehidupan masyarakat hingga sekarang. Kepada masyarakat yang berkenaan, kegiatan seni adalah sebahagian daripada kehidupan seni. Puisi pula adalah sebahagian daripada cerita dan lagu, sementara talibun atau sesomba adalah sebahagian daripada puisi. Dan dalam kehidupan mereka secara praktis, seluruhnya adalah satu kesatuan.

## PROSA BERIRAMA

### Pengertian dan Bentuk

Istilah prosa berirama atau prosa lirik digunakan dalam kajian ini untuk merangkumi suatu bentuk karya sastera yang sehingga ini dikenali secara kabur sebagai *rhythymical prose* atau *lyric prose* iaitu seperti yang digunakan oleh beberapa orang pengkaji, termasuk R.O. Winstedt, A.H. Johns dan P.L. Amin Sweeney. Tetapi, dalam kajian ini, konsep dan pemakaian istilah-istilah ini agak berlainan daripada yang digunakan oleh sarjana-sarjana tersebut. Menurut Winstedt, *rhythymical prose* ialah ungkapan-ungkapan pemerian (*descriptive passage*) yang dipakai dalam cerita-cerita rakyat Melayu, khususnya daripada jenis penglipur lara (lihat bab yang lepas), iaitu yang diistilahkan dalam kajian ini sebagai talibun atau sesomba. Amin Sweeney juga mempunyai tanggapan yang sama; sementara A.H. Johns merujuk kepada 'kaba' Minangkabau, sebagai berbentuk *rhythymical prose*; dan ini hampir sama dengan yang ditanggap oleh kajian ini.

Ringkasnya, apa yang difahamkan di sini sebagai prosa berirama atau prosa lirik ialah bentuk atau ungkapan-ungkapan puisi yang terdapat dalam persembahan beberapa cerita penglipur lara Melayu dan 'kaba' Minangkabau. Cerita-cerita ini seluruhnya tertulis dan dipersembahkan dalam bentuk tersebut; dan ini berbeza dengan talibun atau sesomba yang merupakan ungkapan-ungkapan pemerian (*descriptive passages*) dalam cerita-cerita yang seluruhnya tertulis atau disampaikan dalam bentuk prosa.

Dengan kedudukan demikian, prosa berirama tidak pernah dibicarakan sebagai bentuk puisi atau digolongkan ke dalam genre tersendiri oleh pengkaji-pengkaji terdahulu, termasuk Winstedt, Za'ba dan penulis-penulis yang terkemudian. Hal ini seolah-olah menunjukkan bahawa bentuk yang dimaksudkan itu tidak wujud sebagai suatu genre puisi yang tersendiri; sedangkan pada kenyataannya bentuk tersebut memang terdapat dalam sistem puisi Melayu dan seharusnya digolongkan ke dalam suatu genre tersendiri berdasarkan ciri-cirinya yang berbeza daripada genre-genre yang lain. Tanggapan demikianlah yang diambil dalam kajian ini; dan istilah lamanya terus dikekalkan pertama kerana ia telah dikenali umum

dan digunakan oleh para pengkaji untuk merujuk kepada bentuk yang berkenaan. Dan kedua, penggunaan istilah itu tidak menimbulkan kekeliruan dengan istilah-istilah yang lain untuk genre-genre yang lain. Sementara istilah 'prosa' masih terpaksa digunakan, walaupun untuk genre yang tergolong sebagai puisi. Ini ialah kerana bentuk tersebut, terutamanya cerita-cerita penglipur lara Melayu di Semenanjung, lebih mendekati prosa. Walau bagaimanapun, sifat-sifat puisinya akan dapat dijelaskan dalam erti 'berirama' (*rhythmic*) atau lirik (*lyrical*), yang secara kebetulan merupakan ciri-ciri puisi yang penting bagi genre tersebut.

Sesungguhnya penggunaan istilah dan tanggapan mengenai genre ini telah juga menimbulkan beberapa perbezaan pendapat antara para pengkaji. Misalnya Amin Sweeney (1973), dalam membincangkan istilah tersebut, mengatakan demikian:

*This term is generally used to refer to the descriptive passages in set form which occur regularly in the various 'folk-romances' edited by British colonial scholars, and which are printed in the form of blank verse .... and Winstedt calls them 'metrical passages' inset in these romances by their Sumatrans reciters. By inset he means that the bulk of the story is told in prose and that 'only the metrical parts are handed down exactly in set traditional form. This, then, is the generally accepted view of what is meant by 'rhythical prose'. It is apparently the belief that a penglipur lara tale should contain such passages of brief non-rhyming phrases which has led subsequent editors to print arbitrarily in short lines anything that vaguely resembles 'rhythical prose', regardless of whether this is justified by the original recital or whether the language is fixed in form. (hlm 27).*

Ringkasnya Sweeney tidak bersetuju dengan ukuran yang digunakan oleh Winstedt, kerana menurutnya, dalam persembahan-nya yang sebenar, terutama dalam bentuk istimewa (*stylized form*), keseluruhan cerita disampaikan dalam melodi yang tertentu yang tidak berbeza dalam irama dan intonasi antara kalimat-kalimat yang dikatakan *rhythical prose* itu dengan keseluruhan cerita. Oleh itu penggunaan istilah *rhythical prose* atau *metrical parts* untuk membezakan kalimat-kalimat pemerian (*descriptive passages*) itu tidaklah begitu tepat dan telah disalahgunakan; kerana pada ke-nyataannya keseluruhan cerita yang dimaksudkan disampaikan

dalam bentuk *rhythrical prose* yang sama. Memang jelas dalam petikan di atas masalah kekeliruan yang timbul daripada keterangan Winstedt itu. Pertamanya, dengan memberikan istilah *rhythrical prose metrical passages* atau *metrical island* kepada kalimat-kalimat yang bertaraf *descriptive passages*. Winstedt telah menggunakan istilah-istilah yang sama pada contoh-contoh, bahkan pada genre yang berlainan; kerana, seperti yang diperlihatkan di sini *descriptive passages* lebih jelas tergolong sebagai talibun atau sesomba, sementara *rhythrical prose* adalah prosa berirama atau prosa lirik. Untuk mengelakkan kekeliruan demikian, dalam kajian ini istilah-istilah yang bertindan-tindih itu telah digabungkan ke dalam satu istilah, iaitu prosa berirama, atau prosa lirik; dan ini berbeza dan terasing dari genre talibun atau sesomba yang telah dibincangkan terdahulu.

'Lirik' dalam bahasa Jerman merujuk kepada sejenis puisi yang dinyanyikan dengan irungan alat muzik *lyre* oleh seorang tukang cerita atau satu kumpulan penyanyi. Dalam pengertian yang lain lirik adalah karangan naratif yang lahir daripada perasaan, dalam ekspresi yang bebas, tidak memerlukan ikatan baris, tetapi mengandungi irama yang menarik. Jelas di sini, prosa berirama juga merangkumi ciri-ciri tersebut, pertama dengan bentuknya sebagai naratif yang panjang, dan kedua, kalimat-kalimatnya tersusun dalam bentuk yang berirama. Irama inilah yang antara lain menggolongkannya sebagai puisi. Dan sebagai sebuah genre puisi, bentuknya lebih bebas, mungkin kalimat atau frasa yang berikutan seperti karangan prosa, atau tersusun berurutan, baris demi baris seperti puisi. Dalam bentuk baris-baris yang berurutan, mungkin ia terpisah ke dalam rangkap-rangkap yang berasingan, atau tidak berangkap; dan jika ia berangkap tidak tertentu jumlah barisnya dalam serangkap dan jumlah perkataannya dalam sebaris. Dalam kedua-dua bentuknya itu, prosa berirama (*rhythm*) dan rentak (*cadence*), iaitu dengan kalimat-kalimat yang berurutan, empat atau lima perkataan dalam satu keratan atau baris; keratan atau baris-barisnya dalam bentuk sejajar dan mengandungi aspek-aspek kesejajaran yang umum, seperti anafora, epifora, simplok, responsi dan lain-lain. Ringkasnya, dalam bentuk yang tersusun dalam baris-baris puisi, prosa berirama tidaklah berbeza daripada talibun atau sesomba; yang berbeza ialah isi dan fungsinya. Untai-untai talibun

merupakan unit-unit minimum yang berfungsi sebagai ungkapan-ungkapan pemerian (*descriptive passages*), sementara prosa berirama merupakan unit maksimum iaitu keseluruhan daripada cerita itu sendiri.

Daripada ukuran dan ciri yang digunakan di atas, prosa berirama akan meliputi semua cerita yang disampaikan dengan rentak dan irama atau intonasi yang hampir tetap yang kadang-kadang diiringi dengan muzik. Ke dalam golongan ini termasuk:

1. Cerita-cerita daripada jenis 'kaba' Minangkabau, antaranya *Sabai Nan Aluih*, *Cindua mato*, *Rancak dilabueh*, *Bacindai Aluih*, *Si Umbut Muda*, *Si Manja Ari*, *Anggun Nan Tungga Magek Jabang*, *Rambun Pamenan* dan lain-lain.
2. Cerita-cerita rakyat Melayu di Semenanjung yang dituturkan dengan bentuk yang hampir sama, antaranya termasuk *Cerita Sulung Jawa*, "Puteri Lindung Bulan Kedah Tua", "Jubang Linggang" dan "Kaba Nan Gombang".

#### 1. Kaba Minangkabau

Istilah 'kaba' ialah daripada bahasa Arab 'khabar' yang bermakna khabar atau berita, di sini digunakan sebagai istilah merujuk kepada semua cerita Minangkabau yang disampaikan dalam bentuk prosa berirama, tersusun dalam baris-baris yang hampir sama panjang, berirama dan kadang-kadang berirama. Di Minangkabau cerita-cerita begini telah memainkan peranan penting dalam kehidupan masyarakat sejak berabad-abad yang lalu, bukan saja sebagai unsur hiburan bahkan juga sebagai cara menyampaikan pengajaran dan pendidikan.

Dari segi bentuk dan nilai sasteranya, kaba-kaba Minangkabau ini telah membentuk identitinya sendiri, seragam dan teratur antara satu dengan yang lain. Keseluruhan ceritanya terbina daripada kalimat-kalimat yang hampir sama panjang, antara empat dan lima perkataan, dan apabila disusun baris demi baris seperti puisi, bentuknya sama sahaja dengan talibun, teromba, seloka dan lain-lain.

Menurut A.H. Johns, kaba yang tertua dan yang terpenting ialah *Cindua Mato*, yang tentunya telah menjadi dasar kepada

penciptaan dan perkembangan kepada kaba-kaba yang lain (lihat Johns 1958). Dan seperti *Cindua Mato*, kebanyakan kaba dimulai dengan pantun-pantun sebagai pendahuluan. Secara tradisi, isi pantun-pantun ini termasuk menyatakan maksud pengarang menyusun kabanya, memohon maaf kepada nenek-mamak yang menurunkan kaba itu daripada generasi yang telah lalu, dan rasa rendah hati pengarang tentang kebolehannya yang tidak seberapa, kerana itu bersedia memohon maaf dan menerima teguran daripada pembacaannya. Pantun permulaan dalam *Cindua Mato* berbunyi begini:

Kapal Ulando berpetak-petak  
 Banyak terserak buah pala  
 Nakhoda Datuk Raja Indomo  
 Berlabuh senja pukul enam  
 Kabalah lama komah terletak  
 Kini dicetak diulang pula  
 Mengulangkaji nan lama  
 Membangkit tarikh nan terbenam.

Elok dikumpa hujung tali  
 Boleh pengabit akar bahar  
 Akar diambil ke taruknya  
 Elok dikumpa hujung tali  
 Nyanyi terlereng jadi kaba  
 Kaba cerita Cindua Mato.

(Sjamsuddin Sutan Radjo Endah, 8)

Dalam “Kaba Nan Gombang” yang masih belum diterbitkan, pantun di bahagian pendahuluan ini lebih banyak dan meluas pula; sebahagian daripadanya diberikan di bawah:

Oh negeri bukannya kijang  
 Pandan tersandar di hujungnya  
 Kok bernyanyi bukan dik riang  
 Terkenang badan dik untungnya.

Gadanglah air sungai landai  
 Terendam Kampung Pulut-pulut  
 Mengarang bukan kerana pandai  
 Untuk penggoyang-goyang mulut.

#### TALIBUN DAN PROSA BERIRAMA

Kok nak tau di Paya Kumbuh  
Ikut jalan Simpang Empat  
Kok nak tau di hati nan rusuh  
Junjunglah kayu tidak berkebat.

Bandar orang kami bandarkan  
Padi merapak di permataang  
Disauk dengan daun jerami  
Kaba orang kami kabakan  
Entah dapat entah tidak  
Bohong orang kami tak tahu.

Seharibulan di Ujung Karang  
Berbelok jalan ke hulu  
Tiga bulan lama mengarang  
Mencari jalan bekas lalu.

(Ihsan Buyung bin Idris, Salak, Selangor 1977)

Pantun-pantun yang sama maksudnya dan hampir sama isinya, terdapat dalam kaba yang lain, hanya berbeza pada panjang dan pendeknya. Dan hanya selepas rangkap-rangkap pantun itu barulah dimulai ceritanya; seperti dalam *Cindua Mato*:

Olek olainya masa itu  
Ia diranah Tanjung Bunga  
Dalam istana Pagar Ruyung  
Istana daulat Bundo Kandung  
Istana gadang mahligai tinggi  
Beranjung perak anjung suasa  
Tempat semayam Bundo Kandung  
Raja usali turun-temurun  
Bukan raja dang memintak  
Bukan raja dang berbeli  
Sama jadi dengan alam ini.

Permulaan cerita "Kaba Nan Gombang" agak lebih menarik pula; di bawah ini diturunkan agak lebih panjang sebagai contoh dan penelitian seterusnya:

Berkelok jalan nan ke hulu  
Simpang jalan muara padang

PUISI MELAYU TRADISIONAL

Kok dapat bekas lalu  
Kaden sebut Kaba Nan Gombang.

Kaden bilang beliau orang Nan Gombang  
Di Kampung Kota Ketinggian  
Beliau nan raja di negeri  
Isteri bernama kini ala Gonda Ganto Sari.

Dibilang pula keelokan isteri  
Kok tuanku 'rang nan Gombang  
Bernama ia Gondan Ganto Sari  
Muka bak penuh bulan penuh  
Perjalanan gelinggang laluk.

Pencalikan telipuk layu  
Rambut nan bagai embun malam  
Jari nan halus si ibu landak  
Betis bak perut padi  
Pinggang secekak tiga jari  
Rancak nan bukan alang-kepalang.

Dibilang pula kekayaan 'rang Nan Gombang  
Kapal belayar di laut  
Dan toko berderet di kampungnya  
Kerbau berkubang di kubangnya  
Banting melenguh di padang  
Dihitung kok beliau menjadi raja  
Dah habis tahun berbilang tahun  
Untung tak dapat ditolak  
Mujur tak dapat dialih  
Entah malang entah kok mujur  
Petang Khamis malam Jumaat  
Bermimpi tuanku orang Nan Gombang.

Apalah buah mimpi 'rang Nan Gombang  
Rasa memeluk bulan  
Rasa menimang matahari  
Mimpi sapai badan tersentak  
Hari badaruk parak siang  
Melompat Gombang dari biliknya.

Lah tiba di ruang tepi  
Dihimpun mula anak kandungnya  
ialah Bujang Saliamat  
Saliamat bukan orang kini  
Saliamat orang dahulunya  
Tau diranggas kan melenting

## TALIBUN DAN PROSA BERIRAMA

Tau diribut goyang orang  
Ternampak tuanku duduk di tepi  
Menyusun jari nan sepuluh  
Meucukkan kepala nan satu  
"Ampun tuanku Tuan Kecil  
Bangun tuanku lain rupanya  
Serupa orang dalam kesusahan".

(Buyung bin Idris, Salak, Selangor 1977)

Dalam konteks tertentu dalam cerita tersebut, diselitkan ungkapan-ungkapan pantun, empat baris atau lebih, peribahasa berangkap, gurindam atau teromba. Tetapi ungkapan-ungkapan yang berupa teromba atau petikan daripadanya, selalu disebatik dengan cerita seluruhnya; sementara 'gurindam' yang dimaksudkan oleh kaba itu mungkin berlainan daripada konsep yang kita fahami dalam kajian ini. Misalnya, daripada *Cindua Mato*:

Sembah Cindua Mato:

"Ampun hamba dang tuanku  
Sembahan rakyat Minangkabau  
Senang benar hati tuanku  
Duduk di atas pelamin sutera  
Beralas dengan kasa Benggala  
Elok pulang kita dahulu  
Awak mendapat malu gadang.

Tidak alu sealu ini  
Alas tersandar di tebing  
Kalau tersandar di betung  
Boleh disaoi dengan daun tebu  
Tidak malu semalu ini  
Malu tercoreng di keping  
Kok tercoreng di punggung  
Boleh disaoi dengan baju.

(Sjamsuddin Sutan Rajo Endah, 30)

Dari *Anggun Nan Tingga Magek Jabang*; antara Magek Jabang dengan Puti Gondoriah:

Termenung Puti Gondoriah  
Dijawab saja dengan pantun:

Jika menuba tengah hari  
Belum sekambut hujanlah datang  
Usah menghiba hati kami  
Belum patut tuan berdagang.

Membalas Nan Tungga Magek Jabang:  
Kembang bunga perantauan  
Berbuah berbunga belum  
Larutlah badang ke lautan  
Di rumah berguna belum.

Menjawab pula Nan Gondoriah:  
Dadih nan jangan dituangkan  
Kok tercucur ke dalam padi  
Terserak masuk ke dalam telaga

Kasih nan jangan dielakkan  
Jika hidup putus rezeki  
Jika mati masuk neraka.

Membalas pula Anggun Nan Tungga:  
Manalah adik kandung Gondoriah  
Buah mengkudu di Limau Hantu  
Tampak nan dari perbatasan  
Sudah berbuah berbunga pula.

Usah kausebut nan begitu  
Niat baik mesti disampaikan  
Entah kok hilang badan nan itu.

(Ambas Mahkota 1962, 36–37)

Dan sebahagian daripada nasihat Bundo Kandung kepada Sutan Sampurono dalam *Rancak Dilabueh*:

Dengarlah gurindam adat  
Disebut kata pusaka:  
Lalup berkalang dengan pusaka  
Petua guru janganlah lepas  
Sungguhpun batanglah merdeka  
Ingati pucuk kalau terhempas.

Duduk dengan cupak gantang  
Kalau tegak bertongkat baris

## TALIBUN DAN PROSA BERIRAMA

Adat pusaka kalau mendatang  
Air setitik jangan menitis.

Berjalan dialui patut  
Berkata sopan di majlis  
Jikalau malu sama dituntut  
Tumbuh di cupak kita ilis.

Berunding membawa adab-  
Kalau duduk meraut ranjau  
Supaya dapat faham yang sedap  
Dari lurahlah meninja.

Kalau tegak meninjau jarah  
Berjalan menjemput laba  
Penghulu bersifat murah  
Bungkal genap menahan cuba.

(Johns 1958, 95–97)

Penutup cerita juga diakhiri dengan pantun, sama ada pantun itu diturunkan di dalam teks seperti *Cindau Mato* atau di luar teks seperti dalam *Rancak Dilabueh*. Dalam *Cindua Mato* jelas dilihat penyesuaian yang kemudian, walaupun ceritanya dikatakan telah ada sebelum tahun 1350. Lihat baris-baris penutup yang menunjukkan situasi masyarakat masa kini:

Kalau anda hendak melihat  
Hendak pergi berjalan-jalan  
Bawalah foto nan sebuah  
Untuk jadi kenang-kenangan

Di sanalah turun nenek kita  
Nenek moyang 'rang Minangkabau'

Di mana asal api pelita  
Ia di pandan nan berduri

Di mana asal nenek kita  
Ia di kaki Gunung Merapi.

Ramai kampung 'rang Sumanik  
Ramai di anak orang Gurun  
Ramai nan sampai tengah hari

Terlantang kerana naik  
Terlantak bergegas turup  
Maaf jua reda penyudahi.

(Sjamsuddin Sutan Rajo Endah, hlm 153)

Atau dalam pantun yang lebih panjang, 16 baris daripada Anggun Nan Tunggu Magek Jabang:

Di situlah dangdang belayarnya  
Di tengah laut nan gadang  
Laut sakit Baharullah  
Dekat pesisir tanah Tiku  
Serta kota keduanya  
Layar nan tujuhlah takamak  
Panji merawahlah terpasang  
Dangdang menuju tanah Mekah.  
Di situ kaba berhentinya  
Kaba nan Tungga Magek Jabang  
Dua dengan Puti Gondoriah  
Ditekurkan kepala nan satu  
Dihunjamkan lutut nan dua  
Memintak maaf banyak-banyak  
Kok terlebih kok terkurang  
Scrahlah saja pada Allah.

(Ambas Mahkota 1962, 109)

## 2. Dalam cerita-cerita rakyat Melayu di Semenanjung

Cerita-cerita rakyat Melayu di Semenanjung yang mendekati puisi prosa berirama seperti dalam kaba Minangkabau amat sedikit ditemui. Bentuknya juga masih belum tetap dan tersusun untuk memberikan bentuk tersendiri. Sebahagian besar cerita-cerita rakyat yang tergolong ke dalam penglipur lara, terdapat dalam bentuk prosa; hanya dalam teks prosa itu disisipkan untai-untai puisi yang hampir sama bentuknya dengan puisi kaba, tetapi isi dan fungsinya menggolongkannya sebagai talibun atau sesomba yang berfungsi sebagai ungkapan-ungkapan pemerian atau alat hiasan cerita. Namun demikian terdapat beberapa buah cerita dalam bentuk yang mendekati prosa berirama dan kaba Minangkabau, iaitu yang dikenali sebagai bentuk istimewa (*stylized form*) (Amin Sweeney

1973, 1–53), yang disampaikan oleh penutur-penutur cerita yang mahir, sama ada ‘profesional’ atau tidak. Hanya tiga contoh yang dapat digunakan, satu yang telah diterbitkan, *Cerita Sulung Jawa* (Jamilah Hj. Ahmad 1978), dan dua yang masih dalam bentuk lisan, “Puteri Lindungan Bulan Kedah Tua” (Rakaman daripada Ismail Hasan 1976 & 1977) dan “Jubang Linggang” (Rakaman daripada Abdul Rahman bin Abd. Rashid 1978).

Dalam bentuk yang tertulis dan lisan, cerita-cerita ini tidak dimulai dengan pantun-pantun seperti dalam kaba Minangkabau; tetapi terdapat pula ungkapan-ungkapan yang lebih bersifat dan berfungsi sebagai mantera, iaitu dalam bahagian yang dipanggil ‘tarik’ atau ‘bertabik’. Wujudnya bahagian itu dan dengan fungsi demikian ialah kerana dalam persembahanya, cerita-cerita itu dimulai dengan semacam upacara memuja. Tujuannya selain dari pada daya penarik, pencerita seolah-olah meminta kebenaran kepada semangat-semangat yang terlibat, baik daripada para pelaku dalam cerita apalagi yang mungkin mengganggu ketenteraman pencerita dan pendengar. Dengan mengadakan sedikit alatan, membakar kemenyan dan membaca sedikit mantera, pencerita mengusap seluruh tubuhnya dengan asap kemenyan hingga mungkin ia mencapai peringkat lupa; dan hanya setelah itu barulah ia berkemampuan menyampaikan ceritanya dengan lancar (Encik Ismail Hassan, Perlis 1976). Isi bahagian bertabik ini sesuai dengan tujuan upacaranya; meminta semangat-semangat yang berkenaan melindungi pencerita dan penonton supaya tidak diganggu. Sebahagian daripadanya diberikan di bawah:

Dari “Puteri Lindungan Bulan Kedah Tua”:

Tabiklah tuan oi tabik semula  
 Dan tabik sekalian pawang sait, pawang rimba  
 Pawang menjaga tanahair bumi bahtera  
 Dan sekalian keramat aulia, tuan oi, zaman dulu  
 sedangnya kala  
 Dan pada malam inilah tuan oi, kami nak dengar  
 cerita, alkisah zaman dulu, sedangnya kala  
 Dan kami lebih dulu persembah kepada sekalian  
 pawang sait, tuk pawang rimba, pawang  
 menjaga tanahair, bumi sedang bahtera

PUISI MELAYU TRADISIONAL

Yang diam di timur barat tuan oi selatan dengan  
utara  
Jangan jadi gindang ini tuan oi, porak sedang  
puranda  
Dan semuanya itu harap dimaaf ampun, sedang  
belaka.  
Apabila kami sudah memberi hormat pada sekalian  
aulia keramat, yang mana kan ada  
Hilang alkisah tuan oi nak timbul pula sedang  
cerita  
Alkisah tuan oi Pengkulun duli Baginda  
Dan anak daripada duli yang mulia, tuan oi,  
Raja Lindungan Bulan Kedah, sedangnya Tua  
Dan raja turus negeri, zaman itu bernama, tuan  
oi,  
Almarhum Maharaja kan Jawa  
Dan permaisuri dia adalah yang bernama Puteri  
Lindungan Bulan Kedah, sedangnya Tua.

(Ismail Hassan, Perlis 1976)

Dari "Jubang Linggang":

Letak berlapik timan berlapung  
Bari-bari terbang berdengung  
Nak minta tabik adik kakak di kampung  
Nak mintak tabik pada sepohon keramat; sebuah  
Hulu banik, hilir banik  
Pat pedahap, tujuh sederung, alang bijaksana  
Kami nak bahung kayat zaman-zaman dulu  
Ada yang salah ada tak kena  
Mintak ampun beribu ampun  
Masa dulu ada sungguh lagi  
Jaruh sekarang tak sebutan saja  
Kalau ada negeri ada beri raja  
Kalau ada raja ada rakyat bala berhamba sahaya  
Ada beri nama; Seorang Gading Jubang  
Seorang beri nama Gading Semengha Linggang  
Dia pergi menjadi raja dalam negeri Perlis,  
Tanjung Luluk Ujung Tanjung, adap Pulau Lima  
Dia pergi menjadi raja di dalam negeri Perlis,  
dengan Jong Balok Gendang Galong  
Api asal layar di laut  
Serentak ramai seperti kawan jengkerik pecah di  
sarang

#### TALIBUN DAN PROSA BERIRAMA

Tiba-tiba dia masuk(a) lamat takbir mimpi, berasa  
dia berselorohnya naka  
Dari Tuan Puteri Kutong Delima di atas pucuk  
Gunung Bayu  
Terkejut jaga, la ni, tepekur kiri tepekur kanan  
berasa dok ada bersama dia.  
... dan seterusnya.

(Abd. Rahman bin Abd. Rashid, Kedah 1978)

Demikian dua contoh yang menunjukkan bahagian bertabik dan permulaan cerita. Banyak keragamannya di sini; yang pendek atau yang panjang atau yang tidak mengadakannya langsung seperti dalam *Cerita Sulung Jawa*. Bagaimanapun bahagian seterusnya corak penceritaan dapat dikatakan sama; misalnya dalam percubaan mengadakan rentak dan irama, keratan-keratan kalimat yang panjang biasanya diakhiri dengan bunyi yang sama. Dan seperti cerita-cerita penglipur lara yang lain yang mengadakan ungkapan-ungkapan pemerian dalam bentuk talibun atau sesomba, pantun dan 'gurindam' – cerita-cerita ini juga mengadakan bentuk demikian; misalnya dalam *Cerita Sulung Jawa*: Ketika menggambarkan kehebatan letusan meriam, Meriam Arung Darah Dua serupa:

Tatkala Arung Darah Dua Serupa  
Meletup dengan segera  
Orang yang mana dekat dengan pantai itu  
Lekang rambut di atas kepala  
Daun bakau yang dekat kot pantai itu  
Tinggal batang saja  
Habis relai daun juga  
Lotong dan mawas di dalam hutan rimba  
Habis menyelai kot jatuh ke bumi jua  
Dua orang bunting dua tiga bulan  
Habis gugur ke bumi jua.

(Jamilah Hj Ahmad 1978, hlm xxii)

Bandingkan dengan akibat letusan meriam dalam *Hikayat Terung Pipit*:

Tujuh gok sembilan gentala  
Gentar bumi gunung berlaga

PUISI MELAYU TRADISIONAL

Sekalian orang yang mengandung berputera  
Sembilan bulan habis gugur belaka  
Dan sekalian kera di julai  
Habis gugur ke bumi tanah yang rata  
Dan kenang di arus habis naik ke daratan belaka  
Dan sekalian kayu bakau dan tengar yang di laut  
Habis luruh daunnya tinggal lurus sahaja.

(Jailah Hj Ahmad 1978, hlm xxi)

Di tempat yang lain terdapat pula pantun-pantun empat baris atau pantun berkait yang indah bunyinya:

Anak rusa mati berdarah  
Kain pelekat tenunan Cina  
Kami seloroh jangan nak marah  
Marilah dekat kami nak tanya.

Batu kedidik terbang ke padang  
Kacang parang di terung pungak  
Sampai hati gundik buat kat abang  
Abang larang gundik tak dengar.

Kacang parang di terung pungak  
Tumbuh jari serata-rata  
Abang larang gundik tak dengar  
Abang dok cari ratanya rata.

(Mohd. Taib Osman, 1975b, 145)

Dalam "Jubang Linggang" dapat diterima pemerian tentang kecantikan dari panau di tubuh, satu ukuran kecantikan yang umum dalam konteks dan zaman yang sama:

Kalau pandang panau di keping, taji sebentuk  
Kalau pandang panau di dada, tapak catur  
kalau pandang panau di pinggang peringgan gunung  
Kalau pandang panau di betis, pucuk lekir.

Bandingkan dengan ungkapan lain yang sama maksudnya, dalam bahagian yang membicarakan talibun atau sesomba di atas tadi.

Ringkasnya prosa berirama atau prosa lirik Melayu di Semenanjung dapat juga menunjukkan keseragaman dalam bentuk dan

isi; dan hampir sama pula dengan kaba Minangkabau. Perbezaan-perbezaan pada kalimat, susunan kalimat atau teknik keindahan visual yang terdapat dalam kaba Minangkabau mungkin kerana yang akhir itu telah tertulis, diterbitkan beberapa kali, dibaiki dan digubah semula oleh penulis-penulis kreatif mereka dan banyak pula yang telah disusun untuk didramatari atau dipentaskan sebagai drama, dalam bentuk randi. Tentu sahaja pelbagai unsur keindahan telah digunakan kepada karya-karya itu yang menjadikannya lebih indah dan lebih mantap daripada yang masih diturunkan, seperti halnya prosa berirama Melayu Semenanjung.

### **Isi dan Fungsi**

Tema dan isi cerita-cerita dalam bentuk prosa berirama ini sama sahaja seperti yang terdapat dalam cerita-cerita lisan atau cerita-cerita rakyat yang lain, baik daripada masyarakat Melayu di Semenanjung mahupun Minangkabau. Walau bagaimanapun, pada beberapa tempat baik juga dilihat ciri-ciri yang istimewa dalam golongan ini, berdasarkan maksud dan penekanan yang mungkin berlainan daripada cerita-cerita yang biasa. Kaba Minangkabau, misalnya, seperti yang disebutkan terdahulu, merupakan pengantar yang penting dalam menyampaikan mesej yang amat berkesan.

A.H. Johns, memberikan sinopsis cerita *Rancak Dilabueh*, sebagai berkisar di sekitar kisah seorang ibu, Siti Juhari, mengajar dua orang anaknya, Rancak Dilabueh (kemudian bergelar Sutan Sampurono) dan Siti Budiman, bagaimana membentuk hidup yang sempurna. Dengan pengajaran si ibu, Rancak Dilabueh berjaya merubah dirinya dari keadaan yang buruk kepada sempurna. Dalam cerita selanjutnya dibincarakan tentang kewajipan suami isteri, penghulu dan ketua adat, dalam memilih suami dan isteri serta pemimpin. Cerita berakhir dengan perkahwinan Siti Budiman dan perlantik Sutan Sampurono ke jawatan penghulu (Johns 1958, hlm vi).

Dalam rangka cerita itulah disampaikan prinsip-prinsip yang dianggap unggul dalam sistem nilai masyarakat Minangkabau, seperti yang terbayang di dalam teromba, tabo, terasul dan kata-kata adat mereka. Terhadap suami untuk anaknya, Siti Budiman, Siti Juhari tidak mahu memilih wang, tampan dan bergaya tetapi

tidak berpelajaran, kurang berbudi bahasa, bongkak dan tidak menghormati orang:

Tentang Sutan Malabibi  
Kok elok benar rupanya  
Kok rancak benar pakaianya  
Dunianya sunyi dari pengajaran  
Alamnya ramai dengan kecampuran.

Sudah dilihat dipandangi  
Kok duduk dianya di atas bendi  
Tangan tersempang di tepinya  
Telekannya memanah langit hijau  
Geleng kepala bagai sipatung  
Tidak ianya memberi salam  
Kalau berjalan tengah labuh  
Bak ayam kurik panjang ekor  
Tidak kurang menelek diri  
Tampan mengukur bayang-bayangan.

(Johns 1958, 95; Rivai Yogi 1953, 33)

Pilihan Siti Juhari (setelah beberapa calon ditolaknya) ialah pada yang sederhana, tetapi bijaksana, mempunyai latar belakang keluarga yang terhormat, berbudi bahasa dan berpadanan sifat perangainya dengan anaknya, Siti Budiman:

Nan patut jadi menantu bonda  
Kan jadi cincin dengan gelang  
Kan ganti anenek mamak kita  
Yang akan jadi jodoh adik buyung  
Iyalah hanya Si Buyung Sidiek  
Nan bergelar Pakieh Cendekia  
Kemanakan Datuk Raja Adil  
Anak rang Kampung Luruh Bana  
Itulah di bonda nan setuju  
Kalau diuji sama merah  
Jika ditahil sama berat  
Sejodoh gelar dengan lakunya  
Seedaran bumi dengan langit.

(Johns 1958, 49–51; Rivai Yogi 1953, 37–38)

Sebahagian daripada nilai sebagai isteri yang baik, ialah menjaga gerak-geri supaya tidak kecundangan yang boleh meruntuh-

kan rumahtangga; dan di samping memberikan layanan kepada suami dan anak-anak harus tahu juga menggunakan waktu, membuat sesuatu yang menguntungkan:

Perangai orang bersuami  
Kalau sepeninggal laki awak  
Usah berjalan-jalan scorang  
Usah penurun-nurun senja  
Usah penengok tengah labuh  
Salah rupa dipandang orang  
dan,  
Lembaga hidup harus berusaha  
Pandai melukis menerawang  
Pandai mencukai dengan bertenun  
Tahu disuri mata karuk  
Tahu di pekan rebab tegak  
Arif dan bijak dipakaikan  
Kalau tak terpakai yang demikian  
Bukan kita bernama perempuan.

(Johns 1958, 61–63; Rivai Yogi 1953, 45–46)

Suami yang baik harus bertanggungjawab, menjadi pemimpin keluarganya, mengheningkan yang keruh dan menjauhkan yang buruk:

Kalau awak sudah nikah  
Masuk ke karung kampung orang  
Peganglah bungkal dengan neraca  
Genggam teraju dengan katian  
Dengan karib dan kerabat  
Kalau berselisih bini awak  
Dengan dunsanak-saudaranya  
Atau dengan ibu bapanya  
Bercara sama serumah  
Tokoh perang itu namanya.  
Kawani dik awak dengan kebenaran  
Perangai dik awak bini awak  
Sambil menunjuk mengajari  
Usah bak laku orang kini  
Kalau berselisih perempuannya  
Dicari yang buruk  
Dibuat asung dengan fitnah  
Diasung bini awak

Sampai melawan ibu bapanya  
Atau kepada dunsanaknya  
akibatnya, o'nak kandung hamba  
Bencilah orang kesemuanya  
Buruk bertimbun pada awak  
Jadi gunjingan orang yang banyak.

(Johns 1958, 91; Rivai Yogi 1953, 64–65)

Sebahagian besar cerita memberikan pengajaran tentang hidup bersemenda, dengan istilah dan fahaman tentang pelbagai jenis semenda dan bagaimana yang unggulnya; demikian juga tentang menjadi pemimpin yang baik, diberikan istilah dan pemerian penghulu yang baik sebagai teladan dan yang tidak baik untuk dijadikan sempadan; misalnya "penghulu pisak seluar" di bawah ini:

Erti penghulu pisak seluar  
Itu penghulu yang jahanam  
Hina bangsa rendah martabat  
Hati mahing sahamnya busuk  
Bunyi hanyir fikiran aring  
Panjang akal hendak melilit  
Panjang bicara hendak mengebat  
Cerdik hendak mengena saja  
Mulut manis bagi tengguli  
Bak memakan pisang masak  
Elok tipu manis umbuknya  
Pilih kacang mau memanjat  
Pilih jaring hendak berisi  
Pengecoh orang dalam negeri  
Penipu korong dan kampung  
Penjual anak kemanakan awak  
Berdompet di saku orang  
Tidak mencari emas halal  
Itu penghulu busuk aring  
Bernama Penghulu Pisak Seluar.

(Johns 1958, 101; Rivai Yogi 1953, 72)

*Cindua Mato*, walaupun tidak merupakan 'kitab pengajaran adat' seperti *Rancak Dilabueh*, masih juga mendukung nilai dan prinsip adat yang unggul. Paling menarik daripada kedua-dua

contoh, juga daripada beberapa yang lain, termasuk *Sabai Nan Aluih* dan *Rambun Pamenan*, ialah mesej mengangkat dan memberikan justifikasi kepada kaum wanita untuk memegang peranan sebagai tampuk pimpinan masyarakat. Hampir seluruh kaba, nalam, randai dan jabang Minangkabau mengemukakan wanita sebagai pemegang watak utama, menentukan dan menetapkan sesuatu. Semua watak demikian dinamai Bundo Kandung, di samping nama sebenarnya, kalau ada. Siti Juhari dalam *Rancak Dilabueh* dan *Bundo Kandung* dalam *Condua Mato* dan *Magek Jabang*, mengambil peranan penting dengan tidak disebutkan langsung kewujudan dan peranan suami isteri mereka.

*In both Rancak Dilabueh and Cindua Mato, the women is the centre and source of wisdom in the house and in the state; both use the framework of a story to present the social idals of Islam and adat as forming a perfect harmony.*

(Johns 1958, xii)

Dalam *Sabai Nan Aluih* peranan penting dimainkan oleh wira-watinnya, Sabai Nan Aluih, yang sanggup membunuh musuh untuk membela dan menebus malu daripada orang yang telah membunuh bapanya; sedang adik lelakinya Mangkutak Alam digambarkan sebagai anak manja yang terlalu pengecut untuk berbuat demikian. Di samping itu *Cindua Mato* juga semacam menonjolkan kepentingan wira daripada orang kebanyakan: Cindua Mato ialah anak Kambang Bendahari, pengiring Bundo Kandung; tetapi dialah yang menyelamatkan takhta kerajaan bondanya, "Mangkuto - Ulak Tajung Bunga - tinggi nan tidak bapuncak - memaciek tapuk Minangkabau". Dialah juga yang menyelamatkan tunangan Sutan Rumanduang, Puteri Bongsu, dari dirampas Rajo Imbang Jayo. Mesej seperti ini seolah-olah memberikan pengadilan kepada Adat Perpatih yang dimulakan oleh Datuk Perpatih Nan Sebatang yang secara tradisi dari keturunan orang kebanyakan, iaitu daripada bapa yang bukan raja. Di akhirnya, *Cindua Mato* menerangkan keadaan itu dan cara pemerintahannya yang dapat kita fahami sebagai sistem pemerintahan Adat Perpatih:

Di mana negeri takkan selesai  
Di mana kampung takkan aman  
Raja memerintah bersusunan

Dari bawah naik ke atas  
 Dari rakyat orang kampung  
 Sampai kepada nenek mamak  
 Dari mamak ke penghulu  
 Dari penghulu kepada laras  
 Laras nan dua  
 Luhak nan tiga  
 Pertama Lareh Kota Piliang  
 Ia genggaman Datuk Perpatih  
 Datuk Perpatih Nan Sebatang  
 Itu dipakai Tuan Titah  
 Ia Berdasarkan Sungai Tarab  
 Nan kedua laras Tjaniago  
 Pegangan Datuk Katumanggungan.

(Sjamsuddin Sutan Radjo Endah, 152–153)

Cerita-cerita rakyat Melayu di Semenanjung yang tertulis atau dalam bentuk prosa berirama dapat juga dikatakan membawa mesej yang sama, walaupun tidak menumpukan kepentingan ikatan dan nilai adat. Kebanyakan cerita-cerita rakyat Melayu menggambarkan tanggapan dan kepercayaan masyarakat yang sederhana dan tipikal. *Cerita Sulung Jawa* mengisahkan dua orang bersaudara, Jerun dan Gelam, Putera Raja Sulung Jawa yang memerintah Kedah Tua, membalaas dendam kematian ayahnya pada raja Johor Jaata, Bongsu Jawa. Dengan bantuan dari kayangan di samping kebijaksanaan mereka, dapatlah mereka membela kematian itu dan menebus malu keluarga dan kerajaannya. Sebagaimana cerita-cerita penglipur lara yang lain, *Cerita Sulung Jawa* juga mengisi kisah-kisah perperangan; pengembalaan, percintaan dan keajaiban kayangan. Dalam "Jubang Linggang" dan *Puteri Lindungan Bulan Kedah Tua*, keadaan yang hampir sama dapat ditemui.

Pelbagai pendapat diberikan terhadap fungsi cerita-cerita begini kepada masyarakat penggunanya. Umumnya mengatakan sebagai sumber hiburan, *escapism* atau gambaran pemikiran yang masih dikongkong oleh imaginasi dan mitos yang tidak sedikit pun memberikan kesan positif. Tetapi pendapat-pendapat seperti itu hanya pendapat sahaja. Kepada yang mendukung dan menyebarkan cerita-cerita begitu mungkin tidak berpendapat demikian. Seorang informan, ketika diminta pandangannya mengenai unsur-unsur luar biasa

seperti itu dapat memberikan jawapan yang lebih menarik. Menurutnya, kisah-kisah seperti itu hanya alat untuk menyampaikan pengajaran, sebagai daya penarik untuk melekakan pendengar. Apa yang dimaksudkan ialah tafsiran daripadanya. Watak-watak dalam cerita mencapai kejayaan dalam semua perkara hanya setelah berusaha bersusngguh-sungguh, menuntut pelbagai ilmu, merantau dan mengembara, perang dan menggunakan muslihat. Bantuan kuasa luar, kayangan atau yang lain adalah sebagai ganjaran kepada sifat jujur, tabah dan keinginan menegakkan kebenaran; menuntut bela, menghapuskan malu ibu bapa dan negara. Kisah Raden Linggang menanam padi dan mendapat bantuan kaum orang asli dan kumpulan burung tekukur, memberikan erti yang moden. Pertama, padi masih merupakan sumber hidup dan alat mencapai kejayaan, walaupun di kalangan raja dan pemerintah. Kerja yang dijalankan beramai-ramai menjadikan pekerjaan itu cepat disiapkan dan ini amalan gotong-royong yang ada dan kerjasama (koperatif) yang selalu diusulkan. Siapa sahaja boleh bernasib baik seperti Raden Linggang, dengan bantuan Sakai dan tekukur sedang ia sendiri tidak lena; hal ini pun mungkin benar, jika kumpulan Sakai dan tekukur itu digantikan dengan pelbagai alat jentera (perbualan dengan Encik Jaafar bin Ngah Ibrahim, Perak 1977). Demikian interpretasi seorang informan yang sederhana; walaupun bukan original, subjektif dan *chrono-centric*, masih boleh diterima sebagai mewakili sikap masyarakat yang masih memberikan *patronage* kepada kegiatan-kegiatan seperti itu.

Fungsi prosa berirama, sebagai genre puisi, tentu sahaja amat sempit bidangnya, apalagi kalau diasingkan daripada genrenya yang lebih merangkumi iaitu cerita-cerita lisan seluruhnya. Ini ialah kerana terlalu sedikit cerita-cerita yang tertulis atau terbina dalam puisi prosa berirama; dan terlalu sedikit pula jumlah penutur yang mahir atau profesional ini yang dapat menyampaikan cerita-cerita dalam bentuk tersebut. Anggaran yang diberikan oleh Amin Sweeney, dalam makalahnya pada tahun 1973 itu, terdapat hanya kira-kira 25 orang sahaja di seluruh Malaysia. Sambutan masyarakat terhadap kegiatan bercerita juga terlalu kurang. Seorang pencerita profesional di Selangor mendapat jemputan kira-kira 10 kali dalam setahun, kadang-kadang tiga kali sebulan; sedang seorang tarik selampit di Kelantan akan merasa bertuah kalau dapat jemputan

sekali dalam lima tahun.

Walau bagaimanapun, masih merupakan kenyataan bahawa prosa berirama sebagai sebuah genre puisi masih juga berperanan dalam kehidupan masyarakat. Tarik Selampit di Kelantan dan Perlis; Selampit dan Awang Batil di Perlis dan Langkawi; Jubang Linggang di Kedah dan Kaba di Selangor dan Negeri Sembilan; dan beberapa ahli cerita di Pahang dan Terengganu, masih berfungsi dan berperanan dalam masyarakatnya. Di Minangkabau, transmisi kaba dan nazam masih diteruskan dan cerita-cerita daripada kaba telah diberi nafas baru dengan mengubahnya semula untuk pertunjukan seni dalam tari dan randai yang semakin popular. Lebih daripada itu bentuk randai tidak sahaja dipersembahkan sebagai drama pentas, tapi diperluaskan pula dalam bentuk rakaman pita dan kaset, dijual dan disebarluaskan di dalam dan di luar Minangkabau.

Perlu pula dipertimbangkan bahawa tinjauan yang dibuat di sini agak terhad pada genre dan daerah yang telah pernah dikaji sebelum ini dan pada bentuk yang dikenali sebagai istimewa (*stylized*), dipersembahkan oleh pencerita-pencerita profesional. Dari daerah-daerah pedalaman lain yang masih kurang dikaji, misalnya Hulu Tembeling (Pahang), Hulu Dungun (Terengganu) dan Hulu Temengor (Perak), terdapat maklumat-maklumat tentang adanya kegiatan-kegiatan yang sama oleh pencerita-pencerita baik profesional maupun bukan. Terdapat pelbagai cerita dengan judul-judul yang agak asing daripada yang telah umum diketahui, antaranya "Seladang Cantik" dan "Cik Embung" (Hulu Tembeling), "Keramat Teluk Pulai" dan "Anak Si Gapa-Gapa" (Hulu Perak) dan beberapa yang lain. Cerita-cerita ini masih belum dikaji secara ilmiah untuk ditentukan genre dan bentuknya. Jika setelah dikaji, cerita-cerita itu juga didapati tergolong ke dalam genre prosa berirama, ini akan menambah lagi senarai untuk genre ini, dan seterusnya membuktikan lagi bagaimana luas dan berfungsinya genre tersebut dalam masyarakat kini; sekurang-kurangnya dalam konteks waktu dan daerahnya sendiri.

## BAB VII

### TEROMBA DAN PERIBAHASA BERANGKAP

SEBAGAIMANA yang terdapat pada gurindam, seloka dan tekateki, antara teromba dan peribahasa berangkap juga memiliki hubungan yang erat, bukan sahaja pada bentuknya tetapi juga pada isi dan fungsinya. Peribahasa berangkap atau peribahasa berirama tersusun dalam rangkap-rangkap yang pendek, terdiri daripada dua atau tiga kalimat yang berhubungan makna, membawa tema atau isi sebagai perumpamaan, kiasan atau perbandingan. Teromba juga berbentuk demikian, tetapi rangkapnya lebih panjang, terdiri daripada dua hingga puluhan baris serangkap, beberapa rangkap dalam seuntai, walaupun setiap rangkap – panjang atau pendek dapat melengkapkan satu keseluruhan idea. Baris-baris teromba mungkin terdapat juga sebagai peribahasa berangkap, hingga agak sukar membezakan antara keduanya. Namun demikian, perbezaan antaranya agak jelas, terutama daripada aspek fungsinya. Teromba, biasanya merupakan ungkapan-ungkapan yang panjang, mengandungi pemerian tentang norma dan undang-undang adat yang terpakai secara praktis, khususnya dalam Adat Perpatih di Minangkabau dan di Negeri Sembilan; sementara peribahasa berangkap, berkedudukan sebagai peribahasa, dipakai secara umum dan menyeluruh (lebih tepat sebagai konsep dan pegangan) di kalangan masyarakat Melayu dan seluruh masyarakat Nusantara. Dalam kajian ini, kedua-dua genre itu dibicarakan dalam satu bab yang sama.

## TEROMBA

### **Erti dan Latar Belakang**

Teromba pada maknanya yang asal ialah 'salasilah' keturunan (*genealogy*), seseorang, sesuatu kumpulan masyarakat, suatu bangsa, satu sistem dan sebagainya (Wilkinson 1901, 163). Tetapi maknanya yang difahami sekarang ialah teks dan pemerian salasilah dan pemakaian adat, khususnya dalam konteks adat Minangkabau, iaitu Adat Temenggung dan Adat Perpatih yang hingga sekarang masih diamalkan di Minangkabau dan Negeri Sembilan. Istilah-istilah yang dipakai bersama-sama dengan teromba ialah 'terasul' dan 'tambo'. Terasul ialah cara menggunakan atau menurunkan salasilah adat atau teromba itu dalam penggunaannya yang sebenar, misalnya dalam majlis perbincangan yang beradat, istiadat pinang-meminang, nikah kahwin dan lain-lain (Mohd. Din bin Ali 1957b, I). Sementara tambo bermakna tawarikh atau sejarah (masyarakat dan adat) Minangkabau, tersusun dalam bahasa yang tetap dan dalam bentuk puisi yang sama seperti teromba. Namun begitu dalam pengertian masyarakat yang menggunakan adat tersebut khususnya di Negeri Sembilan, ketiga-tiga istilah itu hampir sama digunakan; ketiganya merujuk kepada susunan kata-kata adat yang kita kenali di sini sebagai teromba.

Perkataan teromba dalam kajian ini digunakan sebagai istilah teknik bagi satu jenis puisi, yang dari segi bentuknya tergolong sebagai puisi bebas (sama seperti talibun dan prosa berirama) dan mungkin mengandungi bentuk yang lain (umumnya pantun), tetapi isi dan fungsinya merujuk kepada satu bidang yang tetap iaitu adat. Ringkasnya, teromba ialah ungkapan-ungkapan puitis yang mengandungi konotasi adat yang digunakan sebagai panduan dan amalan dalam masyarakat adat, khususnya Adat Temenggung dan Adat Perpatih yang sehingga ini masih terpakai di Minangkabau dan di beberapa daerah di Negeri Sembilan dan Melaka.

Bentuk yang dikenali sebagai teromba dalam kajian ini, dalam kajian-kajian yang terdahulu telah diberikan nama-nama lain atau langsung tidak diberi nama, walaupun contoh-contoh daripadanya digunakan sebagai ilustrasi bagi pelbagai genre. Za'ba misalnya tidak memasukkan teromba ke dalam pembicaraan puisi, tetapi

memberikan petikan-petikan dari teromba untuk genre yang dinamakannya perbilangan; tetapi perbilangan tidak pula digolongkannya sebagai puisi, sebaliknya adalah sebagai salah satu genre atau jenis peribahasa; misalnya dalam contoh-contoh di bawah ini:

- Hidup dikandung adat  
Mati dikandung tanah.  
Hutang darah dibalas darah  
Hutang nyawa nyawa padahnya.
- Hukum berdiri dengan saksi  
Adat berdiri dengan tanda.
- Siapa menjala siapa terjun  
Siapa berhutang siapa membayar  
Siapa membunuh siapa kena bunuh.

(Za'ba 1962, 171–173)

Perbilangan, menurut Za'ba ialah:

Seakan-akan bidalan dan pepatah juga; hanya lainnya berperenggan dua tiga atau lebih, disebut lepas satu, satu, seperti orang membilang, dan isinya kebanyakan sudah jadi seperti undang-undang yang tetap.

(Za'ba 1962, 171)

Apa yang dimaksudkan oleh Za'ba sebagai "undang-undang yang tetap" itu menepati konsep teromba yang mengandung undang-undang adat; kerana itu teromba juga dikenali sebagai 'perbilangan adat' atau 'kata-kata adat'. Seterusnya, Za'ba juga memberikan contoh-contoh dari teromba untuk genre puisi yang digolongkannya sebagai 'gurindam'; antaranya:

"Gurindam tiada bersukat":

- Kelebihan nabi dengan mukjizat  
Kelebihan umat dengan muafakat  
Bulat air kerana pembetung  
Bulat manusia dengan muafakat

Air melurut dengan bandaraya  
Benar melurut dengan muafakatnya.

"Gurindam tiada bersukat":

Halaman satu sepermainan  
Seperigi sepermandian  
Segayung sepergiliran  
Muafakat tak berubah  
Rahsia tak bertukar.

Ibarat labu menjalar ke hulu  
Ibarat kundur menjalar ke hilir  
Pangkalnya sama dipupuk  
Pucuknya sama digetis  
Buahnya sama diambil.

(Za'ba 1962, 244 - 245)

Penggolongan puisi di atas sebagai 'gurindam' ialah berdasarkan ciri-ciri gurindam yang telah dinyatakannya sebelum itu: satu daripadanya ialah:

Gurindam tua-tua yang telah tetap tersusun sejak beberapa lama telah jadi seolah-olah bidalan iaitu diketahui dan lancar di mulut oleh orang tua-tua.

(Za'ba 1962, 242)

Ekoran daripada penggolongan yang dibuat oleh Za'ba itu, pengkaji-pengkaji yang terkemudian yang membicarakan puisi secara umum, atau undang-undang adat secara khusus, akan menggunakan pelbagai istilah: pepatah, petitih, peribahasa, perbilangan, perbilangan adat, gurindam, teromba, tambo dan terasul, sebagai merujuk kepada puisi yang dimaksudkan sebagai teromba. Abdullah Siddik, misalnya, menyebutnya sebagai 'peribahasa adat':

Dasar demokrasi ini di dalam peribahasa Adat Perpatih dinyatakan seperti berikut:

Raja menobat di dalam alam  
Penghulu menobat di dalam luak

## TEROMBA DAN PERIBAHASA BERANGKAP

Lembaga menobat di dalam lingkungannya  
Orang banyak menobat di dalam terataknya.

(Abdullah Siddik 1975, II0)

Di tempat lain, beliau menggunakan istilah 'kata-kata adat':

Susunan dan pembahagian kuasa tersebut dinyatakan dalam kata-kata adat, seperti berikut:

Raja pemerintah alam  
Undang memerintah luak  
Lembaga memerintah suku  
Buapak memerintah anak buahnya.

(Abdullah Siddik 1975, II4)

Nordin Selat, pada beberapa tempat menggunakan istilah 'perbilangan':

Adat kategori ini sajalah yang termasuk dalam perbilangan:

Usang-usang diperbaharui  
Lapuk-lapuk dikajangi  
Yang elok dipakai  
Yang buruk dibuang.

Kalau singkat mintak disambung  
Kalau panjang mintak dikerat  
Kalau koyak mintak ditampal.

(Nordin Selat 1976, 3-4)

Muhammad Din bin Ali, kadang-kadang menggunakan istilah 'kiasan adat' di samping pepatah adat:

Setelah mendapat persetujuan oleh 'menti' ini secara mulut,  
maka hendaklah janji ini diikat dengan tanda. Mengikut kiasan  
adatnya:

Ibarat risik sudah berdesus  
Ibarat duai sudah merangkak

Ibarat gamit sudah berkecapi  
Ibarat kata sudah berjawab  
Kata diikat dengan tanda.

(Mohd. Din bin Ali 1957a, II)

Dan di tempat lain ia menggunakan 'gurindam adat':

Keputusan atau timbangan atau hukuman yang secara adat beginilah yang tak boleh dianjak dan tak boleh ditukar dan inilah yang dikatakan oleh gurindam adat:

Tikar terbentang diduduki  
Baju sudah disarungi  
Tidak boleh diubah lagi  
Dianjak layu dicabut mati.

(Mohd. Din bin Ali 1957a, 22)

Daripada contoh-contoh di atas ternyata perbezaan-perbezaan terdapat pada istilah-istilah yang digunakan, sedangkan erti dan konsep yang dimaksudkan adalah daripada bentuk dan jenis yang sama. Kerana itu dalam kajian ini, keseluruhan konsep dan erti yang diliputi oleh istilah-istilah itu dirangkumkan ke dalam satu istilah, iaitu teromba. Dengan demikian erti dan ciri-ciri teromba dalam kajian ini ialah:

1. Ia adalah sejenis puisi bebas, dengan pengertian tidak mempunyai ikatan, bentuk atau struktur tertentu, berangkap atau tidak, memakai rima atau tidak. Jika berangkap tidak tentu barisnya dalam serangkap dan jumlah perkataannya dalam sebaris.
2. Seuntai teromba boleh jadi terdiri daripada satu bentuk tertentu, pantun peribahasa berangkap, gurindam atau kombinasi pelbagai bentuk.
3. Walau apa pun bentuknya, isi dan fungsinya mestilah merujuk kepada sesuatu peraturan, undang-undang atau ungkapan-ungkapan yang telah tertentu bentuknya, di-

fahami dan diamalkan oleh sesuatu komuniti atau bangsa. Dengan demikian teromba tidak saja meliputi apa yang dikenali sebagai sistem Adat Perpatih, tetapi semua jenis puisi yang sama dari segi bentuk, isi dan fungsi.

Perkataan teromba adalah daripada bahasa Minangkabau dan puisi itu juga berasal dan berkembang di daerah Minangkabau dan Palembang, iaitu daerah Sumatera Tengah sekarang. Secara tradisi teromba ialah susunan undang-undang adat yang disampaikan dalam bentuk puisi dan adat di sini ialah yang dikenali sebagai 'Adat Minangkabau', iaitu sama ada Adat Temenggung atau Adat Perpatih, yang bermula dan dipakai di Minangkabau. Di Malaysia, hanya Adat Perpatih yang diamalkan, iaitu di Negeri Sembilan, khususnya dalam daerah-daerah Rembau, Kuala Pilah, Tampin, Jelebu dan Seremban, dan sebahagian negeri Melaka dalam daerah-daerah Naning dan Alor Gajah. Negeri-negeri yang lain, mengamalkan Adat Temenggung, tetapi bukanlah Adat Temenggung yang difahamkan sebagai Adat Minangkabau. Adat Temenggung di Malaysia dikenali sebagai Adat Melayu atau Adat Kampung yang seluruhnya disesuaikan dengan aturan-aturan hukum syarak mengikut mazhab Shafie (Abdullah Siddik 1975, I).

Istilah Perpatih dan Temenggung adalah sempena daripada nama tokoh-tokoh yang dipercayai mencipta kedua-dua adat itu. Kononnya, mengikut tambo, di Minangkabau terdapat dua orang adik-beradik seibu, daripada keluarga bangsawan; seorang Sutan Paduka Basa (Besar) bergelar Datu Katamenggungan (Datuk Temenggung Bendahara Kaya), dan seorang lagi, Sikalokdini, bergelar Datuk Perpatih Pinang Sebatang. Kedua-duanya memerintah Minangkabau: Datuk Katamenggungan sebagai laras Kota Piliang menyusun Adat Temenggung dan Datuk Perpatih Pinang Sebatang sebagai laras Caniago, menyusun Adat Perpatih.

Datuk Temenggung, sebagai anak daripada daulat yang diperlukan, menjalankan pemerintahan dari atas ke bawah, iaitu pemerintahan beraja (autokratik), di mana raja berkuasa penuh, segala titah raja tidak boleh dibandingkan atau dipersoalkan lagi oleh orang seisi larasnya. Sebaliknya, Datuk Perpatih menjalankan pemerintahan dari bawah ke atas (demokratik); kedaulatan di tangan rakyat, rakyat yang memerintah secara muafakat, melalui wakil-wakil yang

mereka lantik. Dalam perkembangan kemudiannya, menurut Abdullah Siddik, "kita lihat Adat Temenggung lebih banyak dipakai di daerah-daerah pesisir sedangkan Adat Perpatih di daerah-daerah pedalaman" (Abdullah Siddik 1975, ll2).

Menurut tradisinya, pembahagian itu telah dibuat oleh Sultan Maharaja Diraja, raja yang pertama memerintah Minangkabau, seperti yang dapat difahamkan daripada sebahagian teromba di bawah:

Maka bertitah Sultan Maharaja Diraja:

Orang culas boleh diumpukan  
Orang lambat boleh dinanti  
Orang berebut boleh dibahagikan  
Orang tak mahu apakah daya.  
Sembah, Datuk.

Maka lepas daripada itu:

Turunlah Maharaja Diraja  
Membawa penghulu yang dua sila  
Turun ke tempat pembahagian  
Turun ke laut ke bandar Rokan  
Tempat perahu yang silang-seli  
Tempat dayung yang lintang-lintung  
Tempat galah yang legah-leguh:  
Di situlah tempat pembahagian  
Datuk Temenggung dengan Datuk Perpatih  
Menghilir ke Kampar Kiri  
Menghulu ke Kampar Kanan  
Sembah, Datuk.

Menghilir ke Kampar Kiri:

Tempat air bergelombang  
Tempat ombak yang memecah  
Tempat pasir yang memutih  
Tempat beting yang menyulur  
Tempat pulau yang memanjang  
Tempat dagang keluar masuk  
Tempat saudagar berjual-beli  
Siapa yang empunya?  
Datuk Temenggung Bendahara Kaya  
Maka mengundanglah dia:

## TEROMBA DAN PERIBAHASA BERANGKAP

Siapa menjala siapa terjun  
Siapa salah siapa bertimbang  
Siapa berhutang siapa membayar  
Siapa bunuh siapa kena bunuh.  
Itulah Adat Datuk Temenggung Bendahara Kaya  
Sembah, Datuk.

Kemudian menghulu ke Kampar Kanan:

Tempat air segantang selubuk  
Tempat pasir tambun-menambun  
Tempat batu hampar-menghampar  
Tempat akar berjembut daun  
Tempat kayu bersanggit dahan  
Tempat tupai turun naik  
Tempat kera berlompat-lompat  
Tempat beruk berbuai kaki  
Tempat si papas berulang mandi  
Tempat si dengking berulang tidur  
Tempat enggang terbang lalu  
Tempat ular tidur berlengkar  
Tempat musang tidur bergelung  
Tempat katak berbunyi malam  
Tempat siamang berguguan  
Tempat ungka bersayu hati  
Tempat pontianak berjerit-jeritan  
Tempat gunung yang tinggi padang yang luas.

Kemudian dipandang pula padang yang luas:

Tempat binatang dua kaki  
Pandang jauh gagak hitam  
Tengok dekat gagak putih  
Sayapnya panjang kepaknya lebar  
Membumbung tinggi  
Mengelelang menyisir awan  
Hinggap kayu meranting  
Manfa yang jauh tampaklah dia.  
Maka pulanglah negeri itu  
Kepada Datuk Perpatih Pinang Sebatang.

(Mohd. Taib Osman 1975, 152–154)

Selain daripada perbezaan sistem pemerintahan dan tempat penyebaran itu, terdapat juga beberapa aspek yang penting yang

berbeza. Misalnya dalam menentukan garis keturunan, Adat Temenggung mementingkan keturunan sebelah bapa, iaitu 'unilateral patrilineal'; sebaliknya Adat Perpatih menyusur garis keturunan secara "unilateral matrilineal", iaitu satu pihak, daripada pihak ibu. Pegangan atau konsep yang berbeza ini membezakan sistem perwarisan harta dan perkahwinan. Tetapi perbezaan yang lebih ketara ialah dalam hukum jenayah. Adat Temenggung memegang prinsip pembalasan (*retribution*), seperti yang ditegaskan dalam teromba di atas tadi:

Siapa menjala siapa terjun  
Siapa salah siapa bertimbang  
Siapa berhutang siapa membayar  
Siapa membunuh siapa kena bunuh.

Sementara Adat Perpatih memegang prinsip pemulihan (*restitution*): orang yang bersalah membunuh tidak semestinya dibunuh, tetapi harus menggantikan orang yang terbunuh daripada suku si mati dengan salah seorang daripada suku yang membunuh. Demikian prinsip yang sama diikuti dalam menimbangkan kesalahan-kesalahan lain, seperti yang tertera dalam terombanya di bawah ini:

Cincang pampas  
Bunuh beri balas  
Anak dipanggil makan  
Anak buah disorongkan balas  
Gawar berbeli  
Kufur taubat  
Dendam beli darah  
Diat beli nyawa  
Upah beli penat  
Sah salah bertimbang  
Sah hutang berbayar  
Sah piutang diterima  
Sesat ke hujung jalan  
Balik ke pangkal jalan  
Sesat ke hujung kata  
Balik ke pangkal kata  
Itulah Adat Datuk Perpatih Pinang Sebatang.

(Mohd. Taib Osman 1975b, 154)

Satu ciri yang khusus dalam sistem adat ini ialah tentang cara penyampaian atau transmisinya di kalangan anggota masyarakat adat itu dari satu generasi ke generasi yang lain. Adat yang meliputi seluruh aspek kehidupan masyarakat disimpulkan dalam rangkaian peraturan, petunjuk, perumpamaan, pantun, gurindam, pepatah dan petith dan dijadikan panduan hidup anggota-anggota masyarakat (Abdullah Siddik 1958, 6). Sesungguhnya inilah minat kita dalam kajian ini, iaitu meneliti dan menganalisis bentuk-bentuk pengucapan yang digunakan itu, walau apa pun juga namanya, tetapi tersusun dalam bentuk puisi yang indah dan mempunyai gambaran daya cipta yang tinggi.

### **Analisis Bentuk dan Struktur**

Seperti yang telah digarisbawahi dalam ciri-ciri teromba di atas tadi, teromba dari segi bentuk dan strukturnya merupakan persamaan dengan puisi bebas yang lain, khususnya talibun dan prosa berirama; selain daripada itu mungkin juga terjadi daripada bentuk-bentuk yang terdapat dalam genre yang lain, terutamanya pantun, peribahasa berirama dan talibun. Bentuk perulangan sejarah, terutamanya dalam aspek anafora, episora dan lain-lain, mendekatkan teromba dengan mantera. Melihat kepada bentuk-bentuk demikian memperlihatkan teromba telah begitu lama usianya dan tentu sahaja kelahirannya bersesuaian dengan sifat semula jadi masyarakat Melayu dalam menggunakan ungkapan-ungkapan sejarah, yang berima dan berirama dalam keseluruhan bentuk ekspresi dan komunikasi sesama mereka.

Dalam mendekati kepelbagaiannya bentuk teromba, secara analisis, dapatlah digunakan dua ukuran:

1. Berdasarkan jumlah barisnya dalam serangkap atau seuntai.
2. Berdasarkan persamaan dan pembinaannya bersama dengan bentuk-bentuk daripada genre yang lain.

#### *Dari Aspek Baris*

Suatu untai teromba mungkin terjadi daripada beberapa rangkap yang terbina pula oleh beberapa baris yang berlainan jumlahnya.

Terdapat rangkap-rangkap yang terdiri daripada dua baris, tiga, empat atau mungkin berpuluhan baris bergantung pada topik yang dibicarakan dan fungsi yang dimaksudkan. Dan dalam mana-mana keadaan, seolah-olah adanya suatu aspek persamaan yang mengikat baris-baris itu sebagai satu kesatuan. Perhatikan contoh-contoh berikut:

a. Teromba dua baris serangkap:

Hidup dikandung adat  
Mati dikandung tanah.

Adat dipakai baru  
Kain dipakai usang.

Yang elok dipakai  
Yang buruk dibuang.

Lembaga berlingkungan  
Undang berkelintasan.

Duduk meraut ranjau  
Tegak meninjau jarak.

Ke darat Adat Perpatih  
Ke laut Adat Temenggung.

Ke laut berteromba  
Ke darat bersalasilah.

Adat bersendi hukum  
Hukum bersendi Kitab Allah.

Contoh-contoh di atas memperlihatkan persamaan bentuk teromba dengan peribahasa berirama dan gurindam daripada jenis yang terikat. Dalam hubungan baris-baris pertama dan kedua, terlihat adanya aspek kesejajaran, jumlah perkataan yang hampir sama dalam sebaris (umumnya tiga perkataan). Selain daripada itu ialah terlihatnya keadaan yang bertimbang secara teratur: baris yang pertama seolah-olah meletakkan syarat atau keadaan, sementara yang kedua sebagai jawab atau pelengkap kepada keadaan yang telah dikemukakan. Contoh-contoh berikut ini merupakan kalimat-

kalimat yang lebih panjang, tetapi masih memperlihatkan keadaan yang sama:

Beroleh kecil kepada nan gadang  
Beroleh gadang kepada nan tua.

Harimau mati meninggalkan belang  
Manusia mati meninggalkan nama.

Kalau keruh air di hulu  
Sampai ke muara keruhnya.

Kok gadang jangan melanda  
Kok cerdik jangan menjual.

Kalau alim hendakkan doanya  
Kalau kaya hendakkan emasnya.

b. Tiga baris serangkap:

Selain daripada sejajar dan jumlah kata yang setimpal antara sebaris dengan yang lain, dapat dirasakan bahawa seluruh barisnya menuju ke suatu idea; ertiinya di sini tidak lagi jelas perhubungan syarat dan pelengkap seperti di atas tadi:

Raja jatuh terdiri  
Penghulu jatuh terpekur  
Lembaga jatuh tersela.

Keris nan sebilah  
Tanah nan sebidang  
Kerbau nan seekor.

Mengheret membentang  
Menunjuk mengajari  
Menegur menyapa.

Tanduk ditanam  
Daging dilapah  
Kuah dikacau.

Sebingkah tanah terbalik  
Sehelai akar putus  
Sebatang kayu rebah.

Anak buah yang mengangkat buapak  
Buapak yang mengangkat lembaga  
Lembaga yang mengangkat Undang.

c. Empat baris serangkap:

Sama sifatnya seperti yang tiga baris serangkap, hanya pemerianya menjadi lebih panjang dan lengkap:

Tuk kali di Padang Genting  
Tuk Indomo di Saruasa  
Tuk Bendahari di Sungai Tarab  
Tuk Makhdum di Sunasih.

Sepakat pangkal selamat  
Sengkera pangkal celaka  
Hilang adat kerana janji  
Hilang pusaka kerana buatan.

Yang elok di awak itu  
Setuju di orang hendaknya  
Sakit di awak sakit di orang  
Lemak di awak lemak di orang.

Alang tukang terbuang kayu  
Alang cerdik binasa adat  
Alang alim rosak agama  
Alang sefaham kacau negeri.

Derhaka, celaka  
Dahaga, dahagi  
Rimbun, bakar  
Tikam, bunuh.

*Persamaan dan gabungan dengan bentuk yang lain*

a. Pantun empat baris:

Seperti pantun yang tipikal, terdiri daripada empat baris serangkap, empat perkataan sebaris dengan skema rima a-b-a-b dan terbahagi kepada unit-unit sampiran dan maksud. Bezanya dengan pantun yang biasa ialah isi dan fungsinya yang merujuk kepada adat, sama ada sebagai pemerian tentang sesuatu adat atau peraturan yang

digunakan dalam konteks sesuatu adat yang tertentu. Di sini, konotasi adatnya bukan saja pada maksud atau keseluruhan pantun, tetapi dapat juga dilihat kehadirannya dalam unit sampiran atau pembayang:

Di dalam nan dua kelarasan  
Adatlah jadi darah daging  
Syarak dan lazim keimanan  
Adat nan kawi nan membimbang.

Di mana jalan baginda Giri?  
Di baruh balai panjang  
Di mana benar adat terdiri?  
Di Batipuh Padang Panjang.

(Abdullah Siddik 1958, 129)

Walau bagaimanapun, keadaan demikian merupakan yang unggulnya sahaja dan hanya dapat dicipta oleh seorang yang mahir dalam kedua-dua bidang; teromba dan pantun, kerana dalam contoh-contoh yang lain didapati hanya pasangan yang kedua sahaja yang berhubungan dengan adat, sementara dalam pasangan pembayang menunjukkan persamaan dengan pantun-pantun yang biasa:

Keratan ladang di hulu  
Berbunga berbuah belum  
Merantau bujang dahulu  
Di kampung berguna belum.

Bukan lebah sebarang lebah  
Lebah bersarang di cucuran atap  
Bukan sembah sebarang sembah  
Sembah saya mohon bercakap.

Mencampak-campak jala ke hulu  
Dapatlah anak bandar belang  
Apakah cupak dik penghulu  
Ialah mempermaining undang-undang.

(Ujang Hj Rapal, Negeri Sembilan 1976)

b. Pantun enam baris:

Kalau jadi pergi ke pekan  
Yu beli belanak pun beli  
Ikan parang beli dahulu.

Kalau jadi engkau berjalan  
Ibu cari sanak pun cari  
Induk semang cari dahulu.

(Nordin Selat 1976, 102)

Penakik pisau raut  
Ambil galah batang lintabung  
Seludang jadikan nyiru.  
Yang setitik jadikan laut  
Yang sekepal jadikan gunung  
Alam terkembang jadikan nyiru.

Gunting dari empat angkat  
Dibawa orang Mandiangin  
Dipinjam orang ke Biara.  
Kalau datang soal dan umpat  
Anggaplah sebagai penawar  
Demikianlah pemimpin yang sebenar.

(Abd. Rahman Hj Mohammad 1964, 13)

Contoh-contoh di atas memperlihatkan bentuk pantun yang tipikal dengan sampiran yang bebas, tidak terikat pada ungkapan adat, tetapi masih memberikan anda yang berlainan daripada pantun biasa. Rangkap yang akhir itu ternyata tidak begitu terikat pada susunan rima pantun kerana yang dipentingkan di sini ialah pernyataan yang mahu disampaikan. Satu ciri yang penting yang menggolongkan pantun-pantun seperti ini sebagai teromba, selain daripada isi dan fungsinya, ialah konteks di mana ia digunakan. Biasanya rangkap-rangkap pantun dalam teromba (atau dalam konteks penggunaannya) berkedudukan sebagai sebahagian daripada ungkapan-ungkapan yang relevan dengan kegiatan adat yang diadakan. Di sini pantun-pantun dua baris, empat atau lebih tetap dianggap sebagai pantun, tetapi keseluruhan untai puisi yang berkenaan, digolongkan sebagai teromba.

- c. Baris-baris yang berurutan seperti talibun dan prosa berirama:

Terdapat urutan baris-baris yang lebih banyak dalam serangkap atau seuntai. Kebanyakan barisnya sama panjang, antara empat atau lima perkataan, tiada berima dan pembahagian unit, hampir sama bentuknya dengan talibun, prosa berirama dan mantera; tetapi keseluruhan isinya merujuk kepada adat:

Adat bersendi hukum  
Hukum bersendi Kitab Allah  
Kuat adat tak gaduh hukum  
Kuat hukum tak gaduh adat  
Ibu hukum muafakat  
Ibu adat muafakat.

(Abdullah Siddik 1958, 129)

Orang berbini nak berbelanja  
Orang bercerai nak berkesudahan  
Orang beranak nak berupah bidan  
Orang bernikah dengan maharnya  
Adat diisi, janji dilabuh  
Sah kata adat mensiang  
Cacat cedera berkembalikan  
Sawan gila luar janji  
Elah si laki-laki luncur tanda  
Elah si perempuan ganda tanda.

(Mohd. Din bin Ali 1957b, 66)

- d. Urutan baris yang lebih panjang, seperti prosa berirama:

*Salasilah Adat*

Allah belum bernama Allah  
Muhammad belum bernama Muhammad  
Bumi belum bernama bumi  
Bumi bernama pusat negeri  
Langit belum bernama langit  
Langit bernama payung negeri  
Bumi itu segedang dalam  
Langit itu segedang payung

Gagak putih bangau hijau  
Datuk bujang nenek gadis  
Sejaman raja jatuh terdiri  
Sejaman penghulu jatuh terpekur  
Sejaman raja jatuh tersela  
Terbit adat dua terepar:  
Ke laut Temenggung ke darat Perpatih  
Adat tertentu bilang teratur  
Beruntuk berharta masing-masing  
Buluh bilah tanah ditanam  
Besi berdentang puntung berasap  
Sebingkakah tanah ditanam  
Tumbuh aur nan berjejer  
Tuan Kali di Padang Genting  
Tuk Senama di Suasa  
Tuk Kalipah di negeri Tombang  
Tuk Mengkudum negeri Sumanik  
Disambut raja Pagar Ruyung  
Lalu ke Siak, Siam, Jambi  
Lalu ke Rokan Penalian  
Lalu ke riak yang berderun  
Tempat aur yang bersurat  
Tempat pisau nan tercabut  
Tempat sialang berlantak besi  
Lalu durian di Takik Raja.

(Ujang bin Hj Rapal, Negeri Sembilan 1976)

- c. Gabungan pelbagai bentuk: peribahasa berirama, pantun, gurindam dan talibun; misalnya sebahagian daripada teromba yang diucapkan dalam majlis menghantarkan cincin tanda di bawah ini. Dari segi pemakaianya, bentuk demikian dikatakan terasul:

Pinggan ada mangkuk pun ada  
Laksana gasing sama liuknya  
Tuan-tuan ada, datuk-datuk pun ada  
Yang mana juga eloknya.

Bukan lebah sebarang lebah  
Lebah bersarang di rumput buluh  
Bukan sembah sebarang sembah  
Sembah menyusun jari sepuluh.

## TEROMBA DAN PERIBAHASA BERANGKAP

Bukan lebah sebarang lebah  
Lebah bersarang di cucuran atap  
Bukan sembah sebarang sembah  
Sembah saya mohon bercakap.

Adapun tatkala buluh bilah ditanam  
Besi nan berloceng  
Puntung yang berasap  
Bangau hitam gagak putih  
Datuk bujang nenek gadis  
Adat sentosa di dalam negeri.

Maka di situlah duduknya suku yang dua belas:

Empat di darat lapan di baruh  
Laman sebuah sepermainan  
Perigi sebuah seperlaungan  
Jamban sebuah seperlaungan.

Maka ditengoklah pula lapan hukum  
Lapan adat  
Hukum tak menambat  
Adat tak melintang  
Harus semenda-menyemenda pula.

Nampaknya beginilah  
Sakit bermula mati bersebab  
Hujan berpokok kata berpangkal  
Mana esa sekata  
Awal permulaan  
Akhir berkesudahan.

Kedatangan datuk dahulu  
Membawa cincin mintaan kepada saya  
Mengikat penyemendaan  
Oleh saya menerima malah  
Tetapi janjinya teguh  
Padangnya lebar  
Nang jauh telah saya jemputkan  
Nang dekat telah saya kampungkan  
Segala tempat semenda saya  
Menerima malah cincin mintaan itu  
...dan seterusnya.

(Long bin Sidik, Negeri Sembilan 1976)

Daripada contoh-contoh yang telah dikaji melalui penerbitan-penerbitan dan pengumpulan yang dilakukan setakat ini, dapat dikatakan, walaupun ungkapan-ungkapan teromba itu seharusnya tetap, tetapi didapati juga variasi dan kelainan dari segi urutan baris, jumlah baris dalam serangkap atau seuntai, kelainan perkataan dan susunan kalimat, serta luas atau ringkasnya sesuatu pemerian. Keadaan ini membuktikan bahawa penciptaan sesuatu untai teromba adalah hasil daya cipta pengarangnya ungkapan adat yang berkaitan dengan topik dan fungsi terasul yang diciptanya. Namun demikian kelainan-kelainan seperti itu amat kecil perbezaannya dengan yang asal dan yang tetap, sehingga tidak langsung menjelaskan pengertian dan bentuknya yang tipikal itu. Di sinilah keistimewaan ahli-ahli teromba dan terasul dalam menyimpan, mengekal dan menyebarkan seni warisan tradisinya.

### Tema dan Isi

Secara umum dapat dikatakan puisi teromba dilahirkan dan diabadikan bersama fungsinya dalam kehidupan masyarakat, sama seperti genre-genre yang lain, khususnya pantun, syair dan mantera. Bagaimanapun masih ada ciri yang istimewa kepada teromba iaitu puisi ini diabadikan dalam kehidupan sehari-hari bukan sahaja melalui aktiviti-aktiviti kesenian berupa tari dan lagu seperti pada pantun dan syair, tetapi meliputi dari tanggapan, pemikiran, pegangan hidup, peraturan dan perundangan, bahkan resam dan kebiasaan masyarakat dalam kehidupan mereka sehari-hari. Dalam masyarakat pendukung adat ini, khasnya daripada keturunan Minangkabau di daerah-daerah Negeri Sembilan dan Melaka, adat merupakan pemimpin dalam semua aspek kehidupan. Kata-kata adat itu dituliskan, dihofalkan dan disampaikan kepada masyarakat melalui penggunaannya dalam kegiatan-kegiatan yang berkenaan.

Untuk memudahkan analisis, tema dan isi teromba dapat dilihat dari tiga aspek:

- i. Teromba sebagai gambaran kepercayaan, nilai dan pegangan hidup masyarakat.
- ii. Teromba sebagai gambaran perlakuan dan tindak laku.

- iii. Teromba sebagai huraian dan pemerian terhadap undang-undang dan peraturan yang mesti dipatuhi.

*Kepercayaan, nilai dan pegangan hidup*

Kebanyakan contoh teromba yang telah dikaji menggambarkan kepercayaan dan mitos terhadap sesuatu. Sebahagian daripadanya mengungkap lebih jauh kepercayaan masyarakat terhadap kejadian alam semesta. Dan kepercayaan demikian sejarah pula dengan yang dipercayai oleh masyarakat Melayu, bahkan masyarakat Nusantara seumumnya. Konsep dan kepercayaan seperti itu biasa diulang dan diserapkan ke dalam mantera yang berhubungan pula dengan konsep magis, agama dan kepercayaan yang lebih kompleks (Skeat 1967, 581 – 582).

Dalam sesuatu untai teromba, bahagian yang menyatakan hal itu terdapat di bahagian permulaannya; seolah-olah sebagai pendahuluan, pengenalan atau ‘mukadimah’ kepada keseluruhan ungkapan seterusnya. Hanya sesudah bahagian itu baharu menyusul pernyataan-pernyataan yang lain, yang menerangkan salasilah keturunan dan penyebaran masyarakat itu, khususnya dari Minangkabau ke Negeri Sembilan; sebahagian daripada teromba berkenaan berbunyi demikian:

Allah belum bernama Allah  
Muhammad belum bernama nabi  
Bumi belum bernama bumi  
Bumi bernama pusat negeri.

Bumi itu segedang dalam  
Langit itu segedang payung  
Datuk bujang nenek gadis  
Sejaman raja jatuh terdiri  
Sejaman penghulu jatuh terpekur  
Sejaman lembaga jatuh tersela  
Terbit adat dua terepar:

Ke laut Adat Temenggung  
Ke darat Adat Perpatih  
Adat bertentu bilang beratur  
Beruntuk seorang satu  
Berhak masing-masing.

(Mohd. Din bin Ali 1957b, 4–6)

Teromba di atas membayangkan kepercayaan atau konsep terhadap apa yang dinamakan sebagai 'adat yang sebenar adat' atau 'adat benar' iaitu kekuasaan Allah dan kejadian alam yang mengaturkan kenyataan: air membasahkan, api menghanguskan (Abdullah Siddik 1975, 6 – 10). Kenyataan demikian telah pun ada sebelum ditempa 'Arasy' dan 'Kursi' bumi dan langit; iaitu ketika kejadian alam masih dalam ilmu Nur Allah dan Nur Muhammad. Kemudian barulah tercipta bumi dan langit, masing-masing sebesar talam dan payung. Demikian seterusnya kelahiran Adam dan Hawa, iaitu nenek moyang sekalian umat manusia, kafir dan Islam. Manusia seterusnya menjadi ramai dan mengatur hidup mereka, berkampung, bernegeri, berluak, berpenghulu, berlembaga dan beraja. Ini diikuti peraturan-peraturan lain yang menjamin kesejahteraan hidup manusia. Dalam konteks masyarakat Adat Perpatih, itulah 'adat dua terepar' yang dapat difahamkan sebagai Adat Temenggung dan Adat Perpatih, atau dengan pengertian konsep demokrasi, beraja dan berperwakilan, bahkan mungkin dimengerti sebagai panduan resam dan syarak.

Kepercayaan terhadap kedatangan dan penyebaran masyarakat Minangkabau ke Negeri Sembilan diterangkan dalam sebahagian daripada teromba yang berkenaan:

Kemudian duduk pandang-memandang  
 Pandang ke darat, meranti bersanggit dahun  
 Pandang ke hulu, gaung nang dalam  
 Pandang ke hilir, sungai nang melurut  
 Pandang ke baruh, lepan nang luas  
 Turun di Pagar Ruyung, raja berdarah putih  
 Berdua dengan Batin Mergalang  
 Lalu naik Gunung Rembau  
 Lalu turun ke Seri Menanti  
 Kemudian duduk bersuku-suku  
 Suku nang dua belas  
 Sukan nang bertua, beribu buapak, berlembaga  
 Kemudian duduk berdekat kampung  
 Halaman sebuah sepermainan  
 Perigi sebuah sepermandian  
 Jamban sebuah seperlaungan.

(Mohd. Din bin Ali 1957b, 22–23)

Masih banyak lagi untai-untai teromba yang menyatakan kepercayaan terhadap asal usul sesuatu peraturan dan perlakuan, bagaimana asal terbukanya negeri, bermulanya adat, kedudukan ketua dan para pemimpin, semuanya dihuraikan dan disampaikan kepada anggota-anggota masyarakat. Dengan adanya konsep dan kepercayaan demikian memungkinkan lahirnya suasana yang harmonis antara keunggulan adat dengan kehendak dan keperluan hidup manusia pendukung-pendukungnya. Faktor itu juga membantu menyematkan rasa setia, menilai dan memandang tinggi kepada keluhuran adat yang menjadi pegangan dan panduan hidup. Keadaan demikian dapat dilihat daripada beberapa rangkap teromba yang tidak sedikit pula jumlahnya, antaranya:

a. Nilai terhadap adat:

Hidup dikandung adat  
Mati dikandung tanah.

Biar mati anak  
Jangan mati adat.

Adat dipakai baru  
Kain dipakai usang.

Dianjak layu  
Dicabut mati.

Dari nenek turun ke mamak  
Dari mamak turun ke kemanakan  
Patah tumbuh hilang berganti  
Pusaka begitu jua.

b. Nilai sebagai manusia yang unggul:

Seorang anggota masyarakat yang baik ialah yang mempunyai falsafah dan pegangan hidup yang baik, yang menguntungkan masyarakat, bertanggungjawab, bantu-membantu, berusaha meninggikan kedudukan masyarakat, mempertahankan kebenaran dan sebagainya:

Mencari kata muafakat  
Menokok barang yang kurang

Menggulas mana yang senteng  
Menghubung yang pendek.

Berat sama dipikul  
Ringan sama dijinjing  
Yang tidak ada sama dicari  
Sama sakit sama senang  
Ke bukit sama mendaki  
Ke lurah sama menuruni  
Sama mengayun sama melangkah  
Jika khabar baik diberitahu  
Jika khabar buruk serentak didatangi  
Jika jauh ingat-mengingat  
Jika dekat temu-menemui  
Dapat sama laba  
Hilang sama rugi.

(Nordin Selat 1976, 12)

Memang biasa terdapat ungkapan-ungkapan seperti ini, dalam rangkap dan untai yang panjang atau pendek, yang menyatakan pegangan dan falsafah hidup bermasyarakat, meliputi keseluruhan bidang hidup, sebagai individu, sebagai anggota kelompok atau pemimpin. Dan dalam kehidupan sehari-hari kata-kata demikian tidak saja tinggal sebagai konsep atau teori semata-mata, tetapi diperaktikkan oleh anggota-anggota masyarakat. Dalam konsep tolong-menolong, misalnya, terdapat pelbagai kegiatan seperti bergotong-royong dan menyeraya (Nordin Selat 1976, 87-88) dalam mengerjakan sawah padi, bergotong-royong mendirikan rumah, mengelolakan majlis perkahwinan, pengebumian jenazah, membersihkan kampung dan sebagainya. Keadaan begini hanya tercapai apabila anggota masyarakat merasakan dirinya sebahagian daripada kelompoknya dan terikat dalam satu kesatuan, seperti yang dinyatakan dalam teromba di bawah ini:

Seikat seperti sirih  
Serumpun seperti serai  
Seciap seperti ayam  
Sedencing seperti besi  
Malu tak boleh diagih  
Suka tak boleh diinjak  
Melompat sama parah

Menyerudup sama bongkok  
Jalan sedundun  
Selenggang seayun.

(Nordin Selat 1976, 13)

*Gambaran perlakuan dan tindak laku*

Ungkapan-ungkapan teromba yang menghuraikan "adat yang ter-adat" dan "adat yang diadatkan" adalah daripada lunas-lunas peraturan yang diikuti dan diabadikan dalam perlakuan dan tindak laku anggota-anggota masyarakat. Ini termasuk yang menggariskan kehidupan bersuku-suku, sistem-sistem perkahwinan, kekeluargaan, perwarisan, ekonomi, politik dan pentadbiran. Di sini prinsip-prinsip adat tidak saja dipegang secara pasif, tetapi dipraktikkan secara aktif dalam kehidupan sehari-hari atau dalam situasi yang berkenaan. Sebagai contoh, teromba yang menerangkan kehidupan bersuku-suku di bawah ini:

Raja beralam  
Penghulu berluak  
Lembaga berlingkungan  
Buapak beranak buah  
Anak buah duduk bersuku-suku  
Berapa sukunya?  
Dua belas.

Kundur menjalar ke hulu  
Labu menjalar ke hilir  
Pucuknya sama digensis  
Buahnya sama ditarik.

(Ujang Hj Rapal, Negeri Sembilan 1976)

Dalam teromba di atas dinyatakan kepentingan pemimpin, raja, penghulu, lembaga, buapak dalam daerah masing-masing: negeri, luak, dusun dan teratak. Kepentingan mereka melihat dan melindungi kepentingan kumpulan yang dipimpin, rakyat, seterusnya anak buah. Masyarakat hidup dalam suku-suku (suku yang 12), dalam kawasan atau daerah yang biasanya terbahagi mengikut keadaan alam, anak air, sawah atau sungai. Antara seorang dengan

yang lain dalam suku yang sama, terikat sebagai saudara kandung (seperut), tidak boleh berkahwin, tetapi dibenarkan bergaul setakat yang diperkenankan oleh adat dan tidak sumbang pada ukuran adat:

Sumbang percakapan  
Sumbang kedudukan  
Sumbang perjalanan  
Sumbang pemandangan.

Antara satu suku dengan yang lain samalah seperti satu kelompok yang disatukan, termeterai dalam perlakuan gotong-royong dan semenda-menyemenda (nikah kahwin). Dan dalam sistem perkahwinan, terdapat pelbagai ungkapan yang menerangkan pelbagai perlakuan, meliputi peringkat-peringkat mulai merisik, menghantar tanda hingga kepada bersanding dan jemput-menjemput. Bentuk hubungan orang semenda (suami) dengan orang tempat semenda (mertua dan ipar-lamai), ditentukan dan tugas-tugasnya dilunaskan dengan terperinci:

Orang semenda bertempat semenda  
Jika cerdik teman berunding  
Jika bodoh disuruh arah  
Tinggi banir tempat berlindung  
Rimbun dahau tempat bernaung.

Orang semenda pergi kerana suruh  
Berhenti kerana tegah.

Jikalau kita menerima orang semenda:  
Jikalau kuat dibubuhkan di pangkal kayu  
Jikalau bingung disuruh arah  
Menjemput yang jauh mengampungkan yang dekat  
Jikalau cerdik hendakkan rundingannya  
Jikalau mualim hendakkan doanya  
Jikalau kaya hendakkan emasnya  
Jikalau patah, penghalau ayam  
Jikalau pekak pembakar bedil.

(Mohd. Din bin Ali 1957b, 64)

Kedudukan orang semenda di tempat semenda adalah:

Masuk ke kandang kerbau menguak  
Masuk ke kandang kambing membebek  
Bagaimana adat di tempat semenda dipakai  
Bumi dipijak langit dijunjung  
Bagaimana adat negeri itulah dipakai.  
Orang semenda dengan orang tempat semenda  
Bagai timun dengan durian  
Menggolek pun luka kena golek pun luka  
Kusut menyelesaikan  
Cicir memungut, hilang mencari  
Hutang membayar, piutang menerimaan  
Oleh tempat semenda.

(Mohd. Din bin Ali 1957b, 64)

*Hukum dan undang-undang yang mesti dipatuhi*

Isi teromba dalam bahagian ini merupakan garis-garis hukum dan undang-undang adat yang dikenakan kepada seseorang anggota masyarakat, apabila dia melanggar norma-norma adat atau melakukan sesuatu yang di luar dari tatasusila kemanusiaan, misalnya mencuri, merogol, melukakan dan membunuh. Dalam untai-untai teromba yang panjang mengenai hal ini terdapat ungkapan-ungkapan yang ringkas dan padat mengenai sesuatu aspek perundangan yang dimaksudkan:

Tali pengikat daripada lembaga  
Keris penyalang daripada undang  
Pedang pemancung daripada keadilan  
Tikam tak bertanya  
Pancung tak berkhabar.

Hukum raja:  
Enam puluh enam kupang  
Tujuh tahil, sepha  
Sekendi sekendidi  
Seisi lesung pesuk  
Seruas buluh talang  
Sekucung lengan baju.

Dahaga dahagi  
Sumbang salah

Rebut rampas  
Siar bakar  
Kicang kecoh  
Upas racun  
Tikam bunuh  
Samun sakal  
Pantang kepada adat.

Upas racun sisa makan  
Cincang pampas bunuh beri balas  
Anak dipanggil makan  
Anak buah disorongkan balas.

Pelesit dua sekampung  
Enau sebatang dua sigai  
Mata tumbuh tiada berbenih  
Sumbang kepada tabiat.  
... dan seterusnya

(Mohd. Din bin Ali 1957b, 60–61)

Teromba di atas, antara lain menyatakan kekuasaan pemerintah menjatuhkan hukuman. Hukum bunuh hanya boleh dijatuhkan oleh raja, iaitu Yang Dipertuan Besar dan Undang yang Empat. Lembaga tidak mempunyai kuasa demikian, tetapi hanya menjalankan penyiasatan untuk mendapatkan bukti-bukti yang akan dibentangkan di mahkamah adat yang lebih tinggi. Raja mempunyai kuasa memerintahkan pertanda atau penggawanya membunuh, dengan menikam atau memancung orang yang bersalah tanpa dibicarakan. Suatu perintah yang telah diberikan tidak akan diulang atau ditarik balik, seperti yang diterangkan di tempat lain:

Raja tak dua kali bertitah  
Undang tak dua kali bersabda  
Lembaga tak dua kali berkata.

Baris-baris berikutnya dari teromba tadi, menerangkan hukum-hukum yang akan diterima oleh seseorang raja atau dari keluarganya, apabila didapati melakukan kesalahan; tetapi ukuran hukumnya lebih ringan, sekadar menjatuhkan hukum, supaya jangan seolah-olah mengelak daripada melakukan pengadilan:

Ibarat limau masam sekerat  
Perahu karam sekerat  
Tiba di mata dipicingkan  
Tiba di perut dikempiskan  
Berbinar ke pangkal lengan  
Bersaksi ke hujung tapak.

Seterusnya diterangkan jenis-jenis hukuman jenayah, dalam kata-kata yang amat ringkas, yang mungkin memerlukan huraian yang lebih terperinci kepada orang lain, tetapi sebagai bilangan 'rukun' sahaja kepada yang menjalankannya.

Dahaga, dahagi: 'dahaga' ialah perbuatan melawan dengan sengaja ketua adat yang menjalankan tugasnya; 'dahagi' ialah ketua adat yang membuat tuduhan palsu ke atas anak buahnya.

Sumbang salah: 'sumbang', kelakuan yang tidak bertertib di khalayak ramai; 'salah, yang memaksakan seseorang dengan kekerasan supaya melakukan perbuatan yang tidak sopan.

Rebut rampas: 'rebut', mengambil harta orang lain dengan cara menipu; 'rampas', mengambil harta orang dengan cara paksa; sama pula dengan ungkapan lain, 'maling curi'.

Siar bakar: 'siar' menggunakan api membakar harta benda orang lain, 'bakar', musnah sama sekali.

Kicang kecoh: 'kicang', menghasut orang lain supaya melakukan kekacauan; 'kecoh', sendiri melakukannya hingga mengganggu ketenteraman orang lain.

Upas racun: 'upas', menggunakan racun untuk menyakitkan orang lain, 'racun', membunuh dengan menggunakan racun.

Tikam bunuh: 'tikam', melukakan, 'bunuh', membunuh.

Samun sakal: 'samun', merampas atau merompak dengan kekerasan, 'sakal', melakukan pembunuhan semasa merompak.

(Nordin Selat 1976, 13–140)

Apa yang diterangkan di atas ialah apa yang dianggap "pantang kepada adat" dan kerana itu yang melakukannya harus menerima hukuman yang sewajarnya; dan dalam ungkapan-ungkapan selanjutnya dihuraikan kesalahan-kesalahan yang dianggap melanggar tatasusila, "pantang kepada tabiat", yang akan dihukum oleh buapak dan lembaga yang berkenaan. Walau apa pun juga tafsiran dan tindakan terhadap undang-undang itu, suatu kenyataan yang jelas dilihat ialah bagaimana terperincinya huraihan-huraihan tersebut dapat dijelaskan dalam ungkapan-ungkapan yang ringkas, tepat dan puitis.

Terdapat pelbagai hukum yang lain, perkahwinan, perceraian, pembahagian harta (bersuarang), perwarisan dan lain-lain; semuanya terjalin dalam ungkapan-ungkapan puitis yang ringkas, tetap dan mantap:

Cari bahagi  
Pembawa kembali  
Dapatkan tinggal  
Sekutu belah  
Suarang beragih.

Apabila sepasang suami isteri mendapati tidak ada jalan lain lagi selain daripada berpisah, si suami akan memanggil orang-orang tempat semendanya dan menyatakan hal itu; sesuai dengan kata adat:

Pertemuan ada dinikahi  
Habis pertemuan diceraii.

Lalu, setelah bercerai, diadakan 'bersuarang' iaitu berbahagi harta antara yang terlibat. Harta carian, yang didapatkan bersama setelah berkahwin akan dibahagi-bahagi mengikut kadar yang setimpal, misalnya dengan mengambil kira jumlah anak-anak yang secara automatik ditinggalkan bersama ibu. Harta yang dibawa suami ke tempat semendanya akan dikembalikan, dan harta dapatan; yang diberikan oleh tempat semenda setelah mereka berkahwin, akan ditinggalkan untuk si isteri. Inilah yang dinamakan "adat sekutu belah" dan "suarang beragih". Dengan amalan dan panduan demikian, tidaklah akan menimbulkan rasa tak puas hati dan

dendam-mendendam antara kedua pihak; bahkan dengan demikian masih menjalin hubungan yang baik antara kedua suku yang telah terpisah itu.

### Fungsi dan Penyebaran

Perbincangan tentang tema dan isi sesungguhnya telah juga menjelaskan fungsi teromba secara umum. Pada dasarnya teromba mengisi pemerian-pemerian tentang nilai dan pegangan hidup yang diperlakukan dalam semua aspek kehidupan masyarakat. Dan, pada dasarnya juga, itulah fungsi teromba, untuk menggariskan norma-norma adat yang mesti diterima dan diamalkan oleh anggota-anggota masyarakat.

Satu perkara yang harus ditekankan di sini, iaitu ungkapan-ungkapan teromba tidak terdapat dalam kegiatan-kegiatan kesenian dan hiburan seperti dalam lagu dan tarian. Tetapi mungkin juga dinyanyikan dalam sesuatu majlis atau keramaian, sekurang-kurangnya pada masa yang telah lalu ketika mana peranan puisi dan lagu merangkumi bidang yang lebih luas. Dalam tinjauan kami terhadap fungsi dan penyebaran teromba di daerah-daerah yang berkenaan, tidak didapati puisi teromba digunakan sebagai seni kata dalam persembahan-persembahan kesenian yang terbiasa di Negeri Sembilan. Namun begitu beberapa rangkap daripada teromba pernah juga didapati dalam teks atau skrip permainan randai yang merupakan bentuk drama daripada cerita-cerita 'kaba' Minangkabau, yang di sini digolongkan sebagai prosa berirama. Dan dari segi penggunaannya yang pasif, seperti yang telah disebutkan terdahulu, baris-baris teromba telah berperanan juga dalam cerita-cerita seperti itu, khasnya daripada jenis 'kaba'.

Penggunaan teromba secara aktif dan peranannya dalam kehidupan masyarakat, terdapat dalam bentuk perlakuan, dalam majlis-majlis, upacara-upacara dan adat istiadat tertentu, misalnya dalam jamuan dan kenduri, majlis perlantikan ketua dan pemimpin adat, dalam peringkat-peringkat pelaksanaan sebuah perkahwinan dan sebagainya. Dalam kegiatan-kegiatan seperti itu, fungsi teromba boleh dilihat dari dua perspektif:

- i. Teromba sebagai bahan hiasan dan rujukan.
- ii. Teromba sebagai bahan gunaan.

*Bahan hiasan dan rujukan*

Di sini fungsi teromba bukanlah sebagai suatu kemestian; tetapi boleh sahaja digunakan atau tidak. Biasanya yang menuturkan ungkapan-ungkapan itu ialah seorang yang tertentu daripada pihak-pihak yang terlibat; iaitu pihak tuan rumah atau wakilnya dan pihak tetamu atau wakilnya. Isi teromba yang diucapkan agak terkhusus kepada majlis yang berkenaan sahaja. Selain daripada digunakan sebagai hiasan dalam ucapan aluan, terima kasih dan sebagainya, ungkapan-ungkapan teromba itu juga mungkin digunakan sebagai bahan panduan, memeriksa dan menyemak apa-apa yang dikehendaki oleh adat bagi menjalankan sesuatu majlis adat. Mohd. Din bin Ali, antara lain, memberikan majlis kenduri berhelat, yang dikatakan "Adat Beratur, Bilang Bertentu", iaitu persediaan dan perjalanan suatu istiadat yang dihadiri oleh pemimpin-pemimpin adat, penghulu, lembaga dan buapak. Dalam bahagian ini dapat dilihat fungsi teromba sebagai rujukan dan pada masa yang sama sebagai hiasan dalam ucapan pada tempat-tempat yang berkenaan. Di bawah ini dipetik sebahagian daripada pemerian itu:

Seseorang yang hendak mengadakan sesuatu majlis yang dinamakan 'berhelat', iaitu dengan menjemput ketua-ketua adat, Lembaga dan Buapak, seperti kenduri berkhatan, bertindik dan berkahwin, haruslah dia mengisi kehendak adat dan peraturan yang ditetapkan, seperti memperbaiki kampung dan rumah:

Dilingkung kampung nang sesudut  
Ditokok tangga nang semata  
Dibetulkan rasuk pelancar  
Ditahan rasuk melintang  
Dituntung lantai nang sebilang  
Ditutup atap nang selayar  
Diarak kayu nang panjang.

Bahagian-bahagian dalam rumah harus juga diperbaiki, dibetulkan dan dihiasi, dinding yang kotor ditutup dengan tabir, atap atau peran dengan langit-langit, ini dinamakan pakaian rumah:

Sudah terdendeng rupanya tabir  
Sudah terbentang langit-langit  
Sudah tergantung kain sampai.

## TEROMBA DAN PERIBAHASA BERANGKAP

Apabila para tamu telah tiba dan duduk, hendaklah ditegur sapa dengan menyorongkan tepak sirih sebagai sebahagian adab dan budi bahasa:

Sudah tersusun rupanya sirih  
Sudah berkacip rupanya pinang  
Sudah putih rupanya kapur  
Sudah kuning rupanya gambir  
Sudah berkumpul rupanya tembakau.

Tempat duduk tetamu kehormat hendaklah disediakan:

Sudah bertimpuh tilam pandak  
Sudah terbentang tilam panjang  
Sudah teratur bantal besar  
Sudah bersusun bantal kecil  
Sudah bergunjung gunung berangkat  
Sudah berpalang silang gunting.

Selepas itu diisi pula kemahuan adat, iaitu dengan mengenakan tungkul merual, keris pedang, tombak dan perisai, serta memeriahkan majlis dengan gendang dan silat, membakar mercun dan bedil sebagai alamat helat jamu yang dibuat:

Sudah memancung rupanya pedang  
Sudah menikam rupanya keris  
Sudah terurai rupanya tombak  
Sudah terkembang rupanya payung  
Sudah berkecimpung tawak-tawak  
Sudah meningkah bunyi gendang  
Sudah beratur rupanya meriam  
Sudah bersukat ubat bedil  
Sudah terbakar rupanya tunam  
Sudah berderum bunyinya lamat.

Apabila mustaid segala-galanya perhelatan di atas dengan tidak silang selisih lagi maka baharulah sempurna Adat Berhelat. Maka baharulah sah di dalam adat pekerjaan tuan rumah membuat helat jamu tadi. Inilah yang dinamakan:

Kok Adat sudah beratur  
Kok bilang sudah bertentu.

(Mohd. Din bin Ali 1957b, 36-40)

*Teromba sebagai bahan gunaan*

Contoh yang diberikan di atas lebih merupakan sebagai rujukan tentang cara dan persediaan membuat sesuatu majlis beradat; jadi ertinya ia tidak dibaca atau dituturkan, walaupun mungkin pihak tuan rumah atau tetamunya memetik beberapa bahagian daripadanya. Penggunaan teromba sebagai media atau alat komunikasi dalam majlis tertentu lebih jelas dalam mengendalikan kerja kahwin, maksudnya meliputi peringkat-peringkat mulai dari merisik, menanda, menghantar tanda dan melamar, menjawab atau menerima cincin mintaan, majlis bertunang dan bertukar cincin, menetap tarikh, istiadat perkahwinan, termasuk nikah dan bersanding, menjemput pengantin dan sebagainya. Untuk menggambarkan perlakuan itu, dan lebih penting memberikan puisi terombanya dalam bentuk yang perakitis dan konkrit, diturunkan beberapa bahagian daripada perjalanan majlis tersebut melalui ungkapan-ungkapan teromba yang sebahagian besarnya tercipta secara spontan tapi masih dapat mengekalkan ciri-ciri dan keindahan puisinya:

a. Menghantar cincin tanda:

Adapun tatkala buluh bilah ditanam  
Besi nan berloceng, puntung yang berasap  
Bangau hitam gagak putih  
Datuk bujang nenek gadis  
Adat sentosa di dalam negeri.

Sebingkah tanah akan permataangnya  
Sehelai tali akan penambatnya  
Sebatang kayu akan penambannya  
Tanahnya rata airnya jernih  
Orangnya ramai dalam negeri.

Maka di situlah pula duduknya suku yang dua belas  
Empat di darat, lapan di baruh  
Laman sebuah sepermainan  
Perigi sebuah sepermandian  
Jamban sebuah seperlaungan.

Maka ditengoklah pula lapan hukum lapan adat  
Hukum tak menambat

## TEROMBA DAN PERIBAHASA BERANGKAP

Adat tak melintang  
Harus semenda-menyemenda pula

Syarat orang semenda-menyemenda  
Diurus dirisikkan  
Dikilat dibayangkan  
Kata dijalankan  
Kata ia kata bersudah  
Kata berjawab bertanda rupa  
Maka mengeleklah pula cincin sebentuk  
Cincin apa? Cincin duduk muafakat.

Esa sekata, kata dibalikkan  
Tak esa sekata, tanda dibalikkan  
Maka ditengoklah pula esa timbal balik  
Maka lalu ditakik pula janji  
Janji apa? Janji adat  
Lambat janji, dua kali tujuh hari  
Laun janji, tujuh hari  
Deras janji tiga hari  
Dalam janji digaduh-gaduhi  
Janji sampai lalu ditepati  
Maka turunlah pula  
Undang di istana, menjunjung titah  
Turun pula lembaga di balai, menjunjung  
sabda  
Maka dengan kebulatan tempat semenda  
Dan segala seresam saya, maka disuruhnya  
saya menghantar tanda cincin si anu  
pada hari ini.

Teromba di atas merupakan sebahagian daripada kata-kata daripada wakil pihak lelaki; dan contoh seperti ini mungkin yang agak ringkas dan sederhana. Daripada contoh yang lain didapati lebih panjang, terperinci dan disulami dengan pantun, gurindam dan peribahasa; misalnya seperti yang diberikan dalam Lampiran.

b. Menjemput tamu:

Beginilah bang  
Sembah pada datuk  
Adalah saya ni dari kampung nan bersudut  
Rumah nan berketak tangga

Ibarat dari istana menjunjung titah  
Ibarat dari balai menjunjung sabda  
Ibarat dari tempat semenda  
Menjunjung suruhan dari buapak  
Adalah hajat dan tujuan saya  
Menjemput anak buah datuk  
Serta adat dengan pusaka nan bersebab kerana  
Inilah sembah saya pada datuk.

c. Semasa akad nikah akan dijalankan:

Selilit Pulau Perca  
Selimbang Tanah Melayu  
Scalam Minangkabau  
Untung sekali malang berturut  
Untung tak boleh diraih  
Malang tak boleh ditolakkan  
Untung melambung tinggi  
Malang menimpa badan  
Hidup dikandung adat  
Mati dikandung tanah  
Maka beruntunglah kita  
Bersuku berwaris  
Jauh pun ada dekat pun ada  
Maka jauh didengarkan  
Dekat dipandangkan.

d. Adat memulangkan kampung halaman:

Kalau ada diunjuk beri  
Kalau tak ada berkata benar  
Kemudian tu diseru-serukan untungnya  
Kok untung sabut, timbul  
Kok untung batu, tenggelam  
Ada pula bak mengerah orang  
Kok kampung nan sesudut  
Kok sawah nan selopak  
Kok rumah nan selayar atap  
Inilah nan terdapat  
Kami pulangkanlah lidah pada baginda  
Belalah dan peliharalah

(Sebahagian daripada rakaman teromba di kawasan Kuala Pilah,  
Jelebu dan Rembau, 1978)

Demikian seterusnya setiap adat dan perlakuan yang berkenaan disertai ungkapan-ungkapan puitis, teromba dan pantun yang indah dan tepat dengan pengertian yang dimaksudkan. Melihat kepada penggunaannya yang spontan antara ahli-ahli adat ini, penyertaan yang 'natural' daripada kalangan peserta setiap kumpulan (yang menyambut dan yang bertamu), serta minat dan pemahaman yang menyeluruh daripada mereka yang hadir, dapatlah disimpulkan bahawa puisi teromba yang mengandung pelbagai bentuk itu telah sebat dan amat popular dalam kehidupan masyarakat. Dan kesebatian ini bukan sahaja pada menyebut dan menggunakan dalam majlis-majlis seperti itu, tetapi lebih daripada itu segala isi dan pengajaran di dalamnya telah diikuti dan diamalkan oleh setiap anggota masyarakat yang berkenaan.

## PERIBAHASA BERANGKAP

### Erti dan Bentuk

Peribahasa berangkap atau peribahasa berirama adalah daripada bentuk puisi yang amat sederhana dan selalu dianggap sebagai permulaan kepada beberapa bentuk puisi yang telah berkembang termasuk pantun, seloka, gurindam dan teromba. Pada dasarnya peribahasa berangkap ialah ungkapan-ungkapan yang dikenali dan berperanan sebagai peribahasa yang secara umum meliputi juga perumpamaan, bidalan, pepatah, perbilangan, tamsil dan ibarat, juga lidah pendeta. Tetapi yang digolongkan dalam genre ini, (dalam kajian ini) ialah yang mengandungi sekurang-kurangnya dua unsur di bawah ini:

- i. Pengucapan itu tergolong sebagai peribahasa.
- ii. Pengucapan itu mengandungi nilai-nilai puisi; yang penting di sini ia tersusun dalam baris-baris yang berurutan dalam satu rangkap dengan adanya pertimbangan rima dan irama sekurang-kurangnya berupa rentak atau kadensa.

Apa yang dianggap sebagai 'peribahasa' dalam konteks di atas,

adalah berdasarkan tafsiran yang diberikan oleh Za'ba:

Peribahasa itu ialah segala susunan cakap yang pendek yang telah melekat di mulut orang ramai semenjak beberapa lama oleh sebab sedap dan bijak perkataannya, luas dan benar tujuannya, dipakai akan dia jadi sebutan oleh orang sebagai bandingan, teladan dan pengajaran. Maka ialah juga yang dikatakan bidalan, pepatah, perbilangan dan perumpamaan kerana tiap-tiap satu ini cakap yang mengandungi segala sifat peribahasa yang telah disebutkan itu.

(Za'ba 1962, 165).

Berdasarkan keterangan Za'ba di atas dan membandingkannya dengan ciri-ciri puisi yang digunakan dalam kajian ini, dapatlah diringkaskan bahawa peribahasa berrima yang difahamkan di sini ialah ungkapan-ungkapan peribahasa yang terdiri daripada sekurang-kurangnya dua keratan yang sejajar, baik dalam sebaris, mahupun dalam dua baris atau lebih daripada dua baris. Antara baris-baris itu mungkin tidak berhubungan dari segi rima, tetapi seharusnya terjalin dalam hubungan yang seimbang, yang satu sebagai pembanding atau pelengkap kepada yang lain. Dengan menggunakan penjenisan yang dibuat oleh Za'ba, dapatlah diberikan beberapa contoh di bawah:

- Yang tergolong sebagai bidalan atau pepatah (iaitu peribahasa yang bermakna selapis):

Sesal dahulu pendapatan  
Sesal kemudian tak berguna.

Ringan tulang berat perut  
Berat tulang ringan perut.

Ada padi semua kerja jadi  
Ada beras semua kerja deras.

Bercakap siang pandang-pandang  
Bercakap malam dengar-dengar.

Nak tahuhan jahat orang tanyakan pada  
seterunya

## TEROMBA DAN PERIBAHASA BERANGKAP

Nak tahuukan baik orang tanyakan pada sahabatnya.

Harimau mati tinggal belangnya

Gajah mati tinggal tulangnya

Manusia mati tinggal nama.

Ikut suka luka

Ikut hati mati

Ikut rasa binasa.

Siang terkenang-kenang malam termimpi-mimpi

Makan tak kenyang tidur tak lena

Mandi tak basah berminyak tak licin

Terkilan-kilan di hati terbayang-bayang di mata

Terasa-rasa bak duri di dalam daging.

Mara hinggap mara terbang

Mara bergeisel sambil lalu

Enggang lalu ranting patah.

Muda akan tua

Hidup akan mati

Dunia akan tinggal

Bilatah lagi?

Berserah berkebilan

Beruca berpegang ekor

Berpesan berturutan

Bertaruh berpermalami

(Za'ba 1962, 167 - 170)

### ii. Yang tergolong sebagai perbilangan:

Hidup dikandung adat

Mati dikandung tanah.

Bulat air kerana pembetung

Bulat manusia kerana muafakat.

Kain rabak tegal dik lenggang awak

Baju rabak tegal dik lengkok awak

Kopiah pesuk tegal dik lonjak awak.

Siapa menjala siapa terjun  
Siapa berhutang siapa membayar  
Siapa membunuh siapa kena bunuh.

Merajuk pada yang kasih  
Manja pada yang sayang  
Meminta pada yang ada  
Berkaul kepada yang keramat.

(Za'ba 1962, 171–173)

Hampir semua contoh yang diberikan oleh Za'ba, yang sebahagiannya dipetik di atas, mempunyai konotasi adat dan dari segi isinya tergolong sebagai teromba; namun, pada umumnya, teromba merupakan beberapa untai peribahasa berangkap yang tergolong dalam satu konteks; sedang peribahasa berangkap lebih jelas sebagai untai-untai yang berasingan.

- iii. Yang tergolong sebagai perumpamaan; iaitu peribahasa yang bermakna dua lapis:

Bagai limau masam sekerat  
Bagai perahu karam sebelah.

Seperti sumbu pelita  
Menerangi yang lain membakar dirinya.

Ibarat gasing:  
Berpaku tetap berpusing  
Tak berpaku merayau.

Macam lembu bigal:  
Dikemudiankan ia menyepak  
Didahulukan ia menendang.

Macam anak nakhoda kasap:  
Pangkal hilang hujung lesap  
Hujung hilang pangkal lesap.

Mulut tempayan boleh ditutup  
Mulut manusia bagaimana menutupnya?

TEROMBA DAN PERIBAHASA BERANGKAP

Ular dipukul biar mati  
Kayu pemukul jangan patah  
Tanah tempat memukul jangan lembang.

Buah belolok:  
Tercampak ke laut tak dimakan ikan  
Tercampak ke darat tak dimakan ayam.

(Za'ba 1962, 176 – 185)

iv. Yang tergolong sebagai lidah pendeta:

Muafakat itu berkat  
Dengan muafakat dapat diangkat.

Kekayaan saudagar pundi-pundi emasnya  
Kekayaan pendeta keping-keping kertasnya.

Mengeluar kata berfikir-fikir  
Membuat kerja bertadbir-tadbir.

Padang perahu di laut  
Padang fikiran di hati.

(Za'ba 1962, 186 – 187)

v. Yang tergolong sebagai kiasan; khasnya kiasan berangkap:

Sudah gaharu cendana pula  
Sudah tahu bertanya pula.

Banyak udang banyak garam  
Banyak orang banyak ragam.

Lain dulang lain kakinya  
Lain orang lain hatinya.

Sebab pulut santan binasa  
Sebab mulut badan binasa.

(Za'ba 1962, 193)

vi. Yang tergolong sebagai tamsil dan ibarat:

Kayu mati berpunggur  
Manusia mati biar bernama.

PUISI MELAYU TRADISIONAL

Bawa resmi padi:  
Semakin berisi makin merunduk  
Jangan bawa resmi jagung  
Makin berisi makin jegang.

(Za'ba 1962, 199–200)

Beras basah:  
Ditampi tak berlayang  
Dinding tak berantah  
Hujungnya tidak disudu itik.

(Hose 1933, 33)

Seperti dedalu api hinggap ke pohon kayu  
Hinggap ke ibu, ibunya mati  
Hinggap ke ranting, rantingnya patah.

(Hose 1933, 49)

Ayam hitam terbang malam  
Hinggapnya ke rimba dalam  
Bertali ijuk bertambang tanduk  
Ayam putih terbang siang  
Hinggap di kayu malarasi  
Bertali benang bertambang tulang.

(Simandjuntak 1965, 39)

- vii. Bentuk dua baris berima, seperti pantun dua baris, tetapi, dari segi bentuk dan isinya lebih mendekati perumpamaan:

Dibuat kerana Allah  
Menjadi kerana olah.

Bukannya patah, ruat  
Bukannya jatuh, dibuat-buat.

Bagai buntal kembung  
Perut buncit dalamnya kosong.

Bagai meriam di dalam kubu  
Gerapah sahaja bukannya peluru.

## TEROMBA DAN PERIBAHASA BERANGKAP

Burung pipit sama enggang  
Mana boleh sama terbang?

Ibarat dakwat dengan kertas  
Bila boleh renggang terlepas?

Di manakah tuma hidupnya pula  
Jika tak makan di atas kepala?

Hairan sekali di dalam hati  
Meriam diatur perang tak jadi.

(Hose 1933, 38-52)

Terbakar kampung kelihatan asap  
Terbakar hati siapa tahu?

Bangau bangau minta aku leher  
Badak badak minta aku daging.

(Hose 1933, 28)

Mohd. Taib Osman menggolongkan puisi jenis ini sebagai "ungkapan-ungkapan bersajak atau pantun dua baris"; dan dalam contoh-contoh yang diberikannya, beliau memasukkan semua bentuk yang sama, termasuk yang berupa teka-teki, peribahasa dan ungkapan-ungkapan bersajak yang tergolong sebagai pantun dua baris (Mohd. Taib Osman 1975b, 13). Dalam contoh-contoh yang dipetik di atas, (dari sumber yang lain, selain *Warisan Puisi Melayu*, walaupun sama bentuknya dengan pantun dua baris, tetapi isinya adalah peribahasa, sama ada pepatah, perumpamaan, kiasan atau ibarat. "Dibuat kerana Allah, menjadi kerana olah", hampir sama ertiannya dengan bidalan "hati hendak semua jadi". Demikian juga "bagai buntal kembung, perut buncit di dalam kosong" sama pula maksudnya dengan perumpamaan "bagai bunga dedap: cantik tidak berbau".

### viii. Peribahasa berirama dalam bentuk pantun empat baris:

Ada seekor burung pucung  
Leher panjang laksana teropong

PUISI MELAYU TRADISIONAL

Tiada tahu sendiri kosong  
Sebagai kaduk naik junjung.

Anak beruk dimakan siput  
Disambar oleh buaya katak  
Laksana lambuk di tengah laut  
Tenggelam timbul dilambung ombak.

Anak raja mudik ke Daik  
Masuk ke taman mandi di kolam  
Kalau asal baja yang baik  
Sedikit dicanaí menjadi tajam.

Bangsal di hulu kerapatan  
Sayang durian gugur bunganya  
Sesal dahulu pendapatan  
Sesal kemudian apa gunanya.

Bukan tanah menjadi padi  
Kalau jadi hampa melayang  
Bukan bangsa menanam budi  
Kalau tanam cuma terbuang.

Dari bukit turun ke kampung  
Orang pintal tali sabut  
Pipit hendak menelan jagung  
Telan tak lepas mati tersangkut.

Encik Ali orang Semarang  
Singgah berulam pucuk ketapang  
Tabik cuali muda sekampung  
Mulutnya manis lidah bercabang.

(Hose 1933, II-54)

Sekali membeli kemenyan  
Sekupang membeli ketaya  
Sekali lancung keujian  
Seumur hidup tak percaya.

Anak agam jual sutera  
Jual di Rengat tengah pekan  
Jangan digenggam seperti bara  
Terasa hangat dilepaskan.

(Simandjuntak 1965, 39)

Sepertimana bentuk pantun dua baris di atas, bentuk pantun empat baris ini juga khusus mengandungi pengertian atau rujukan kepada peribahasa. Dalam rangkap pertama, ungkapan "bagai kaduk naik junjung" adalah perumpamaan; dan di sini diberikan perbandingan kepada burung pucung yang juga melambangkan sifat meninggi diri. Peribahasa dalam rangkap kedua, "laksana lambuk di tengah laut" sama pula dengan peribahasa "bagai apung di tengah lautan, dipukul ombak sekejap ke tengah sekejap ke tepi". Demikianlah dengan ungkapan-ungkapan yang lain, "pipit menelan jagung", "bukan tanah menjadi padi", "lidah bercabang", "genggam bara api biar sampai jadi arang" dan lain-lain, adalah dari ungkapan-ungkapan peribahasa yang begitu dikenal dalam kehidupan masyarakat Melayu.

Simorangkir Simandjuntak menggolongkan rangkap-rangkap terakhir itu sebagai pantun seloka (Simandjuntak 1965, 39); namun, dalam kajian ini kedua-duanya dianggap sebagai pantun biasa; hanya dari segi isi dan fungsinya, kedua-dua rangkap tersebut digolongkan sebagai peribahasa berangkap, sesuai dengan ciri-ciri yang dimilikinya dan ukuran yang digunakan dalam penggolongan yang berkenaan.

### Isi dan Fungsi

Tema atau isi peribahasa berirama dapat disorot daripada fungsi dan pemakaianya dalam kehidupan masyarakat sehari-hari, dan ini seharusnya dilihat dalam konteks pemakaian peribahasa secara umum; kerana genre yang dibicarakan ini hanya merupakan sebahagian kecil sahaja daripada keseluruhan peribahasa yang meliputi pelbagai bentuk dan jenis, termasuk perumpamaan, pepatah, kiasan, perbilangan dan lain-lain. Za'ba meringkaskan kegunaan peribahasa itu sebagai berikut:

- i. Menghiasi karangan dan percakapan.
- ii. Menguatkan tujuan karangan atau percakapan itu.
- iii. Kebanyakannya boleh menjadi pedoman hidup kerana isi-nya yang besar dan luas itu (Za'ba 1962, 165).

Mengenai kedudukan peribahasa dalam kebudayaan sesuatu bangsa, Za'ba mengatakan:

Peribahasa itulah seolah-olah mutiara atau buntat daripada bijaksana orang-orang yang punya bahasa itu. Di dalamnya terisi segala hal-ehwal kesusahan dan kesenangan atau jenis kehidupan yang telah dirasa oleh bangsa itu.

Sesuatu bangsa itu boleh diketahui bagaimana pandangan orang-orangnya di atas kehidupan dalam dunia ini, dan bagaimana senang sukar yang telah dilalui mereka, jika diperiksa bidalan-bidalan dan perumpamaan-perumpamaan pada bahasa sahaja (Za'ba 1962, 165).

Ringkasnya, menurut Za'ba, peribahasa menggambarkan pandangan dunia (*world view*) masyarakat atau bangsa yang mempunyainya. Ia juga dapat menyatakan pengalaman hidup, kesenangan dan kesukaran yang telah dilalui serta bentuk kehidupan sesuatu bangsa itu seluruhnya. Dengan kedudukan demikian, isi dan tema peribahasa berirama yang dibicarakan ini dapatlah dipandang sebagai mencerminkan pandangan dunia dan etos masyarakat Melayu, khususnya dalam konteks pemakaian peribahasanya. Dan untuk memudahkan perbincangan, pembahagian di bawah ini mungkin bersesuaian:

1. Peribahasa sebagai pernyataan etos masyarakat.
2. Peribahasa menggambarkan sikap dan pegangan hidup.
3. Peribahasa menggambarkan kepelbagaiannya cara hidup dan pekelilingan masyarakat.

#### *Pernyataan etos dan nilai*

Sebagaimana pantun dan teromba, peribahasa juga menggambarkan etos atau nilai masyarakat. Hal ini dapat dijelaskan apabila makna sesuatu ungkapan itu diaplikasikan secara teori dan praktis kepada kehidupan masyarakat itu. Bertolak dari pendapat yang mengatakan masyarakat Melayu sebagai norma yang dituntut dalam hidup, dengan mudah dapat dikumpulkan pelbagai ungkapan yang merujuk kepada norma tersebut; sebahagian daripadanya diberikan di bawah:

a. Berbudi dan berjasa

Budi kepada masyarakat Melayu merupakan sebahagian daripada kebudayaan, kerana dalam kehidupan sehari-hari, budi menjadi semacam *sanction* yang mengikat anggota-anggota masyarakat kepada sistem yang lebih besar. Pengertian budi bukan saja terbatas pada pemberian dan penerimaan barang dari seorang kepada yang lain, tetapi meliputi seluruh konsep hubungan sosial masyarakat itu. Seorang anak harus taat kepada ibu bapanya, kasih sayang, hormat, patuh, bersopan santun, halus tutur kata, beradab dan sebagainya. Seorang anak yang di luar daripada norma ini dianggap tidak berbudi, kacang lupukan kulit atau melepaskan anjing tersepit; dan akibatnya, hidupnya tidak menerima keredaan Tuhan:

Elok bahasa bagi bakal hidup

Elok budi bagi bakal mati.

Sesuatu budi yang telah diberikan secara jujur seperti melepas kesukaran orang lain, bantuan dan kasih sayang dalam hidup berkeluarga dan berjiran, akan tetap dikenang dari hidup hingga ke mati:

Hancur badan dikandung tanah  
Budi yang baik dikenang juga.

Hutang emas boleh dibayar  
Hutang budi dibawa mati.

Muka berpandangan  
Budi kedapatan  
Kasih bak lama juga.

Budi berhubungan erat dengan jasa; berjasa adalah berbudi. Tidak mungkin seorang dapat dianggap membuat jasa jika dia tidak berbudi. Setiap anggota masyarakat ingin membuat jasa yang termampu olehnya; jika jasanya besar, namanya akan tetap dikenang walau sehingga kematiannya. Bagi yang lebih penting kedudukannya dan penting pula jasa yang diberinya, namanya akan terukir dalam sejarah bangsa dan negara:

Hidup kayu berubah

Hidup manusia biar berjasa.

## PUISI MELAYU TRADISIONAL

Kayu mati berpunggur  
Manusia mati biar bernama.

Harimau mati tinggal belangnya  
Gajah mati tinggal tulangnya  
Manusia mati tinggal nama.

Kalau baik disebut orang baik  
Kalau jahat, jahatlah.

Biar mati dengan nama yang baik  
Daripada hidup dengan nama yang jahat.

### b. Merendah diri

Merendah diri dan bertimbang rasa juga tergolong sebagai budi. Orang yang berbudi bahasa, kata-katanya tidak meninggi, dia tidak memungkiri janji. Orang yang tidak berbudi ialah yang meninggi diri, kata-katanya dilepas tanpa memikirkan perasaan orang lain dan tidak pernah setia pada janji:

Mandi di olak-olak  
Cakap di bawah-bawah.

Bawa resmi padi:  
Makin berisi makin merunduk  
Jangan bawa resmi lalang  
Makin berisi makin jegang.

Terlajak perahu boleh diundur  
Terlajak kata emas padahnya.

Berfikir sebelum berkata  
Berunding sebelum dibuat.

Iikut hukum memiat daging  
Sakit di awak sakitlah di orang.

### c. Menuntut pelajaran

Masyarakat Melayu memang telah menyedari kepentingan pelajaran. Menuntut pelajaran tidak semestinya secara formal, melalui pendidikan di surau, sekolah atau universiti, tetapi mungkin melalui pengalaman-pengalaman, penelitian sendiri atau melalui meditasi.

Tidak ada sesuatu pekerjaan atau tindakan untuk hidup akan berhasil dengan baik tanpa pengetahuan yang khusus mengenainya; kerana itu segala sesuatu harus dipelajari sebelum dilakukan. Orang yang berpelajaran akan mendapat tempat dalam hidup, sedangkan yang tidak, akan dipandang hina, tidak berfungsi, tidak berperanan atau sampah masyarakat:

Akal tak sekali datang  
Fikiran tak sekali tiba.

Kurang wang ringgit boleh dicari  
Kurang akal fikiran habis bicara.

Muda akan tua  
Hidup akan mati  
Dunia akan tinggal  
Bilakah lagi?

Arang habis besi binasa  
Tukang bekerja penat sahaja.

Berguru kepalang ajar  
Bagai bunga kembang tak jadi.

Macam daun terap  
Bunyinya degah deguh, degah deguh  
Jatuh ke bawah 'sir' katanya.

Bagai lembu bigal:  
Dikemudiankan ia menyepak  
Didahulukan ia menendang.

d. Bekerja kuat dan berjimat-cermat

Keinsafan masyarakat terhadap ekonomi, penghasilan dan pendapatan daripada usaha yang bersungguh-sungguh dan berjimat cermat jelas dilihat dalam pelbagai peribahasa yang menekankan kepentingan itu. Sikap yang baik, yang mendukung prinsip itu mendapat pujian daripada masyarakat; sementara yang bertentangan, yang mengingkari hakikat itu mendapat kecaman:

Sehari selembar benang  
Lama-lama menjadi kain.

Tak air talang dipancung  
Tak kayu jenjang dipatah.

Ditangkap buaya nampak riaknya  
Ditangkap malas tak bertanda.

Berhemat sebelum habis  
Sediakan payung sebelum hujan.

Besar pasak dari tiang  
Besar sendal dari gelegar.

Sekali merengkuh dayung  
Dua tiga pulau terlangsung  
Sekali mengorak pura  
Dua tiga hutang langsai.

c. Taat setia dan menghormati undang-undang

Kesedaran dan sikap terhadap negeri, pemerintah dan undang-undang, kewajipan pemerintah dan yang diperintah, taat setia dan kasih yang tidak berbelah bagi kepada negeri sendiri, dibayangkan dalam beberapa banyak peribahasa. Seorang pemerintah, raja, undang, lembaga, pembesar, buapak atau penghulu, yang memerintah negeri, luak, daerah, mukim dan sebagainya menyedari adanya semacam 'waad' atau perjanjian dengan yang diperintahnya:

Raja adil raja disembah  
Raja zalim raja disanggah.

Biar mati anak  
Jangan mati adat.

Pemerintah harus berlaku adil bagi menjamin hubungan yang baik dengan yang diperintah. Dalam menghadapi sesuatu peristiwa atau masalah, menjatuhkan hukuman denda atau bunuh, adat atau undang-undang yang teradat harus dilaksanakan, tanpa memandang kepentingannya kepada diri sendiri, walaupun anak atau kaum keluarga.

Kewajipan yang diperintah ialah memberikan taat setia kepada raja dan negeri. Menghormati dan mengakui keluhuran undang-

## TEROMBA DAN PERIBAHASA BERANGKAP

undang, menjauhkan sikap "gergaji dua mata", "menggunting dalam lipatan" dan sebagainya:

Hidup dikandung adat  
Mati dikandung tanah.

Di mana bumi dipijak  
Di situ langit dijunjung.

Masuk kandang kambing mengembek  
Masuk kandang kerbau menguak.

Hujan emas di negeri orang  
Hujan keris lembing di negeri sendiri  
Baik juga di negeri sendiri.

Bagai pucuk ru:  
Ke mana angin keras  
Ke sana ia berpihak.

Penohok kawan seiring  
Penggunting dalam lipatan.

### *Sikap dan pegangan hidup*

Apa yang terlihat dari contoh-contoh di atas, sikap dan nilai masyarakat terhadap sesuatu aspek hidup tidak semata-mata sebagai pengucapan tetapi dijadikan pegangan dan diamalkan dalam kehidupan sehari-hari. Masih banyak pula peribahasa yang menggambarkan sikap dan pegangan hidup ini. Misalnya, dari segi adat dan agama, setiap anggota masyarakat adalah sama mempunyai hak dan peranan masing-masing dalam masyarakat:

Berdiri sama tinggi  
Duduk sama rendah.

Hidup sandar-menyarandar  
Umpama aur dengan tebing.

Jangan hidup seperti enau di rimba:  
Melepaskan pucuk masing-masing.

PUISI MELAYU TRADISIONAL

Dalam kehidupan sehari-hari terdapat pelbagai peribahasa yang menunjukkan sikap dan pegangan:

a. Pekerjaan:

Kerja beragak tidak menjadi  
Kerja beransur tidak tertahan.

Duduk meraut ranjau  
Tegak meninjau jarak.

Merajukan air di ruang  
Hendak karam ditimba jua.

b. Usaha:

Hendak seribu daya  
Tak hendak seribu bicara.

Biar berputih tulang  
Jangan berputih mata.

Bulat tak datang menggolek  
Pipih tak datang melayang.

Kalau tidak dipecahkan ruyung  
Di manakah dapat sagunya?

c. Persefahaman:

Ibarat teluk limbungan kapal  
Ibarat tua menahan ragam  
Ibarat muda menanggung rindu.

Adat kambing membebek  
Adat kerbau menguak  
Adat murai berkicau.

d. Sia-sia:

Tiada beban batu digalas  
Tiada burut diampu-ampu.

## TEROMBA DAN PERIBAHASA BERANGKAP

Orang bini-binian anak tak dapat disuruh.  
Orang pindah-pindahan tanaman tak dapat dirasa.

### e. Mempertahankan diri:

Musuh jangan dicari  
Bertemu pantang dielakkan.

Keris pusaka apabila tercabut  
Berjalan terus berpantang surut  
Walau ada halangan berkabut  
Mahupun nyawa ditentang maut.

### *Peribahasa sebagai pengenalan dan pengajaran*

Memang pada umumnya semua peribahasa mengandungi tema pengajaran, iaitu dengan maksud mengajar dan mengingatkan anggota-anggota masyarakat dalam pelbagai aspek kehidupan. Bagaimanapun mungkin terdapat ungkapan-ungkapan tertentu yang khusus merujuk kepada sesuatu bidang tertentu, misalnya dalam mengingatkan pelbagai kemungkinan yang akan datang, membuat pilihan dan bertindak, berhutang, boros, meminjam dan memberi pinjam dan sebagainya.

Ingat-ingat yang di atas  
Kelak di bawah akan menimpa.

Merajuk kepada yang kasih  
Manja kepada yang sayang  
Meminta kepada yang ada  
Berkaul kepada yang keramat.

Hutang kajang belum langsai  
Hutang samir sudah tiba pula.

Ibarat kain tengah empat  
Elak ke atas bawah terbuka  
Elak ke bawah atas terbuka.

Sebahagian besar pengajaran dapat diraih melalui pengalaman. Hidup telah mengajar manusia supaya berwaspada, duduk sebelum berlunjur, bersikir sebelum berkata, melihat sebelum melompat,

supaya tidak menyesal di kemudian hari, atau "sudah terhantuk baru tengadah".

Sesal dahulu pendapatan  
Sesal kemudian tiada berguna.

Sekali jalan terkena  
Dua kali jalan tahu  
Tiga kali jalan mengena.

Lepas di tangan jangan diharap  
Orang pulang jangan dinanti  
Mulut manis jangan didengar.

*Gambaran persekitaran dan kepelbagaian hidup manusia*

Daripada keseluruhan ungkapan yang digolongkan sebagai peribahasa berirama – juga peribahasa seluruhnya – jelas memperlihatkan kepelbagaian cara hidup dan persekitaran masyarakat yang mencipta dan menggunakan peribahasa itu. Dengan kata-kata lain, terdapat pelbagai ungkapan peribahasa daripada pelbagai golongan manusia, status dan profesi. Daripada petani, suri rumah, guru, murid dan penganggur. Golongan-golongan seperti ini menyatakan sistem susun lapis masyarakat yang telah matang dan saling berinteraksi. Dan keadaan ini juga menjelaskan persekitaran manusianya: dari padang dan sawah, dari bukit dan gunung, dari laut dan pantai, dari pasar dan pekan, dari istana, balai, sekolah, masjid dan surau, bahkan dari ceruk dapur dan tepian jalan. Setiap ruang ada penghuninya dan setiap penghuni ada peranannya.

Setiap ungkapan peribahasa mengandungi sesuatu fungsi yang dapat dicari oleh seorang pencari, yang dapat ditafsir oleh seorang pentafsir. "Setinggi-tinggi terbang bangau, hinggapnya ke atas belakang kerbau juga", suatu ungkapan yang mengandungi pelbagai erti. Dari aspek latarnya memperlihatkan persekitaran masyarakat: dari kaum tani yang tinggal di pedalaman, di tepian sawah yang ber-kubang, dengan bangau dan kerbau, hubungan yang baik antara dua jenis haiwan yang berbeza sifat dan kebolehan serta suatu fakta terhadap resam alam yang teratur. Dari aspek dalamannya ia memperlihatkan sikap dan kepercayaan bahawa seorang perantau akan kembali juga akhirnya ke kampung halamannya. Dan daripada

## TEROMBA DAN PERIBAHASA BERANGKAP

keseluruhan erti memperlihatkan adanya satu institusi sosial tentang adat dan perlakuan merantau, mencari rezeki, bermiaga, menuntut ilmu, menebus malu dan seterusnya memperbaiki taraf hidup dengan mendapat apa yang dicari. Perhatikan contoh-contoh yang lain di bawah ini:

Lain ditaja lain dianyam  
Seiring berselisih jalan.

Kilat pisau ke tangan  
Kilat beliung ke kaki  
Kilat cermin ke muka.

Hadiah ada maniknya  
Ubi ada batasnya  
Budi ada balasnya:  
Hubaya-hubaya,

Takut tempua bersarang rendah  
Ada udang di balik batu.

Sambil menidurkan anak  
Lepas kelap mata  
Sambil menuapkan anak  
Lepas pedih hati.

Kerja raja dijunjung  
Kerja sendiri dikelek  
Titah raja:

Pancung tak bertanya  
Sabda tak berulang.

## BAB VIII

# MANTERA DAN DIKIR

## MANTERA

### **Erti dan Bentuk**

MANTERA sebagai suatu bentuk puisi pernah dianggap sebagai genre yang paling awal dalam kehidupan dan kebudayaan sesebuah masyarakat. Pada masyarakat Melayu terdapat bukti-bukti bahawa mantera adalah warisan daripada kehidupan primitif, dalam zaman purba atau prasejarah yang terus dikekalkan, ditambah, diperkembangkan dan diamalkan hingga ke hari ini.

Perkataan ‘mantera’ berasal daripada bahasa Sanskrit: *mantara*, *manir* atau *matar*; ertinya, mengikut John T. Platten (1960) ialah:

*That part of each Veda which comprises the hymns (as distinguished from Brahmanas, or theological portions); a passage of the Vedas, a holy text; a formula sacred to any particular deity; a mystical verse, a magical formula; an incantation, a charm, spell, philter; secret consultation, consorting together, spiritual instruction. (hlm 1071)*

Apabila digunakan dalam masyarakat Melayu, makna yang sama masih dikekalkan walaupun dalam bidang yang agak sempit; misalnya, menurut Marsden ialah “*incantation, charm, secret prayers*” (Marsden 1812b, 334) atau menurut *Kamus Dewan*: “kata-kata atau ayat yang apabila diucapkan dapat menimbulkan kuasa ghaib (untuk menyembuhkan penyakit dan lain-lain); erti yang sama

ialah jampi (Teuku Iskandar 1970, 704).

Mantera yang difahami dalam kajian ini ialah semua jenis pengucapan dalam bentuk puisi atau prosa, yang mengandungi tujuan dan konotasi magis, pengubatan dan perbomohan; dan istilah ini merangkum semua nama dan jenis pengucapan yang sama fungsi-nya, seperti yang disebutkan dalam pengertian-pengertian yang terdapat dalam kamus-kamus di atas; yang dalam bahasa Melayu disebut jampi, serapah, tawar, sembur, cuca, puja, seru, tangkal dan lain-lain. Tetapi, satu bentuk penegasan telah digunakan di sini; iaitu:

1. Mantera yang dikaji ialah yang berbentuk puisi.
2. Batas pengertian mantera di sini tidak merangkum apa yang dikenali sebagai doa (*prayers*).

Suatu hal yang perlu dalam memahami mantera Melayu ialah sekurang-kurangnya sedikit pengetahuan terhadap latar belakang puisi itu, dari segi kehadiran dan kesebatianya dengan kehidupan masyarakat Melayu dari dulu hingga kini. Dalam hal ini, selain daripada teromba, manteralah yang memaparkan jalinan yang amat erat antara kepercayaan, sejarah dan warisan kebudayaan, dengan tindak laku masyarakat sehari-hari. Dari sejak dulu hingga sekarang, mantera dan segala aspek yang berhubung dengannya masih lagi berperanan dalam sebahagian besar kegiatan hidup masyarakat, baik di Semenanjung mahupun di Nusantara sama ada di pedalaman ataupun di bandar. Satu daripada pelbagai faktor yang mendorong kelangsungan ini ialah kerana adanya persambungan pengalaman hidup masa kini masyarakat itu dengan pengalaman-pengalaman yang telah ditempuhnya di sepanjang perjalanan sejarah dan kebudayaan yang telah dialami.

Pelbagai pendapat telah diberikan oleh para pengkaji, ahli-ahli sejarah dan antropologi mengenai agama dan kepercayaan masyarakat Melayu dari zaman prasejarahnya. Misalnya, Moorhead (1957), Skeat (1900) dan Winstedt (1961), dalam karya masing-masing, menyebutkan tingkat-tingkat perubahan dan pengaruh yang mewarnakan fahaman dan kepercayaan masyarakat Melayu, dari animisme, Hinduisme, Buddhisme, Islam dan Barat atau moden. Secara umum ketiga-tiga mereka memberikan penekanan kepada

agama Hindu sebagai pengaruh yang amat penting dalam mewarnakan sahaman agama dan kepercayaan bangsa Melayu. Beberapa buah karya Winstedt dengan jelas membayangkan anggapan itu, misalnya *Shaman, Saiva and Sufi: A Study of the Evolution of Malay Magic* (1925) dan kemudian, *The Malay Magician: Being Shaman, Saiva and Sufi* (1961). Mengenai kesusasteraan dan kebudayaan Melayu, dalam *The Malays – A Cultural History* (1961), Winstedt mengatakan:

*For a thousand years the Malay was under the influence of Hinduised courts, that were centres of Buddhism, and Saivism, Hindu magical science, Hindu art and literature: During that time he borrowed two Indian script, the Pallavan from which Java as early as 8th century A.D. evolved its Kawi alphabet, and the nagari script brought in the 8th century by the Palas from Bengal. A guild of Tamil traders in the same century left scraps of their Buddhist story of Manimakalai in Sumatra folktales that have been re-told in the Malay Peninsula and written down in modern time.* (hlm 139)

Kesimpulan Winstedt mengenai perubahan dan pengaruh-pengaruh tersebut dapat difahamkan dalam petikan di bawah:

*A faculty that has always made for the Malay's progress has been his power to accept the new and adjust it to the old. So, from fear of local spirits and godlings he passed through of the Hindu pantheon to the worship of Allah, the One God. In prehistoric days, for example, he shared Asia's widespread belief in Spectre Huntsman, who Aryan came to identify with storm-god, Rudra, and Hindus with Siva. The Malays not only identified their Spectre Huntsman with Siva when they became Hindus, but on conversion to Islam they identified both the Spectre Huntsman and Siva with father of Islam's djinns. Obviously such syncretism avoided any serious break in tradition and satisfied racial and intellectual pride.* (hlm 1–2)

Bagaimanapun, daripada pandangan yang lain, pendapat-pendapat demikian dapat dikatakan agak berlebihan daripada keadaan yang sebenar. Dalam hal fahaman dan amalan magis dalam kalangan masyarakat Melayu, misalnya, setelah meneliti hampir 1000 untai mantera Melayu yang dikumpulkan dari zaman-zaman dan daerah-daerah yang berlainan di Semenanjung Malaysia, se-

olah-olah membuktikan bahawa mantera Melayu adalah peninggalan dari zaman animisme yang seharusnya merupakan rangka kepada kebudayaan Melayu yang kemudian disesuaikan dan disebatkan dengan pengajaran Islam. Islam adalah unsur yang memberikan warna kepada rangka yang telah ada, sementara warisan dari kebudayaan Hindu-Buddha mungkin diwakili oleh rentetan-rentetan kecil pada warna yang diberi oleh Islam.

Mungkin Za'ba mendefinisikan pendapat kita setakat ini dengan lebih jelas dan meyakinkan, melalui tulisannya, "The Malays and Religion" (1980). Menurutnya, sebelum Islam bangsa Melayu itu ialah *animist* iaitu kaum yang mempercayai semua benda yang tak bernyawa dan alam semula jadi mempunyai semacam "roh yang hidup" (*living soul*) atau *spirit*. Kepada orang-orang Melayu, *soul* atau *spirit* dikenali sebagai semangat, badi atau penunggu, bergantung kepada sifat-sifat dan ciri-cirinya yang tertentu. Selain daripada itu mereka tidak mempunyai agama mengikut pengertian yang difahami sekarang – satu sistem kepercayaan dan penyembahan yang *regular*.

Dalam masa yang terkemudian mereka telah menerima pengaruh Hinduisme. Mengikut para pengkaji, pengaruh Hindu ini berlaku dalam permulaan zaman Masihi dan hanya pada akhir abad yang ke-13 baru mereka menjadi pengikut Islam. Ini bererti mereka telah bertukar dari menganut animisme kepada Hindu dan Islam dalam tempoh meliputi kira-kira 1000 tahun. Dewasa ini kesan daripada kedua-dua fahaman itu – animisme dan Hinduisme – masih dapat dilihat dalam lapisan-lapisan kehidupan dan kepercayaan mereka yang dianggap sebagai agama mereka hari ini.

Bilakah masanya orang-orang Melayu itu mempunyai kesedaran agama dan pandangan yang sebenarnya *animist* mungkin telah berlaku sejak permulaan mereka muncul sebagai satu suku bangsa di kalangan bangsa di dunia. Ahli-ahli sejarah tidak dapat menentukan tarikh-tarikh tersebut, tetapi bukti-bukti yang menunjukkan animisme itu sebagai agama mereka yang paling awal; jelas dapat dilihat dalam pelbagai kepercayaan dan tahayul, terutamanya di kampung-kampung.

Bagaimanapun, mengenai kesan pengaruh Hinduisme, Za'ba (1980) berpendapat:

*The doctrines and ideas of the Hindu religion did not appear to take root among the Malays of the peninsula. Our forefathers here were not affected by the Hinduism to such extent as were the Javanese and the Balinese – a fact probably due to the meagre and floating nature of the population here in those days. There are no Hindu remains of any importance to be found in Malaya. The only relics of the Hindu days that have found a permanent place among the Malays of Malaya are a few hundred words having to do with royalty, religion and learning; certain customs ceremonies in connection with marriage, the names of certain Hindu gods and goddesses invoked in Malay charms, and lastly a large portion of the subject-matter in our literature, which however, for the most part came to us through Java... we have no Borobudur, no survivals of ideas and beliefs that are traceable to Hinduism. (hlm 105)*

Berdasarkan pendapat Za'ba itu dan bukti-bukti yang dapat dilihat setakat ini, pendekatan terhadap mantera dalam kajian ini akan ditumpukan kepada keperibadian Melayu yang lebih asal dan lebih penting iaitu animisme dan Islam. Kerana itu – dan memang sewajarnya demikian – perbandingan dan interpretasi dari kaca mata Hindu dan Buddha tidak akan dilakukan, kerana didapati tidak penting dan tidak berkaitan. Selain daripada itu perlu juga ditekankan bahawa minat dan penumpuan kajian ini ialah kepada aspek-aspek sastera khususnya puisi mantera itu; dan ini membolehkan kajian ini mengelak daripada membicarakan persoalan konsep dan interpretasi magis yang berhubung dengannya. Aspek-aspek itu, selain daripada menyimpang daripada kajian ini, telah juga banyak dilakukan oleh para pengkaji yang khususnya terdidik dalam disiplin yang berkenaan.

Bagaimanapun, dalam rangka menganalisis dan menginterpretasi mantera itu ada beberapa ciri yang dasar yang harus dijelaskan:

1. Bahawa keseluruhan mantera Melayu adalah dalam bentuk puisi; atau sekurang-kurangnya mengandungi unsur-unsur puisi; dan puisi ini agak unik bentuk dan isinya daripada yang lain.
2. Isi dan konsep yang dikandungi dan dipancarkan oleh sesebuah mantera menunjukkan hubungan yang amat erat dengan sistem kepercayaan masyarakat, khususnya dalam zaman dan konteks

di mana mantera itu dicipta dan diamalkan secara total oleh masyarakat yang berkenaan.

3. Sesebuah mantera yang dicipta, diabadikan dalam satu perlakuan yang tertentu dan untuk fungsi yang tertentu.
4. Pengabadian sesebuah mantera dalam perlakuan yang berkenaan hanya dilakukan oleh seseorang (pawang atau bomoh) yang telah memperolehi tauliah untuk menjalankan perlakuan tersebut.
5. Kepercayaan, konsep, teks atau tubuh puisinya, amalan dan perlakuannya dipraktikkan oleh orang yang mengamalkannya, baik untuk tujuan perseorangan, maupun untuk masyarakat; sama ada untuk tujuan yang baik atau mungkin dengan tujuan yang jahat.

Sebagai ilustrasi kepada keadaan di atas, perhatikan mantera di bawah ini:

Assalamualaikum, hai berna kuning  
Aku tahu akan asalmu  
Mu tumbuh di bukit Gunung Siguntang Mahameru  
Berdaun perak, berbatang suasa, berbuah emas  
Aku nak mintak jadi anak panah Seri Rama  
Anak panah Rajuna, wong Inu Kertapati  
Aku nak mintak mu jadi anak tebuan tunggal ekor  
Mulah menghambat segala jin, setan dan iblis  
Mambang peri Sang Raya dan kampung Sang Raya  
Bayang-bayang dewa di tali angin  
Mu kerja seperti anak panah dewa Sang Raya yang  
tunggal  
Menghambat segala iblis setan  
Mu dengar pesanan umat aku  
Disumpah malaikat menjadi raja  
Memerintah alam empat yang empunya pada  
hari ini ketika ini  
Insya-Allah dengan kuasa Allah  
Muhammad Rasulullah.

(Ihsan Pak Da Mat Zain, Kota Bharu 1977)

Mantera di atas digunakan dalam upacara ‘berbagih’ satu cara pengubatan penyakit-penyakit ganjil, yang masih terdapat di Kelantan dan Terengganu. Satu daripada objek-objek yang digunakan ialah beras kunyit (beras putih yang dikuningkan warnanya dengan air kunyit), digunakan untuk dihambur ke tubuh si sakit dan ke sekitar ruang dalam rumah, dengan tujuan menghalau semangat-semangat yang merbahaya. Beras dan padi dipercayai mempunyai semangat dan semangat ini harus dipuja untuk memberikan kekuatan yang dipinta (Harun Mat Piah 1981, 15–17).

Dari segi genre dan bentuk, mantera tersebut adalah daripada puisi bebas, dengan pengertian ia tidak terikat kepada sesuatu sistem yang tertentu tidak terbahagi kepada rangkap, dengan jumlah baris dalam serangkap atau jumlah perkataan dalam sebaris; dan tidak memakai rima. Unsur puisinya yang jelas ialah dengan adanya perulangan-perulangan sejarar, rentak dan irama, di samping pemilihan-pemilihan kata dan imajan yang sesuai dalam membina genre yang dimaksudkan, iaitu mantera.

Pemilihan dan urutan-urutan perkataan yang membentuk puisi tersebut dengan jelas mencerminkan sistem kepercayaan masyarakat yang menciptanya. Secara diakronisnya, sistem tersebut telah begitu lama wujudnya dalam masyarakat Melayu, iaitu sejak zaman animisme, yang mempercayai semua kejadian mempunyai semangat atau jiwa yang hidup. Semangat padi yang disebut di sini dihubungkaitkan dengan mitos yang lebih menyeluruh sifatnya, seperti yang terdapat dalam *Sejarah Melayu*. Wan Empuk dan Wan Malini yang berhuma di atas Bukit Siguntang telah didatangi oleh putera-putera Raja Suran (nasab daripada Raja Iskandar Zulkarnain) yang akhirnya memancarkan keturunan raja-raja Melayu. Dengan kedatangan putera-putera itu, Wan Empuk dan Wan Malini mendapati “padinya berbuahkan emas dan berdaunkan perak dan batangnya tembaga suasa” (Shellabear 1975, 20–22).

Kepada semangat padi yang ‘berusul berasal’ ini, si bomoh meminta menjadikannya anak panah wira yang merupakan *national hero* yang terdiri daripada Seri Rama, Rajuna dan ‘wong’ Inu Kertapati. Seri Rama di sini ialah watak wira dalam cerita-cerita Seri Rama Melayu dan berlainan sama sekali dengan Ramayana oleh Valmiki. Demikian watak Rajuna dalam mantera ini bukanlah Arjuna yang dikenali dalam epik-epik Ramayana dan Mahabharata

India, tetapi adalah salah seorang dewa di kayangan, yang selalunya diinkarnasikan kepada watak Raden Inu Kartapati, wira cerita-cerita Panji Melayu dan Jawa. Demikian Inu Kartapati dikenali oleh orang-orang Melayu melalui berpuluhan-puluhan versi cerita-cerita Panji Melayu, baik berupa wayang kulit dan cerita-cerita lisan bahkan cerita-cerita hikayat yang begitu luas penyebarannya dalam kesusteraan dan masyarakat Melayu (Harun Mat Piah 1980a, 25–29). Watak Sang Raya juga tidak semestinya Dewata Mulia Raya atau Sang Hyang Tunggal yang selalunya dihubungkan dengan Visnu dan Siva dalam sistem ketuhanan Hindu.

Ringkasnya, setelah diasingkan watak-watak di atas, didapati selebihnya tidak lain daripada nama-nama yang dikenal dalam sistem kepercayaan Islam; iblis, syaitan, malaikat, Nabi Muhammad S.A.W. dan Allah S.W.T. Keadaan yang sama dapat dilihat dalam kebanyakan mantera, misalnya dalam mantera 'pengasih' di bawah ini:

Hei om pali  
 Hei hantu tanah  
 Jembalang bumi  
 Kaupergi mengambil semangat roh si anu  
 Bawa gila kepada aku  
 Menyala seperti api  
 Seperti nasi mendidih.

Jika engkau tidak membawanya gila kepada aku  
 Seperti api yang menyala, nasi yang mendidih  
 Kusumpah engkau  
 Derhaka engkau kepada Allah  
 Bukan dengan kuasa aku  
 Dengan kuasa Allah.

(Awang bin Mat, Perlis 1978)

Dalam mantera di atas tidak terlihat kesan yang nyata sebagai pengaruh Hinduisme, selain daripada seruan 'Om' dan 'pali' yang sesungguhnya dibawa melalui bahasa Thai. Nama-nama lainnya, hantu tanah dan jembalang bumi adalah warisan animisme, sementara roh dan Allah dari Islam. Imajan "menyala seperti api, seperti nasi yang mendidih" merupakan perbandingan daripada pengalam-

an sehari-hari yang tidak memerlukan peniruan daripada mana-mana kebudayaan.

Kesimpulan daripada perbincangan di atas, di samping menginterpretasi mantera dari segi fahaman dan kepercayaan masyarakat, menjelaskan juga betapa sedikitnya mantera-mantera Melayu yang mempunyai hubungan yang langsung dengan ajaran Hindu. Daripada seribu contoh yang telah diperiksa, didapati tidak lebih daripada 30 peratus (30%) yang serba sedikit menunjukkan hubungan itu. Bahan itu pun kebanyakannya daripada kumpulan-kumpulan yang telah ada sebelum dan sehingga tahun 1900.

Sebagaimana kebanyakan puisi Melayu lama yang lain, puisi mantera juga berhubungan erat dengan fungsinya; bahkan dapat dikatakan sesuatu puisi mantera itu adalah hasil daripada suatu perlakuan yang khusus untuk suatu tujuan. Contoh yang pertama di atas tadi ialah mantera yang digunakan untuk memuja semangat beras kunyit yang digunakan dalam upacara berbagih. Upacara berbagih itu pula merupakan perlakuan yang kompleks yang mempunyai aturan dan cara yang mesti diikuti dengan betul. Mantera kedua, 'jampi pengasih', walaupun merupakan pakaian diri untuk tujuan individu, mempunyai juga peraturan dan amalan yang mesti dilakukan oleh pemakainya.

Suatu hal yang harus disentuh mengenai perlakuan mantera dan magis ini ialah kewibawaan seorang bomoh dalam mengamal, menggunakan atau menurunkan sesuatu 'ilmu'. Seorang bomoh bagih, misalnya, merupakan seorang pakar dalam bidang itu, mengetahui pelbagai unsur yang mendatangkan penyakit, pelbagai jenis penyakit yang disebabkan oleh pelbagai unsur, pengetahuan asal usul unsur-unsur yang berkenaan dan cara-cara serta amalan untuk mengalahkan unsur-unsur tersebut. Dia juga hendaklah mempunyai keperibadian dan semangat yang kuat untuk menentang unsur-unsur yang menyebabkan penyakit. Untuk memperolehi kebolehan-kebolehan itu dia mestilah 'menuntut', iaitu belajar bersungguh-sungguh, mengelakkan segala pantang larang dan melakukan amalan mengikut kehendak sesuatu ilmu yang dituntutnya.

Menurut informan-informan yang telah ditemui, yang kebanyakannya merupakan bomoh-bomoh yang bertauliah ini, ada tiga cara untuk memperolehi ilmu dan tauliah, iaitu:

1. Dengan menuntut melalui guru-guru dan bomoh-bomoh yang handal.
2. Melalui keturunan atau pusaka, iaitu apabila bapa, ibu, datuk atau nenek menuarkan ilmunya kepada keturunan di bawahnya. Penurunan dan penerimaan pusaka ini tidak semestinya dengan menuntut, seperti dalam 1 di atas.
3. Melalui penjelmaan atau resapan; iaitu apabila seorang yang bukan bomoh, tidak daripada keturunan bomoh, menerima penjelmaan atau resapan daripada sesuatu sumber, roh, wali, syekh atau bomoh yang lebih handal, yang telah mati atau hanya wujud dalam kepercayaan sahaja.

Seorang bomoh yang handal mungkin telah menerima ilmunya melalui ketiga-tiga proses itu: dirinya sendiri berketurunan bomoh, kemudian dia memperbanyak ilmunya dengan menuntut daripada bomoh yang lebih tua dan lebih berpengalaman; dan seterusnya menerima resapan daripada roh, semangat, jin atau wali Allah. Bomoh yang demikian biasanya tergolong sebagai profesional, menjadi pawang istana atau diraja dan sebagainya. Ia berkebolehan menjalankan semua istiadat istana, dari bernobat (naik takhta), berkerajaan (memuja jin dan semangat) dan sanggup mengubat hampir semua jenis penyakit, baik jasmani maupun rohani.

Tidak kurang juga penting dan popularnya, pawang keturunan atau pusaka; iaitu yang menerima kepandaian dan tauliah berbomoh daripada orang tuanya, bapa, datuk, ibu atau nenek. Biasanya pusaka itu diturunkan kepada anak yang tua; daripada bapa atau datuk kepada anak atau cucu laki-laki dan daripada ibu atau nenek kepada anak atau cucu perempuan. Mungkin yang menerima pusaka tidak pun menuntut atau berhasrat untuk menerimanya; tetapi oleh kerana pusaka itu merupakan sesuatu yang harus dipelihara (biasanya daripada jenis hantu, hantu raya, bajang atau pelesit), ia harus diturunkan kepada pemelihara yang terdekat supaya ia tidak akan merayau dan mengganggu ketenteraman orang lain.

Perolehan ilmu dengan menuntut juga memberikan kedudukan yang berlainan. Tuntutan yang sederhana, dengan perolehan yang sederhana biasanya untuk keperluan sendiri dan kaum keluarga,

terutamanya daripada jenis mantera pakaian diri, seperti pengasih, pemanis, pelindung, pelaris dan lain-lain. Penuntutan yang lebih luas dan serius memperluas bidang dan kebolehan seorang bomoh; demikian bomoh bagih, puteri, saba dan lain-lain, sanggup pula menjalankan tugas yang lebih besar, meliputi tugas dan kebolehan bomoh-bomoh profesional.

Walau apa pun juga kedudukan dan kebolehan mereka, bomoh-bomoh inilah sebenarnya pencipta, pemilik dan penyebar mantera-mantera tersebut. Daripada kelainan tempat, kebolehan dan bidang tugas yang mereka lakukan, menghasilkan pelbagai kelainan dari segi bentuk, pemilihan kata dan mutu puisi manteranya secara keseluruhan. Dan kebanyakannya pula merupakan ungkapan-ungkapan puitis yang indah, tepat dan mantap, dengan pemilihan kata dan imajan yang menunjukkan daya cipta yang mengagumkan. Dan minat kita di sini ialah pada keindahan puisi ini, isi dan fungsinya dalam masyarakat yang melahirkannya.

### **Analisis Bentuk dan Struktur**

Dalam meneliti bentuk dan struktur sebuah mantera, ada dua aspek yang dapat dilihat sebagai titik tolak perbincangan:

1. Aspek luaran, iaitu bentuk yang dapat dilihat secara keseluruhan.
2. Aspek dalaman, iaitu struktur yang membina sesebuah mantera.

#### *Bentuk luaran*

Pada dasarnya, bentuk sebuah mantera dapat dikatakan sama dengan puisi bebas yang lain, khususnya talibun atau sesomba, prosa berirama dan teromba. Mantera, bahkan mungkin lebih bebas bentuknya hingga hampir tidak terikat sama sekali; dan dengan keadaan demikian sesebuah mantera dapat memenuhi maksudnya tanpa dibatasi oleh ukuran-ukuran tertentu, baik dari segi jumlah perkataan, baris dan rangkap, maupun dari segi rima, rentak dan irama. Bagaimanapun, sebagai sebuah puisi – seperti puisi yang lain juga – mantera semestinya mempunyai bentuknya yang tersendiri. Tanpa bentuk ini, sesebuah ungkapan atau rentetan kalimat, tidak akan tergolong ke dalam genre puisi.

Pada umumnya, bentuk-bentuk mantera Melayu merupakan keragaman dan kepelbagaiannya yang menunjukkan kebebasannya. Suatu untai mantera mungkin terdiri daripada dua baris, atau mungkin memenuhi sebuah buku setebal 50 halaman. Dan dalam penyampaiannya mungkin dalam satu nafas hingga keseluruhan malam, dari selepas waktu isyak hingga menjelang subuh. Misalnya dalam pengubatan cara berbagih atau main puteri, perjalanan upacara mungkin mengambil masa hingga beberapa malam. Dari segi gubahannya punsinya juga, mantera mungkin terbina oleh bentuknya yang dasar, atau mengandungi pelbagai bentuk, pantun, talibun dan prosa berirama, bahkan dialog-dialog yang dramatis, sesuai dengan fungsi dan konteks di mana ia digunakan. Di bawah ini diberikan beberapa contoh:

1. Yang pendek: dari dua hingga lima baris:

a. Pengeras badan:

Ya man, ya ras, ya malik  
Ya kuserahkan kepada kamu.

(Awang bin Ahmad, Bachok, Kelantan)

b. Melumpuhkan lawan:

Bismi  
Bukmu mawa umur.

(Awang bin Long, Pasir Putih, Kelantan)

c. Untuk menang dalam pergaduhan:

Allah kata salah  
Muhammad kata silih  
Jibrail kata fana.

(Wan Ali bin Wan Md. Nor, Alor Setar, Kedah)

d. Sahabat empat:

Hei, Saidina Ali di hadapan aku  
Hei, Saidina Umar di kanan aku  
Hei, Saidina Othman di belakang aku  
Hei, Saidina Abu Bakar di kiri aku.

(Wan Ali bin Wan Md. Nor)

- e. Menilik jenis penyakit:

Asal kutum akar raja selum  
Batang raja berdiri  
Daun raja ngepa  
Buah raja mengunduk  
Kutum cari sekun, rasi jadi temuan.

(Mamat bin Awang, Pasir Putih, Kelantan)

2. Kombinasi dengan bentuk yang lain:

Pemanis:

Kain peta lima manis  
Mari kulipat di dalam dalam  
Bagai kain pakai manis  
Seperti asam dengan garam.

(Habsah bt Mat, Perlis 1978)

- a. Menjerat burung:

Pelaung buluh pelaung  
Pelaung buluh merpati hutan  
Tujuh bukit tujuh lurah  
Tujuh permatang tujuh pelaung  
Akan pelaung anak burung merpati hutan  
Mengampangkan ke laman Nabi Allah Sulaiman.

Arak-arak iring-iring  
Kembang bunga si panggil-panggil  
Datang berarak turun beriring  
Nabi Sulaiman datang memanggil.  
Memanggil anak burung merpati hutan  
Ke laman Nabi Allah Sulaiman.

Indang-indang melukut  
Aku indang disumpit purun  
Aku kundang aku jemput  
Aku jemput aku bawa turun  
Turun ke laman Nabi Allah Sulaiman.

Tak turun makan menturun  
Tak datang makan binatang  
Mati mampik mati mawai  
Mati sengkelan bulu

Mati telah tulang  
Hinggap di akar dililit akar  
Hinggap di daun dipatuk ular daun  
Segeralah engkau turun  
Ke Kandang Nabi Allah Sulaiman.

(Skeat 1967, 597)

3. Yang panjang, seperti talibun atau prosa berirama:

a. Penjauh harimau:

Hei Besenu Hei Berkaih  
Aku tahu asal kau jadi  
Syekh Abuniah Lahah Abu Kasap  
Pusatmu pucuk ubun-ubun  
Susu kau di tapak tangan  
Simpangkan tujuh petala langit  
Simpangkan tujuh petala bumi  
Kalau tak simpang  
Derhaka kau kepada Allah.

(Skeat 1967, 603)

b. Terkena kelintasan:

Bismillahir-rahmannir-rahim  
Hei Semar se-Alam Tunggal  
Mulah sungguh Semar se-Alam Tunggal  
Semar Jin Hitam, Jin Tejeli, Jin Tejerah  
Empat tapan alam dunia  
Naik ke langit jadi asap  
Turun ke bumi jadikan wap  
Hei Semar Berkat aku memakai akan wujudmu  
Yu pitu, yu pitak  
Oh Akulah meraba-raba di hadapan pintu  
kayangan

(Abd. Rahman Abdullah, Kota Bharu 1976)

Daripada contoh-contoh di atas dapat dilihat pelbagai variasi dalam pembentukan baris-baris mantera; panjang atau pendek, bebas atau terikat, mempunyai satu bentuk seluruhnya atau sebagai bentuk yang membina satu kesatuan. Ada semacam ukuran yang membantu pemilihan bentuk ini. Mantera-mantera yang pendek,

dari dua atau tiga baris biasanya tergolong dalam jenis 'pakaian diri', seperti penguat gigi, penahan kulit dan tulang, mantera ketika akan melangkah atau ketika berhadapan dengan sesuatu yang berbahaya, misalnya:

Teguh gigi  
Tuk asa tuk asi  
Patah tangga ikat besi  
Teguh tegak semua gigi.  
Nganga ngingai  
Teguh tegah engkau gigi  
Sama-sama kita pergi.

(Abd. Hamir Hj Abd. Halim, Batu Pahat)

Bentuk pantun, sama ada seluruhnya atau bersama dengan bentuk bebas yang lain, lebih umum dalam mantera-mantera yang merupakan pujaan kepada unsur yang dimaksudkan, misalnya kepada semangat bahagian-bahagian anggota dalam ilmu pemanis dan semangat orang yang dipuja dalam ilmu pengasih. Demikian juga bagi semangat yang halus dan lembut, misalnya semangat padi, semangat burung, bahkan mungkin sebahagian daripada hantu-hantu tertentu, seperti pelesit dan bajang. Mantera menjerat burung di atas tadi jelas memperlihatkan kelembutan kata-katanya di samping kekuatan mistik yang dapat dirasakan daripada keseluruhan mantera itu. Perhatikan beberapa contoh di bawah yang membawakan nada dan maksud yang sama:

Bedak pemanis:  
Bedak olak olek  
Mari pakai hujung gunting  
Kupakai bedak di luar kulit  
Mesra dalam daging.  
Dengan berkat doa  
Lailahaillallah, Muhammad Rasulullah.

Seri muka:  
Sirih senggang kuning  
Naik belukar muda  
Mukaaku bagai anak mambang kuning  
Berkataku memakai doa setandang muda.

Matahari tidak berseri  
Seri naik ke tubuhku  
Bulan tidak bercahaya  
Cahaya naik ke mukaku  
Cahaya Allah cahaya Muhammad  
Cahaya baginda Rasulullah.

(Baba bin Mahat, Melaka 1979)

Pengasih

Sungai Nipah Sungai Gemuruh  
Tiga dengan Sungai Ati-ati  
Bagai dikipas engkau tubuh  
Bagai dilambai engkau hati.

Kalau engkau tak makan susu ibu  
Tak kena buatan aku  
Kalau engkau makan  
Engkau terkena buatan aku.

(Jiwa bt Hj Omar, Johor 1977)

Bentuk yang lebih panjang dan lebih bebas, biasanya terdapat dalam mantera-mantera yang digunakan bagi tujuan upacara dan pengubatan penyakit, misalnya upacara bersemah, puja kampung, puja pantai, buka panggung dan bertabik; atau dalam pengubatan, seperti berhantu, berjin, berbagih, saba, kebiah, belian dan main puteri. Untuk jenis-jenis ini mantera tidak saja dibaca sebagai jampi atau doa, tetapi disampaikan sebagai persembahan drama, bersama dialog, nyanyian dan tarian. Sebahagian daripada mantera dalam berbagih diberikan di bawah sebagai contoh:

Dewa Agung Sang Serahmeka Petala Guru  
Mintak guru turunkan alam dunia tanah api  
Menurun padang-padang  
Turun mengasuh keselian angkatan juak  
Anak raja balai atas sifat umat Ali  
Sule pada la ni, pada ketika ini  
Jangan siapa meninggalkan keruap  
Dua jangan meninggalkan jisi  
Mintak sapak sekali dengan wong-kuwong  
Cendil badi, seka pentarakni segala pitam  
Jangan dibawa wap penat

Jangan dibawa mabuk ringan  
Jangan dibawa lenguh lumpuh, kuku kaat,  
seban-rotan  
Dengar seorang dengarkan semua  
Dengarkan jisi seratus lapan, seribu makna.

(Tuan Abdullah Tuan Muda, Kelantan 1978)

### Bentuk Dalaman

Bentuk dalaman merupakan struktur yang membina sesebuah mantera. Selain daripada mantera-mantera yang pendek, yang merupakan tangkal atau amalan hari-hari, kebanyakan mantera dapat dikatakan mempunyai binaan yang sempurna, yang dapat dibahagikan secara kasar kepada permulaan, isi dan penutup. Dalam pada itu, setiap peringkat tersebut dapat pula diperinci mengikut sifat-sifat yang umum dalam kebanyakan mantera. Tinjauan di bawah ini dibuat berdasarkan binaan yang sempurna daripada sebuah mantera:

- a. Permulaan: mengandungi penghormatan kepada Tuhan, malai-kat, nabi-nabi dan wali Allah. Umumnya mantera demikian dimulai dengan:

Bismillahir-rahmanir-rahim

dan bagi yang lebih panjang diikuti dengan membaca:

Al-Fatihah hingga akhir, sekali atau berulang.  
Ayat al-Kursi hingga akhir, sekali atau berulang  
Qulhuallah hu ahad hingga akhir.  
Qula'uzubirrabi falaq hingga akhir  
Qula'uzubirabbit Nas hingga akhir  
Subhanallah, beberapa kali (biasanya tujuh kali)  
Alhamdulillah, beberapa kali (biasanya tujuh kali)  
Allahu akbar, beberapa kali (biasanya sembilan kali)

kemudian:

Bismillahir-rahmanir-rahim  
Ya Allah, Ya Rahman, Ya Rahim

Ya Ilahi, Ya Tuhan  
Ya Rasul, Ya Rasulullah yang dikasihi.

- b. Bertabik, hormat pada guru: seruan dan penghormatan yang ditujukan kepada unsur-unsur yang berkenaan, para nabi, syekh dan wali Allah, watak-watak tertentu seperti bomoh dan guru yang berkenaan, seterusnya jin, jembalang dan sebagainya.

Wahai semua penunggu-penunggu tempat ini  
Wahai sekalian syekh-syekh yang ada  
Wahai sekalian wali yang tinggal  
Wahai sekalian nabi-nabi  
Wahai sekalian pesuruh-pesuruh  
Wahai sekalian jin-jin yang ada di sini.

dan kemudian:

Hai, Tuk Mambang Putih, Tuk Mambang Hitam  
Yang diam di bulan dan matahari  
Melimpahkan sekalian alam asalnya pawang  
Menyampaikan sekalian hajat.  
Hai, sahabatku Mambang Tali Harus  
Yang berulang ke pusat Tasik Pauh Janggi  
Sampaikan pesan aku  
Kepada Datu Si Rimpun Alam.  
Hai, sekalian sahabatku yang di laut  
Sidang Murnin, Sidang Embang, Sidang Biku,

Mambang Segara, Mambang Singgasana,  
Mambang Dewata, Mambang Laksana,  
Mambang Sinar Mata  
.... dan seterusnya.

- c. Pernyataan atau pendakwaan diri: 'beryang-yang', menyerukan keturunan, tauliah, warisan dan guru-guru yang istimewa dan sebagainya:

Hong Si Kumari Hong  
Aku anak harimau jantan  
Halilintar membelah akan tempekkku  
Kilat memancar akan senjataku  
Aku memakai putaran bumi.

atau

Hong anak lampung  
Lalu tegak di pintu raya besar  
Tinju rejang aku lalu, ah lalu  
Pancungku pancung Ali  
Pancungku seperti kumbang  
Hinggap di air lagi kering  
Hinggap di batu lagi belah  
Hinggap di gunung lagi runtuh  
Hinggap di langit lagi tembus  
Hinggap di bumi lagi limbang  
Konon nyawa musuh seteru lawanku  
Hancur lalu seperti timah dalam perandangan  
Seperti embun di hujung rumput.

dan, mungkin:

Guru aku tujuh nan lima  
'pat sebelas, tiga serupa, dua sebaya  
Satu putih, penawar  
Batu putih medan sela  
Guru bernama Datu Quran  
Dua, guru bernama Sidi Akmal Hakim  
Tiga, guru bernama Apla  
'pat, guru bernama baginda Nurcahaya  
Lima, Datu Ruhul Amal  
Guru bertapa di langit Selon  
Di bawah Nur Turkup harapan mula  
Di bawah payung kuning, keduduk putih,  
remega satu.

- d. Seru, iaitu menyeru unsur-unsur yang berkenaan, dengan menyebutkan asal usulnya, mungkin dalam bentuk deskriptif atau dialog misalnya ditujukan kepada angin Dewa Muda dalam Jampi Nisbah Angin di bawah ini:

Dengar angin empat nasib, angin empat nasub  
Asal angin keluar dari pintu Laila Majnun  
Lalu ditanam oleh malaikat empat  
Lalu dipecah empat  
Angin nak jadi anak dewa tujuh  
Asal dewa tujuh, dewa hikayat, dewa empat  
dewa pusaka.

Zaman asal dulu, hamba nak khabar beri cerita  
Jikalau jatuh pada angin anak dewa tujuh  
Asal dewa fana, dewa fani  
Dewa sayu, dewa belas, dewa cita, dewa rasa  
Adik bernama Dewa Kecik, Dewa Muda  
Ayah bernama Tuk Raja Jawa  
Bonda bernama Tuan Puteri Selindung Bulan  
Di dalam negeri bergelar Seluruh Lidah  
Pancung meleleh dari Tanah Jawa.

- c. Suruh, tegah atau pernyataan maksud, dengan menyatakan tujuan mantera atau upacara, serta tugas-tugas yang diminta dari unsur yang berkenaan:

Kalau ada berkenan fikir  
Kasihan belas pada tabib  
Tabib nak mintak tuan hamba berundur mara  
Menyapu sekalian wap jebat hipuh pelana  
Di rumah sederang, kulit sebidang  
Bersama-sama darah sebijji, daging seketul  
Urat seribu, tulang seratus.  
Kalau demam nak minta kebah  
Kalau tajam nak mintak tumpul  
Kalau bisa nak mintak tawar  
Kalau letih nak mintak gagah  
Kalau tak rak nak mintak segar  
Berat ringan, tidur jenera  
Makan kenyang, mandi basah  
Murah rezeki, lanjutkan umur  
Tidur siang jangan bawa masuk mimpi  
Tidur malam jangan bawa masuk ngigau  
Angkat lapang, gemuk temu, gagah kuasa  
Biar tepat mapat  
Pulau pulih sediakala.

- f. Sumpah, iaitu dengan tujuan menekankan maksud yang diminta, lalu mengingatkan unsur yang berkenaan supaya jangan mengabaikan permintaan Tuk Pawang:

Marilah naik lancang ini berkampung ramai-ramai  
Boleh dibawa air hilir

Dibawa angin lalu  
Dibawa tanah merekah  
Pergilah engkau ke laut tak berombak  
Padang tak berumput  
Janganlah engkau berbalik-balik ke mari  
Jikalau engkau berbalik ke mari  
Engkau dimakan sumpah  
Ke laut tak dapat minum  
Ke darat tak dapat makan  
Menangkap melintang bumi.

- g. Penutup: kembali kepada Allah dan Rasul, dengan tujuan memperkuatkan kewibawaan tuk bomoh yang direstui Allah dan Muhammad; atau menyerahkan kepada takdir dan kekuasaan Tuhan selepas menjalankan segala ikhtiar yang terdaya:

Sidi guru, sidilah aku  
Dengan berkat kata  
Lailahaillallah,  
Muhammad Rasulullah.

Pembahagian dengan contoh-contoh di atas merupakan rekonstruksi daripada pelbagai mantera dengan fungsi dan konteks yang berlainan. Kerana itu lebih panjang dan terperinci dan kebanyakannya yang biasanya singkat dan mudah. Bagaimanapun dalam sesbuah mantera yang lengkap masih dapat dilihat tiga bahagian yang penting itu, iaitu pendahuluan, tubuh atau isi dan penutup. Mantera 'menghalau badi' di bawah ini mengandungi ketiga-tiga bahagian itu:

Bismillahir-rahmanir-rahim  
Hong badi, mak badi  
Badi seratus sembilan puluh tiga  
Bukan aku yang berbadi  
Sekalian bernyawa yang berbadi  
Aku tahu asal kau jadi:  
Uri tembuni pusat tetuban asal kau jadi  
Turun kau dari urat sendi darah daging  
Si anu (.....)  
Kalau kau tiada turun  
Aku sumpah dengan kata  
Lailahaillallah.

Suatu aspek yang tidak kurang pentingnya dalam meneliti dan menganalisis sesebuah mantera ialah pada pemilihan dan pembentukan kata yang membina sebuah mantera. Setiap kata yang dipilih dan diungkap dalam urutan-urutan kalimatnya mempunyai hubungan yang erat, bahkan hasil daripada keseluruhan sistem kepercayaan yang meliputi bidang yang lebih lengkap dan kompleks. Hampir seluruhnya terbina daripada frasa-frasa yang pendek, padat (*compressed*) dan tepat dengan fahaman dan maksud yang dikehendaki. Agak terlalu sukar menghuraikan kembali ungkapan-ungkapan itu, terutama bagi orang yang tidak terdidik dalam sistem kepercayaan ini; dan kesukaran itu dirasai oleh bomoh-bomoh; bahkan bomoh yang mengamalkan atau yang menyampaikan mantera itu sendiri. Kebanyakannya akan mengatakan sesebuah mantera diturunkan dari generasi yang telah lepas dalam bentuknya yang demikian. Tidak ada keterangan yang tepat mengenainya, pencipta atau penggubahnya, serta kata-kata di dalamnya. Para bomoh umumnya mengenalinya sebagai 'bahasa perbomohan'; dan mungkin mencuba memberikan interpretasinya sendiri. Dalam percubaan ini seseorang bomoh akan dipengaruhi oleh pengetahuannya yang umumnya di luar daripada bidang kemantaraan, magis dan perubatan. Sebagai contoh dalam waktu yang akhir-akhir ini ada percubaan menginterpretasi mantera daripada pandangan Islam, khususnya fahaman tauhid atau tasawuf. Encik Mohd. Nor bin Nonik, seorang bomoh puteri yang terkenal, di Jerteh, Terengganu, memberikan huraian demikian terhadap beberapa baris mantera dalam pengubatan main puteri yang dijalankannya sendiri dengan berperanan sebagai bomoh atau Tuk Teri. Dipetik di bawah ini sebahagian manteranya bersama tafsiran yang diberikannya:

Tuk Teri dalam keadaan lupa, ditanya oleh Tuk Minduk (pemain rebab):  
"Siapa tubuh bernama badan bergelar?"

Tuk Teri: "Sebenar, ayah. Ayah bertanyakan khabar  
Siapatah lagi membawa angin hayat, angin ayun  
Wujud, kidam, samak, basar, kalam  
Hamba berdiri di pintu, di wadi manikam  
Hamba membuka pintu air iktikad  
Citarasa pintu hawa nafsu  
Wujud ilmu nasru ayah."

Maksudnya:

Sesungguhnya tiada siapa lagi yang harus mengenali dan memahami kewujudan Tuhan. Hambalah, yang berdiri dari penjelmaan empat unsur yang menjadikan. Unsur yang menjadi punca gerak dan perasaan, mempunyai nafsu pada kewujudan ilmu yang menyeru.

Tuk Teri: "Hamba berdiri dengan dua hayat

Satu hayat hamba meretikan kalam  
Membuka pintu sir usulan nafsu  
Dua hayat hamba meretikan kalam  
Membuka pintu sir Sulaiman  
Lalu hamba mengangkat kudrat, iradat, memutus  
sekalian tauhid makrifat.  
Hamba menurut resam dunia."

Maksudnya:

Hamba berdiri pada dua penjelmaan, satu yang menjolakkan nafsu dan kedua yang menjolakkan iman. Maka berkuasalah hamba menjalani hidup dengan menghaluskan pegangan terhadap keesaan Tuhan. Inilah kuasa dari kemurahan kurniaan Tuhan. Dan menurutlah hamba akan resam dunia.

Tuk Teri: "Tubuh hamba sebenar, ayah  
Sultan Johar Lela Muda Setali Arus Sejuang Akar."

Maksudnya:

Inilah nama yang membawakan fiil. Ia bukannya kuasa dari luar, tetapi sebenarnya ialah zat yang menumbuhkan puncaran tindak balas pada kebolehan berakal dan berfikir.

Tuk Teri: "Semasa hamba keluar di dalam negeri  
kota pendati, kota gelugur, di cabang  
empat puluh lima

Sedar hamba membawa angin kesemaran jati sealam  
diri berkafan kuning menobat jati."

**Maksudnya:**

Semasa hamba keluar dari rahim ibu, disambut oleh tangan bidan, diri hamba dimasukkan roh dari penjelmaan pancaran kilau dari zat Allah.

Demikian seterusnya, setiap baris dan rangkap diberi tafsiran, dan pada beberapa tempat huraian yang lanjut tentang konsep dan kepercayaan mengenai alam, alam maujud, alam hakikat, alam makrifat dan sebagainya. Pada beberapa tempat kelihatan fahaman atau tafsiran yang kurang konsisten, berbaur dengan contoh dan keterangan yang tidak jelas tetapi dari segi keseluruhan interpretasi memperlihatkan minat dan kemahiran para dalang dan bomoh ini dalam bidangnya.

**Analisis Tema dan Isi**

Tema dan isi mantera lebih jelas dilihat bersama fungsi dan perannya dalam masyarakat yang menggunakannya. Ini ialah kerana isi dan fungsi sesebuah mantera merupakan aspek-aspek yang tidak mudah diasingkan; yang satu adalah sebahagian daripada yang lain. Kerana itu dalam perbincangan ini, tema dan isi akan menekankan aspek peranan sebuah mantera dan keadaan yang melahirkan peranan tersebut; sementara aspek fungsi akan membicarakan bagaimana mantera itu digunakan dalam kehidupan seorang individu dan masyarakatnya secara kolektif. Dalam perbincangan tema dan isi ini dengan sendirinya juga pendekatan yang digunakan mengarah kepada membuat klasifikasi berdasarkan isi dan fungsi seperti yang berlaku dalam membicarakan genre-genre yang lain.

Secara analisis, isi dan kandungan mantera-mantera Melayu dapat dibahagikan kepada empat bahagian penting:

1. Pakaian diri.
2. Pembantu dalam usaha dan pekerjaan.
3. Alat dalam perubatan dan perbomohan.
4. Syarat dalam istiadat dan upacara.

*Pakaian diri*

Dalam golongan ini ialah mantera-mantera daripada jenis tangkal atau azimat yang diamalkan dalam kehidupan sehari-hari. Amalan 'ilmu' itu bersama dengan perlakuan dan pantang larangnya dan tujuannya ialah untuk kepentingan atau faedah diri pemakainya. Hampir seluruh kepentingan dalam hidup seseorang individu dapat dijaga atau diperbaiki dengan memakai ilmu-ilmu itu yang berbagai-bagi pula ungkapan manteranya serta alat dan syarat yang ditetapkan. Bagaimana luasnya bidang yang dirangkumi oleh mantera-mantera dalam bahagian ini dapat dijelaskan melalui nama-nama ilmu dan tujuannya masing-masing. Sebahagian daripadanya ialah:

- a. Penahan dan penguat; misalnya untuk menahan gigi supaya tetap kuat dan utuh, menguatkan gigi dan tulang, melebat, menghitam dan menahan keutuhan rambut, menegangkan kulit dan urat saraf dan lain-lain.
- b. Kebal; iaitu menjadikan kulit tiada lut oleh senjata, tulang dan tubuh tidak runtuh oleh tikaman dan pukulan musuh.
- c. Pelindung; iaitu melindungkan diri daripada ancaman musuh misalnya dengan menghilangkan diri daripada penglihatan musuh, terlepas daripada mara bahaya dalam perjalanan, terhindar daripada perbuatan dan hikmat orang dan sebagainya.
- d. Penggerun dan penunduk; menjadikan seseorang kelihatan gagah dan menggerunkan, menimbulkan rasa takut orang lain melihat kegagahannya. Digunakan untuk menentang lawan, bukan sahaja dalam pertarungan fizikal, bahkan dalam berhujah dan bertengkar.
- e. Pemanis; menjadikan wajah dan perwatakan seseorang berseri dan menarik, menimbulkan minat dan kasih sayang orang, seseorang atau orang ramai.
- f. Pengasih; menjadikan pemakainya dikasihi orang, oleh seseorang yang diingini bahkan oleh orang 'sekampung'.

- Pengasih juga sebagai ilmu guna-guna yang dikenakan kepada seseorang supaya dia jatuh cinta kepada yang mengenakannya, atau menjadi gila, sakit atau sebagainya.
- g. Pembenci; menimbulkan rasa benci antara dua orang yang bersahabat, pasangan yang sedang berkasih, bahkan suami dan isteri, dengan tujuan yang buruk; misalnya membala dendam, cemburu atau dengan maksud akan memiliki salah seorang daripada mereka.
  - h. Mantera-mantera lain yang membantu pencapaian maksud mantera di atas.

Dengan meneliti judul-judul mantera atau ilmu-ilmu untuk pakaian diri ini, kita akan mendapat kesan bahawa masyarakat Melayu itu begitu peka terhadap perkelingannnya, serta berwaspada dan berusaha untuk menghadapi sebarang kemungkinan yang tidak diingini. Secara purata, golongan inilah yang paling besar. Daripada jumlah 280 judul yang dijadikan bahan kajian, 50 peratus tergolong ke dalam jenis ini. Dan daripada jumlah itu, 30 peratus daripadanya tergolong sebagai 'pemanis' dan 'pengasih'; ini tidak termasuk ilmu-ilmu dan amalan-amalan lain yang membantu mencapai tujuan itu, misalnya penegang dan penyeri muka, penyegar badan, pembangkit berahi, penguat syahwat isteri dan diri sendiri dan beberapa yang lain yang sama tujuannya. Hal-hal begini mengingatkan kita kepada keadaan yang sama, yang diperlihatkan melalui pantun-pantun dan syair-syair yang menunjukkan keterlibatan anggota-anggota masyarakat dalam alam cinta dan kasih sayang – misalnya, lebih 60 peratus pantun-pantun yang dikaji, memperlihatkan keghairahan hidup berkasih.

Namun demikian tidaklah tepat untuk ditimbulkan tanggapan bahawa masyarakat Melayu itu terlalu mementingkan diri sendiri atau mempunyai kecenderungan yang memberatkan soal-soal nafsu dan keberahian semata-mata. Terlalu sedikit mantera dan amalan yang mengandung hasrat menimbulkan kebencian atau memisahkan pasangan yang sedang berkasih. Sebaliknya masih banyak pula yang bertujuan menyelamatkan orang lain, misalnya melepaskan cekik tulang, menyenangkan bersalin, tangkal atau azimat penerang hati,

mendamaikan perselisihan suami isteri dan beberapa yang lain untuk kegunaan membantu orang lain apabila keadaan memerlukan.

Tema dan isi mantera-mantera dalam golongan ini amat luas dan menyeluruh, sesuai dengan bidang yang dirangkuminya. Tiap-tiap sebuah mantera menyatakan suatu tujuan di samping menyentuh atau merujuk kepada unsur-unsur lain yang terlibat dengan amalan dan pencapaian mantera tersebut. Dan selalunya pula terdapat pelbagai mantera untuk tujuan yang sama. Tetapi, di samping kepelbagaiannya demikian terlihat pula suatu macam keseragaman pada bentuk dan cara pernyataan maksud melalui ungkapan-ungkapan yang membina mantera-mantera itu. Misalnya, pada bahagian isi (selepas dimulai dengan nama Allah, biasanya dikemukakan sesuatu pernyataan yang menunjukkan penguasaan seseorang bomoh atau pemakainya terhadap ilmu yang berkenaan. Ini termasuk pemahamannya mengenai nama dan pengertian ilmu tersebut, konsep dan kepercayaan mengenainya; bahan dan alatan yang digunakan, cara dan berhasil atau tidaknya, seterusnya gantian atau pemilihan yang lain jika tidak berhasil.

Dalam bahagian ini juga diserukan kuasa-kuasa yang mendorong dan yang membantu kemujaraban mantera yang berkenaan. Paling utama di sini, ialah kuasa yang Maha Kuasa iaitu Allah S.W.T. dan yang amat membantu, Muhammad S.A.W. Suatu yang amat menarik di sini, kuasa utama dan kuasa-kuasa lain yang membantu adalah daripada unsur-unsur yang dibawa dan diperkenalkan melalui Islam. Hanya ilmu dan konsep mengenainya sahaja yang merupakan warisan purba, khususnya daripada animisme; dan sedikit sekali pula yang menunjukkan kesan pengaruh-pengaruh asing, Hindu, Buddha, Shaman dan Saiva. Tegasnya, perincian dari segi watak, kepercayaan, amalan dan keseluruhan isi daripada sebuah mantera, lebih jelas sebagai gambaran kepada tradisi Melayu dan Islam.

Dalam golongan mantera pakaian diri ini didapati pelbagai nama atau judul untuk sesuatu 'ilmu' yang di dalamnya tersirat fahaman dan kepercayaan yang merupakan sebahagian daripada amalan yang dimestikan. Terdapat misalnya, judul-judul seperti "Sangga Bunuh", "Sangga Mara", "Si Awang Lebih", "Si Palit Gila", "Cinta-mani", "Pelangkah", "Penderas" dan sebagainya. "Sangga Bunuh" atau "Sangga Mara" adalah sejenis ilmu pengasih,

digunakan untuk memuja perempuan yang diinginkan, atau bagi orang yang berpoligami, dibacakan kepada isteri-isterinya, khususnya isteri pertama, supaya dia sayang, hormat dan menerima dengan jujur tindakan dan perlakuan si suami. Dan sebagai ilmu pengasih, ciri-ciri kelembutannya, dengan pantun dan ungkapan-ungkapan yang berima dan seimbang masih dikekalkan; lihat misalnya, ilmu "Sangga Bunuh", di bawah:

Bismillahir-rahmanir-rahim

Cok padang mancur

Tiga dengan padang selasih

Tertutup hati yang pusur

Terbuka hati yang kasih.

Tunduk kasih tunduk hormat

Kasih (si anu) kepada aku

Kur semangat (si anu) teringat aku  
seorang.

Aku satukan semangat (si anu)

Dengan semangat aku.

Air hilir lagi berbalik

Angin bertiup lagi berhenti

Burung terbang lagi singgah

Api nyala lagikan padam

Inikan pula hati (si anu)

Padaku seorang.

Bagai diindang bagai dikicak

Bagai dibuat bagai didaduk

Bagai ditampi bagai dihirup

Hati (si anu) padaku seorang.

Rupa aku Nabi Yusuf

Suara aku Nabi Daud

Rupa aku dipandang-pandang

Suara aku didengar-dengar

Berkat doa

Lailahaillallah.

(Ihsan Mohd. Noh bin Ali, Segamat 1977)

Kuasa-kuasa yang diseru dalam mantera-mantera jenis ini bukan sahaja dianggap akan memberi atau memperkesankan tujuan

'ilmu' tersebut; tetapi seolah-olah akan bersama-sama, bahkan melaksanakannya bagi pihak pemakainya; lihat misalnya sebahagian daripada ilmu "Memanggil Semangat" di bawah ini:

Bukan aku empunya panggil  
Allah empunya panggil  
Bukan aku empunya panggil  
Muhammad empunya panggil  
Aku panggil dengan kata Allah  
Aku panggil dengan kata Muhammad.

Dalam setengah-setengah mantera, pemakainya sendiri mendakwa sebagai sebahagian daripada kuasa yang membantu, atau mewakili kuasa yang berkenaan; misalnya dikatakan "akulah harimau Allah", walaupun gelaran "harimau Allah", selalunya diberikan untuk Saidina Ali R.A.H. Perhatikan seruan "akulah anak Rasulullah" dalam 'ilmu pendinding' di bawah ini:

Dong-dong kata Allah  
Dong-dong kata Muhammad  
Teh perieh namamu besi  
Akulah bernama anak Rasulullah  
Semua manusia berkaki empat  
Tunduk di bawah tapak kakiku.  
Jika engkau tidak tunduk  
Di bawah tapak kaki kiri aku  
Derhakalah engkau kepada Allah  
Berkat kata  
Laillaha illallah.

(Haji Hussin bin Abdullah, Kuala Lipis 1978)

#### *Mantera pembantu pekerjaan*

Mantera jenis ini dibacakan ketika memulakan sesuatu pekerjaan atau dipakai sebagai tangkal untuk menjamin kejayaan pekerjaan itu. Dibandingkan dengan yang di atas, mantera jenis ini amat kecil jumlahnya, iaitu kira-kira 15 peratus sahaja. Pengolongannya juga agak kurang jelas; kerana pada beberapa contoh, mungkin telah tergolong sebagai pakaian diri, pengubatan atau upacara. Hampir semua pekerjaan, baik sebagai punca kehidupan maupun kegiatan-kegiatan tertentu, mempunyai mantera dan cara amalannya sendiri.

Justeru itu, secara tidak langsung dapat digambarkan sebahagian daripada pekerjaan dan mata pencarian masyarakat, misalnya bersawah, memburu binatang, berniaga, menangkap ikan, membalaik, merotan, memungut manisan lebah, nira kelapa atau enau (untuk gula atau tuak). Sementara kegiatan-kegiatan yang lain termasuk membina rumah, jalan raya atau denai untuk kegunaan umum, membina jambatan, bahkan menebang pohon-pohon yang dianggap tua atau pelbagai unsur yang mungkin memerlukan mantera yang tersendiri. Dalam bersawah padi melibatkan tanah, air, api (matahari) dan angin (udara). Tanah dan air melibatkan tumbuh-tumbuhan, haiwan dan kuasa-kuasa ghaib, penunggu, jembalang, hantu-hantu, jin dan sebagainya. Semangat-semangat halus seperti 'semangat padi' dan semangat haiwan (badi), perlu dijaga supaya tidak membahayakan. Untuk tujuan itu diamalkan mantera "memuja semangat padi", setelah selesai pekerjaan berpadi dan "ilmu penolak badi", setelah mendapat dan menyembelih binatang dalam perburuan.

Padi merupakan sumber kehidupan yang amat penting; kerana itu mengusahakan padi harus dibuat dengan teliti dan dijalankan setiap peringkatnya dengan betul, tepat dan terperinci, bersama dengan mantera dan amalannya yang mengiringi perlakuan itu (Harun Mat Piah 1981, 15–17). R.O. Winstedt (1920) memberikan deskripsi tentang upacara-upacara dalam perusahaan padi di Hulu Perak dan di Negeri Sembilan sekitar tahun 1900-an. Daripada keterangannya itu, terdapat pelbagai mantera yang amat rapat hubungannya dengan kepercayaan dan tindak laku masyarakat Melayu dalam pelbagai aspek kehidupan. Mantera di bawah ini dibacakan oleh bomoh ketika memasukkan benih padi ke dalam lubang tukal sebagai sebahagian daripada upacara menabur benih.

Assalamualaikum  
 Hai Nabi Allah Sulaiman, raja sekalian bumi  
 Assalamualaikum  
 Hai jin tanah, jembalang bumi  
 Assalamualaikum  
 Hai bapaku, langit  
 Assalamualaikum  
 Hai ibuku, bumi.  
 Assalamualaikum

PUISI MELAYU TRADISIONAL

Hai bapa kawal, ibu kawal  
Aku nak kirim anakku  
Anak Maharaja Cahaya pada ibunya  
Aku suruh belayar ke laut hitam, laut hijau,  
laut biru, ke laut ungu.  
Aku kirim engkau, enam bulan ketujuh kusambut  
naik,  
Bukan aku menurunkan benih  
Aku menurunkan padi.

(Winstedt 1920, II8)

Bandingkan dengan mantera yang sama tujuannya dari pengumpulan yang terbaru:

Bismillahir-rahmanir-rahim  
Assalamualaikum  
Ya Nur Adam abi al-Basyar  
Aku kahwinkan Nur Hayat Allah  
Dengar Nur Adam abi-al-Basyar  
Minta dikandungkan baik-baik dari awal sampai  
akhir  
Banyak padi seperti banyak bumi.

(Awang bin Long, Pasir Putih 1976)

Dalam dua mantera di atas terdapat perbezaan konsep dan penumpuan pada kuasa-kuasa yang berlainan. Mantera dari Hulu Perak, lebih purba sifatnya dibandingkan dengan yang di Kelantan. Seruan kepada langit sebagai bapa, bumi sebagai ibu dan panggilan semangat padi sebagai "Anak Maharaja Cahaya" telah diganti dengan nama-nama yang berhubungan dengan konsep dan kepercayaan Islam: Nur Allah, Nur Adam dan abi al-Basyar. Dalam upacara menuai, R.O. Winstedt memberikan contoh mantera dari Negeri Sembilan, juga di sekitar tahun 1900-an; sebahagian daripadanya berbunyi demikian:

Hai, Dang Puk Dang Malini  
Bertompok Dayang di sini  
Dang Puk Dang Malini  
Tetap Dayang di sini  
Bergerak langit tujuh lapis

Bergerak anakku Maharaja Cahaya  
 Tak bergerak langit tujuh lapis  
 Tak bergerak anakku Maharaja Cahaya.

Dari pengumpulan yang terbaru, melalui informan di atas tadi, Encik Abdul Rahman bin Abdullah, didapati mantera di bawah ini yang sama pula tujuannya; tetapi objek dan kuasa-kuasa yang dirujuk atau diminta bantuannya telah berubah daripada yang diberikan di atas. Ikuti mantera tersebut yang dibacakan ketika mengeluarkan padi dari kepuknya:

*Jampi doa sepuluh*  
 Bismillahir-rahmanir-rahim  
 Kese Allah  
 Kedua bumi  
 Ketiga dengan air sembahyang  
 Keempat dengan hari Isnin  
 Kelima dengan pangkat mahligai  
 Keenam dengan dinding rezeki  
 Ketujuh pintu syurga  
 Kelapan anak kukandungkan  
 Kesembilan Muhammad menjadi  
 Kesepuluh tanah tanam dengan kampung lamanku.

Memburu bukanlah suatu pekerjaan yang mudah; dan bukan pula sebagai hiburan seperti yang difahami sekarang. Berburu, pada masyarakat lampau adalah sebahagian daripada mata pencarian untuk hidup; daging untuk makanan, kulit untuk pakaian dan alat kemudahan, sementara bahagian-bahagian yang tertentu (kuku, mata atau pelir) daripada haiwan tersebut mungkin diperlukan dalam amalan magis dan perbomohan. Dan perkelilingan haiwan dengan hutan rimbanya, bukit-bukau, alur dan sungainya, masing-masing mempunyai semangat dan penunggu. Haiwan yang dibunuh mungkin meninggalkan badi yang akan mengancam keselamatan pemburu dan keluarganya, bahkan orang lain; kerana itu harus ditolak atau ditawar. Akibat daripada kepercayaan tersebut, terdapat pelbagai mantera yang digunakan sebelum, semasa dan sesudah berburu. Sebahagian daripadanya diberikan di bawah ini:

Mantera ketika masuk hutan:  
 Hei, Dayang Keranah

PUISI MELAYU TRADISIONAL

Gembala Hakim Setambun Tulang  
Si Rencak Balang, Si Ranjang dan Si Belang  
Kalau beri temukan kami  
Nan luar kandang Nabi Sulaiman  
Itulah yang kami pinta  
Yang berbulu dan yang tak berguna.

.....  
(Abdul Rashman Abdullah, Kota Bharu 1976)

Sesudah menyembelih binatang:

Tuah sukum aturan bantai  
Cucuk bantai jinjang bantai  
Oleh menanti di rumah.

Berontak bunga kasai  
Kasih menyalak Si Putar Leman  
Serantau hilir dimudahkan  
Tuah ada pendapatan  
Pendapatan ada maka boleh  
Anak raja tuntung puteri bertimbang  
Bertelanjangan berteguh kata,  
tegak dik parang  
Dua belas kota dalamnya  
Mengorek Si Gentam Bumi  
Gerak Gempa gaya  
Dendam gerak di kepalanya.

(Abdul Rahman Abdullah 1976)

Lalu dimandikan anjing buruan:

Limau pulut limau lelangkan ketiga limau Melaka  
usu tersorok mata menghilang  
Aku buang serau dengan celaka  
Mak putih sidang putih  
Bukan aku nan memulih  
Lagi rimbun lagi rampak  
Bak dulu kala  
Kejaran anjingku ini  
Esa sebulan, empat sebulan  
Lima sebulan, enam sebulan  
Tujuh sebulan  
Buruan anjingku ini

Jangan dilambat tangan disegi  
Orang pulang ke rumahnya.

(Abdul Rahman Abdullah 1976)

Memungut dan menurunkan manisan lebah, nira enau atau nira mayang, untuk dibuat gula dan bahan minuman merupakan pekerjaan yang sulit dan sukar. Lebah, misalnya, bersarang di pohon yang tinggi, besar, di dalam yang sukar dicapai. Pemanjatnya akan terdedah kepada pelbagai bencana. Selain daripada itu harus pula dipertimbangkan kepercayaan yang berhubung dengan semangat dan penunggu yang dipercayai wujud pada benda-benda tersebut. Justeru itu pekerjaan yang terlibat menghendaki syarat-syarat, bahan dan perlakuan yang khusus, bersama mantera-mantera yang digunakan. Di Negeri Sembilan, mantera dan lagu dalam pekerjaan memungut dan memelihara madu lebah dinamakan 'bersandoi'. Dan mantera-mantera di dalamnya agak menarik, dengan adanya pantun-pantun dan ungkapan-ungkapan puitis yang indah. Mantera di bawah ini dibacakan ketika memasang 'peting' sebagai tangga untuk memanjat.

Assalamualaikum Si Raja Kayu  
Borek bernama raja bersila  
Batang bernama raja berdiri  
Dahan bernama raja berembun  
Daun bernama raja bersanding  
Berkat datuk nan di darat  
Berkat datuk nan di baruh  
Berkat datuk nan di hulu  
Berkat datuk nan di hilir  
Marilah kita sama bermain.

(Tuan Hj Omar Ismail, Kuala Pilah 1978)

Bandingkan dengan mantera ketika melentur mayang dalam pekerjaan mengambil nira kelapa:

Assalamualaikum Puteri Sekuntum Besir  
Yang berhaluan berhilir Si Mayang  
Si Gedebah Mayang  
Puteri tujuh dara Dang Mayang

Mari kecil ke mari  
Mari senik ke mari  
Mari burung ke mari  
Mari halus ke mari  
Aku memaut lehermu  
Aku menyanggul rambutmu  
Aku bawa sadap gading mahu basuh mukamu  
Uri manis tembuni manis  
Manis sampai ke jari manis  
Uri manis tembuni manis  
Manis sampai ke muka mayang  
Sadap gading merancung kamu  
Kaca gading menadahkanmu  
Kolam gading menanti di bawahmu  
Bertepuk berkecar di dalam kolam gading  
Kolam bernama Maharaja Bersalin.

(Skeat 1967, 216–612)

Pekerjaan biasa yang tidak melibatkan semangat dan penunggu mungkin juga memerlukan mantera sebagai tangkal atau azimat. Mantera pelaris di bawah ini berguna untuk pekedai dengan harapan mlariskan jualannya:

Hei seri mina seri  
Seri menyolok ke barang aku  
Garam di laut asam di darat  
Pecah liur sekalian umat manusia.  
Qulhu Allahu Ahad  
Allahu 's'-Samad  
Lam jadi pelaris menjadi  
Lam jadi pelaris menjadi  
Lam jadi pelaris menjadi  
Dengan berkat doa  
Laillahaillallah  
Muhammad Rasulullah.

(Wan Ahmad Hj Wan Abd. Rahman, Kuala Selangor 1978)

Mantera di atas dibacakan pada air, campuran air hujan yang diambil pada malam Jumaat, dan air laut (air di kuala sungai): dilakukan antara malam-malam 13, 14 dan 15 haribulan, iaitu waktu-waktu bulan penuh. Mantera itu didahului dengan membaca *al-*

*Fatihah sekali, al-Ikhlas, tiga kali, al-Khalaq sekali, al-Nas sekali* kemudian selawat atas Nabi tujuh kali lalu dihembuskan pada air tadi sambil membaca mantera di atas. Air itu disimpan di dalam jag atau botol, diletakkan di tempat yang selamat.

#### *Perubatan dan perbomohan*

Selain daripada mantera pakaian diri, bahagian inilah yang paling banyak dan luas penyebarannya. Hampir semua jenis penyakit mempunyai mantera untuk mengubatnya; dan ini bersama amalan, bahan, syarat-syarat dan pantang larangnya. Sesuatu jenis penyakit mungkin mempunyai pelbagai mantera yang berlainan dan tidak jarang pula sebuah mantera dapat digunakan untuk pelbagai jenis penyakit. Melihat judulnya sekali imbas, menimbulkan anggapan bahawa seluruh penyakit dapat diubat dengan mantera dan amalan-nya. Dan ini meliputi dari yang paling sederhana, seperti mengubat sawan dan terkena cika, hingga kepada yang lebih sulit seperti dirasuk hantu, gila atau terkena buatan orang. Dari sepasang mantera yang terdiri daripada beberapa baris dan diakhiri dengan semburan air sirih, hingga kepada yang lebih panjang, memakan masa semalam suntuk atau beberapa malam seperti dalam kebiah, belian, makyung, main puteri, saba bagih dan lain-lain. Perhatikan beberapa contoh di bawah ini:

#### *Tawar bisa*

Kekek cendawan kekek  
Tumbuh cendawan hilang lupa  
Titik air tiga titik  
Aku mengeluarkan bisa  
Dalam tubuh si anu ini  
Masuk segala tawar  
Keluar segala bisa  
Hu Allah.

(Kaluh bin Alimi, Melaka 1978)

Tawar juga digunakan untuk mengubat penyakit yang lebih sukar, seperti dirasuk hantu, pelesit, polong, bajang dan orang bunian; atau penyakit wabak, seperti "orang baik-baik" (cacar), taun dan lain-lain. Lihat "tawar penyakit orang baik-baik" di bawah ini:

Hei, orang baik  
Aku tahu asalmu  
Kejadianmu duduk dalam neraka jahanam  
tiada bersifat  
Maka kamu keluar dari neraka jahanam  
kamu singgah kepada anak adam  
Baharulah kamu bersifat  
Aku tahu asalmu tujuh beradik:  
Kamu jadi daripada dadih yang hitam  
Kamu jadi daripada romah yang hitam  
Kamu keluar daripada kulit yang hitam  
Kamu keluar daripada daging yang hitam  
Kamu keluar daripada urat yang hitam  
Kamu keluar daripada lendir yang hitam  
Kamu keluar daripada tulang yang hitam.

Bukan aku empunya tawar  
Dewa Betara Nerada empunya tawar  
Bukan aku empunya tawar  
Dewa sang sembah empunya tawar  
Bukan aku empunya tawar  
Hampas neraka jahanam yang empunya tawar  
Aku tawar sekalian yang bisa  
Aku padam sekalian yang nyala  
Jikalau bisa minta tawar  
Jikalau nyala minta padam  
Sidi guru, sidilah aku kepada guruku.

(Za'ba 1962, 121–122)

Suatu jenis mantera yang amat menarik dalam sistem perubatan dan perbomohan ini ialah yang disampaikan dalam bentuk drama bersama dialog, muzik, nyanyian dan tarian hingga merupakan satu persembahan seni, drama atau taridra. Kebiah, belian dan makyung yang terdapat di Kedah, mungkin merupakan bentuk yang terawal dan tipikal dalam cara pengubatan seperti ini. Penyakit yang dirawat ialah yang berhubung dengan semangat, tertegur, tersampuk atau terkena sihir; dan yang dirawat pula umumnya daripada kaum keluarga bomoh tuk kebiah, tuk belian atau tuk puteri. Dalam perlakuannya menunjukkan hubungan yang erat dengan binatang, khasnya harimau atau harimau jadian, kerana itu tuk bomoh biasanya meniru gerak-geri harimau. Dalam keadaan lupa itu tuk bomoh menghidu tubuh pesakit, menunjuk bahagian yang sakit dan

seterusnya menyatakan ubatnya. Terlepas daripada persoalan magis, tahap dan langkah-langkah pengubatan serta latar belakang kepercayaan mengenainya, aspek yang sangat menarik ialah pada ungkapan-ungkapannya yang puitis, sederhana dan spontan. Dengan rentak dan intonasi, dengan irungan muzik daripada rebab dan gendang, tuk bomoh dapat menimbulkan kuasa magis untuk menyembuhkan penyakit. Perhatikan petikan di bawah, dari permainan kebiah, ketika tuk kebiah bertanya melalui tuk paduan (pemain gendang atau rebab):

Apa hajat memanggil datuk  
 Datang ke mari ke balai dunia  
 Datang ke mari  
 Kalau musuh-musuh di mana  
 Kalau berperang, perang di mana  
 Panggil datuk datang ke balai  
 Balai anjung balai Sultanah  
 Di pagi hari datuk duk tidur tengah lali  
 Lalu bunyi duk berdengar  
 Lekas bangun, saya ngan panggil terjerit-jerit  
 Sayalah datang ke mari  
 Menuju ke jinjang  
 Habis letih dengan dilayu  
 Kenapa anak, kenapa cucu  
 Kenapa pedih dengan bisa  
 Lama sungguh saya tak datang

(Hajah Esah bt Ahmad, Kuala Ketil 1978)

Dalam belian juga, terdapat mantera yang hampir sama maksudnya:

Weh mak, apalah hajat  
 Memanggil kami datang ke mari  
 Kalau musuh perang di mana terbit  
 Padang yang luas saujana padang.

Naik main janda beremas  
 Sayang bersanding tali terpedung  
 Hantu sebatang  
 Padang yang luas saujana padang.

Apalah hajat memanggil kami  
 Naik main wau beremas

PUISI MELAYU TRADISIONAL

Sekaum-kaum, sepuak-puak  
Anak cucu cicit  
Di padang luas saujana padang.

Nak tengok anak cucu cicit  
Terlalu panas  
Manalah datuk tengok  
Datang ke mari  
Di padang luas saujana padang  
Tempat kami.

Dalam makyung yang bertujuan mengubat penyakit, didapati dialog dan jalan cerita yang hampir sama dengan makyung yang dipersembahkan sebagai hiburan, misalnya dalam nyanyian untuk "Raja Muda dan Puteri Bongsu" di bawah ini:

Fikir hamba di dalam hati  
Ayah, janganlah tegur hamba di dalam dada  
Fikir siang menjadi malam  
Terlupa malam hamba terlupa  
Perut lapar terasa kenyang  
Badan kurus terasa gemuk  
Sangat lama hamba datang ke negeri  
Datang ke negeri Tanah Jawa  
Tanah Jawa hamba dah lama  
Ambil hayat lama-lama  
Jangan hamba dok seksa diri dan badan ayah  
Sampaikan bonda ayah tak kenal ayah tak  
sebut  
Anjung ketujuh bilik sembilan  
Raja Muda tidur beradu  
Gerak siang menjadi malam  
Gerak ke kiri balik ke kanan  
Gerak ke kanan balik ke kiri  
Gerak Tuan Puteri Bongsu  
Mari tidur beradu  
Di anjung ketujuh  
Gerak sekarang gerak hamba gangguan.

(Hajah Esah bt Ahmad 1978)

Bentuk yang hampir sama terdapat dalam main puteri, bagih dan saba, yang lebih terkenal di Kelantan dan Terengganu. Bezanya, pengubatan-pengubatan tersebut lebih rumit dan mengambil masa

yang lebih panjang; biasanya antara tiga hingga lima malam berturut-turut. Sebahagian daripada mantera berbagih diberikan dalam lampiran.

#### *Mantera dalam upacara*

Dalam golongan ini tidak termasuk mantera-mantera yang digunakan sebagai upacara memulakan sesuatu kegiatan, seperti misalnya menabur benih padi, mendirikan rumah atau memulakan pengubatan main puteri, bagih dan lain-lain. Mantera-mantera untuk tujuan tersebut, telah tergolong dengan sendirinya ke dalam bahagian-bahagian yang berkenaan dan telah pun dibicarakan di atas tadi. Upacara-upacara yang dimaksudkan di sini ialah yang merupakan kegiatan yang lebih besar dan menyeluruh, yang melibatkan sebahagian besar anggota masyarakat, misalnya upacara puja pantai, menyemah kampung, melancarkan bahtera atau lancang, bahkan memulakan permainan layang-layang. Lihat sebahagian daripada contohnya di bawah ini:

#### Melancarkan bahtera ke laut:

Assalamualaikum  
 Medang Raya, Medang ke Tanah  
 Jangan engkau bercerai dua beradik  
 Aku nak menghantar seboleh-bolehnya  
 Ke mana-mana tempat hendak pergi  
 Kalau tidak, Engkau derhaka kepada Allah

(Skeat 1967, 621)

#### Mantera memulakan istiadat:

Hei Saidina Alam  
 Marilah bersama-sama aku  
 Akulah bomoh yang asal  
 Bomoh yang usul  
 Bomoh yang tidak tirus  
 Bomoh yang turun-temurun  
 Marilah mu bersama-sama aku  
 Aku nak buat kenduri khidmat  
 Assalamualaikum  
 Aku kirim salam kepada jin tanah  
 Aku tahu asalmu  
 Mu keluar dari air ketubang

Bukan aku melepas bala mustaka  
Sang Kaka Sang Kipat melepas bala mustaka  
Bukan aku melepas bala mustaka  
Jin Taru melepas bala mustaka  
Bukan aku melepas bala mustaka  
Jin yang tua melepas bala mustaka  
Aku melepas kweng keneng  
Cara badi bala mustaka  
Aku lepas pada tahun ini  
Aku lepas pada hari ini  
Aku lepas pada saat ini  
Aku lepas sekali dengan rumah tangga  
Aku lepas sekali dengan kain baju  
Aku lepas sekali dengan periuk belanga  
Aku lepas sekali dengan lekar, sudip, senduk  
Aku lepas sekali dengan bomoh tabib  
Dengan kata sa tiga lima tujuh lepas  
Dengan berkat kata  
Lailahaillallah  
Muhammadar-Rasulullah.

(Husin bin Ahmad, Pasir Putih 1977)

Daripada contoh-contoh dan perbincangan yang dikemukakan dalam bahagian ini dapatlah diperlihatkan bagaimana luasnya pencakupan tema dan isi mantera-mantera Melayu. Hampir seluruh bidang dan keperluan hidup, pengalaman, ketakutan dan persediaan manusianya dalam menghadapi sebarang kemungkinan seolah-olah telah dapat dipenuhi oleh manteranya. Daripada judul dan isi sesebuah mantera dengan segera menjelaskan maksud dan fungsinya serta tanggapan, kepercayaan, penyerahan, usaha dan harapan manusia kepada kuasa Yang Maha Esa dan kuasa-kuasa ghaib yang lain yang juga berada di bawah kekuasaan-Nya.

### Fungsi dan Penyebaran

Dalam pembicaraan mengenai tema dan isi di atas, telah juga disentuh dengan ringkas tentang fungsi mantera itu dalam masyarakatnya. Ini ialah kerana kelahiran mantera sepertimana genre puisi yang lain juga adalah daripada fungsi atau suasana yang memerlukannya. Hanya dalam perbincangan yang lalu itu penekanan diberikan pada isi, motif atau objek yang dikemukakan dalam ungkapan-

ungkapan yang menjalin sesebuah mantera. Dalam bahagian ini yang khusus membincangkan fungsi dan penyebaran mantera, penekanan akan diberikan pada penggunaannya secara praktis dan aktif di kalangan masyarakat tersebut; iaitu sebagaimana yang dilakukan terhadap genre-genre puisi yang telah dibicarakan di sini. Dan, untuk kemudahan menggambarkan keadaan ini, fungsi atau penggunaan mantera akan ditumpukan kepada kehidupan seorang watak yang dimaksudkan untuk mewakili sebuah masyarakat. Di sini diperlihatkan waktu dan suasana ia memerlukan sesebuah mantera, mengapa dan bagaimana ia menggunakan dan kesan pada dirinya dalam hubungannya dengan masyarakat kelilingnya.

Pada praktisnya, mantera telah digunakan ketika seorang anak masih dalam kandungan ibunya. Upacara melenggang perut, misalnya dilakukan ke atas ibu yang sedang mengandung sulung diadakan pada bulan ketujuhnya. Pelbagai mantera digunakan dalam pelancaran upacara itu; satu daripadanya 'jampi pelindung' di bawah ini, dibacakan oleh bidan menjelang selesainya upacara:

Rumah bertiang teras jelatang  
 Rumah berbendul batang bayam  
 Bertaburkan batang purut-purut  
 Yang berbulu rompang songsang  
 Yang menaruh jala lalat  
 Yang bergendang kulit tuma  
 Janganlah engkau mungkir setia padaku  
 Jangan kaubawa bencana pada anak cucu aku  
 Matilah engkau ditimpa daulat empat  
 penjuru alam  
 Mati ditimpa malaikat empat puluh empat  
 Mati disula besi kawi  
 Mati dipanah halilintar  
 Mati disambar kilat senja  
 Mati ditimpa Quran tiga puluh juz  
 Mati ditimpa kalimah Allah.

(Awang bin Ahmad, Tumpat 1976)

Mantera juga mungkin diperlukan ketika si ibu sedang melahirkan; misalnya anak tidak lahir pada waktu yang sewajarnya, sedang si ibu telah lemah atau tidak berdaya lagi. Tuk bidan yang bertugas lalu membacakan mantera "penyenang bersalin" sambil meng-

gosokkan minyak selusuh di perut ibu:

Bukan aku yang buka pintu rajat  
Allah yang buka pintu rajat  
Bukan aku yang buka pintu rajat  
Muhammad yang buka pintu rajat  
Bukan aku yang buka pintu rajat  
Lokman Hakim yang buka pintu rajat  
Tuk bomoh yang ketujuh yang buka pintu rajat  
Bukan aku yang buka pintu rajat  
Tuk bidan ketujuh yang buka pintu rajat  
Dengan berkat doa  
Lailahaillallah.

(Wan Ahmad bin Hj Wan Abd. Rahman, Kuala Selangor 1978)

Dalam membesarkan seorang anak, di persekitaran kampung yang terdedah pada pelbagai ancaman penyakit, diperlukan pula persediaan menghadapinya. Daripada senarai judul-judul mantera yang telah dikumpulkan terlihat yang paling banyak daripada jenis penyakit perut, sawan, senak angin dan ceret-beret, di samping unsur-unsur hantu, pelesit, bajang dan polong yang dikatakan terlalu kerap mengganggu kanak-kanak. Menjelang remaja, si anak memerlukan pula 'pelindung' yang lebih kukuh daripada hantu dan buatan orang, daripada bahaya dalam perjalanan, daripada serangan binatang buas, bahkan daripada gigitan serangga. Perhatikan mantera "pelindung tubuh" di bawah ini:

Qulhu songsang  
Qulhu Allah tujuh kali songsang  
Qulhu Allah Quran tiga puluh juz  
Luar dalam badanku  
Balik berkat Nabi Muhammad Rasulullah  
Hasrat dengki pergi balik  
Balik kepada asal tempatmu  
Tenaga aku seperti baginda Ali  
Suara aku seperti gajah menta  
Berkat doa ajaran guruku.

(Sahut bin Jantan, Port Dickson 1977)

Jika si anak berkecenderungan untuk mengatasi orang lain, ingin menjadi pendekar, tentera atau hulubalang, dia perlu pula

melengkapkan diri dengan ilmu-ilmu kepahlawanan, termasuk kebal, penunduk, penggerun, penderas iaitu mencepatkan gerak anggotanya, pengunci untuk mengunci gerak musuh, termasuk binatang buas, harimau, buaya dan sebagainya untuk menghadapi dunia remaja yang penuh cabaran, terutamanya godaan nafsu dan keinginan cinta, seorang pemuda atau gadis harus mempunyai sesuatu, amalan, tangkal atau azimat, sekurang-kurangnya memberikan keyakinan diri. Terdapat berpuluhan-puluhan mantera untuk pemanis, menaikkan seri pada wajah, seterusnya menarik perhatian orang lain kepadanya. Lihat misalnya mantera "Si Awang Lebih" di bawah ini:

Bismillahir-rahmanir-rahim  
 Seri gurun, seri bintang, seri matahari  
 Seri naik ke mukaku  
 Cahaya limpah ke tubuhku  
 Cahaya Allah cahaya Muhammad  
 Cahaya baginda Rasulullah.  
 Duduk aku seperti raja  
 Berdiri aku seperti menteri  
 Berjalan aku seperti baginda  
 Duduk akulah yang lebih  
 Berdiri aku lebih  
 Siapa yang berkata  
 Akulah yang lebih  
 Berkat aku memakai "Si Awang Lebih".

(Alwi Hj Mohd. Salleh, Johor Bahru 1978)

Apabila hati telah terpikat, seluruh minat dan perhatian akan tertumpu kepadanya. Dia mungkin perlu mengamalkan ilmu-ilmu pengasih untuk menarik minat kekasihnya. Dan jika gagal, cintanya tidak dibalas, atau terhalang oleh keluarga kekasihnya, dia akan bertindak lebih jauh, 'mengena' atau memberikan 'hikmat guna-guna' supaya yang dipujanya tidak akan aman hidupnya, tidak lena tidur, lupa makan dan minum atau terus menjadi gila, sehingga orang yang dimaksudkan datang kepadanya. Sebuah mantera pengasih yang mengandung hasrat itu berbunyi demikian:

Hei malaikat kudus kidam  
 Keempat puncak bertemu aku dengan si anu

Jika si anu memandang, aku di dalam  
renungan matanya  
Jikalau si anu bercakap, aku di dalam  
cakapnya  
Jikalau si anu berjalan, aku di dalam langkahnya  
Jikalau si anu makan, aku di dalam nasinya  
Jikalau si anu tidur, aku di dalam  
selimutnya  
Akulah memakai gendangan Nabi Muhammad  
Dengan berkat sidi guruiku.

(Lassim bin Kasbi, Johor Bahru 1978)

Ilmu-ilmu pengasih akan terus diamalkan walaupun sesudah pasangan itu berumahtangga. Suami dan isteri masing-masing menginginkan kelangsungan hidup yang bahagia dan memuaskan kedua-dua pihak. Cinta mungkin berhubungan erat dengan nafsu jantina. Suami ingin menimbulkan ghairah isteri dan mendapatkan kepuasan seks daripadanya. Mungkin dia kurang bertenaga dengan sebab-sebab kesihatan atau usia yang lanjut, tetapi masih ingin gagah seperti yang diharapkan. Terdapat pelbagai mantera dan amalan untuk tujuan-tujuan itu; lihat beberapa contoh di bawah:

Mantera menutup nafsu isteri:

Hei, si mani ketika  
Mari aku temu nawaitu rafaal hadas  
Tertutup terkunci nafsu engkau  
Daripada lelaki yang lain daripada aku  
Berkat doa  
Lailahaillallah

(Mamat bin Salleh, Kuala Brang 1979)

Mantera supaya isteri kuat bersetubuh:

Hei kuno kala pudi  
Mari aku jatuh setitik  
Ke dalam syurga Allah  
Dalam syurga Muhammad  
Berkat doa Lailahaillallah.

(Mamat bin Salleh, 1979)

Tongkat tua (menambahkan nafsu batin suami):

Assalamualaikum,  
Hei tongkat tua,  
Aku tau asal kau jadi  
Dari besi khursani yang di dalam syurga  
Besi serpai Nabi Allah Adam  
Tujuh hari tujuh malam  
Berkubung kubuh di tanah  
Roh Adam cahaya Adam  
Turun mani naik mani  
Istana Allah  
Allah menyatakan Muhammad  
Meneguh dan menegangkan  
Sendi selereng urat tembagaku  
Naik cahayaku  
Limpah cahaya ke seluruh badanku  
Berkat pengajaran guruku  
Mustajab kepadaku.

(Haji Mohd. Yunus bin Daud Melaka, 1977)

Sebagai orang dewasa yang telah berkeluarga, berumah dan berharta mungkin perlu juga dipelajari serba sedikit mantera untuk kerja-kerja seharian, misalnya berpadi, sawah atau huma, merotan, menangkap ikan, berburu, memungut manisan atau nira; atau mengkhusus kepada sesuatu pekerjaan seperti melemahkan ular, menjerat buaya, menjerat pelanduk, memikat burung dan sebagainya. Rumah dan harta perlu dijaga, 'dipagar' melalui amalan tertentu, atau 'pasung bumi' di bawah ini untuk melemahkan dan menangkap pencuri yang datang menceroboh:

Hei mamang  
Kesemak lang tunggal  
Kamu berdiri di kanan, Kiraman  
Kamu berdiri di kiri, Katibin  
Kamu tutup sekalian yang bernyawa  
Kamu panah sekalian yang bersifat  
Kesemak lang tunggal  
Kesemak lang tunggal

(Hussin bin Long, Kodiang 1979)

Sebagai manusia biasa, keinginan hidup memadai lah setakat itu: panjang usia, murah rezeki, sihat badan dan akal, mempunyai pasangan dan keturunan, rumah dan kampung, dihormati, puas nafsu Jimak dan sebagainya, sesuai dengan konsep kepuasan hidup sebagai manusia biasa. Tetapi, untuk lebih berguna di dalam masyarakat, dijemput ke upacara dan istiadat, selain daripada berpelajaran dan beramal ibadat, ialah dengan menjadi dalang, bomoh atau bidan terkenal. Profesion ini memberikan rezeki, selain daripada keistimewaan peribadi. Untuk mencapai tujuan itu, semua ilmu yang berkenaan harus dituntut dan diamalkan. Dalam perdalangan seperti wayang kulit, makyung, jikey dan sebagainya, pelbagai mantera perlu diamalkan, pelunak suara, penghilang gugup dan darah gemuruh, penguat badan supaya dapat berdalang semalam suntuk, pelindung diri daripada hantu syaitan dan buatan orang, dan yang paling penting daya penarik untuk memikat para penonton.

Dalam pengubatan yang lebih sofistikated, seperti main puteri, bagih dan saba, selain ilmu-ilmu pembantu di atas, perlu pula pengetahuan yang luas dalam bidang-bidang tersebut. Dalam suatu persembahan, puteri atau bagih, bomoh bukan saja mahir dalam cara dan peringkat-peringkat pengubatan, tapi dia juga seorang dalang, pelakon, penari, pemain muzik dan penyanyi yang baik. Lihat misalnya sebahagian daripada mantera yang dilakukan dalam main puteri di bawah ini sebaik selesai bahagian bertabik:

Mantera Angkat Angin Teri  
Serilah gunung berdara salam  
Sahut salam berdiri saksi  
Saksi termaklum nenek awal guru mula  
Guru tujuh dua belas jadi  
Nak gerak asal titih debu berbangkit dalam udara.

Berpita-pita di kaki alif, di bayang ba  
Ba cukup, ba genap di sekalian alam  
Hari ketujuh malam kelapan.

Kalau begitu hamba nak titih angin Islam baka.  
Ayah haji, bonda malai dijunjung  
Ayah ghaib di tanah suci  
Bonda hilang di tanah mulia  
Anak duk nanti di pintu asyik

Asyik terayun di pintu nurani  
Asyik terdengar di pintu Singa Maling  
Lalu terbuka pintu asyik berasyik.

Lalu hamba nak titih angin Berma Sakti  
Bertulang tunggal, berlidah fasih, air  
liur masin  
Barang pinta barang jadi  
Barang kehendak barang boleh  
Minta jaga lekas dengan segera  
Jaga atas menjadi payung  
Jaga bawah menjadi pelapit  
Kiri kanan dari mula  
Asal di hadapan Nabi Muhammad  
Minta jaga sebarang jaga  
Jaga lekas dengan segera.

(Hashim bin Mamat, Pasir Putih 1977)

Apa yang digambarkan secara ringkas dalam perbincangan di atas, seolah-olah memperlihatkan masyarakat Melayu itu masih dibalut oleh fahaman-fahaman dan amalan-amalan kuno yang terikat kepada kepercayaan-kepercayaan karut tentang jin, jembalang, hantu dan syaitan. Sesungguhnya tanggapan begitu hanya suatu tafsiran saja. Dalam kehidupan yang nyata, walaupun amalan magis masih tersebar luas di seluruh tanahair (apalagi di Sabah dan Sarawak), namun pada hakikatnya masih wujud dua pilihan kepada anggota-anggota masyarakat itu, iaitu sama ada menggunakan yang tradisional, melalui magis dan perbomohan, atau yang moden, melalui klinik dan doktor. Bagi yang tinggal di pedalaman, pawang dan bomoh menjadi pilihan pertama, bukan saja untuk penyakit-penyakit biasa, apalagi yang sulit dan sukar. Sementara yang tinggal di bandar, hospital dan doktor sebagai pilihan pertama, bomoh dan pawang sebagai pilihan kedua. Untuk penyakit-penyakit yang umum, patah tulang, penagih dadah atau lemah jantung, hingga pada yang ganjil, sihir, buatan orang dan sebagainya, pilihan kedua nampaknya lebih dipercayai oleh masyarakat bandar.

Pada waktu yang akhir-akhir ini, main puteri, ulit mayang dan saba telah berubah kepada bentuk hiburan, untuk tontonan pelancong dan pengkaji budaya, selain daripada unsurnya yang semula jadi iaitu pengubatan dan perbomohan. Namun, dalam persembah-

an-persembahan itu, unsur dan perlakuan magisnya masih tetap dikekalkan. Ringkasnya, walau apa jua tafsiran yang diberikan pada amalan dan tanggapan ini, kenyataannya masih terbukti bahawa mantera, perbomohan dan amalan magis kekal diamalkan secara langsung atau tidak oleh sebahagian besar masyarakat Malaysia hari ini.

## DIKIR

### Erti dan Bentuk

Perkataan dikir dalam bahasa Melayu ialah daripada bahasa Arab *zik'r*, yang bererti:

*The religious ceremony, or devotion, which is practiced by the various religious orders of faqirs, or Derwishes. Almost every religion Muhammadan is a member of some order of faqirs, and, consequently the performance of zik'r is very common in all Muhammadan countries but it does not appear that any one method of performing the religious service of zik'r is peculiar to any order. (Hughes 1964, 703).*

Dalam bahasa Melayu zikir digunakan sebagai:

1. Puji-pujian kepada Allah, diucapkan tanpa lagu atau dengan lagu atau intonasi yang berulang-ulang.
2. Doa atau puji-pujian berlagu; biasanya disampaikan dalam perayaan Maulud Nabi.
3. Lagu atau nyanyian dengan pantun atau puisi yang lain yang dilakukan beramai-ramai. (Teuku Iskandar 1970, 240)
4. Dikir (*chants*) ini termasuk juga mantera, jampi, serapah atau gugusan kata yang didikirkan atau diungkapkan. (Mohd. Taib Osman 1976, 59–60)

Dalam bahasa Melayu, perkataan zikir digunakan di samping dikir (dike), atau jikir (jike). Dalam daerah-daerah yang telah ditinjau untuk tujuan kajian ini, sebutan yang paling menyeluruh

ialah dike; sementara jikey digunakan untuk merujuk kepada sejenis drama Melayu lama yang dikenali sebagai 'jikey'. Permainan ini terdapat di Utara Semenanjung Malaysia, khususnya di Langkawi, Perlis dan di Wilayah Siam Selatan, Satun, Pattani dan Naratiwat (Harun Mat Piah 1979a, 7–9). Namun begitu 'jikey' tidak tergolong ke dalam dikir atau zikir yang dibicarakan dalam kajian ini.

Memang pada dasarnya perkataan zikir itu merujuk kepada perlakuan yang merupakan sebahagian daripada amal ibadat kepada Tuhan, iaitu dengan memuji-muji dan mengagungkan kekuasaan-Nya, serta puji-pujian kepada Rasul-Nya, Muhammad S.A.W. Dalam perlakuan berzikir untuk ibadat ini tidak termasuk pergerakan-pergerakan fizikal seperti lompat atau tari dan tidak juga diiringi muzik dan nyanyian, selain daripada intonasi yang tertentu, sesuai dengan ibadat itu dan bahan bacaan yang dizikirkan. Umumnya juga zikir untuk ibadat ini dilakukan selepas sembahyang – seorang atau berjemaah – atau di majlis-majlis tahlil arwah dan sebagainya.

Bagaimanapun zikir atau dikir yang dibicarakan dalam bab ini tidak lagi berupa ibadat yang sebenar, tetapi telah berkembang menjadi suatu bentuk persembahan atau permainan kesenian (Harun Mat Piah 1980b: 23–27), dengan fungsi yang penting dalam kehidupan masyarakat. Dalam kegiatan-kegiatan ini, ungkapan-ungkapan puitis memuji Tuhan dan Rasul itu telah dinyanyikan dalam lagu dan irama yang tertentu, diiringi dengan bunyi-bunyian serta gerak-gerak fizikal seperti bergerak, berjalan, melompat atau menari (Mohd. Taib Osman 1979, 97). Pergerakan-pergerakan inilah yang sesuai dengan seni katanya, lagu dan nyanyian, alat dan persembahan muzik, tujuan dan tempat diadakan yang menjadi sektor dalam membezakannya dengan yang lain; baik dari segi nama, mahupun pada bentuk dan fungsinya. Justeru itu, dari segi fungsi kita mengenal 'dikir maulud', diadakan di dalam majlis sambutan Maulud Nabi; 'dikir berarak', ketika mengarak pengantin, tetamu kehormat dan lain-lain, 'dikir rebana' yang hampir sama dengan 'dikir berarak', tetapi diadakan ketika majlis sedang berjalan. Dari faktor tempat dan suku kaum yang mengamalkannya, dikenali pula 'dikir Pahang' yang terdapat di Pahang, 'dikir Perak' didapati di Perak dan 'dikir Minang', oleh suku kaum Minangkabau, dengan lagu dan cara yang tersendiri. Berdasarkan isi dan judul, dikenali

pula 'dikir badau' di Terengganu, 'dikir burdah' di Selangor dan Pahang dan 'dikir Nabi Allah' di Negeri Sembilan. Di Johor, tidak dinamakan dikir, tetapi 'kempelingan' yang bermakna 'gendang-gendangan', walaupun isi, bentuk dan fungsinya sama dengan dikir yang lain. Digolongkan juga sebagai dikir, kegiatan-kegiatan yang sama fungsinya, tetapi tidak tergolong sebagai permainan kesenian, iaitu marhaban, berzanji, endoi dan nazam. Namun demikian, endoi dan nazam tidak dibicarakan di sini kerana daripada bentuk dan fungsinya, puisi tersebut telah tergolong ke dalam bentuk tertentu, iaitu syair dan nazam (lihat Bab IV).

Seperti yang dierangkan oleh *Kamus Dewan* di atas tadi, istilah dikir merangkumi juga permainan-permainan kesenian yang sama asalnya, tetapi telah hilang unsur-unsur agamanya hingga menjadi lebih dekat kepada hiburan, seperti 'dikir laba', 'dikir barat', 'dikir rebana kering', 'dikir rebana asal' dan 'dikir timur', semuanya terdapat di Kelantan, 'dikir lotah' di Perak dan 'beduan' di Perlis. Tetapi dalam kajian ini jenis-jenis tersebut tidak dibicarakan. Pertama, mungkin kerana bentuk puisinya telah tergolong ke dalam genre yang lain, misalnya pantun dan syair, dan keduanya, pada tanggapan penulis, perkataan dikir dalam istilah-istilah itu adalah merujuk kepada bentuk persembahan, bukan bentuk puisi. Sedangkan dikir yang menjadi tumpuan kajian ini ialah suatu bentuk puisi dengan ciri-ciri yang tersendiri, berbeza daripada genre-genre puisi yang lain. Kajian ini juga tidak menganggap jampi, mantera dan serapah sebagai dikir, baik pada bentuk persembahan maupun bentuk puisi, seperti yang disebutkan oleh Mohd. Taib Osman. Ini kerana, pada kenyataannya mantera dan jampi tidak didikirkan beramai-ramai seperti perlakuan dalam dikir; dan ia juga tidak merupakan kegiatan ibadat seperti yang dimaksudkan untuk makna zikir.

Suatu ukuran yang penting digunakan dalam kajian ini ialah bahasa; iaitu bahasa Melayu. Kerana itu, walaupun terdapat pelbagai jenis dan bentuk dikir daripada pelbagai daerah di Malaysia, pilihan kita untuk pembicaraan hanya tertumpu pada yang berbahasa Melayu seluruhnya, seperti dalam "Dikir Nabi Allah" dan yang bercampur Arab dan Melayu seperti dikir laba dan berzanji. Dari segi bentuknya ketiga-tiga jenis dikir ini tergolong sebagai puisi bebas, iaitu terdiri daripada ungkapan-ungkapan

sejajar yang puitis, tetapi tidak mempunyai bentuk yang tertentu dari segi berangkap atau tidak; jika berangkap tidak tentu jumlah barisnya dalam serangkap, jumlah perkataannya dalam sebaris, memakai rima atau tidak. Sesuatu untai dikir mungkin terbina bersama bentuk-bentuk yang lain, khususnya syair dan pantun. Dan sesuatu untai atau rangkap dapat melengkapkan satu keseluruhan idea.

Bahan-bahan teks bagi genre ini juga amat terhad, baik pula jumlah mahupun pada penyebarannya. Untuk dikir laba tidak terdapat bahan bertulis dan tidak juga ada kajian yang lengkap terhadapnya, selain daripada sebuah latihan ilmiah di peringkat Sarjana Muda (lihat Mohd. Nazir Hassan, UKM, 1976/77). Bagi berzanji hanya sebuah bahan bertulis karya Haji Jamaluddin Hashim (1972) dan bagi dikir Nabi Allah, terdapat tiga versi teks, yang merupakan kelainan daripada versi yang sama, masing-masing dari Kampung Senaling, Kampung Talang dan Kampung Kayu Ara; ketiga-tiganya dari daerah Kuala Pilah, Negeri Sembilan. Untuk mendapatkan gambaran yang agak jelas, di bawah ini dibicarakan bentuk-bentuk tersebut dengan beberapa contoh yang sesuai:

#### *Dikir laba*

Seni kata dikir laba jelas berada dalam peringkat peralihan, iaitu selain daripada bahasa Arab yang betul dan bermakna, terdapat pula bahagian yang merupakan campuran Arab dan Melayu, kata-kata Arab yang tidak bermakna dan akhirnya bahasa Melayu yang baik dan bermakna. Walau bagaimanapun kata-kata Arab yang digunakan dan isi keseluruhan suatu untai dikirnya tidak berunsur keagamaan seperti yang terdapat dalam marhaban dan berzanji atau dikir Nabi Allah. Ikuti contoh di bawah dalam lagu yang berjudul "Ayo Seke".

Siapa yang pakai baju biru  
 Yang duduk di situ  
 Memandangkan aku  
 Hatiku merasa rindu.  
*Ayo seke, hei, biluhana*  
*Bilaituma bithawal fu'adi*  
*Yasata 'ilaflala*  
*Bitijarti*  
*Biluttulu biha wal tumala*

*Sakilal-alwa  
Bawal gul mali, ra'al berana  
Ihla ghaura biwayal alayala  
Wayali waya ra'bi  
Hai Kuntum hail minal alal kunfal  
Waya hu'ala ala 'alam*

Wahai jika adik pandai menari  
Lenggok lenggang goyang-goyang kaki  
Kalau sudah tak ada jalan lagi  
Tak sah tebeng wat sakit rasa sendi;

(Haji Jamaluddin Hashim 1972, 69)

Rangkap pertama dalam lagu di atas adalah dari sebuah lagu Melayu yang agak popular sedikit masa yang lalu. Dari segi bentuk ia tergolong sebagai syair dan mungkin sajak bebas yang umum dalam seni kata lagu-lagu Melayu dalam tahun 50-an. Rangkap berikutnya dalam bahasa Arab, tetapi tidak semuanya mempunyai erti, baik dari segi perkataan maupun kalimat; misalnya *ayo seke*, *bilaituma*, *alfa'adi*, *yasata*, *bahnawa*, *al-'alwa'* dan *burana*. Kata-kata Arab yang dapat diertikan seperti *bahnawa* (dengan nafsu), *bitijarati* (lihatlah), *'Ala* (di atas), *bawal* (dengan junjungan); namun dalam konteksnya, perkataan-perkataan itu juga tidak memberikan pengertian yang bermakna. Ringkasnya seni kata dikir laba tidak mempunyai nilai puisi yang baik dalam konteks puisi Melayu lama. Atas alasan ini, bentuk ini tidak akan dibicarakan selanjutnya.

### *Berzanji*

Terdapat dua sumber seni kata berzanji, satu dalam bahasa Arab dari *Kitab Majmu'a Maulud Syarif al-Anam* (hlm 72–147); dan yang lain dalam bahasa Melayu, oleh Haji Jamaluddin Hashim, berupa terjemahan daripada bahasa Arab dari puisi berzanji karangan al-Syed Jaafar al-Berzanji, antaranya Madrajus Sa'ud, syarah atas kitab berzanji karangan al-Syekh al-Nawawi al-Bantana.

Terjemahan dalam *Berzanji Arab-Melayu* ini dapat dikatakan baik, sesuai dengan disiplin penterjemahan yang sewajarnya. Seni kata asalnya juga daripada bentuk puisi bebas, dari jenis qasidah yang serima (*monorhyme*), tidak saja dalam sesuatu untai, malah seluruh buku itu dari awal hingga akhir. Bagaimanapun, agak sulit

mengekalkan bentuk demikian dalam bahasa Melayu bukan saja kerana kelainan struktur bahasa dan perbendaharaan kata, tetapi juga kerana tradisi puisi yang berlainan. Perhatikan beberapa contoh di bawah ini, dipetik dari buku tersebut:

### Penggal I

Bismillahir-rahmanir-rahim

- a. Kumulakan karangan ini, dengan nama Tuhan Ilahi  
Kumohon limpahan berkat atas segala nikmat yang telah diberi  
Kuucapkan pujian kepada Allah sebenar-benar puji  
Kuiringkan pujian dengan kesyukuran yang amat tinggi.
- b. Kupohonkan supaya Allah cucurkan rahmat dan selamat kepada junjungan yang nurnya mula-mula dijadikan Allah di alam nyata  
Nur yang berpindah dari keturunan, demi keturunan, yang kesemuanya keturunan mulia  
Kupohonkan semoga Allah, kurniakan keridaan khasnya kepada seluruh keluarga baginda  
Amnya kepada sekalian sahabat, pengikut-pengikut sahabat dan orang-orang terkemudian dari masa ke semasa.
- c. Kupohonkan kurniaan hidayat, menuju jalan yang tenang nyata  
Jaya menuntut elakkan daripada langkah-langkah yang sesat melata  
Kusiarkan sesudut kisah Junjungan dalam gubahan yang indah cipta  
Gubahan dari nasab yang mulia menyedapkan pendengaran siapa juga.

(Haji Jamaluddin Hashim 1972, 8)

Di beberapa tempat lain terdapat bentuk syair dan bentuk bebas seperti dalam puisi moden; sementara yang berbentuk syair merupakan syair Melayu yang tipikal, bebas daripada bentuk Arabnya. Suatu rangkap daripadanya berbunyi demikian:

Memuliakan Muhammad Allah pelihara  
Keturunan baginda suci mulia

Tidak tersentuh sumbang dan cela  
Sajak Adam ke ayah bonda baginda. (hlm 12)

dan sebuah puisi bebas seperti sajak moden:

Suatu rangkaian keturunan yang kaukira tinggi  
berharga dengan segala hiasannya.

Mengalungkan dia oleh bintang jauzah  
di angkasa akan rakan-rakan bintangnya.

Alangkah cantiknya dokoh bertatah permata  
dengan keagungannya.

Dikau permata tunggal yang tiada bandingannya.  
(hlm ll)

Ringkasnya puisi ini hampir sama dengan nazam yang terdiri daripada baris-baris yang panjang, seperti yang dibincangkan dalam Bab IV di atas. Dan daripada ukuran puisi Melayu, berzanji tidak memperlihatkan apa-apa ciri yang menarik, dibandingkan dengan nazam atau dikir Nabi Allah.

#### *Dikir Nabi Allah*

Dikir Nabi Allah terdapat di beberapa daerah di Negeri Sembilan khususnya Kuala Pilah, Jelebu dan Rembau. Puisi ini seluruhnya dalam bahasa Melayu; tetapi dengan melihat pada bentuk dan susunan kata-katanya, besar kemungkinan ia juga diterjemahkan daripada bahasa Arab dengan cara yang sama seperti berzanji tadi. Tetapi sehingga ini tidak diketahui sumbernya yang asal itu. Menurut keterangan para peminat dan pendukung puisi ini, dikir Nabi Allah adalah terjemahan daripada beberapa buah buku agama dalam bahasa Arab oleh seorang ulama bernama Haji Ghafun dan telah pun ada di Negeri Sembilan sejak tahun 1818. Siapakah Haji Ghafun dan apakah signifikannya tahun 1818 itu dalam konteks perkembangan dikir Nabi Allah ini, masih belum dapat dipastikan.

Bentuk puisi dikir ini dapat dikatakan lebih baik. Ungkapan-ungkapannya tersusun dalam baris-baris yang tidak terlalu panjang, mengandungi empat hingga enam perkataan sebaris. Kata-katanya lebih puitis dan kreatif, tidak terikat kepada persamaan rima dan

bentuk seperti dalam berzanji dan nazam. Lihat contohnya di bawah yang menceritakan seksaan di neraka:

Neraka itu tujuh pangkatnya Muhammad  
 Tujuh ratus tahun jauh perjalanan  
 Sedikit pun tidak nikmat di dalamnya  
 Berbagai-bagai jenis azab yang dirasanya.

Jibrail pun berkata kepada Nabi kita  
 "Lihat pula hangatnya api  
 Sebiji sawi jatuh ke bumi  
 Menjadikan hangus langit dan bumi"  
 Allah Sallallah.

Orang neraka rantainya besi Muhammad  
 Hangatnya tidak lagi terpergi  
 Jikalau dihantarkan kepada bukit  
 Hancurlah bukit gugurkan dirinya  
 Allah Sallallah.

(Ihsan Hj Omar Ismail, 1978)

Dua rangkap puisi di atas sesungguhnya tergolong ke dalam satu untai yang sama, iaitu rangkap kedua adalah sambungan kepada kata-kata Jibrail dalam rangkap pertama. Tetapi bentuk dikir Nabi Allah sengaja dibuat dengan begitu rupa; setiap untai mungkin menceritakan suatu tajuk dan terdiri daripada beberapa rangkap; atau suatu tajuk diceritakan dalam beberapa untai yang berasingan, menjadikannya berpenggal-penggal. Setiap penggal dimulai dengan suatu kalimat yang berakhir dengan kata 'Muhammad', misalnya: "Allahumma Salli'ala Muhammad", atau "adalah rumah di dalam syurga Muhammad" atau seperti tajuk-tajuk di atas. Dan setiap rangkap diakhiri dengan selawat atas nabi seperti di atas, atau "Allah, Allah di Tanah Makkah". Kalimat akhir ini, dalam persembahannya, dilakukan dengan nada suara yang tinggi dan dalam lagu yang lain daripada teks seluruhnya. Perhatikan contoh lain yang memberi ingat kepada mengerjakan sembahyang:

Tatkala kita pergi sembahyang Muhammad

Banyaklah langkah kamu yang tiada terbilang

Suatu ilmu yang tiada hilang  
Kepada akhirat Jami' maka ditimbang.

Di hadapan kadi Rabbul Jalil  
Barang hukumnya terlalu adil'  
Barang dikatanya terlebih benar  
Jika berat daun ke kanan, lebih amalnya  
Masuklah kamu ke dalam syurga Jannatun Naim.

Dengan redanya Allah Tuhan kita  
Jikalau berat daun ke kiri, kurang amalnya  
Masuklah kamu ke dalam neraka  
Binasalah dirinya dengan merah kepada Tuhan  
Allah Sallallah. (hlm 43)

Pada beberapa tempat dalam diktir ini terdapat baris-baris syair yang tipikal – empat baris serangkap, empat perkataan sebaris, dengan rima a-a-a-a – bersama dengan ungkapan-ungkapan yang berima, tetapi tidak tergolong sebagai syair; misalnya:

Segala itulah mula terjali Muhammad:

Tuhan kita itu Tuhan yang sungguh  
Hukumannya terang seperti suluh  
Terang di surat bilangan sifat yang dua  
puluhan  
Itulah tali yang amat teguh.

Setengah manusia banyak cenderung  
Sehari dan semalam demikian jua makan  
dan minum  
Sudah terikut perangai hantu syaitan  
Hawa nafsu tidak ditolakkan  
Tidaklah sampai datang menghadap ke  
hadrat Tuhan  
Allah Sallallah (hlm 85–87)

Rangkap pertama menepati ciri syair empat baris, dengan rima a-a-a-a, walaupun baris ketiga lebih panjang daripada syair yang biasa. Rangkap berikutnya hampir sama dengan nazam iaitu jika disusun dalam dua baris serangkap dengan rima a-a, a-a, atau serima. Perhatikan:

Setengah manusia banyak cenderung  
Sehari dan semalam demikian jua makan dan minum

Sudah terikat perangai hantu syaitan  
Hawa nafsu tidak ditolakkan.

Selain daripada itu terdapat untai-untai yang lebih menyerupai syair: empat perkataan sebaris, tetapi tidak dalam empat baris serangkap. Setiap baris berima sama (*monorhyme*); jelasnya hampir sama dengan qasidah Arab. Yang lebih menarik, untai di bawah ini hampir sekali dengan "Syair Perahu" oleh Hamzah Fansuri (lihat Doorenbos 1933, 18–19):

Nabi Allah Nabi Muhammad  
Sampailah masa dengan waktu  
Datanglah angin segala kelengkapan  
Belayarlah perahu Sidang Budiman.

Wujud Allah nama lautnya  
Ilmukan Allah nama perahunya  
Imankan Allah nama kemudinya  
Yakinkan Allah nama juragannya  
Zahir dan batin nama lantainya  
Tawakal akan Allah nama kelasinya  
Tauhidkan Allah nama suaranya  
Lailahaillallah nama talinya  
Agamakan Allah nama anak dayungnya  
Selawatkan Nabi nama muatannya  
Astaghfirullah nama sauhnya  
Allahu Akbar nama anginnya  
Wallahuaklam nama rantaunya  
Kudrat dan iradat nama negerinya  
Fakir yang sabar datang mengerjakan  
dianya  
Kepada Tuhan di dalam hadisnya.

Sifat yang dua puluh hendak menghafazkan  
Taat orang itu kepada Tuhan  
Yang bersifat Jalal dan Jamal  
Serta qidam dan baqa.

Nabi kita Adam yang pertama dijadikan  
Nabi Allah Muhammad yang akhir zaman  
Allah Sallallahi alaihi wassalam.

(hlm 82–84)

### Bentuk Prosa

Seperti dalam teka-teki dan mantera, tidak kurang pula didapati ungkapan-ungkapan yang tidak tergolong sebagai puisi, tetapi lebih dekat kepada prosa. Hanya di dalam penyampaiannya, dengan rentak dan lagu yang sama seperti pada puisi, bentuk demikian sama saja kesannya seperti bentuk-bentuk yang lain itu. Perhatikan sebuah contoh:

Ibrahim Nabi Allah Ibrahim Muhammad

Nabi Allah Ibrahim itu hidupnya empat puluh  
Lima tahun tatkala berperang dengan Nimrud  
Lama berperang tiga hari tiga malam  
Dapat dibakarnya api segedang gunung  
Turun ayat di dalam Quran yang tiga puluh  
Di dalam dunia ini, tak usahkan hangus  
Hangat pun tidak.

Allah Sallallah (hlm 49–50)

Ringkasnya, dari segi bentuk dan struktur, dikir Nabi Allah ini lebih jelas menggambarkan puisi bebas dari segi puisi lama. Penciptaan semestinya memiliki kebolehan daya cipta yang amat baik, hingga ia berjaya melahirkan ungkapan-ungkapan puitis yang indah, tepat dan yang lebih penting mencapai maksud yang dikehendaki. Dalam mencipta puisinya, ia tidak terkongkong kepada konvensi yang ada dalam tradisi puisinya, tetapi menggunakan dengan bijaksana sebagai alat (*device*) untuk merangsang kejayaannya. Rasakan bagaimana puitisnya ungkapan-ungkapan di bawah ini:

Orang neraka azabnya tidak lagi terhingga Muhammad:

Azab neraka bukan sedikit  
Ular dan kala semuanya menggigit.  
Sakitnya bukan alang-kepalang  
Sakitnya lantas ke dalam tulang  
Tidaklah kita merasai senang.

Kulit dan daging dimakan api  
Di sanalah kita tidakkan mati.  
Allah Sallallah.

(hlm 60–61)

Daripadauraian dan contoh-contoh yang diberikan bagi dua jenis dikir di atas – berzanji dan dikir Nabi Allah – berzanji dapat dikatakan tidak memiliki banyak kepelbagaian. Ini mungkin kerana sifatnya sebagai terjemahan atau adaptasi yang langsung daripada puisi Arab. Justeru mengekalkan bentuk dan isi, menjadikan nilai puisinya berkurangan dibandingkan genre lainnya. Baris-barisnya lebih panjang, tidak terdapat aspek-aspek kesejarahan yang menimbulkan keindahan dan sedikit sekali penggunaan rima yang semula jadi seperti dalam pantun dan syair, dan amat jarang pula pembinaan untai yang terdiri daripada kombinasi pelbagai bentuk seperti dalam dikir Nabi Allah.

Walau bagaimanapun, terdapat juga persamaannya dengan genre puisi Melayu lainnya, seperti prosa berirama, khususnya dalam cerita-cerita penglipur-lara Melayu, iaitu *Hikayat Sulung Jawa*, *Hikayat Terung Pipit*, *Hikayat Selindung Bulan Kedah Tua*, atau "Puteri Lindungan Bulan Kedah Tua". Persamaan itu pun hanya pada aspek pemakaian bunyi sama (atau bersajak) pada baris akhir setiap kalimat. Tetapi, berzanji mungkin tertakluk kepada bentuknya yang asal, yang lebih terikat kepada puisi Arab, khususnya qasidah. Perkataan-perkataan yang digunakan terkawal dan mempunyai erti yang sesuai dalam kalimat berkenaan. Sementara dalam prosa berirama, khasnya dalam cerita-cerita yang dirujuk, perkataan-perkataan tersebut mungkin berupa frasa rangka (*frame phrases*) yang tidak begitu bermakna, selain daripada fungsinya yang utama untuk mengadakan rima. Perhatikan contoh berzanji di bawah ini:

Kupohonkan kurniaan hidayat, menuju jalan  
yang tenang nyata  
Jaya menuntut elakkan daripada langkah-  
'langkah yang sesat melata  
Kusiarkan sesudut kisah Junjungan dalam  
gubahan yang indah cipta  
Gubahan dari nasab yang mulia menyedapkan  
pendengaran siapa juga.

Atau dalam bentuk yang lebih panjang:

Masa itu kaum bangsa baginda masih rapat  
hingga hal Junjungan mencela sembahhan

berhalia dan mengajak mereka menyembah  
Ilahi  
Mereka pun bersikap menentang, melakukan  
permusuhan tidak tabik kecuali  
Hebat benar derita, ditanggung oleh pihak  
Muslimin, maka pada tahun kelima, mereka  
berpindah ke negeri Habsyi  
Junjungan tidak berpindah, dan baginda dibela  
oleh bapa saudara baginda Abu Talib, yang  
orang-orang Makkah memang segangkan dia  
dan menghormati.  
..... dan seterusnya.

Dikir Nabi Allah, seperti yang dapat dirasakan dari contoh-contoh yang diberikan di atas dan yang mengikuti kemudiannya, dapat dikatakan lebih puitis, lebih lincah dan lebih dekat kepada tradisi puisi Melayu. Baris-barisnya yang pendek, membawa rentak dan irama yang hampir sama seperti dalam nazam, talibun atau teromba. Seterusnya contoh di bawah ini:

Tujuh ratus tahun jauh perjalanan  
Sedikit pun tidak nikmat di dalamnya  
Berbagai-bagi jenis azab yang dirasakannya.

Dikir ini juga mempunyai untai-untai yang terbina melalui gabungan genre-genre lain, khususnya syair, dan bentuk demikian agak luas pula penggunaannya. Perhatikan contoh di bawah:

Tuhan kita itu Tuhan yang sungguh  
Hukumnya terang seperti suluh  
Terang disurat bilangan sifat yang dua puluh  
Itulah tali yang amat teguh.

Penggunaan rima a-a-a-a dalam puisi ini menggolongkannya sebagai syair, tetapi baris ketiganya tidak begitu terikat kepada konvensi empat perkataan sebaris. Keadaan begini membuktikan adanya kebebasan mengadakan kepelbagaian yang membantu melahirkan keindahan dan kemantapan isi.

Bentuk serima yang umum terdapat dalam puisi Arab dan beberapa genre puisi Melayu, terdapat juga dalam dikir Nabi Allah; misalnya contoh di bawah ini:

Wujud Allah nama lautnya  
 Ilmukan Allah nama perahuanya  
 Imankan Allah nama kemudinya  
 Yakinkan Allah nama juragannya  
 Tawakal akan Allah nama kelasinya.  
 .... dan seterusnya.

Dari segi rima, bahkan daripada sumber asalnya, iaitu "Syair Perahu" oleh Hamzah Fansuri, puisi di atas adalah syair; tetapi dalam bentuknya yang ada di sini, seluruh untainya terbina oleh baris-baris yang berurutan, menjadikannya lebih dekat kepada qasidah Arab, atau nazam Melayu. Bezanya, di dalam nazam, untai-untainya terbina dalam urutan dua baris serangkap, dengan rima a-a, a-b atau serima.

Ringkasnya terdapat juga kepelbagaian dalam dikir Nabi Allah. Dan, walaupun keadaan demikian tidak terdapat dalam berzanji dan marhaban, genre dikir masih dapat membuktikan adanya kebebasan berkreatif, di samping maksud utamanya untuk menyampaikan ajaran-ajaran agama. Kepelbagaian begini akan lebih banyak pula jika zikir-zikir lainnya yang sekarang masih dalam bahasa Arab – antaranya dikir maulud, dikir Pahang, dikir rebana dan kempelingan – diterjemah atau diberi adaptasi dalam bahasa Melayu. Kemungkinan begini memang dapat diyakini kerana telah ada usaha-usaha yang sedang dilakukan ke arah itu.

### **Analisis Isi dan Fungsi**

Tema dan isi puisi dikir (zikir), secara keseluruhan dapat dikatakan sama saja dengan nazam, seperti yang telah dibincangkan terdahulu. Kedua-duanya berunsur agama, mengandung pengajaran tentang akidah dan ibadat kepada Allah S.W.T. Dengan persamaan itu menjadikan perbezaan antara kedua genre tersebut lebih jelas terletak pada bentuknya; iaitu nazam sebagai bentuk terikat, merupakan syair dua baris serangkap, dengan rima a-a, a-b atau serima; sedangkan dikir sebagai bentuk bebas, tiada ketentuan dari segi rangkap, baris dan rima. Walau bagaimanapun terdapat juga perbezaan pada bidang dan keluasan tema dan isi yang dirangkumi oleh kedua-dua genre itu. Nazam pada umumnya menceritakan dengan terperinci riwayat hidup Rasulullah di samping pengajaran yang lain, khususnya rukun iman, yang dihuraikan dengan begitu terperinci.

Dikir pula, yang terbahagi kepada beberapa jenis, lebih jelas merupakan petikan-petikan ringkas daripada beberapa kisah yang menarik mengenai Rasulullah, keluarga dan sahabat-sahabatnya, di samping pengajaran yang lain yang umumnya berkisar pada rukun Islam yang lima.

Dalam dikir berzanji, seluruh penceritaannya tertumpu pada kehidupan Rasulullah, dari waktu kelahirannya, kisahnya semasa kecil, menerima wahyu, menyampaikan seruan Islam, peristiwa israk dan mikraj, berhijrah ke Madinah dan memperkuatkan kedudukan Islam. Dan sebagai yang terdapat dalam nazam, keseluruhan penceritaan lebih merupakan pemerian yang terperinci mengenai mukjizat dan sifat-sifat kelebihan Rasulullah. Petikan di bawah ini yang mengikuti kisah kelahiran baginda, mengandung pujian dan sanjungan yang dimaksudkan:

Muka bercahaya laksana suria  
Menyinari malam, gilang-gemilang  
Malam keputeraan Junjungan mulia  
Lahir agama yang benar terang.  
Waktu itu Aminah ibu  
Anak Wahab keturunan mulia  
Megah bangga sepenuh kalbu  
Mencapai kurnia tiada setara.

Aminah melahirkan seorang perdana  
Mengatas Siti Mariam yang dara  
Keputeraan anggapan si kafir durjana  
Bala menimpa menghancurkan mereka.

Bertalu suara, bersorak ria  
Suara ghaib, berbunyi nyata  
Muhammad lahir, ke alam dunia  
Penghuni alam bersukacita.

(Haji Jamaluddin Hashim 1972, 18)

Pada menggambarkan sifat keunggulan Muhammad yang tidak menyimpan dendam, tidak ingin membala keburukan dengan keburukan, misalnya terhadap penyeksaan yang diterimanya daripada

kaum Musyrikin di Taif, berzanji ini menggambarkannya demikian:

Akhirnya, pulanglah Junjungan ke Makkah hampa  
baginda didatangi Malaikat yang  
menjaga gunung, mohon izin menghancurkan  
kaum itu semua sekali.

Junjungan berkata, "Jangan; Saya  
mengharapkan keturunan mereka, akan  
beriman dan berbudi.

(Haji Jamaluddin Hashim 1972, 45)

Dalam *Nazam al-Jawahir al-Saniyyah*, kisah yang sama digambaran dengan nada yang hampir sama:

Maka jawabkan dia oleh Rasul yang mulia  
Dengan jawab yang baik dan kata yang mulia.

"Tapi kuharap dari Tuhan yang Kaya  
Mengeluarkan anak yang mengesakan Dia  
Daripada salbi itu yang cela  
Lagi tiadalah pula mensyirikkan Dia."

(Syed Muhammad al-Idrus 1939, 19)

Dikir Nabi Allah dapat dikatakan lebih menarik dengan isi dan penceritaannya yang pelbagai, serta seni katanya yang lebih puitis dan indah. Kisah Rasulullah tidak diceritakan dengan terperinci, tetapi diberikan secara petikan pada tempat-tempat yang ada hubungannya dengan motif dan pengajaran yang muhu disampaikan. Ikuti beberapa contoh di bawah ini:

Nabi Allah nabi Muhammad  
Tatkala di langit yang ketujuh lapis, Nur  
Allah namanya Muhammad  
Zahir di Makkah di Tanah Madinah, Si Abu'l  
Qasim namanya Muhammad  
Tatkala di langit yang pertama, Ma'jud  
namanya Muhammad  
Tatkala di langit yang kedua, Mahmudun  
namanya Muhammad  
Tatkala di langit yang ketiga, Mahsudun

PUISI MELAYU TRADISIONAL

namanya Muhammad  
Tatkala di langit yang keempat, Safiun  
namanya Muhammad  
Tatkala di langit yang kelima, Mustafa  
namanya Muhammad  
Tatkala di langit yang keenam, Hasan dan  
Husin ya Habibullah namanya Muhammad  
Tatkala di langit yang ketujuh, Syamsul  
anbia namanya Muhammad  
Allah sallallah,

(hlm 14 -15)

Mengenai kewafatan Rasulullah, yang tidak terdapat dalam nazam dan zikir yang lain, Dikir Nabi Allah menceritakannya demikian:

Nabi Allah nabi Muhammad  
Tatkala ia kembali pulang ke rahmat Allah  
Taala  
Kepada awalnya waktu subuh  
Segeralah nabi pergi ke masjid sembahyang  
subuh  
Sudah sembahyang segeralah nabi berjalan  
pulang  
Tiba ke rumahnya berbaring-baring tidur  
menelentang  
Hatinya takut tulang gementar  
Malaikat pun turun beriring-iring  
Israil dan Mikail bersaing-saing  
Rumahnya gadang menjadi sesak bertindih-  
tindih berhimpit-himpit  
Itulah mulanya sakitnya panjang  
Di tanah Makkah  
Allah sallallah.

Nabi Allah nabi Muhammad  
Tatkala ia berjalan pulang ke rahmat Allah  
Diiringkan Malaikat membawa tasbih  
Seperti kilat yang maha ringkas  
Membawa ke langit yang ketujuh  
Bertemu di jalan Nabi Allah Adam

Terlalu suka Nabi Allah Adam  
Siang puasa malam berbuka.  
Allah sallallah.

(hlm 20–21)

Diceritakan juga kisah Rasulullah berangkat ke masjid, menjadi imam fardu Jumaat. Baginda dipapah oleh Saidina Ali lalu disongsong oleh orang ramai. Baginda pun duduk di tempat imam dan Bilal pun segera melaungkan azan. Dan selepas Junjungan membaca khutbah, Bilal lalu berdiri qamat dan seterusnya Junjungan bersama makmum melakukan sembahyang, mulai dari mengangkat takbir hingga memberi salam, wirid dan doa. Dengan penceritaan demikian, pengarang tidak saja memerikan perlakuan salat Rasulullah, tetapi juga, dengan cara yang lebih berkesan menghuraikan ibadat sembahyang seperti yang dikehendaki dalam rukun sembahyang yang tiga belas. Dengan tujuan demikian tidaklah menjadi aneh, bila penceritaan kisah ini menyusul kemudian daripada kisah kewafatan Rasulullah. Sesungguhnya pula zikir ini bertujuan menghuraikan rukun dan syarat sembahyang yang sempurna; kerana dalam ketigatiga versi zikir ini terdapat huraian yang panjang mengenai rukun sembahyang yang tiga belas itu. Sebahagian daripadanya diberikan di bawah sebagai contoh:

Tuhan kita itu cahayanya terang  
Kepada Nabi kita hukumnya terang  
Wajib disembah siang dan malam  
Tiga belas pula rukun sembahyang.  
Allah sallallah.

Niat itu rukun yang pertama  
Jalal dan jamal takyun pertama  
Nabi kita Adam mula pertama  
Kepada dada Adam tersurat nama.  
Allah Sallallah.

Berdiri betul itu rukun yang kedua  
Jalal dan Jamal hendak dibawa juga  
Mencari Tuhan tiada bersua  
Kepada Jannatunnaim  
maka bersua Allah sallallah.

Allah humma salli 'Ala Muhammad

Memberi salam itu rukun yang kedua belas  
Mengerjakan sembahyang petang dan pagi  
Ke sana dan ke sini engkau hendak berjalan  
Hati yang mukmin diharu syaitan  
Waktu sembahyang jadi ke belakang  
Maka menang nafsu yang garang.  
Allah sallallah.

Allah humma salli 'Ala Muhammad

Tertib itu rukun yang ketiga belas  
Faedahnya besar di akhirat yang kemudian  
Menempuh titian yang terkepung tiada bertali  
Meniti di titian tidak seperti  
Seribu tahun lama menanti  
Mendarat dan mendaki demikian lagi  
Berat di kanan tinggal di titian  
Berat ke kiri api akan mencapai  
Keraslah iman tinggal di titian  
Jatuh ke neraka panggang bergayut-gayut  
Muka berlasus dijilat api  
Menengok ke bawah ular ada menanti  
Takut engkau di sana  
Ke mana engkau hendak lari  
Elok di dalam dunia berbuat bakti jangan berhenti-henti  
Allah sallallah.

(hlm 89 - 90)

Pengajaran-pengajaran yang lain juga disampaikan dengan cara yang sama, iaitu secara tidak langsung, bersama kisah-kisah yang menarik. Misalnya dalam contoh di atas pengarang tidak saja menghuraikan aturan dan kesempurnaan ibadat sembahyang, tetapi menekankan juga kepentingannya sebagai bekalan di hari kiamat, khususnya ketika bertimbang dosa dan pahala dengan melalui tisi Siratul-Mustaqim. Sesungguhnya masih banyak contoh demikian yang lebih panjang dan terperinci, terutamanya mengenai syurga, neraka dengan pelbagai nikmat dan sengsara di dalamnya. Sebahagian daripada contoh-contoh ini diberikan dalam Lampiran sekadar perbandingan.

Dalam dikir yang lain, seperti marhaban, dikir berarak atau dikir rebana, ditemui juga tema dan isi yang sama iaitu puji-pujian dan sanjungan kepada Rasulullah S.A.W. serta doa supaya Allah memberkatinya dan sekalian umatnya. Dalam dikir rebana dan dikir Pahang terdapat juga beberapa rangkap pantun yang digunakan sebagai selingan; sedang seluruh ungkapan zikirnya masih dalam bahasa Arab. Setakat ini amat sedikit ditemui contoh-contoh yang menunjukkan adanya usaha menterjemahkan ungkapan-ungkapan zikir itu ke bahasa Melayu, misalnya seperti yang dilakukan terhadap dikir marhaban di bawah ini:

Bagi unta mengasihimu tak pernah dilihat  
Menjalani malam merawanlah sangat  
Awan meredupkan bayang berdarjat  
Segala malaikat atasmu bersalawat.

Pohon datang menyembah kepadamu  
Merendahkan diri meratap merayu  
Memohon pertolongan wahai kekasihku  
Kijang yang liar damping ke sisimu.

Tatkala mengikat ahli Mahamil  
Bagi angkatannya mereka memanggil  
Bercucuran air matanya bila ditampil  
Hamba berkata, "Bangkitlah hai dalil.

Hantar apalah utusan hamba  
Ayuhan asyik yang sangat hiba  
Ke arah rumah yang sangat dicinta  
Petang dan pagi yang nyata."

Tergoyang-goyang kepala makhluk alam  
Kepada yang 'berdahi amat bercahaya'  
Laksana dahaga berahi dendam  
Rindu mengeluh tiada terhingga.

Berpihak manusia beberapa kaul  
Hairan memahamkan hakikat-Mu yang ghali  
Tuan hambalah kesudahan segala rasul  
Penuh kesyukuran tuan hamba yang tertinggi.

(Ihsan Zaini bin Hj Khairuddin, Batu Pahat 1978)

Contoh di atas menjelaskan suatu kemungkinan bahawa puisi dikir dalam bahasa Arab itu dapat diterjemahkan ke bahasa Melayu dengan memelihara bentuknya yang asal; (secara kebetulan ungkapannya dalam bentuk empat baris serangkap dan lapan suku kata sebaris). Usaha demikian samalah seperti yang telah dilakukan terhadap berzanji yang digunakan dalam kajian ini dan mungkin terhadap zikir Nabi Allah, seperti yang telah disebut mula-mula tadi. Jika proses penterjemahan ini berterusan dan terjemahan-terjemahan itu menjadi popular dalam penggunaannya yang sebenar, hasilnya nanti tentulah akan menambah kepelbagaiannya bentuk dan isi kepada genre puisi Melayu lama itu, khususnya pada genre yang digolongkan di sini sebagai dikir atau zikir ini.

Tema dan isi dikir/zikir yang dibincangkan di atas dengan sendirinya menjelaskan fungsi dan penyebarannya yang agak penting dan luas pula. Sesuai dengan fungsinya yang bersifat keagamaan, dikir dapat digunakan dalam kebanyakan kegiatan masyarakat, baik yang berunsur agama maupun yang tidak. Dikir Nabi Allah yang dibicarakan dalam bab ini tersebar dengan luasnya di beberapa daerah di Negeri Sembilan, terutamanya di Kuala Pilah, Rembau dan Jelebu. Ia diadakan sebagai acara dalam majlis-majlis perkahwinan, berkhatan, khatam Quran, sambutan Maulud, israk dan mikraj dan sebagainya, sama ada berasingan atau bersama dengan acara-acara yang lain. Dalam suatu contoh yang didapati di Kuala Pilah, dikir ini rupanya dapat juga dipersembahkan oleh pemain-pemain bongai dalam suatu pertunjukan bongai yang diadakan pada malam selepas majlis berkhatan. Perhatikan dikirnya di bawah ini sekadar menggambarkan keadaan yang dimaksudkan:

Sudahlan mati seisinya alam Muhammad  
 Timbun-bertimbun bak rupanya bangkai  
 sampailah ia nan tiga hari nan tiga malam  
 Turunlah angin nan silang nan seli  
 Membuangkan bangkai masuk ke laut  
 Gunung yang tinggi habislah runtuh  
 Hancurlah besi dengan batu  
 Laut dan tanah bercampur gaul  
 Bumi pun sudah menjadi bubur  
 Kayu di rimba sudahlah hancur  
 Bumi dan langit sudah hancur

Langit yang ketujuh sudah bergulung  
 Bintang di langit jatuh mengerdip  
 Bulan di langit sudahlah padam  
 Matahari di langit sudahlah hilang  
 Hari yang terang sudahlah kelam  
 Guruh gegak-gempita bak bunyinya alam  
 Itulah tandanya hari kiamat  
 Allah sallallah.

(Ihsan Abdullah Mohd. Yusuf, Kuala Pilah 1978)

Dikir marhaban diadakan terutamanya dalam majlis-majlis khatam Quran, naik buaian atau berendoi, menyambut maulud dan sebagainya. Penggunaannya tersebar di seluruh Semenanjung, dengan bentuk, bahan dan lagu yang sama; tetapi sehingga ini masih belum terdapat versi Melayunya, selain daripada yang di Batu Pahat Johor. Keadaan yang sama terdapat juga dalam dikir berarak atau dikir rebana, di Negeri Sembilan dan dikir Pahang, di beberapa daerah di negeri Pahang atau kempelingan yang tedapat di Johor, khususnya di daerah Batu Pahat. Dikir-dikir ini diadakan dalam majlis-majlis perkahwinan, sambutan-sambutan rasmi, pesta dan keramaian-keramaian yang lain, baik di peringkat kampung, mahupun di peringkat daerah dan negeri.

Bagi dikir yang tidak berunsur keagamaan, seperti dikir laba di Kelantan, fungsinya lebih jelas sebagai unsur hiburan dan pengisi acara; iaitu samalah dengan dikir barat yang juga terkenal di Kelantan. Dan oleh kerana isi dan fungsinya tidak berunsur agama, dikir-dikir jenis ini tidaklah digolongkan ke dalam genre dikir/zikir yang dibicarakan ini.

Mungkin perlu disebutkan di sini bahawa wujud suatu aspek yang umum antara jenis-jenis dikir tersebut; iaitu aspek pertandingan. Selain daripada pertandingan secara formal seperti dalam Pesta Dendang Rakyat yang diadakan khusus untuk tujuan pertandingan, kerap pula berlaku pertandingan yang tak rasmi, iaitu apabila lebih daripada satu pasukan didapati bermain dalam satu pertunjukan yang sama. Bagi dikir laba, aspek yang menjadi ukuran ialah pada lagu; banyaknya variasi lagu, beberapa lagu atau kelainan dalam sesebuah lagu, sesuainya lagu dengan seni kata, yang umumnya direka sendiri oleh kumpulan tersebut, serta sedap atau indahnya lagu pada pendengaran penonton. Bagi dikir Nabi Allah, selain dari-

pada rentak dan lagu secara keseluruhan, aspek yang diutamakan ialah pada kebolehan penzikir 'mengherik' atau mengeluarkan nada suara yang tinggi, terutama pada bahagian-bahagian akhir sesuatu untai yang dizikirkan. Kemampuan dan kebolehan istimewa seperti ini, bersama keindahan lain menurut ukuran penonton, menjadikan suatu kumpulan lebih diminati dan lebih ramai penontonnya dari pada kumpulan yang lain. Aspek ini akhirnya menjadi ukuran yang muktamad dalam menentukan pasukan yang menang.

Ringkasnya, seperti genre-genre puisi Melayu lama yang lain, dikir/zikir dapat dikatakan masih digemari dan luas penyebarannya dalam masyarakat Melayu hari ini. Seni katanya yang puitis, baik dalam bahasa Melayu, Arab, campuran daripada kedua-duanya, satu yang sebahagiannya tidak dapat dimengerti sama sekali, seperti dalam dikir laba, pada umumnya masih juga berjaya menyampaikan maksud dan pemikirannya kepada anggota-anggota masyarakat. Melalui isinya yang mengandungi nasihat dan pengajaran, dikir-dikir ini berjaya mengingatkan masyarakat penggunanya terhadap nilai-nilai keagamaan yang baik sebagai kaum Muslimin yang sempurna.

Sesungguhnya itulah isi dan maksud puisi yang dikenali sebagai dikir atau zikir di sini; iaitu untuk menyampaikan pengajaran yang baik dan amanat-amanat yang bernes sebagai panduan hidup bermasyarakat. Dan isi dan fungsi demikian tidak pula terbatas kepada jenis dikir yang dibicarakan di sini, iaitu yang berunsur agama dan mendekati konsepnya yang asal iaitu pujian-pujian kepada Allah dan Rasul. Dalam kegiatan-kegiatan yang lain juga, yang dikenali sebagai 'dikir', isi dan maksud mengajar itu dibawa dan menjadi ciri kepada kegiatan-kegiatan itu, ini termasuklah dikir barat, dikir hadrah, dikir endoi, bahkan dikir rodat. Umumnya persoalan yang disentuh dan diperkembangkan dalam persembahan-persembahannya merupakan masalah-masalah dan isu-isu semasa yang telah diketahui umum. Ini meliputi soal-soal agama, pendidikan, perniagaan, pentingnya bersatu padu, memelihara keamanan negara, bahkan meliputi soal dadah, samsu haram, antisorok, rancangan kemajuan Malaysia dan paling baru Amanah Saham Nasional.

Dalam waktu yang akhir-akhir ini dikir barat bukan saja terbuka kepada peminat-peminat dari daerah-daerah tertentu, khusus-

nya di tempat asalnya, Kelantan, tetapi telah dijadikan sebahagian daripada acara sebaran am melalui radio dan televisyen. Dengan cara ini ia bukan saja sebagai alat hiburan, tetapi seolah-olah berfungsi pula sebagai alat untuk menyampaikan amanat-amatan pemerintah atau kerajaan kepada rakyat, sesuai dengan dasar dan harapan pemerintah pada masa-masa yang berkenaan. Dengan sifatnya yang luwes begini, yang dapat menerima pelbagai isi, maksud, peranan dan fungsi; dikir barat dan dikir lainnya akan terus digemari dan terus berkembang untuk diabadikan dalam pelbagai kegiatan hidup masyarakat. Dan, keadaan demikian tidak saja pada dikir, bahkan hampir dalam semua bentuk dan genre puisi Melayu lama.

## BAB IX

# KESIMPULAN

MELALUI kajian ini telah dibicarakan dengan agak terperinci puisi Melayu lama itu berdasarkan pendekatan yang disarankan iaitu dari segi genre, isi dan fungsi. Daripada pembicaraan itu telah dirumuskan beberapa kesimpulan yang pada umumnya diberikan pada akhir setiap bab, bahkan mungkin di akhir sesuatu bahagian dalam sebuah bab. Namun demikian terdapat beberapa kesimpulan dasar yang perlu ditekankan dan diperlihatkan hubungannya dengan pembicaraan kajian ini secara keseluruhan.

Pertama, dari segi genre, kajian ini memberikan kesimpulan bahawa puisi Melayu lama itu dapat dibahagikan kepada 12 genre, masing-masing mempunyai ciri yang tersendiri. Sifat atau ciri yang signifikan bagi sesebuah genre mengasingkannya daripada yang lain. Setiap genre telah diberikan satu istilah teknik yang khusus; iaitu pantun, syair, nazam, gurindam, seloka, teka-teki, talibun atau sesomba, prosa berirama atau prosa lirik, teromba, peribahasa berirama, mantera dan zikir/dikir. Sesuatu istilah teknik bagi suatu genre diberikan definisi dan batas pencirian yang mengandung sekurang-kurangnya satu perbezaan aspek yang minimum. Hasilnya, seperti yang dapat dilihat dan dirasakan, keadaan yang bertindan-tindih dan mengelirukan (seperti yang telah dibincangkan dalam Bab II) telah dapat diselesaikan. Sekurang-kurangnya, sebanyak 1422 untai puisi yang digunakan dalam kajian ini telah pun diasingkan ke dalam genre-genre yang tersendiri, seperti yang disarankan.

Sebaliknya harus pula dipertimbangkan sesuatu istilah yang digunakan dapat dianggap sebagai label yang ditampalkan kepada

suatu rangka pemerian, definisi, tanggapan atau ciri. Dengan demikian sesuatu istilah itu dapat dipinda, dirubah, digantikan dengan yang lain atau digugurkan sama sekali. Misalnya istilah 'bahasa berirama' telah digugurkan untuk diganti dengan yang baru: talibun atau sesomba; sedang konsepnya yang dasar iaitu bahasa berirama sebagai ungkapan pemerian (*descriptive passages*) dalam cerita-cerita penglipur lara, terus dikekalkan. Sebaliknya istilah talibun yang dahulunya difahami sebagai pantun yang melebihi empat baris serangkap telah digugurkan daripada membawa konsep tersebut. Lantas, pantun empat kerat tetap tergolong sebagai suatu bentuk pantun, dan talibun dengan konsep yang hampir sama dengan bahasa berirama atau sesomba, dikekalkan.

Kajian ini juga telah mengadakan batas pentafsiran yang lebih konkret, iaitu dengan melihat secara berasingan bentuk sesebuah genre, tema atau isi, dan fungsinya dalam masyarakat. Dengan begitu aspek-aspek itu dapat diasingkan; misalnya untuk penjenisan dan klasifikasi sesebuah genre seharusnya berdasarkan bentuk atau struktur luaran, ertinya tidak dikelirukan dengan isi dan fungsi, seperti yang dilakukan sebelumnya. Jadinya, seperti dalam penjenisan pantun, 'pantun kanak-kanak', 'pantun kasih', 'pantun budi' atau 'pantun dagang' tidak dianggap sebagai jenis atau klasifikasi pantun, tetapi lebih tepat sebagai sebahagian daripada tema atau isi. Demikian juga 'syair romantis', 'syair sejarah' atau 'syair agama' bukanlah sebagai jenis atau klasifikasi syair, tetapi adalah di antara isi dan pembicaraan puisi syair.

Satu kesimpulan yang lebih penting ialah dalam teori puisi dan kesusasteraan Melayu secara umum. Sehingga ini tanggapan yang ditimbulkan daripada pendapat-pendapat beberapa pengkaji, seolah-olah masyarakat Melayu tidak memiliki tradisi puisinya yang asli. Gurindam, seloka dan mantera kononnya berasal dari India Selatan kerana istilah-istilahnya berasal daripada bahasa-bahasa India, Sanskrit, Hindi atau Tamil. Pantun, yang diakui sebagai pencapaian paling tinggi dalam kesusasteraan Melayu lama, dikaitkan asal usulnya dengan seloka India, wangsalan Jawa bahkan oda Cina. Demikian juga yang terjadi pada genre syair yang mengisi sebahagian besar daripada perasaan dan pemikiran Melayu dikatakan ber-asal dari Arab, semata-mata kerana istilah itu daripada bahasa Arab. Teromba, talibun dan prosa lirik yang digolongkan sebagai '*rude*

*rhythrical verse'* dikatakan berkembang dari daerah Minangkabau dan lebih jauh adalah warisan dari Hindu. Dalam perbincangan seterusnya mengenai asal dan perkembangan puisi Melayu moden, selalu diperkatakan yang puisi itu diperolehi sepenuhnya dari tradisi Barat.

Kesimpulan daripada kajian ini membuktikan pendapat-pendapat seperti itu tidak begitu dapat diterima kerana terlalu berdasar pada pertimbangan bahasa dan sejarah yang masih kabur dan kontroversial sifatnya. Melalui perbandingan antara pelbagai genre puisi tersebut, dari segi bentuk, isi dan pemikiran di dalamnya serta fungsinya yang semula jadi dalam masyarakat dan kebudayaan Melayu, penulis membuat kesimpulan bahawa puisi Melayu lama adalah hasil daripada tradisi Melayu dan dari daerah Kepulauan Melayu; tegasnya tidak dari India, Arab atau Parsi. Apa yang dipercayai berlaku ialah peminjaman istilah-istilah teknik daripada bahasa-bahasa asing yang akhirnya berkembang menjadi istilah kepada bentuk-bentuk yang telah sedia ada atau tercipta kemudiannya dalam tradisi kepuisian Melayu. Hal ini terbukti dengan penggunaan beberapa istilah teknik yang tidak tepat, tidak konsisten dan lebih penting tidak menunjukkan persamaan dengan sumbernya yang asal dalam bahasa-bahasa asing yang berkenaan.

Dalam pada itu tidaklah dinasikan kepentingan pengaruh-pengaruh asing itu terutamanya dalam memberikan warna dan kepelbagaian bentuk dan isi kepada puisi Melayu bahkan kepada kebudayaan Melayu seluruhnya. Pada puisi Melayu moden bentuk luaran dan pembicaraannya, terutama pada peringkat-peringkat awal, jelas menampakkan persambungannya dengan tradisi puisi lama; dan telah pula diakui bahawa perkembangannya yang kemudian adalah hasil daripada keadaan sebelumnya. Ini bererti puisi Melayu moden juga tidak seluruhnya dari tradisi Barat yang digunakan sebagai 'gantian' kepada bentuk yang tradisional. Di sini juga pengaruh puisi Barat atau asing itu lebih jelas untuk memberikan kepelbagaian bentuk, di samping memperluas cara berfikir dan bidang pembicaraan yang tidak saja terbatas pada puisi, tetapi juga pada genre sastera Melayu moden yang lain.

Dalam perbincangan seterusnya pada bab-bab yang berasingan bagi sesebuah genre telah pula diperlihatkan hubungan dalam pelbagai aspek antara genre-genre tersebut. Bentuk dan ciri yang umum

dalam pantun, misalnya empat baris serangkap, empat perkataan sebaris, berima dan lengkap dalam serangkap, terdapat juga dalam syair, gurindam, seloka, talibun, teromba dan mantera. Tema dan isi nazam dan dikir yang khususnya berunsur agama terdapat juga dalam syair, pantun, gurindam dan peribahasa berangkap. Fungsi magis dan ritual yang umumnya terdapat pada mantera ditemukan juga dalam pantun, teromba dan beberapa jenis dikir. Sebaliknya pula terdapat fungsi yang umum bagi semua genre iaitu pada aspek hiburan dan permainan, selain daripada unsur pengajaran dan panduan hidup bermasyarakat.

Sesungguhnya bagi puisi Melayu lama, fungsi merupakan aspek yang amat penting dalam proses penciptaan dan pemakaianya. Hampir seluruh puisinya lahir sebagai hasil daripada keperluan dan penggunaannya dalam kehidupan masyarakat. Pantun, selain menjadi alat komunikasi masyarakat, menimbulkan interaksi dalam kehidupan bercinta dan kasih sayang, menyampaikan rasa dan pengalaman lain, termasuk sedih, benci, gembira, sepi, tersisih dan rindu. Ia juga menyampaikan pengajaran dan panduan supaya berbuat baik, menuntut ilmu, membalias budi dan sebagainya. Pantun juga digunakan dalam pelbagai kegiatan, tidak saja sebagai hiburan dan perhiasan kata, tetapi lebih penting merupakan sebahagian daripada upacara dan istiadat yang mungkin berunsur agama dan magis. Daripada pelbagai kegiatan ini terhasil keragaman bentuk dan isinya dan seterusnya pemakaian dan pencukupan bidang yang lebih luas untuk genre tersebut.

Pelbagai data yang digunakan bagi kajian ini, yang sebahagian besarnya merupakan hasil daripada kerja-kerja lapangan, membuktikan kebenaran pandangan yang dikemukakan di awal kajian ini bahawa puisi tradisional masih berkembang agak subur, dicipta dan dihayati dalam kebanyakan kegiatan hidup masyarakat, tidak saja di daerah-daerah pedalaman, bahkan juga di bandar-bandar dan di kota.

Daripada huraihan dan contoh-contoh yang diberikan bagi setiap genre dalam babnya masing-masing, dapat digambarkan bahawa puisi Melayu lama itu amat kaya dengan kepelbagaiannya bentuk dan isi. Sekurang-kurangnya ada empat genre yang terbina melalui bentuk dan struktur yang berbeza, iaitu pantun, syair, nazam dan bentuk-bentuk tidak terikat yang berbeza, iaitu pantun, syair,

nazam dan bentuk-bentuk tidak terikat yang lain. Daripada bentuk-bentuk yang tidak terikat dapat pula diasingkan ke dalam genre-genre tersendiri berdasarkan perbezaan isi dan fungsi. Dalam kebanyakan genre, khususnya pantun, syair dan gurindam mempunyai pula kepelbagaian yang lain dari segi jumlah baris serangkap, kombinasi pelbagai bentuk dalam seuntai, kelainan rima dan teknik berkait. Dalam aspek-aspek isi dan fungsi, puisi tradisional dapat merangkumi sebahagian besar daripada keperluan, pemikiran dan pengalaman hidup masyarakatnya. Sebuah genre tertentu lebih umum mengandung sesuatu isi dan tujuan tertentu, misalnya syair untuk menyampaikan cerita dan hiburan, berbanding dengan mantera untuk tujuan magis dan pengubatan. Sebuah genre, seperti pantun, dapat pula merangkum pelbagai isi dan fungsi. Kelainan dan kepelbagaian ini, selain daripada menunjukkan kematangan perkembangan puisinya, menyatakan juga tentang adanya kebebasan berkreatif dan kebolehan mempelbagaikan ciptaan, walaupun dalam genre puisi yang dikenal sebagai terikat dan konvensional.

Di sebalik kekayaan bentuk, isi dan fungsi itu, puisi Melayu lama dapat pula dikatakan miskin dari segi penilaian, interpretasi dan pentafsiran yang mengangkat kedudukan dan kepentingannya. Pendekatan, ilmu atau disiplin pengajian puisi (*poetics*) tidak pernah wujud dalam tradisi kaji puisi Melayu, sementara kegiatan kritikan puisi mungkin merupakan gejala yang amat baru. Justeru itu amat sukar untuk mendapatkan hasil pengkajian yang ilmiah, mendalam dan menyeluruh terhadap puisi Melayu lama; oleh penulis atau pengkaji Melayu dari kaca mata dan sudut pandangan bangsa Melayu.

Melihat beberapa aspek yang ditimbulkan daripada kesimpulan-kesimpulan di atas, mungkin berkaitan jika dikemukakan beberapa saranan dalam memperkembangkan dan meneruskan kelangsungan puisi Melayu lama itu dalam perkembangan masyarakat dan kesusastraan semasa. Pertama di peringkat pengajian akademik seharusnya akan lebih banyak minat, usaha dan pemusatan ditumpukan kepada kajian historis dan kritis untuk memahami lebih dekat pemikiran, pandangan hidup dan kemampuan daya cipta masyarakat Melayu. Pada peringkat penggunaannya di kalangan masyarakat, mungkin perlu ditingkatkan, bukan saja pada daerahnya,

bahkan juga isi dan pemikirannya supaya mudah diterima oleh audiennya, di samping menyampaikan maksud yang diharapkan. Akhirnya, pada peringkat penciptaan dan penulisannya, haruslah dapat diketengahkan kepada penyair-penyesia semasa untuk diberikan nafas baru dan kemantapan baru untuk seterusnya digembangkan ke dalam tradisi penciptaan dan penikmatan puisi semasa.

Akhir sekali penulis juga merasakan, bahawa masih terlalu luas bidang pengkajian yang perlu diteruskan dalam bidang puisi Melayu lama. Buku ini baru dapat mengisi secebis daripada keperluan itu. Ringkasnya kajian ini baru mencuba menyelesaikan masalah pembahagian, penamaan dan pencirian genre. Contoh-contoh yang diberikan secara rambang dan agak banyak di sini lebih tepat untuk menunjukkan kepelbagai bentuk dan isi; sedangkan aspek dalamannya, pemikiran dan tanggapan, pengertian dan interpretasi yang lebih mendalam tidak dapat dilakukan. Mudah-mudahan dalam kesempatan lain, atau oleh pengkaji yang lain, aspek-aspek ini dan yang lebih bererti lagi akan dapat pula dijalankan.



Untuk mengelakkan orang yang tidak baik  
Dan untuk mencari jalan yang benar  
Jadi buanglah segala hal yang buruk  
Dan ambillah segala hal yang baik

Bila jalinan dilakukan dengan  
Dalam keadaan yang baik,  
Maka ia akan berjaya

## LAMPIRAN

BAHAGIAN ini mengisi petikan-petikan puisi yang merupakan:

1. Sambungan kepada sesuatu petikan yang telah digunakan dalam kajian.
2. Bahagian sepenuhnya bagi sesebuah potongan yang telah dikutip.
3. Bahagian yang telah disebutkan di mana-mana dalam kajian supaya dirujuk ke dalam Lampiran.

Umumnya petikan-petikan dalam Lampiran ini didapati dari pada sumber yang sama seperti disebutkan dalam kajian; dengan itu mungkin tidak dilanggar perujukannya dalam Lampiran. Perujukan juga tidak dibuat bagi petikan-petikan yang merupakan koleksi dari pada pelbagai sumber yang berlainan dan dalam masa-masa yang berlainan, misalnya bagi teromba dalam adat perkahwinan di Negeri Sembilan.

### *Pantun Rejang: Rejang Sindir Ilmu Perak*

Seharibulan rejangnya kuda  
Kuda aman dari Pasai  
Dipacu lalu ke bandar Selan  
Akhir zaman muda dan bisa  
Tuntutlah ilmu mengenal Tuhan.

Dua haribulan rejangnya kijang  
Kijang mengantuk di rumpun buluh  
Mamakan kaduk di dalam padi  
Tuntutlah ilmu biar bersungguh  
Hidup kita ni akhirnya mati.

Tiga haribulan rejangnya harimau  
Harimau sekuci turun sekawan  
Mati ditikam si janda balu  
Ilmu yang suci tuntutlah tuan  
Kerana suci sempurna fardu.

Empat haribulan rejangnya kucing  
Kucing melompat di atas geta  
Lalu turun ke serambi  
Apalah sudah kejadian kita  
Hidup kita ni akhirkan mati.

Lima haribulan rejangnya simpai  
Simpai karak simpai rotan  
Buat menyimpai kepala toman  
Jangan diikut kehendak syaitan  
Hendaklah patuh kata-kata firman.

Enam haribulan rejangnya lembu  
Lembu sejagat memakan putat  
Mati seekor di kolam mandi  
Hendaklah mengucap dua kalimah syahadat  
Itulah tanda umatnya Nabi.

Tujuh haribulan rejangnya kerbau  
Kerbau sekawan di laman balai  
Turun mandi terkena jerat  
Hidup kita ni janganlah lalai  
Untuk menuju jalan akhirat.

Lapan haribulan rejangnya kambing  
Kambing berjalan berlompat-lompat  
Melompat lalu ke tengah laman  
Menuntutlah kamu jangan terlambat  
Supaya jangan ketinggalan.

Sembilan haribulan rejangnya anjing  
Anjing langsat anjing perburu  
Menyalak lalu susur keramat  
Tauhidlah ketika menghadap guru  
Meminta hakikat Nabi Muhammad.

Sepuluh haribulan rejangnya naga  
Naga di tasik bercula tujuh  
Dilelah ikan berkawan-kawan

Tuntutlah ilmu biar bersungguh  
Jalan yang tidak dimurkai Tuhan.

Sebelas haribulan rejangnya singa  
Singa mengeram di atas bukit  
Menunggu anaknya sedang menyusu  
Ilmu di dunia bukan sedikit  
Tuntutlah tuan yang mana satu.

Dua belas haribulan rejangnya gajah  
Gajah sekawan turun ke paya  
Hendak mencari umbut rumbia  
Hidup kita jangan disia-sia  
Berbuat baiklah sesama manusia.

Tiga belas haribulan rejangnya pelanduk  
Pelanduk bunting turun ke baruh  
Memakan londai di dalam peti  
Sakitnya badan ditinggalkan roh  
Buatlah amal sebelum mati.

Empat belas haribulan rejangnya ikan  
Ikan sekolah habislah mati  
Mati dipanah si batang ubi  
Dengan kehendak Rabbil-azati  
Mana yang bernyawa habislah mati.

Lima belas haribulan rejangnya mayang  
Mayang mengurai malam Khamis  
Seludang jatuh di tengah laman  
Buangkanlah perangai iblis  
Dunia ni sudah akhirnya zaman.

Enam belas haribulan rejangnya babi  
Babi beranak dalam bangsal  
Mati ditimpa tulang bumbungan  
Banyak-banyak Nabi yang munsal  
Tidakkan sama dengan Junjungan.

Tujuh belas haribulan rejangnya helang  
Helang terbang menyapu awan  
Mengintai anak si barau-barau  
Sudah datang seruannya Tuhan  
Mencari ilmu tergagau-gagau.

## LAMPIRAN

Lapan belas haribulan rejangnya jampuk  
Jampuk berbunyi mendayu-dayu  
Rindukan bulan tinggi di awan  
Tuntutlah ilmu janganlah jemu  
Kerana ilmu satu panduan.

Sembilan belas haribulan rejangnya baring  
Baring mengeram di atas cangkat  
Terkena jerat sayung rotan  
Jika alang-alang makrifat  
Siratul-maut dianut syaitan.

Tiga puluh hari sebulan genap  
Padi ditanam dayang Masirat  
Terang suluh cahaya Muhammad  
Itulah tanda jalan akhirat.

(Ihsan Hj Mohd. Wajib Abd. Rahman, Slim River 1976)

*Pantun Si Bongsu Pandai Membilang Malam  
(versi Negeri Sembilan)*

Si Bongsu pandai bilang malam  
Malam ini malam keesa  
Esa di pangsa  
Letak mari di dalam perahu  
Belum kenal dengan biasa  
Apa dibuat orang pun tahu.

Si Bongsu pandai bilang malam  
Malam ini malam kesembilan  
Anak tilan kepala tilan  
Keluh-kesah kepala naga  
Bujang kecil tidur bertilam  
Rambut sehelai pelindung dada.

Si Bongsu pandai bilang malam  
Malam ini malam kesepuluh  
Tetak buluh panjang sepuluh  
Akan penjolok sarang kapas  
Bagaimana hati tak rusuh  
Sangkar sudah burung terlepas.

Si Bongsu pandai bilang malam  
Malam ini malam kesebelas

## LAMPIRAN

Anak ayam turun sebelas  
Mati seekor terpijakkan  
Hati siapa tidakkan belas  
Kata entah ke mana tidakkan.

Si Bongsu pandai bilang malam  
Malam ini malam kedua belas

Anak ayam turun dua belas  
Mati seekor dalam kurungan  
Hati siapa tidakkan belas  
Melihat bujang turun dukungan.

Si Bongsu pandai bilang malam  
Malam ini malam ketiga belas

Geliga mengail pagi  
Dibawa gelombang tangkap ikan  
Entah gila main tak jadi  
Burung terbang diberahikan.

Si Bongsu pandai bilang malam  
Malam ini malam keempat belas

Berempat duduk di pentas  
Cukup berlima dengan gurunya  
Ambillah dakwat dengan kertas  
Barulah kena dengan jodohnya.

Si Bongsu pandai bilang malam  
Malam ini malam kelima belas

Cincin empat hilang lima  
Hilang lagi sebentuk taji  
Sahabat handai lagikan gila  
Inikan pula main tak jadi.

Si Bongsu pandai bilang malam  
Malam ini malam keenam belas

Tanam pisang di tepi paya  
Anak buaya mati berenang  
Malang sungguh nasib saya  
Dapat kak janda beranak enam.

Si Bongsu pandai bilang malam  
Malam ini malam ketujuh belas

Tanam aur betung tumbuh  
Pucuk cemperai ke seberangan  
Ambil cindai panjang tujuh  
Hendak melimbai semangat abang.

LAMPIRAN

Si Bongsu pandai bilang malam  
Malam ini malam kelapan belas  
Anak apan dalam apan  
Mati bersarang di buku buluh  
Entah bertuah entah pendapatan  
Dalam Koran tiga puluh.

Si Bongsu pandai bilang malam  
Malam ini malam kesembilan belas  
Ambil kain panjang sembilan  
Cukup sepuluh dengan rambunya  
Tidur semalam dengan Cik Hitam  
Tinggal peluh dengan baunya.

Si Bongsu pandai bilang malam  
Malam ini malam kedua puluh  
Rumah besar bertingkat timah  
Tingkat satu paduka tuan  
Ke Makkah ke Madinah terlalu payah  
Badan terserah padamu tuan.

Si Bongsu pandai bilang malam  
Malam ini malam dua puluh satu  
Cik murai panjang rambut  
Panjang melilit ibu kaki  
Mendengar cik murai pandai bercerita  
Abang menunggu di Tanjung Jati.

*Pantun Cik Busu Pandai Membilang Malam  
atau Pantun Tiga Puluh (Versi Terengganu)*

Kata Cik Busu pandai membilang malam  
Malam ini malam kese-se  
Parang dewangsa  
Hendak memarang gunung sebuah  
Kata Cik Busu pandai berkata  
Kata sepatah tiada berubah.

Kata Cik Busu pandai membilang malam  
Malam ini malam kedua-we  
Dua di kayu anak  
Mari disumpit dengan sumpitan  
Orang berdua berdukung anak  
Macamlah gunung bersahutan.

## LAMPIRAN

Kata Cik Busu pandai membilang malam  
Malam ini malam ketiga-ge

Dua tiga genggong kupatah  
Hendak menggenggong si batang padi  
Dua tiga gunung kulangkah  
Hendak mencari bagai di hati.

Kata Cik Busu pandai membilang malam  
Malam ini malam keempat-pat

Pisau lipat diulas geta  
Ilmu jatuh ke padang  
Bagai disipat bagi dipeta  
Haram tak jemu mata memandang.

Kata Cik Busu pandai membilang malam  
Malam ini malam kelima-ma

Empat lima meragi kain  
Manak sama sepatu puan  
Empat lima muda yang lain  
Tidaklah sama abang seorang.

Kata Cik Busu pandai membilang malam  
Malam ini malam keenam-nam

Hanyut bluh dari kerena  
Jerjak di pangkal titi  
Duduk tak senang fikir tak nyaman  
Tidur sekejap dimasuk mimpi.

Kata Cik Busu pandai membilang malam  
Malam ini malam ketujuh-juh

Bintang tujuh tertinggal enam  
Jatuh sebutir ke Majapahit  
Pelukkan tubuh rasa tak nyaman  
Baru kutahu badan tak baik.

Kata Cik Busu pandai membilang malam  
Malam ini malam kedelapan-pan

Serindit makan di papan  
Berisi maka tumbuh  
Eloklah sungguh si kain kafan  
Balut ke mati baharu sungguh.

Kata Cik Busu pandai membilang malam  
Malam ini malam kesembilan-lan

Lembut liut si ngekor tiram

LAMPIRAN

Lembut lemah kepala naga  
Lemahlah sungguh corek dipegang  
Hendak memujuk si ngorang ada.

Kata Cik Busu pandai membilang malam  
Malam ini malam kesepuluh-luh  
Tetak buluh panjang sepuluh  
Hendak mengait sarang tempua  
Apalah guna suruh-menyuruh  
Tipulah daya kita berdua.

Kata Cik Busu pandai membilang malam  
Malam ini malam kesebelas-las  
Pucuk empelas makan di api  
Masak sampai ke surau raja  
Rawan belas di dalam hati  
Abang hendak bergurau saja.

Kata Cik Busu pandai membilang malam  
Malam ini malam kedua belas  
Dua belas dayung ke Jambi  
Putik nanas di dalam kebun  
Adik tak belas memandang kami  
Siang berpanas malam berembun.

Kata Cik Busu pandai membilang malam  
Malam ini malam ketiga belas  
Tiga belas dayung kupaut  
Hendak mendayung tanah seberang  
Di dalam hati terkelam-kabut  
Tidak kulupa abang seorang.

Kata Cik Busu pandai membilang malam  
Malam ini malam keempat belas  
Empat belas bulan mengambang  
Bulan belum purnama lagi  
Hendak mengingat kepada abang  
Hendaklah simpan di dalam hati.

Kata Cik Busu pandai membilang malam  
Malam ini malam kelima belas  
Lima belas bulan purnama  
Embung meniti di hujung padi  
Kalaualah adik tak sebutkan nama  
Tidur sekejap dimasuk mimpi.

## LAMPIRAN

Kata Cik Busu pandai membilang malam  
Malam ini malam keenam belas  
Enam belas selindung tiang  
Bulan menampuk di balik awan  
Kalau rindu di dalam hati  
Bawa berjalan supaya hilang.

Kata Cik Buku pandai membilang malam  
Malam ini malam ketujuh belas  
Tujuh belas kapal yang datang  
Kapal datang darinya Jawa  
Di dalam hati luka kan hilang  
Kalau boleh bertentang mata.

Kata Cik Busu pandai membilang malam  
Malam ini malam kelapan belas  
Tujuh belas racik kutahan  
Kena seekor si burung merpati  
Kalaulah adik tidaklah tahan  
Abang ni rasa semacam nak mati.

Kata Cik Busu pandai membilang malam  
Malam ini malam kesembilan belas  
Sembilan belas kereta pedati  
Sarat bermuat buah sena  
Kalau abang rasa nak mati  
Adik pun hendak mati bersama.

Kata Cik Busu pandai membilang malam  
Malam ini malam kedua puluh  
Dua puluh seldadu datang  
Seldadu balik dari berperang  
Abang tidak mati dahulu  
Kalaupun mati bertindih tulang.

Kata Cik Busu pandai membilang malam  
Malam ini malam kedua puluh satu  
Dua puluh satu bilangan Melayu  
Satu liku bilangan Jawa  
Sama-sama menanggung malu  
Kalaupun mati kita berdua.

Kata Cik Busu pandai membilang malam  
Malam ini malam kedua puluh dua

LAMPIRAN

Dua puluh dua pokok kurebab  
Kurebab jua pokok ketapi  
Kalaualah adik pandai mengubat  
Carilah ubat supaya tak mati.

Kata Cik Busu pandai membilang malam  
Malam ini malam kedua puluh tiga  
Dua puluh tiga terendak Cina  
Habis sebutir dimakan api  
Biarlah kita mati bersama  
Barulah puas di dalam hati.

Kata Cik Busu pandai membilang malam  
Malam ini malam kedua puluh empat  
Dua puluh empat bubu kutahan  
Kena seekor ikan sembilang  
Perkara mati belumlah tentu  
Abang dahulu atau kemudian.

Kata Cik Busu pandai membilang malam  
Malam ini malam kedua puluh lima  
Dua puluh lima nabi pilihan  
Manakan sama nabi Muhammad  
Mati dahulu atau kemudian  
Itu semua daripada rahmat.

Kata Cik Busu pandai membilang malam  
Malam ini malam kedua puluh enam  
Dua puluh enam sedaung kupasang  
Kena seekor si rusa jantan  
Sudahlah patut terima balasan  
Kerana kita derhakakan Tuhan.

Kata Cik Busu pandai membilang malam  
Malam ini malam kedua puluh tujuh  
Dua puluh tujuh bilangan bulan  
Tujuh likur bulan puasa  
Sudah patut terima balasan  
Kerana kita berbuat dosa.

Kata Cik Busu pandai membilang malam  
Malam ini malam kedua puluh enam  
Dua puluh lapan kuda berlari  
Bila nak sama kereta pedati  
Adik hai adik janganlah lari  
Biarlah sama kita ni mati.

## LAMPIRAN

Kata Cik Busu pandai membilang malam  
Malam ini malam kedua puluh sembilan  
Dua puluh sembilan geluk kukandar  
Jatuh sebutir menimpa kaki  
Ayuhan abang marilah dekat  
Supaya kita bersama mati.

Kata Cik Busu pandai membilang malam  
Malam ini malam ketiga puluh  
Tiga puluh bulan yang cukup  
Malam esok harilah raya  
Ayuhan anak yang terkutuk  
Kubunuh engkau orang derhaka.

### Pantun-pantun yang Merupakan Sebahagian daripada Mantera-mantera dalam Permainan Ulit Mayang atau Main Mayang

(dipetik dari Skeat, hlm 647 - 658)

1. Dianggit mayang dianggit  
Dianggit di pantat pasu  
Kupanggil dayang kupanggil  
Kupanggil turun bersatu.
2. Kuanggit mayang kuanggit  
Kuanggit di pokok tua  
Kupanggil dayang kupanggil  
Kupanggil turun berdua.
3. Kuanggit mayang kuanggit  
Kuanggit di pokok geliga  
Kupanggil dayang kupanggil  
Kupanggil turun bertiga.
4. Kuanggit mayang kuanggit  
Kuanggit di pokok perepat  
Kupanggil dayang kupanggil  
Kupanggil turun berempat.
5. Kuanggit mayang kuanggit  
Kuanggit di pokok delima  
Kupanggil dayang kupanggil  
Kupanggil turun berlima.

6. Kuanggit mayang kuanggit  
Kuanggit di pokok kerena  
Kupanggil dayang kupanggil  
Kupanggil turun berena.
7. Kuanggit mayang kuanggit  
Kuanggit di pokok buluh  
Kupanggil dayang kupanggil  
Kupanggil turun bertujuh.
8. Bidadari turun bertujuh  
Pinjam tukul pinjam landasan  
Nak menukul tengkuk pari  
Pinjam dusun pinjam laman  
Menurunkan anak bidadari.
9. Pinjam tukul pinjam landasan  
Nak menukul belakang pari  
Pinjam dusun pinjam laman  
Menurunkan anak bidadari.
10. Pinjam tukul pinjam landasan  
Nak menukul gelabang pari  
Pinjam dusun pinjam laman  
Menurunkan anak bidadari.
11. Pinjam tukul pinjam landasan  
Nak menukul gerongok pari  
Pinjam dusun pinjam laman  
Menurunkan anak bidadari.
12. Pinjam tukul pinjam landasan  
Nak menukul insang pari  
Pinjam dusun pinjam laman  
Menurunkan anak bidadari.
13. Pinjam tukul pinjam landasan  
Nak menukul ekor pari  
Pinjam dusun pinjam laman  
Menurunkan anak bidadari.
14. Gali-gali halia  
Dapat sejari dua jari  
Cari-cari padang mulia  
Menurunkan anak bidadari.

## LAMPIRAN

15. Gali-gali bonglai  
Dapat sejari dua jari  
Cari-cari padang yang selesai  
Menurunkan anak bidadari.
16. Gali-gali serai  
Dapat sejari dua jari  
Cari-cari padang yang sukur  
Menurunkan anak bidadari.
17. Gali-gali temu  
Dapat sejari dua jari  
Cari-cari padang yang jemur  
Menurunkan anak bidadari.
18. Gali-gali kunyit  
Dapat sejari dua jari  
Cari-cari padang yang sulit  
Menurunkan anak bidadari.
19. Gali-gali lempoyang  
Dapat sejari dua jari  
Cari-cari padang yang loyang  
Menurunkan anak bidadari.
20. Tatang puan tatang cerana  
Tatang di tengah taman  
Datanglah tuan datanglah nyawa  
Datanglah duduk di tengah laman.
21. Tatang puan tatang cerana  
Tatang puan pagi hari  
Datanglah tuan datanglah nyawa  
Datang naik membasuh kaki.
22. Tatang puan tatang cerana  
Tatang biduk di selasar  
Datanglah tuan datanglah nyawa  
Datang duduk nak bentang tikar.
23. Tatang puan tatang cerana  
Tatang dengan kait padinya  
Datanglah tuan datanglah nyawa  
Datang dengan baik hatinya.

LAMPIRAN

24. Tatang puan tatang cerana  
Tatang biduk Seri Rama  
Datanglah tuan datanglah nyawa  
Datanglah duduk bersama-sama.
25. Tatang puan tatang cerana  
Tatang dengan tunjang nyirih  
Datang tuan datanglah nyawa  
Datanglah duduk makan sirih.
26. Tatang puan tatang cerana  
Tatang dengan lembah pakunya  
Datanglah tuan datanglah nyawa  
Datang dengan tingkah lakunya.
27. (Maka datanglah bidadari bertenggek di atas mayang itu)
28. Kulansar mayang kulansar  
Kulansar ke cawan putih  
Dihantar dayang dihantar  
Dihantar ke awan putih.
29. Kulansar mayang kulansar  
Kulansar ke cawan hitam  
Kuhantar dayang kuhantar  
Kuhantar ke awan hitam.
30. Kulansar mayang kulansar  
Kulansar ke cawan hijau  
Kuhantar dayang kuhantar  
Kuhantar ke awan hijau.
31. Kulansar mayang kulansar  
Kulansar ke cawan biru  
Kuhantar dayang kuhantar  
Kuhantar ke awan biru.
32. Kulansar mayang kulansar  
Kulansar ke cawan merah  
Kuhantar dayang kuhantar  
Kuhantar ke awan merah.
33. Kulansar mayang kulansar  
Kulansar ke cawan ungu  
Kuhantar dayang kuhantar  
Kuhantar ke awan ungu.

LAMPIRAN

34. Kulansar mayang kulansar  
Kulansar ke cawan kuning  
Kuhantar dayang kuhantar  
Kuhantar ke awan kuning.

*Pantun Alif-Ba-Ta : Perak*

- (<sup>۱</sup>) Alif terdiri ambangan bayu  
Pelajaran anak Raja Jumah  
Akal bicara mohon dipayu  
Wujud anggota habis lemah.
- (<sup>۲</sup>) Balang berisi nila kesumba  
Minuman anak raja kayangan  
Harap hati minta perhamba  
Supaya kasih panjang-panjangan.
- (<sup>۳</sup>) Telepot bunga teratai  
Tumbuh di jambang nila wanta  
Reput atap dengan lantai  
Abang tak lepas dari bercinta.
- (<sup>۴</sup>) Tebu ladang dimakan kuda  
Lada diramas dalam telaga  
Manak padan dengan saya  
Tuan emas saya tembaga.
- (<sup>۵</sup>) Jalan terus pergi Madinah  
Negeri tu hebat di tengah padang  
Di atas langit di bawah tanah  
Saya tak lepas puan seorang.
- (<sup>۶</sup>) Hasil mahsul Perak negeri  
Tiga million lebih dan kurang  
Rata desa sudah kucari  
Tak ada bandingan tuan seorang.
- (<sup>۷</sup>) Khairadi nama Raja  
Tabal di gunung nila wanta  
Ngilur zamzam dan kerja  
Menyatakan tuan sangat bercinta.
- (<sup>۸</sup>) Di masjid makam Rasul  
Sikap kerawang tebuk kalimah  
Jika terpandang sifat yang usul  
Wujud anggota habis lemah.

LAMPIRAN

- (ذ) Zamzam telaga di Makkah  
Minuman orang naik haji  
Berapa zaman telah yang sudah  
Belum pernah mungkir janji.
- (ع) Raden Galuh tengah bergunting  
Bergelar Raden Gayang Gelima  
Dari jauh saya didamping  
Dah dekat bena tak bena.
- (ص) Zalika bangsa Arab  
Jalikia bahasa Melayu  
Berapa zaman menanggung harap  
Kepada tuan mohon dipayu.
- (س) Sahwajid Osman Basah  
Negeri dialah dilanggar Jepun  
Jangan tuan berhati susah  
Kepada saya kasih terhimpun.
- (ض) Singa mengerang di tepi gunung  
Mati ditimpa batang jarak  
Tengah malam bangkit termenung  
Serasa tuan datang menggerak.
- (ص) Sabar sungguh Raja Sahperi  
Orang berarak di tengah pekan  
Wahai adinda jagalah diri  
Jangan menyesal di hari kemudian.
- (ض) Dhadun melompat dalam taman  
Peladang berdiri tujuh kepala  
Wahai adinda ambilku teman  
Buat penyapu di dalam istana.
- (ط) Taat sungguh alim ulama  
Beramat malam dan siang  
Tuan umpama sekuntum bunga  
Abang nak taruh di muncung balang.
- (ظ) Zalim sungguh raja di Makkah  
Membunuh orang tak berdosa  
Berapa zaman telah sudah  
Baru sekarang bertentang mata.

## LAMPIRAN

- (e) Taat sungguh raja di Perak  
Beramal tak berhenti  
Kasih tidak dapat dijarak  
Hampir maut abang mati.
- (f) Ghalat sungguh raja di Acheh  
Belanda nak ambil negeri  
Walau adinda muda kasih  
Tuan belakan kerana mati.
- (g) Papan bahtera Nabi Allah Noh  
Bawa sekali nespipa sampai  
Tuan umpama minyak yang penuh  
Mari ke mari abang nak pakai.
- (h) Kapak tajam dari beliung  
Nak nebang kayu berdurri  
Tuan di atas kemuncak payung  
Saya di bawah menjunjung duli.
- (i) Lam jelalit lam jelajah  
Tongkat dipakai sultan ulama  
Adik berserah kepada Allah  
Hidup mati biar bersama.
- (j) Mayam im bun mayam indelan  
Tiga dengan mayam kematu  
Tuan timbul saya tenggelam  
Umpama sauh merapat batu.
- (k) Nirwana Banin negeri yang indah  
Kota berlapis dengan tembaga  
Berapa zaman telah yang sudah  
Umpama baru bertentang mata.
- (l) Wakil fadli kadi Maulana  
Mengarah orang tidak berhenti  
Ibarat tuan sekuntum bunga  
Saya nak simpan di dalam hati.
- (m) Harap hati Raja Muda  
Niat hendak menjadi sultan  
Wahai adinda nyawa kakanda  
Kasih jangan tuan putuskan.

LAMPIRAN

- (Y) Layang-layang terbang melayang  
Hinggap kemuncak balairung seri  
Siapa bilang abang tak sayang  
Di bawah awan payah dicari.
- (\*) Ya sungguh kata ulama  
Maharaja singa turun bersiram  
Tuan umpama sekuntum bunga  
Itu sebab kanda geram.
- (S) Ya sungguh gagak di padang  
Datang gajah dibelaikannya  
Tengah sedap mata memandang  
Takdir Allah dileraiannya.

*Syair atau Nazam yang Mendekat Bentuk Syair Arab  
(Dari Bentuk Hidayat Al-Salikin)*

Scorang manakala hati dia  
Dengan angan-angannya tertiuup daya.

Dan bergaduh gundah dengan loba akan  
kaya dunia yang bukan tempat kaya.

Dan terkelam-kabut dengan asap jahil  
Serta ajab sumaaah takbur dan riak.

Lalai ia tidak mempeduli akan  
Yang utama baginya dan sigia.

Memperdaya ia akan amal ibadat  
Dan maasi dilekas akan dia.

Lupa akan huru-hara maut  
Padanya yang tidak ia bersedia.

Maka sangatlah terlebih besar untung  
Ahli tasawuf, salha dan aulia.

Ikhlas tulus taat ibadat mereka  
Itu bagi Tuhan maha tinggi la.

Mereka itulah yang senang di akhirat  
Tempatnya tu serta Rasul dan anbia.

LAMPIRAN

Fikir kamu hai yang lalai akan mati  
Jangan jadi umur kamu sia-sia.

Hari umur itu manakala luput  
Sia-sia tidak lagi pulang ia.

Seorang manakala zahir hubungannya  
Menyesal maka apalah upaya.

Dunia ini tempat ambil bekal bawa mati  
Ambil oleh kamu akan dia.

Sebaik-baik bekal itu takut akan  
Allah, sebut pada ayat yang mulia.

Takut akan-Nya tu memperus adah.  
Dan mencemerlang ia akan rahsia.

Hamba ini menasihat akan kamu  
Walau diri hamba ini terpedaya.

Bunga pandang sebab wanginya dicium  
Walau pohonnya tu duri ada ia.

Mengaji kamu akan Hidayat al-Salikin  
Yang menunjuk bagi kamu jalan raya.

Kitab amat nyata padanya berkat  
Dan manfaat sangat rata dengan dia.

Hamba tarikh akan tahun capnya itu  
Boleh jadi maklum bagi manusia.

Dengan kata hamba keji kitab Kiai  
Abdul Samad telah baik tabik ia.

(Abd. Samad al-Palambani, hlm 150–151)

*Syair Rejang: Rejang Tujuh Hari  
Perak*

Bismillah itu mulaan kalam  
Dengan nama Allah Khalikul Alam  
Adam diturunkan ke dalam alam  
Dunia gelap semuanya kelam.

Adam terkejut tidak terperi  
Di Pulau Serindit namanya negeri  
Menangis Adam berperi-peri  
Mengenangkan nasib badan sendiri.

Jibrail turun membawa wahi  
Adam disuruh sembahyang sendiri  
Sembahyang Adam satu rakaat  
Membawa iman dengan taat.

Fajar terbit waktu subuh  
Adam duduk sedang bertelimpuh  
Ia menyesal serta mengeluh  
Tubuhnya hangat serta berpeluh.

Bangkitlah Adam lalu berdiri  
Membaca qunut sambil berperi  
Mengangkat tangan menyusun jari  
Matahari terbit sianglah hari.

Sukanya Adam tidak terperi  
Ke sana ke mari terlari-lari  
Mencari Hawa isterinya sendiri  
Daripada pagi malamlah hari.

Esok dibilang hari Sabtu  
Lepas Sabtu berganti Ahad  
Tuntut ilmu biar bermutu  
Hendaklah dibuang perangai yang jahat.

Dibilang pula harinya Ahad  
Lepas Ahad berganti Isnin  
Hendaklah dibuang perangai yang jahat  
Supaya boleh menjadi mukmin.

Dibilang pula hari Isnin  
Lepas Isnin berganti Selasa  
Supaya boleh menjadi mukmin  
Jikalau mati tiada berdosa.

Dibilang pula hari Selasa  
Lepas Selasa berganti Rabu  
Jikalau mati tiada berdosa  
Boleh berjumpa Tuhan Yang Satu.

## LAMPIRAN

Dibilang pula harinya Rabu  
Lepas Rabu berganti Khamis  
Boleh berjumpa Tuhan Yang Satu  
Jangan diikut syaitan iblis.

Dibilang pula harinya Khamis  
Lepas Khamis berganti Jumaat  
Jangan diikut syaitan iblis  
Hendaklah beriman dengarnya taat.

Dibilang pula harinya Jumaat  
Lepas Jumaat tamatlah sudah  
Hendaklah beriman dengannya taat  
Di dalam syurga tempat yang indah.

Tamatlah sudah Rejang Tujuh Hari  
Dikarang oleh orang tua bahari  
Hendaklah sekalian kita ambil perhati  
Kerana di dalamnya ada bukti.

(Haji Mohd. Wajib Abd. Rahman, Slim River 1976)

### Syair Kisah Perang Rokam

Bismillah itu mula dikarang  
Syair sudah dibuat orang  
Sebab kampung jadi berperang  
Cukai lama sudah terbuang.

Alhamdulillah mula disurat  
Syair ini sudah dibuat  
Tahun ini hikmat berat  
Datang daripada kafir murtad.

Hukuman datang berdetap-detap  
Ini tanda hukuman tetap  
Orang mendengar banyak meratap  
Bangsal dibuat tiada beratap.

Hukuman ini amat derhaka  
Banyak orang tiada suka  
Hingga meninggalkan rumah tangga  
Raja dimakan api neraka.

LAMPIRAN

Tatkala anak dara Syamsuddin duduk di pintu  
Pegang penyapu seorang satu  
Tuan Rokam datang naik ke situ  
Hendak dipukul dengan penyapu.

Setelah Rokam sangat gembira  
Serta ia balik ke Melaka  
Dibawanya Kabul dengan segera  
Masuk dalam kereta kuda.

Kisah itu suatu nazam  
Bila hari sudah malam  
Jam berbunyi pukul dua malam  
Senapang berbunyi berdegum-degam.

Syamsuddin dengar Tuan Rokam datang  
Ia iari lintang-pukang  
Dikejar Kabul dari belakang  
Dipukul dengan punggung senapang.

Telah Syamsuddin berasa sakit  
Mintak tolong lalu menjerit  
Datang pula orang bukit  
Datang ia bukan sedikit.

Orang datang bunyi menderam  
Warna bulan cahaya kelam  
Orang tiba di pangkal Gelam  
Senapang bunyi berdegum-degam.

Orang penuh sekalian ditembak  
Dapat khabar Pak Mat gemuk kena tembak  
Seberat berteriak ibu dan bapak  
Dalam parit badan tercampak.

Cukup-cukup sayu hati dia  
Mak Uda Leha lari dalam paya  
Panjar nyiur setakut dua  
Bertanyakan Tuan Rokam di mana dia.

Tersebut kisah seorang muda  
Kecut bin Raman di mana dia  
Ditangkap Rokam dengan segera  
Disuruh panjat pokok kelapa.

## LAMPIRAN

Kani cibai kani hampu  
Jahat sekali orang Melayu  
Hutang gua kain belacu  
Habis lari semuanya itu.

Cina kelentong banyak yang rugi  
Orang Melayu habis lari  
Hutang kain baju banyak lagi  
Minta tangguh lepas potong padi.

Padi di sawah dimakan tempua  
Dimakan pula lotong kera  
Orang lain sara bara  
Tak kira tua ataupun muda.

Begitu bunyi syair ringkasan  
Perang Rokam empunya kesan  
Cik Besah membaca lancar lisan  
Ingatan sungguh pada perasaan.

Ahli syair empunya barang  
Encik Hasan nama seorang  
Kisahnya dapat diurai terang  
Orang Serkam kononnya berperang.

Begitulah adanya semangat orang Serkam  
Menentang kehendak orang Rokam  
Macam-macam membuat ragam  
Tak mudah dapat dicengkam.

*Talibun: Lagu Gubang Panjang, Kuala Pilah, Negeri Sembilan*

I Ahai ... hai ...

Lancang kuning lancang pusaka  
Lancang Datuk Batin Alam  
Rimbun bernama raja seranti  
Batang bernama raja berdiri  
Urat bernama raja bersela  
Kulit bernama raja selimut  
Dahan bernama si ara menyampai  
Peting bernama si ular lidi

#### LAMPIRAN

Daun bernama si layang-layang  
Pucuk bernama si tuan tunggal  
Pucuk malam pucuk pagi  
Pucuk air di dalam talam.

#### II Ahai ... hai ....

Dibakar kemenyan putih  
Merak berasap ke langit  
Turun ke udara berkasih  
Turun ke abang ke abang jua  
Turun ke tarah ke tarah jua  
Ketam-ketam jua  
Pahat-memahat jua  
Cukup hari nan tujuh  
Siap sudah lancang kuning  
Hendak teman di dalam parit  
Mati ditembak anak kuda  
Kalau ada teman yang baik  
Sedang, sedang cakap jadi nakhoda  
Tanah merah  
Tebang dengan pisau raut  
Ambil surat tengok darah  
Berapa pulau di dalam laut  
Sembilang merah matanya  
Mati dilapik buku buluh  
Habis sudah bilangannya pulau  
Pulau seratus sembilan puluh.

#### III Abai ... hai ....

Hijap jurumudi  
Ara tinggi gedungnya angin  
Empat setinggi alam  
Angin golek angin golai  
Turun angin kepak kepoi  
Turun angin tarik lembu jantan  
Kiri datang kanan datang  
Depan datang belakang datang  
Sekali melambung lancang kuning  
Berderak terang tembaga  
Sekali merentap lancang kuning  
Pecah rembeaga  
Sekali melenggok lancang kuning  
Dua tiga tebing terlampaui

## LAMPIRAN

Bagai pucuk dilancarkan  
Malam belut ketil ekor  
Macam kumbang putus tali  
Macam kucing lepas senja  
Beginilah lamanya lancang kuning  
Belayar bak kini.

### IV Amboi ... ii ... lah ngamboi ....

Tetak sigai si daun dayu  
Hendak menyigai penaung limau  
Budak kecil bidai bahu  
Pinggang ramping secekak bunga.  
Bunga telipuk layu  
Muka tiga sekali  
Bukan anak engkau, anak geliga  
Anak tilan di dalam padi  
Bak dicana rupanya dahi  
Mati ditakur lakau Naning  
Disambar burung berapuk  
Bulu mata menongkat kening  
Bulu keneng taji dibentuk  
Sebentuk taji Hang Tuah  
Pakaian anak bendahara kaya  
Panau di jari perungkai jala.

### V Ahai ... hai ....

Selaga memintai jala  
Pecah sepiring dilayangkan  
Bertabur panau di dada  
Panau di keneng abang bayangkan  
Setabur panau di dada  
Panau di tengkuk abang bayangkan.  
Panau di tengkuk perintik balam  
Panau di jari pemintal jala  
Panau di tengkuk perindu dendam  
Panau di pipi panau menghela.

Menghela di hulu menghela di hilir  
Menghela di tengah berderik-derik  
Panau di pipi panau di bibir  
Panau berjejer membuat cantik.

VI Amboi ... ii .... lah ngamboi ....

Selaga melempar jalan  
Pecah sepiring dilayangkan  
Setabur panau di dada  
Panau di kening abang sayangkan.

Selaga melempar jala  
Pecah semangkuk dilayangkan  
Setabur panau di dada  
Panau di tengkuk abang sayangkan.

Merebah sederu jatuh  
Mati disambar dewa sakti  
Tidak abang berubah kata  
Dari hidup sampai ke mati.

Anak hulu kalam hulu  
Hulu Bukit Siguntang  
Tetak kayu timbun-timbunkan  
Telipuk layu bunga sekuntum  
Pasik abang konon namunkan  
Berderak rimbun setambun temiang  
Tepi air  
Sarat rupa seembun  
Hendak siang rupanya hari  
Hari siang bulan setampuk  
Hitam kencong di atas pintu  
Boleh mana abang nak masuk  
Keris bersilang di muka pintu.

*Teromba dalam Istiadat Perkahwinan Negeri Sembilan*

Adalah saya bak kata orang:  
Kok ibarat umur baru bertukar muda  
Pendapatan pun belum ada  
Pandangan pun belum banyak  
Pengalaman pun belum jauh  
Kok darah belum setampuk pinang  
Kok jalan kurang pasa  
Kalau begitu kedatangan saya ni  
Ibarat pergi ke huma  
Singkap daun ambil buah  
Adapun kedatangan saya ini sama-sama faham  
Orang ke awak, awak ke orang

## LAMPIRAN

Semenda bersemenda  
Kok kurus dipupuk  
Kok segar disiram  
Kok putus kata di pangkal  
Putus dengan dibagi  
Duduk berperuntungan  
Mati hukum Allah  
Duduklah pula sepelarasan  
Pandang-memandang satu nan lain  
Iaitu bersuku-suku  
Berapalah sukunya dua belas  
Dua belas Muar dua belas Jempol  
Enam Teraci enam Gunung Pasir  
Kok selaman sepermainan  
Kok sejamban seperlaungan  
Tapi dik hukum tak mengambil  
Diharuskan pula semenda-menyemenda.

Kemudian dikatakan maksud:

Kemudian saya ni ibarat kata adat:  
Kok turun dari istana menjunjung tepak  
Kok turun dari balai menjunjung sabda  
Turun dari rumah nan berketak tangga  
Kampung nan bersudut  
Disuruh oleh tempat semenda menjemput.

Apabila sudah dicapai persetujuan 'mahu' bersemenda pihak lelaki menghantar 'cincin tanya' kepada pihak perempuan. Ini dibuat oleh mak semenda laki-laki; dan ini dikenali sebagai 'merisik'.

Kata orang semenda kepada orang yang dijemput:

Beginilah bang  
Sembah pada atuk  
Adalah saya ini dari kampung nan bersudut  
Rumah nan berketak tangga  
Ibarat dari istana menjunjung titah  
Ibarat dari balai menjunjung sabda  
Ibarat dari tempat semenda menjunjung suruhan dari  
Ibu bapak  
Adalah hajat dan tujuan saya  
Menjemput anak buah atuk  
Serta adat dengan pusaka nan bersebab kerana  
Inilah sembah saya pada atuk

## LAMPIRAN

Kemudian adat diisi nikah diperoleh  
Jika untung sama diserukan  
Jika tuah sama ditampungkan  
Jika siang sama dipandangkan  
Jika malam sama diperdengarkan  
Kemudian sebulan nan setengah  
Setahun nan dua  
Oleh takdir dengan kudrat.  
Nan terlangsung akan jatuh  
Nan biang akan tumbuh  
Nan genting akan putus  
Nan retak akan belah  
Ibarat mengkalai akan sudah  
Ada pertemuan akan dinikahi  
Habis pertemuan diceraikan  
Dik saya tadi datanglah nak bersedekah  
Nasi nan sesuap dan air nan seteguk  
Pinang sekacip sirih nan secabik  
dilingkung kampung nan bersudut  
Ditakuk tangga nan semata  
Dibetulkan rasuk pelancar  
Ditahan rasuk melintang  
Ditalang lantai nan sebilah  
Ditalang atap nan selayar  
Diarak kayu nan panjang.

Peralatan disiapkan di kedua-dua pihak, tabir dan lelangit dinaikkan; bak kata gurindam adat:

Sudah terdendeng rupanya tabir  
Sudah terbentang langit-langit  
Sudah tergantung kain lampai'an

Tempat sirih juga disediakan:

Sudah tersusun rupanya sirih  
Sudah berkacip rupanya pinang  
Sudah putih rupanya kapur  
Sudah kuning rupanya gambir  
Sudah bersimpul rupanya tembakau.

Perhiasan disiapkan untuk orang-orang istimewa:

Sudah bertompok tilam pandak  
Sudah terbentang tilam panjang

## LAMPIRAN

Sudah teratur bantal besar  
Sudah bersusun bantal kecil  
Sudah berganjung gunung berbangkit  
Sudah berpalang silang gunting.

Persiapan adat yang penting pun diatur:

Sudah memancar rupanya pedang  
Sudah menikam rupanya keris  
Sudah terurai rupanya tombak  
Sudah terkembang rupanya payung  
Sudah berkecimpung tawak-tawak  
Sudah meningkah rupanya gendang  
Sudah beratur rupanya meriam  
Sudah bersukat ubat bedil  
Sudah terbakar rupanya tunam  
Sudah berderau rupanya lamat.

(Itu hanya gambaran persiapan yang teratur saja – tidak semestinya menggambarkan persiapan yang sebenarnya) seperti kata adat:

Kok adat sudah beratur  
Kok bilang sudah bertentu

Di hari perkahwinan:

Istiadat membayar adat pusaka; pihak perempuan menghantar dua orang wakil menjemput pihak lelaki; katanya:

Beginilah atuk  
Saya ni beripar berlamai  
Yang jantan pun ada  
Yang betina pun ada  
Yang jaftan dicari-carikan untungnya  
Yang betina dinantikan perlahan-lahan tuahnya  
Maka sudah begitu  
Pada hari nan sari  
Pada malam nan semalam ni  
Maka nampaklah elok beruntung pula  
Jodohnya dengan anak buah atuk tu  
Jadi dalam pada itu  
Kedatangan saya ni sudahlah pula  
Kebulekan semenda serta tempat semenda  
Maka inilah saya datang bertemu di sini

#### LAMPIRAN

(Diikuti dengan memperkenalkan saudara-saudara yang jauh dan dekat)

Kata lagi pihak laki-laki:

Apa diturut nak menanti  
Kalau tak dituruti kami kan datang jua.

Jawab perempuan:

Kayu ara tinggi sebatang  
Dahan lampai pucuk putih  
Apa fasal lambat datang  
Kami memandang mata dah putih.

Kata pihak perempuan lagi:

Cempedak di tengah laman  
Dijolok di umpu kaki  
Usah lama tegak di laman  
Ambil cebok basuhlah kaki.

Sahut pihak laki-laki:

Jolok pun kok tak dijolok  
bunga teratai kan kembang jua  
Disogok pun kok tak disogok  
Kami pun naik jua.

Jawab pihak perempuan:

Putih pauh dari permatang  
Sayang selasih masak minyak  
Dari jauh tuan datang  
Terima kasih banyak-banyak.

Balas pihak laki-laki:

Putih pauh dari permatang  
Sayang selasih saya lurutkan  
Dari jauh aya datang  
Tegal dik kasih saya turutkan.

## LAMPIRAN

(Kemudian dilakukan akad nikah. Sebelum itu adalah pula balasan sambut-menyambut), antaranya di kata:

Selilit Pulau Perca  
Selimbang Tanah Melayu  
Sealam Minangkabau  
Untung sekali malang berturut  
Untung tak boleh diraih  
Malang tak boleh ditolakkan  
Untung melambung tinggi  
Malang menimpa badan  
Hidup dikandung adat  
Mati dikandung tanah  
Maka beruntunglah kita  
Bersuka berwaris  
Jauh pun ada  
Maka jauh didengarkan  
Dekat dipandangkan.

Dalam bermesra, masing-masing berpantun, menunjukkan keahlian masing-masing:

Kalau tidak kerana bulan  
Bintang tidak terbit pagi  
Kalau tidak kerana tuan  
Kami tak sampai ke mari.

Balas pihak perempuan:

Sudah penat kami berbangsi  
Kerabat di bawah batang  
Sudah penat kami menanti  
Inilah baru tuan datang.

Sahut laki-laki:

Rumah gedang papan berukir  
Keranji dibelah dua  
Kami datang kata tak mungkir  
Sebab dah janji kita berdua.

## LAMPIRAN

Sahut perempuan:

Anak pipit mati tersepit  
Mati disengat kumbang hijau  
Makan sirih pinang digigit  
Hendak dibelah tidak berpisau.

Balas pihak laki-laki:

Bukan lebah sebarang lebah  
Lebah bersarang di atas papan  
Bukan sembah sebarang sembah  
Sembah dari hujung hingga ke pangkal.

Sahut perempuan:

Bukan lebah sebarang lebah  
Lebah bersarang di pokok nangka  
Bukan sembah sebarang sembah  
Sembah seadat dengan pusaka.

Kemudian pihak perempuan membuka bungkusan adat. Pihak laki-laki berkata:

Jangan malu jangan segan  
Saksikanlah bersama-sama nampaknya:  
Kok panjang, keratkan  
Kok pendek, hubungkan  
Kok berlebih, untunglah  
Kok kurang, minta maaflah.

Akad nikah pula dijalankan. Begitulah, pendeknya:

Sehari adat sehari bernama  
Sehari berhutang pada mak bapak  
Hutang di atas enam sekerat  
Pertama kerat pusat  
Kedua upah bidan  
Ketiga sunat Rasul  
Keempat tinoik daing  
Kelima serahkan mengaji  
Keenam hutang adat dengan hukum  
Nan kecil dah besar  
Nan belseyar dah pulang  
Nan bingung dah cerdik  
Teringin pulak nak berumahtangga

## LAMPIRAN

Lalu dirisik duai  
Dekat rumah dekat kampung  
Serantau kulu seranta kilir  
Risik sudah berdesus  
Gamit sudah berkecapi  
Orang membeli kerbau dengan talinya  
Mengikat kata dengan tanda  
Diberi cincin sebentuk  
Cincin tari cincin tanya  
Kok asa sekata menjadi  
Tak asa sekata pulang balik  
Kok asa sekata janji pun diikat  
Kok helah betina ganda tanda  
Cacat cinda berkembalian  
Sawan gila luar janji  
Cacat tidak gila pun tidak  
Datang menepati janji  
Janji dibuat dimuliakan  
Dalam janji digaduhkan  
Janji sampai ditepati  
Mati bertanda berhutang  
Bukan hutang pada nan bersudut  
Bukan hutang kain nan berhasta  
Bukan hutang ringgit nan berbilang  
Adat diisi dengan nikah.

Menyalang atau menyembah. Pihak perempuan datang ke rumah laki-laki.

Kata pihak perempuan:

Entahnya lantak entah lentik  
Kembang bunga iraian  
Entah mantah entah lembik  
Budak-budak punya buatan.

Pihak laki-laki:

Sorong papan tarik papan  
Buah keranji dalam perahu  
Suruh makan saya makan  
Berjanji tidaklah saya tahu.

Pengantin perempuan bermalam di rumah pengantin laki-laki; istiadat ini dipanggil 'Meliaur Jejak'. Ketiga tamu-tamu itu akan berangkat

## LAMPIRAN

pulang, pihak laki-laki akan berkata:

Hendak dulang diberi dulang  
Dulang ada berpanta tidak  
Hendak pulang diberi pulang  
Pulang tuan diantar tidak.

atau

Hendak dulang diberi dulang  
Dulang berisi bunga lada  
Hendak pulang diberi pulang  
Pulang diiring si air mata.

'Memulangkan kampung halaman'. Orang semenda biasanya tinggal di rumah pengantin perempuan. Berkumpul di rumah pengantin perempuan dihadiri orang tua-tua dari kedua-dua pihak, untuk menyerahkan apa yang ada dan menerangkan kedudukan yang sebenar. Perbilangan adatnya:

Kalau ada diunjuk beri  
Kalau tak ada berkata benar  
Kemudian tu diseru-serukanlah untungnya  
Kok untung sabut, timbul  
Kok untung batu, tenggelam  
Ada pulak bak mengerah orang  
Kok kampung nan sesudut  
Kok sawah nan selopak  
Kok rumah nan selaya atap  
Inilah nan terdapat  
Kami pulanglah lidah pada baginda  
Belalah dan peliharalah  
Kok untung sabut, timbul  
Kok untung batu, tenggelam  
Dalam itu pulak  
Kok dapat buruk sampaikan buruknya  
Kok elok sampaikan eloknya.  
Adalah orang semenda tu:  
Peti bunian kepada tempat semenda  
Kerana orang semenda tu raja tempat semenda  
Di dalam itu tidak pula kami tu sebagai:  
Beri niur berpegang ekor  
Lepas tandang bergembala  
Pesan berturut  
Seia bertukar kata

## LAMPIRAN

Seiring bertukar jalan  
Duduk bergesel tegak berpaling  
Menyambung nak panjang  
Menyembar nak lebar.

Mantera: Sebahagian daripada Mantera Berbagih Kelantan

### I Jampi kepada bertih (kutur):

Hai kutur aku tahu asalmu  
Mu keluar dari benua Rom benua China  
Benua Bugis, benua Belanda, benua Sasang  
Kutur aku besa jajah kedai Keling  
Kedai Siam, kedai Bugis, kedai Belanda  
Kutur aku nak masuk jadi pengasuh Raja Angin  
Angin berusul angin berasal  
Angin jangan terkejut tergamam  
Angin jangan berlokek ponagh  
Angin jangan murih marah.

### II Jampi kepada daun pinang:

Hai daun pinang aku tahu asal usulmu  
Akarmu raja bersela  
Batangmu raja berdiri  
Daun raja mengapar  
Pucuk raja mustajab  
Buah raja bergantung  
Nak mintakmu cabut wap bisa  
Kalau tajam nak mintak tumpul  
Kalau panas nak mintak sejuk  
Kalau demam nak mintak kebah  
Kalau mu tak dengar katakaku  
Derhakamu kepada Allah  
Sidi guru sidi aku  
Dengan berkat kata  
Lailahaillallah  
Muhammad Rasullullah.

### III Jampi bertabik:

Sedang mula meletak mula berjadi  
Mula menyebut nama Allah  
Puji nama Rasul  
Kerat tambang sidi  
Sidi terucap tiga kali

LAMPIRAN

Langkah tiga langkah  
Langkah Raja Berail  
Langkah Mikail  
Langkah Israil  
Langkah Ali  
Langkah Umar  
Langkah abu Bakar.  
Lalu hamba nak bergantung pada aras yang tinggi  
Lalu hamba nak selam pada aras yang besar  
Lalu hamba nak mintak pada aras yang suci  
Dahulu pintak, kemudian saksi  
Saksi nak mintak ampun nenek  
Maaf di guru, guru yang ghaib  
Arwah yang lelang  
Sidi berucap Ali pelita  
Nenek yang mengambil salah  
Guru juga murka daya  
Baru hamba nak bersuka ria  
Hamba nak mintak jadi tabik  
Sekali lalu  
Rumbu ayah istana bonda  
Sedang mula meletak awal terjadi  
Jika ada kurnia Allah dan Rasul  
Dengan syafaat Nabi  
Dengan berkat Syekh Waliullah.  
Syekh wali ulia Allah  
Syekh wali ulia sidi  
Syekh wali ulia keramat  
Syekh Abdab  
Syekh Rahwo  
Syekh Ali Nabah  
Syekh menunggu pintu Kaabah  
Mintak turun doa bertuah  
Isi keramat  
Sudah pesan taruh  
Wali lapan masih sembilan  
Lalu hamba nak pesan taruh  
Minduk asal mengantin mula  
Minduk ketiga mengantin dua belas  
Jaga-jaga minduk tua di tali angin  
Jaga-jaga minduk muda  
Masjid Rasul surau rakna  
Di tambak ladang kebun bunga ayah  
Jaga menjadi tabik

## LAMPIRAN

Jangan scorang melangkah baris  
Jangan scorang melangkah peta  
Kerana baris tidak ghaib peta tidak lelang  
Di kaki nenek bayang guru  
Sudah pesan tanah gumanat tinggal  
Minduk asal pengantin mula  
Lalu hamba nak sampai salam  
Mintak guru angkat serta terangkit  
Atas sifat tujuh gambalan satu  
Hilang guru tujuh timbul guru empat  
Guru empat guru sebaya  
Guru bercahaya  
Guru maha suci  
Guru maha adil  
Adil guru sampai ke nabi wali  
Adil guru sampai ke umat petua nabi  
Hilang guru empat timbul guru dua  
Hilang guru dua timbul guru satu  
Guru satu guru putih penama guru  
Hamba nak minta turun penawar putih dan sila  
Hamba nak pulih atas sifat tujuh gambalan  
satu  
Jika ada untung tuah sekun raksi  
Janji teman surat awal.

### IV Seru semangat daun perambas:

Assalamualaikum hai semeru  
Semeru aku tidur aku nak gerak jaga  
Semeru lebah bergoncang bangun  
Jatuh ke akar raja bersela  
Jatuh ke batang raja berdiri  
Jatuh ke daun raja melepar  
Jatuh ke puak Seligi Botor  
Asal buru asal pengambat  
Asal mengibas  
Orang patah maka patah  
Patah tombak aku salin tombak  
Ya Ibadullah  
Ya Rizaldullah  
Kayu Ruhilkodus  
Aghnimi bi fua satin  
Ya Tuhanku  
Mu berilah penolong akan hambamu zahir dan  
batin

## LAMPIRAN

Jaga-jaga Ali  
Jaga Usman  
Jaga Abu Bakar  
Jaga sahabat empat berdalam  
Jaga Jibrail  
Jaga Mikail  
Jaga Israfil  
Jaga tokoh inang serandung badan  
Biar teguh tegap lapur-lasar  
Sirat mapat tupat ketat  
Nomor kulit darah daging.

### V Jampi terjejak angin:

Asal sah notik, pusaka ayah  
Agin sah nata, pusaka bonda  
Jaga berdiri angin tujuh beradik empat  
bersaudara  
Agin bisa menarik pohon kebumi tinggi  
Jati Jawa serbat daun  
Daun digubah  
Jaga membuka angin sepuluh  
Nyata sembilan, ghaib angin sembilan  
Jaga terjeli pada angin tujuh  
Ghaib pada angin tujuh  
Terjeli pada angin satu  
Agin bernama Satul-amar  
Agin bernama Darul-anbia  
Tiga bernama Darul-aspar  
Masing-masing sederah angin  
Janganlah seorang kecil hati dua belas ras.

Agin empat separa rujuh  
Agin pecah dari empat sifat  
Agin hidup dengan tujuh ayat  
Siapa penghulu sekalian angin  
Siti putih koda bilik  
Siti putih koda anjung  
Jangan seorang kelahi bantah  
Jangan seorang berebut beretak  
Jangan seorang bertikam bertakik  
Jangan seorang tikam istana  
Masing berdengar hari, masing berdengar  
bilang  
Sungguh usul baik asal molek

## LAMPIRAN

Jangan seorang berkecil hati  
Jangan seorang berpatah rasa.

### *Dikir Nabi Allah, Kuala Pilah Negeri Sembilan*

Husin baginda Amir Husin Muhammad  
Baginda Amir Husin itu anak cucu Rasulullah  
Anak bongsu baginda Ali, menjadi suami Puteri Seri Banun  
Mati berperang sabilullah.

Malaikat pun turut dari langit beriring-iring  
Israil dan Mikail bersaing-saing  
Anak bidadari turun dari langit  
Beriring-iring bersaing-saing  
Berdesisit-desit bak bunyi kakinya.  
Anak bidadari turun dari langit  
Beriring-iring bersaing-saing  
Berdering-dering bak bunyi gelang dan cincin  
Anak bidadari turun dari langit  
Beriring-iring bersaing-saing  
Berdenting-denting gelang tangannya.  
Anak bidadari turun dari langit  
Beriring-iring bersaing-saing  
Berdurau-durau bak bunyi gelang kakinya  
Anak bidadari turun dari langit  
Beriring-iring bersaing-saing  
Berderuk-deruk bak bunyi cincin di jarinya.  
Anak bidadari turun dari langit  
Beriring-iring bersaing-saing  
Subang di telinganya sepasang scorang.  
Anak bidadari turun dari langit  
Beriring-iring bersaing-saing  
Tumit bulat bak rincing telur  
Jarinya halus bak mata serai  
Anak bidadari turun dari langit  
Beriring-iring bersaing-saing  
Duduk bertenun kain dalam syurga Jannatunnaim  
Kain sandusin.  
Anak bidadari turun dari langit  
Beriring-iring bersaing-saing  
Baju dipakainya waistabakin namanya baju.  
Anak bidadari turun dari langit  
Beriring-iring bersaing-saing  
Berdengung-dengung bak bunyi dokohnya

LAMPIRAN

Anak bidadari turun dari langit  
Beriring-iring bersaing-saing  
Tubuhnya baik lemah lembut  
Cahaya tubuhnya bulan julung keluar.

Anak bidadari turun dari langit  
Beriring-iring bersaing-saing  
Rambutnya lembut lagi labuh, berlipat pandan  
Hitam hingga mayang menyerbak baunya.

Anak bidadari turun dari langit  
Beriring-iring bersaing-saing  
Hidungnya mancung keningnya lentik bak bentuk taji.

Anak bidadari turun dari langit  
Beriring-iring bersaing-saing  
Dadanya bidang rantainya bunga.

Anak bidadari turun dari langit  
Beriring-iring bersaing-saing  
Pipinya pauh dilayang.

Anak bidadari turun dari langit  
Beriring-iring bersaing-saing  
Bibirnya merah, giginya sama rapatnya, jinjang lehernya.

Anak bidadari turun dari langit  
Beriring-iring bersaing-saing  
Pinggangnya ramping cekakan bunga.

Anak bidadari turun dari langit  
Beriring-iring bersaing-saing  
Jantung betisnya bunting bak batang padi.

Anak bidadari turun dari langit  
Beriring-iring bersaing-saing  
Kain selendangnya waidibajin namanya kain.  
Kain tudungnya mutualabbisin namanya kain

Anak bidadari turun dari langit  
Beriring-iring bersaing-saing  
Duduk bersama-sama dengan suaminya  
Di dalam syurga Jannatunnaim  
Itulah isteri orang yang mukmin.  
Allah sallallah.

## BIBLIOGRAFI

- Abdul Karim bin Ahmad, 1964. *Pantun Berkait*. Singapura: Malaysia Publications Limited.
- Abdul Karim Md. Shariff, 1970. *Pantun Melayu*. Kuala Lumpur: Longman.
- Abdul Samad al-Palambani, Syeikh. tt. *Hidayat al-Salikin fi Suluk Mislikul-Muttaqin*, Singapura, Pulau Pinang, Kota Bharu: Sulaiman Marie.
- Abdul Rahman al-Ahmadi, 1966. *Pengantar Sastera*. Kota Bharu: Pustaka Aman Press.
- Abdul Rahman Haji Mohammad, 1964. *Dasar-dasar Adat Perpatih*. Kuala Lumpur: Pustaka Antara.
- Abdullah bin Abdul Kadir Munsyi, 1965. *Kisah Pelayaran Abdullah*. Singapura: Malaysia Publications Limited.
- Abdullah bin Mohamed (Nakula), 1975. *Bentuk Alam yang Mengagumkan*. Kota Bharu: Pustaka Aman Press.
- \_\_\_\_\_, 1979. "Simbol-simbol dalam Wayang Kulit Melayu". Kertas Kerja Bengkel Wayang Kulit Malaysia, Port Dickson, April 1979.
- Abdullah Siddik, 1975. *Pengantar Undang-undang Adat di Malaysia*. Kuala Lumpur: Penerbit Universiti Malaya.
- Abdullah Sidek, 1958. "Orang Melayu dengan Pantunnya", dlm *Dewan Bahasa*, Disember 1958. hlm 589-595.
- Abu Hassan Muhammad Sham, 1975. "Ulasan: Sejarah Kesusastraan Melayu Klasik, Drs. Liaw Yock Fang", dlm *Dewan Bahasa*, Disember 1975, hlm 791-806.
- Abu Ridwan, 1963. *Seribu Satu Malam (Alfu Laila Walailah)*. Bandung: P.T. "Bandung Timur".
- Achadiati Ikram, 1964. "Pantun dan Wangsalan", dlm *Majalah Ilmu-ilmu Sastera Indonesia*, hlm 261-268. (Nomor persembahan kepada Prof. R.M.Ng. Poerbatjarka, berhubung dengan ulang tahun beliau ke-80, daripada para murid beliau).
- Adnan S.A.M. dan Sofjan Muchtar, 1960. *Kesusasteraan Indonesia dalam Bentuk dan Isi*. Kuala Lumpur: Pustaka Antara.
- Ahmad Balji, 1961. *Pantun*. Singapura: Pustaka Geliga Ltd.
- Ahmad bin Haji Abdul Rauf, 1925. *Ini Nazam yang Bernama Tanbih al-Kusla*.

#### BIBLIOGRAFI

- Singapura: Haji Muhammad Idris, No. 21 Kampung Haji Lane.
- Ahmad Kotot, 1927. *Hikayat Percintaan Kasih Kemudaan atau Yazid Asyik Berahi dan Maksyuknya Akan Zamrud*. Seremban.
- Ajip Rosidi, 1966. *Kesusasteraan Sunda Dewasa Ini*. Cirebon: Penerbitan Cupumanik.
- Altmann, G., 1963., "Phonic Structure of Malay Pantun", dlm *Archiv Oriental*, 32: hlm 274-286.
- \_\_\_\_\_, 1965. "The Climax in Malay Pantun", dlm *Asian and African Studies*, Department of Oriental Studies in the Slovak Academy of Sciences, Bratislava, I, hlm 13-20.
- Altmann, G., 1968. "Some Phonic Features of Malay Syair", dlm *Asian and African Studies*, Department of Oriental Studies of the Slovak Academy of Sciences, Bratislava, iv, hlm 9-16.
- Ambas Mahkota, 1962. *Anggun nan Tungga Magek Jabang dengan Puti Hondoriah*. Bukittinggi: C.V. Pustaka Indonesia.
- Anas Haji Ahmad, 1971. *Sastera Melayu Lama dan Baru*. Pulau Pinang: Sinaran Bros. Sdn. Bhd.
- Antologi Syair Simbolik dalam Sastera Indonesia Lama*. Projek Pembangunan Media Kebudayaan Republik Indonesia. tt.
- Arberry, A.J., 1965. *Arabia Poetry - A Primer for Student*. Cambridge: The University Press.
- Arenawati, 1965. *Asas Pengetahuan Puisi*. Kuala Lumpur: Pustaka Antara.
- Ariffin Nur, 1971. *Kesusasteraan Lama Melayu*. Kota Bharu: Pustaka Aman Press.
- Aristoteles, 1951. *Aristotel'sd Theory of Poetry and Fine Arts: With a Critical Text and Translation of the Poetics, by S.H. Butcher*. New York: Dover Publications.
- \_\_\_\_\_, 1952. *Atistotel's Art of Poetry: A Greek View of Poetry and Drama, With an Introduction and Explanation by W. Hamilton Fyfe*. Oxford: Clarendon Press.
- Awang Had Salleh, 1964. *Selindung Bulan Kedah Tua*. Kuala Lumpur: Dewan Bahasa dan Pustaka.
- Baharum bin Ahmad (K.C.S.), 1951. *Syair Kenang-kenangan Yapsai Taman Penghiburan*. Pulau Pinang: The United Press.
- Baldwin, C.S., 1959. *Ancient Rhetorical Poetic Interpreted From Representative Works*. Gloucester: Massachusett, P. Smith.
- Bhama, 1979. *Kavyalakara* (Edited with English Translation and Notes by P.V. Nagamatha Sastry). Delhi: M. Banarsidass.
- Bijleveld, B.J., 1943. *Herhalingsfiguren in het Maleisch Jevaansch en Soendaasch - een Stilistische Studies*. Groningen: Batavia, J.B. Wolters.
- Blagden, C.O., 1986. "Notes on the Folklore and Popular Religion of the Malays", dlm *JSBRAS*, 29 (1896), hlm 1-12.
- \_\_\_\_\_, 1897. "An Account of the Cultivation of Rice in Malacca", dlm *JSBRAS*, 30, hlm 285-304.
- \_\_\_\_\_, 1041. "A XVIIth Century Malay Cannon in London", dlm *JMBRAS*, 19, i (1941), hlm 122-124.

#### BIBLIOGRAFI

- Bland, R.N., 1905. "Hunting Invocations", dlm *JMBRAS*, 42 (1905), hlm 19–22.
- Blok, E., 1885. "Syair Perang Aceh", dlm *TBG*, 30, iv (1885), hlm 586–595.
- Braasem, W.A., 1950a. "Pantuns", (*Indonesische Kwatrijnen*). Orienlatie 38 Januari, hlm 27–42.
- \_\_\_\_\_, 1950b. *Pantuns*. Jakarta-Amsterdam-Surabaya, De Moderne Boekhandel Indonesia.
- \_\_\_\_\_, 1951a. "Een Duits Romanticus Over de Pantun", dlm *Indonesia*, hlm 530–538.
- \_\_\_\_\_, 1951b. *Proza en Poezie of het Heilige Meer der Bataks – De Bataks – en hun Volksletterkunde*. Jakarta-Amsterdam-Surabaya, De Moderne Boekhandel Indonesia.
- Brakel, L.F., 1969. "The Birth place of Hamza Pansuri", dlm *JMBRAS*, 42, ii (1969), hlm 206–212.
- Brewster, Paul G., 1958. "Metrical, Stanzaic an Stylistic Resemblances Between Malayan and Western Poetry", dlm *Revue de Literature Compares*, No 32, (1958) hlm 214–222.
- Bukhari al-Juhari, 1827. *Tajus-Salatin (Mahkota Segala Raja-Raja)*. Naar een Oud Maleische Handschrift Vertaald Door P.P. Roorda van Eysinga, Batavia.
- Caldexott A., 1980. "Jelebu Customary Songs and Sayings", dlm *JMBRAS*, 78 (1980), 8–41.
- Cassirer, Ernst, 1968. *The Philosophy of Symbolic Forms*. Jilid I, New Haven-London: Yale University Press.
- Chew Hock Tong, 1973. "Asal usul Syair Melayu dengan Hamzah Fansuri", dlm *Dewan Bahasa*, Januari 1973, 63–71.
- Clifford, H., 1891. "A New Collection of Malay Proverbs", dlm *JMBRAS*, 24 (1891), hlm 87–120.
- Craig Ia Drier, James, 1965. "Prosody", dlm *Princeton Encyclopaedia of Poetry and Poetics* (ed Preminger, Alex). New Jersey: Princeton University Press.
- Crawfurd, John 1852. *A Grammer and Dictionary of the Malay Language: With a Preliminary Dissertation*. London: Smith & Elder.
- Danzinger, Marlies K., dan Johnson, W. Stacy, 1961. *An Introduction to Literary Criticism*. Boston: D.C. Heath.
- De, Sushil Kumar, 1959. *Some Problems of Sanskrit Poetics*. Calcutta: Mukhopadyai.
- \_\_\_\_\_, 1963. *Sanskrit Poetics as a Study of Aesthetic – (With Notes by Edwin Gerow, Berkeley)*. California: University of California Press.
- Djadjuli, 1961. "Transkripsi Syair Cinta Berahi", dlm *Bahasa dan Budaya*, 9 (1961), hlm 91–133.
- Djajadiningrat, R. Hoesein. "Arti Pantun Melayu yang Ghairah", dlm *Pujangga Baru*, No 6, Disember 1933, hlm 193–198; No 8, Februari 1934, hlm 248–256 No 9, Mac 1934 hlm 275–282.

#### BIBLIOGRAFI

- Doorenbos, J., 1933. *De Geschriften van Hamzah Fansuri – Uitgegeven en Toegelicht*. Dissertation Leiden.
- Drew, Elizabeth, 1972. *Poetry: A Modern Guide to its Understanding and Judgement*. New York. Del Publishing Co., Inc.
- Drewes, G.W.J., 1955. "Een 16 Eeuwse Maleise Vertaling Van de Burda van al-Busiti", dlm *Verhandelingen van het Koninklijk Institut*, No 18, s Gravenhage.
- \_\_\_\_\_, 1959. "Review: Malay Sufism as Illustrated in an Anonymous Collection of 17th Century Tracts by A.H. Johns", dlm *BKI*, 115, hlm 280–304.
- Dulaurier M.Ed., "Le Pantoun, Considere Comme Une des Formes de la Poesie des Maleis", dlm *Revue de Orient*, 10, hlm 589–609.
- Dussek, O.T., 1971. "Ceremonial Speech at haircutting of Young Child", dlm *JSBRAS*, 75 (1917), hlm 127–134.
- \_\_\_\_\_, 1918. *Teka-Teki*. Singapura: Methodist Publication House.
- Emeis, M.G., 1975. *Bunga Rampai Melayu Kuno*. (Cetakan Ketiga belas). Kuala Lumpur: Dewan Bahasa dan Pustaka.
- Encyclopaedia Van Nederlandsch-Indie, 1919. "Syair", Jil III's Gravenhage, Martinus Nijhoff, 793–794.
- Endicott, K.M., 1970. *An Analysis of Malay Magic*. Oxford: Clarendon Press.
- Facharuddin Ambo Enre 1963. *Perkembangan Puisi Indonesia dalam Masa Dua Puluh*. Jakarta: Gunung Agung.
- Farid ud-Din Attar, 1971. *The Conference of the Birds, A Sufi Fable* (A Philosophical Religious Poem in Prose). Colorado: Shambhala Publications Inc.
- Fatimi, S.Q. 1963. *Islam Comes to Malaysia*. Singapura: Malaysian Sociological Research Institute.
- Gazali Dunia, 1962. *Puisi dan Prosa Indonesia*. Jakarta: Penerbitan Widjaya.
- \_\_\_\_\_, 1969. *Langgam Sastera Lama*. Kuala Lumpur: Oxford University Press.
- \_\_\_\_\_, 1971. *Sejarah dan Telaah Sastera Indonesia Lama dan Baru*. (Cetakan ketiga). Jakarta: Penerbitan Widjaya.
- Gimlet, John P. 1929. *Malay Poisons and Charm Cures*. London: J. and Churchill.
- Goldziher, I., 1966. *A Short History of Classical Arabic Literature* (Translated and enlarged by Joseph Desomogyi). Hildersheim: George Olms.
- Groot, A.W. De., 1946. *Algemene Versleer*. Den Haag.
- Gruenbaum, G.E. "Van Arabic Poetry", dlm *Dictionary of World Literary Terms* (ed Shipley, J.T.). London: George Allen & Unwin, Ltd.
- Habsi Yaacub, 1976. *Panduan Doa dan Zikir*. Kota Bharu: Pustaka Aman Press.
- Halim A.R., 1968. *Pantun Serbaneka*. Kuala Lumpur: Dewan Bahasa dan Pustaka.

#### BIBLIOGRAFI

- Haji Abdul Malik Karim Amrullah (HAMKA), 1977. "Pengaruh Islam dalam Sastera Melayu", dlm *Islam dan Kebudayaan Melayu*. Kuala Lumpur: Kementerian Kebudayaan Belia dan Sukan, hlm 162–181.
- Hamer, C. Den, 1890. "De Syair Madi Kencana", dlm *TBG*, 33. v, vi, hlm 531–564.
- Hamid Jabar, 1979. "Pantun dan Tradisinya di Minangkabau". Kertas Kerja Persidangan Antarabangsa Pengajian Melayu, di Universiti Malaya.
- Hamilton, A.W., 1922. "Some Rhyming Sayings in Malay". dlm *JSBRAS*, 86 (1922), hlm 393–395.
- \_\_\_\_\_, 1944. *The Malay Pantuns* (Edited and Translated). Sydney.
- \_\_\_\_\_, 1961. *Malay Proverbs*. Singapura: Eastern University Press.
- Hamsiah Abdul Hamid, 1964. *Bongsu Pinang Peribut*. Kuala Lumpur: Dewan Bahasa dan Pustaka.
- Harmsen, L.K. dan Hoevell, W.R. Van, 1975. "Vijftig Minangkabausche Pantoens met eene Verklarende Woordenlijst", dlm *TBG*, 21 (1875), hlm 480–513.
- Harun Aminurrahid, 1968. *Kajian Puisi Melayu*. Singapura: Pustaka Melayu.
- Harun Mat Piah, 1977. "Dokumentasi: Syair Argeni—Sebuah Cerita Panji Yang Tipikal", dlm *Jurnal Budaya Melayu*, 2 (1977), hlm 42–50.
- \_\_\_\_\_, 1978. "Puisi Melayu Tradisional – Sedikit Tentang Masalah Penyelidikan dan Bidang Kajian", dlm *Jurnal Budaya Melayu*, 3 (1978), hlm 51–70.
- \_\_\_\_\_, 1979a. "Antara Dike dan Jikey: Yang Mana Satu?", dlm *Dewan Budaya*. Jun 1979, hlm 7–9.
- \_\_\_\_\_, 1979b. "Penyusunan Baris-baris Pantun dan Alat Keindahan Visual", dlm *Nadaminggu*, 25 Jun 1979.
- \_\_\_\_\_, 1979c. "Unsur-unsur Magis dalam Permainan Kesenian Melayu", dlm *Dewan Budaya*, Disember 1979.
- \_\_\_\_\_, 1980a. *Cerita-cerita Panji Melayu*. Kuala Lumpur: Dewan Bahasa dan Pustaka.
- \_\_\_\_\_, 1980b. "Fungsi dan Penyebaran Permainan Kesenian Melayu di Malaysia", *Dewan Budaya*, April 1980, hlm 23–26.
- \_\_\_\_\_, 1981. "Kepercayaan Magis Berhubung dengan Padi", dlm *Dewan Budaya*. Januari 1981, hlm 15–17.
- Hasjmi, A., 1976. *Rubai Hamzah Fansuri*. Kuala Lumpur: Dewan Bahasa dan Pustaka.
- Hassan Ahmad, 1962. "Syair", dlm *Dewan Bahasa*, Januari 1962, hlm 20–31.
- \_\_\_\_\_, 1964. *Syair* (Bunga Rampai: Syair-syair yang tersiar di majalah-majalah dan akhbar-akhbar Melayu di Malaya). Kuala Lumpur: Dewan Bahasa dan Pustaka.
- Hava, J.G., S.J., 1970. *Al-Farid Arabic Dictionary*. Beirut.

## BIBLIOGRAFI

- Helfrich, O.L., 1895. "Serawaische en Besemahsche Sprekwoorden, Spreekwijsen en Raadsels", dlm *BKI*, 45 (1895) hlm 1–78; 384–386.
- \_\_\_\_\_, 1904. "Bijdrage tot de Kennis Van Het Midden Maleisch", dlm *Verhandelingen BGKW*, 53.
- Hight, Gilbert, 1967. *The Classical Tradition*. (Cetakan semula). London: Oxford University Press.
- Hikayat Perjumpaan Asyik*, 1934. Singapura: Maktabah wa Matbaah Sulaiman Marie.
- Hikayat Nur Muhammad dan Diiringi dengan Nazam Ayunan Dua Lagu*, tt. Pulau Pinang: Haji Abdullah bin Muhammad al-Rawi.
- Hill, A.H., 1960. "Hikayat Raja-raja Pasai", dlm *JMBRAS*, 33, ii (1960).
- Hollander, J.J. De, 1845. *Handleiding bij de Beoefening der Maleische Tal en Letterkunde*. Breda.
- Hooykaas, G., 1965. *Perintis Sastera* (terj Raihoel Amar Gelar Datoek Besar). Edisi Baru, Kuala Lumpur: Oxford University Press.
- Hose, E.S., 1933. *Malay Proverbs: A Compilation of Proverbs and Proverbial Expressions, With Some Pantuns and Riddles Taken from Earlier Publications*. Singapura: Govt. Printing Office.
- Humphreys, J.L., 1914. "Collection of Malay Proverbs", dlm *JSBRAS*, 67 (1914), hlm 95–123.
- \_\_\_\_\_, 1916. "Naning Weeding Speech", dlm *JSBRAS*, 72 (1916), hlm 25–33.
- \_\_\_\_\_, 1921. "Naning Recital", dlm *JSBRAS*, 83 (1921) hlm 1–33.
- Hughes, T.P., 1964. *A Dictionary of Islam Anarkali*. Lahore: Premier Book House.
- Ibrahim Saad, 1977. *Kesusasteraan Melayu: Satu Pengenalan*. Kuala Lumpur: Utusan Publications & Distributors.
- Inon Shaharuddin Abd. Rahman, 1979. "Teka-teki: Satu Kajian Struktural", dlm *Jurnal Budaya Melayu*, 4 (1979), hlm 57–69.
- Iskandar Alibasjah, Teuku, 1967. "Three Malay Historical Writings in the First Half on the 17th Century". dlm *JMBRAS*, 40, ii (1967), hlm 38–53.
- \_\_\_\_\_, 1970. *Kamus Dewan*. Kuala Lumpur: Dewan Bahasa dan Pustaka.
- Ismail Hussein, 1974. *The Study of Traditional Malay Literature – With Selected Bibliography*. Kuala Lumpur: Dewan Bahasa dan Pustaka.
- Istilah Kesusasteraan: Inggeris-Melayu-Inggeris*, 1972. Kuala Lumpur: Dewan Bahasa dan Pustaka.
- Jalaluddin Hashim, Haji, 1976. *Berzanji Arab-Melayu* (Cetakan ketiga). Johor Bahru: Lembaga Penerbitan Jabatan Agama Johor.
- Jamdin Buyong, 1975. "Pengumpulan Tradisi Lisan di Sabah: Metode dan Masalah", dlm *Tradisi Lisan di Malaysia* (ed Mohd. Taib Osman). Kuala Lumpur: Kementerian Kebudayaan Belia dan Sukan.
- Jamilah Haji Ahmad, 1978. *Cerita Sulung Jawa*. Kuala Lumpur: Dewan Bahasa dan Pustaka.

#### BIBLIOGRAFI

- Jaspan, M.A., 1964. *Redjang Ka-Ga-Nga; Folk Literature of South Sumatra*. Canberra: The Australian National University.
- Johns, A.H., 1957. "Malay Sufism as Illustrated in an Anonymous Collection of 17th Century Tracts", dlm *JMBRAS* 30, ii (1957), hlm 3–11.
- \_\_\_\_\_, 1958. *Rancak Dilabueh: A Minangkabau Kaba*: (A specimen of the traditional literature of Central Sumatra based on the Version of Datuk Paduko Alam and Sutan Pamuntjak as reprinted by Firma Soeelman, Bukittinggi, 1951). Data Paper on no 32, Ithaca (New York), Cornell University Department of Far Eastern Studies, South East Asia Program.
- \_\_\_\_\_, 1960. "Review: Een 16de Eeuwse Maleise Vertaling van de Burda Van al-Busir by G.W.J. Drewes", dlm *JMBRAS* 33 (1960) hlm 122–125.
- \_\_\_\_\_, 1965. *The Gift Addressed to the Spirit of the Prophet*. Canberra: Australian National University.
- Josselin de Jong, J.P.B. de., 1945. "Oost-Indonesische Poezie", dlm *BKI*, 100 (1945), hlm 235.
- Jumsari Yusuf, 1971. "Syair Damarwulan", dlm *Manusia Indonesia*, 4, i, ii (1971), hlm 172–238.
- \_\_\_\_\_, 1972. "Syair Singapura Dimakan Api", dlm *Manusia Indonesia*, 6, i, ii (1972), hlm 4–26.
- Juynboll, H.H., 1899. *Catalogus van de Maleische en Sundaneesche Handschriften der Leidsche Universitetis – Bibliotheek*. Leiden: E.J. Brill.
- Kassim Ahmad, 1960. "Pantun dan Sajak dalam Perkembangan Puisi Melayu", dlm *Dewan Bahasa*, Disember 1960, hlm 602–613.
- Katalog Koleksi Melayu Perpustakaan Universiti Malaya*, 1980. Kuala Lumpur: Perpustakaan Universiti Malaya.
- Kennedy, E.C. and Davis, A.R., 1964. *Two Centuries of Roman Poetry*. London: Macmillan & Co. Ltd.
- Kitab Tajul-Muluk al-Murassa'a bi-Anwa al-Dusar wa al-Jawahir al-Mandzumat*, tt, (terjal-Syekh Nuruddin bin Ali). Singapura: Sulaiman Marie.
- Klinkert, H.C., 1868. "Iets Over de Pantoens of Minnezangen der Maleijers – Inleiding, Tekst en Aanteekeningen", dlm *BKI*, 15 (1868), hlm 309–370.
- \_\_\_\_\_, 1869. "Vervolg op de Maleische Raadsels en Kinder-Spelen, Verzameld Door", dlm *BKI*, 16 (1869), hlm 24–66.
- \_\_\_\_\_, 1880. "Twee Maleische Handschriften: I. Korte Inhoud van de Syair Kahar al-Masyhur", dlm *BKI*, 28 (1880), hlm 512–522.
- \_\_\_\_\_, 1881. "Korte Inhoud van het Maleische Gedicht Syair Ken Tambuhan", dlm *De Indische Gids*, 3, i (1881).
- Kritzeck, J., (Peny.), 1964. *Anthology of Islamic Literature*, London.
- Kruyt, A.C., 1906. *Het Animisme in de Indischen Archipel*. The Hague: Martinus Nijhoff.

## BIBLIOGRAFI

- Lang, David Marshall, (Peny.), 1971. *Guide to Eastern Literature*. New York, Washington: Praeger Publishers.
- Lanz, Henry, 1931. *The Physical Basis of Rime – an Essay on the Aesthetics of Sound*. California: Standard University Press.
- Lewis, Cecil Day 1971. "How Poet Knows", dlm *Poems and Perspectives* (ed Ross, Robert H. dan Stafford). Illinois: Scott, Foresman & Co.
- Leyden, John, 1808. "On the Language and Literature of the Indo-Chinese Nations" dlm *Asiatick Researches*, 10 (1808), hlm 175–184. Reprinted in *Miscellaneous Papers Relating to Indo-China*, I (1886).
- Liaw Yock Fang. 1975. *Sejarah Kesusasteraan Melayu Klasik*. Singapura: Pustaka Nasional.
- Linehan, W., 1951. "A 16th Century Stave of Malay Poetry". dlm *JMBRAS*, 24, iii (1951), hlm 153–154.
- Lorberi, Johannis Christopheri, 1688. *Grammatica Malaica, tradens praecepta brevia idiomatis linguae in India Orientali celiberrimae ab indignis dictae Malayo*.
- Lord, Albert B., 1965a. *The Singer of Tales*. New York: Atheneum.
- \_\_\_\_\_, 1965b. "Oral Poetry", dlm *Princeton Encyclopedia of Poetry and Poetics* (ed Preminger, Alex), Princeton, New Jersey: Princeton University Press.
- Lumbera, Beinvenido, 1967. "The Folk Tradition of Tagalog Poetry", dlm *Brown Heritage: Essays on Philipine Cultural Tradition and Literature* (ed Manuud, Antonio G.). Quezon City: Ateneo University Press.
- Mahmud Ahmad, 1961. *Imbuhan Sastera*. Singapura: Pustaka Melayu.
- Majmu'at Maulud Syarif al-Anam, tt. Pulau Pinang: Maktabah wa Matbaatul Maaruf.
- Mangkungara IV. 1953. *Serat-serat Anggitan Ingkang Sampun Kakelen-Pakalian Djangkep*. Jakarta: Kolf.
- Marrison, G.E., 1961. "A Malay Poem in Old Sumatran Characters", dlm *JMBRAS*, 24 (1961) 162–165.
- Marsden, W., 1812a. *A Grammar of the Malayan language: With an Introduction and Praxis*. London: Printed for the Author by Cox and Baylis.
- \_\_\_\_\_, 1812b. *A Dictionary of the Malayan Language in Two Parts: Malayan English and English Malayan*. Printed for the Author by Cox and Baylis.
- \_\_\_\_\_, 1886. "On the Traces of the Hindu Language and Literature Extant Among the Malays", dlm *Miscellaneous Papers Relating to Indo-China I*.
- Max Rieser, 1969. *Analysis of Poetic Thinking* (Translated by Herbert M. Schuller). Detroit: Wayne State University Press.
- Maxwell, W.E., 1883. "Shamanism in Perak", dlm *JSBRAS*, 12 (1883), hlm 222–232.
- \_\_\_\_\_, "Malay Proverbs" dlm *JSBRAS*, I (1878), hlm 85–98;

## BIBLIOGRAFI

- JSBRAS*, 2 (1878), hlm 136–162; *JSBRAS*, 3 (1879), hlm 19–51; *JSBRAS*, II (1883), hlm 31–82.
- \_\_\_\_\_, 1906. "Mantra Gajah", *JSBRAS* 95 (1906), hlm 1–53.
- Mc Hugh, J.N., 1955. *Hantu-hantu: an Account of Ghost Belief in Modern Malaya*. Singapura: Donald Moore.
- Mohd. Ali bin Hitam, 1967. *Meninjau Pantun Melayu Lama di Pedalaman Dungun Terengganu*. Kuala Lumpur: Dewan Bahasa dan Pustaka.
- Mohd. Din bin Ali, 1957a. *Pepatah Adat Melayu*. Kuala Lumpur: Pustaka Antara.
- \_\_\_\_\_, 1957b. *Sembaan Cakap dan Pepatah Adat Melayu*. Kuala Lumpur: Pustaka Antara.
- Mohd. Ghous Nasaruddin, 1976. "Muzik Etnik Melayu", dlm *Bahasa, Kesusastraan dan Kebudayaan Melayu*. Kuala Lumpur: Kementerian Kebudayaan Belia dan Sukan.
- Mohd. Taib Osman, 1965. *Kesusasteraan Melayu Lama*. Kuala Lumpur: Federal Publication.
- Mohd. Taib Osman, 1967. "Indigenous, Hindu and Islamic Elements in Malay Folk Beliefs". Ph.D. Thesis, University of Indiana.
- \_\_\_\_\_, 1968. "Pantun, Syair dan Sajak, dari Segi Pandangan Diakronis dan Singkronis", dlm *Penulis*, 2, i (1968), hlm 1–14.
- \_\_\_\_\_, 1973. "Myth, Ritual and Drama: With Particular Reference to the Nusantara", dlm *Manusia dan Masyarakat*, 2, (1973), hlm 1–14.
- \_\_\_\_\_, 1975a. *Tradisi Lisan di Malaysia* (peny). Kuala Lumpur: Kementerian Kebudayaan, Belia dan Sukan.
- \_\_\_\_\_, 1975b. *Warisan Puisi Melayu* (peny) Kuala Lumpur: Kementerian Keudayaan Belia dan Sukan.
- \_\_\_\_\_, 1976. *Panduan Pengumpulan Tradisi Lisan*. Kuala Lumpur: Dewan Bahasa dan Pustaka.
- \_\_\_\_\_, 1977. "Perbomohan: Satu Aspek World-View dalam Kebudayaan Melayu", dlm *Masyarakat Melayu Antara Tradisi dan Perubahan* (ed Zainal Kling). Kuala Lumpur: Utusan Melayu Publications and Distributors.
- \_\_\_\_\_, 1979. "Traditional Malay Music: A Traditional Cultural Expression in Comtemporary Setting", dlm *Jurnal Budaya Melayu*, 4 (1979), hlm 97–111.
- Mokhtar Hj. Mohd. Dom, Haji, 1977. *Adat Perpatih dan Adat Istiadat Malaysia*. Kuala Lumpur: Federal Publication.
- Muhammad bin Abdul Jalil, 1964. *Mutiara Terpendam: Teka-teki Bersyair*. Kuala Lumpur: Dewan Bahasa dan Pustaka.
- Muhammad Haji Salleh, 1977. *Tradition and Change in Contemporary Malay and Indonesian Poetry*. Kuala Lumpur: Universiti Kebangsaan Malaysia.
- \_\_\_\_\_, 1979. "Preliminary Notes on the Esthetics of the Malay Pantun", dlm *Jurnal Budaya Melayu* 4 (1979), hlm 70–78.
- Mukarovsky, J., 1976. *On Poetic Language* (Translated and Edited by John

## BIBLIOGRAFI

- Burbank and Peter Stemer). Lisse: The Peter de Ridder Press.
- Musa Yusuf, Haji, 1959. "Syair" dlm *Dewan Bahasa*, Oktober 1959, hlm 502–508.
- Nasroen, M., 1957. *Dasar Falsafah Minangkabau*. Jakarta: Bulan Bintang.
- Netscher, E., 1854. "De Twaalf Spreukgedichten Door Radja Ali Haji van Riouw, Maleische Tekst met Vertaling", dlm *TBG*, II (1854), hlm 11–32.
- Nicholson, R.A., 1926. *Mathnavi* (Edited and Translated into English). 2 jil, London.
- \_\_\_\_\_, 1950. *Rumi Poet and Mystic*. London.
- \_\_\_\_\_, 1969. *Studies in Islamic Poetry*. Cambridge: The University Press.
- Nordin Selat, 1976. *Sistem Sosial Adat Perpatih*. Kuala Lumpur: Utusan Melayu (M) Sdn. Bhd.
- Oma de Sequeira, 1966. *Berbalas Pantun*. Kuala Terengganu: Penerbitan H.C. Mohd. Abdul Rahman.
- Omardin Haji Asha'ari, 1961. *Kajian Pantun Melayu*. Singapura: Malay Publishing House.
- Ophuijsen, Ch. Van, 1904. *Het Maleische Volksdicht*. Leiden.
- \_\_\_\_\_, 1886. "be Poezie in het Bataksche Volksleven", dlm *BKI*, 35 (1886), hlm 402–432.
- Overbeck, H., 1914a. "Rejang in Malay Pantuns", dlm *JSBRAS*, 67 (1914), hlm 219–220.
- \_\_\_\_\_, 1914. "Syair Burung Pungguk", dlm *JSBRAS*, 67 (1914), hlm 139–218.
- \_\_\_\_\_, 1922. "The Malay Pantuns", dlm *JSBRAS*, 85 (1922), hlm 4–28.
- \_\_\_\_\_, 1923. "Syair Raksi", dlm *JSBRAS*, i, II (1923), hlm 282–307.
- \_\_\_\_\_, 1929. "Syair Ta'bir Mimpi", dlm *JMBRAS*, 9 (1929), hlm ii.
- \_\_\_\_\_, 1932. "Syair Dandan Setia", dlm *JMBRAS*, 10, i (1932), hlm 141–158.
- \_\_\_\_\_, 1934. "Malay Animal and Flower Syairs", dlm *JMBRAS*, 12, ii (1934), hlm 108–148.
- Pantun Melayu*, 1958. Jakarta: Dinas Penerbitan Balai Pustaka.
- Pigeaud, Th. G., 1938. *Javanese Volksvortoningen*. Batavie.
- \_\_\_\_\_, 1967. *Literature of Java – Synopsis of Javanese Literature 900–1900*. Jilid I, The Hague: Martinus Nijhoff.
- Pijnapple, J., 1883. *Over de Maleische Pantoens*. Published on the occasion of the 6th International Congress of Orientalists at Leiden, The Hague, Koninklijk Institut Voor Taal-, Land en Volkenkunde, hlm 161–175.
- Pires, Thomas, 1967. *Suma Oriental* (Translated by Armando Cortesao). London: Hakluyt Society.
- Plattas, John T., 1960. *A Dictionary of Urdu, Classical Hindi & English*.

## BIBLIOGRAFI

- Oxford: Oxford University Press.
- Prampolini, Giamoko, 1951. "De pantun en de Verwante Dichtvormen in de Volkspoezio", dlm *Indonesia*, hlm 234-243.
- Preminger, Alex, 1965. *Encyclopedia of Poetry and Poetics* (peny)., Princeton, New Jersey: Princeton University Press.
- Pyan Hussayn dan Suhaimi Haji Muhammad, 1981. *Embun Pagi: Antologi Puisi Sebelum Perang*. Kuala Lumpur: Dewan Bahasa dan Pustaka.
- Raja Ali Haji bin Raja Ahmad, 1956. *Kitab Silsilah Melayu dan Bugis dan Sekalian Raja-rajanya*. Johor Bahru: Percetakan Kerajaan.
- Raja Iskandar bin Raja Mohd Zaid, 1964. *Syair Burung Pungguk*. Kuala Lumpur: Dewan Bahasa dan Pustaka.
- Rentse. A., 1933. "Notes on Malay Belief", dlm *JMBRAS*, II, ii (1933), hlm 245-251.
- \_\_\_\_\_, 1936. "Kelantan Shadow Play", dlm *JMBRAS*, 14, iii (1936), hlm 284-251.
- Ricklefs, R.C. dan Voorhoeve, P., 1977. *Indonesian Manuscripts in Great Britain: ACatalogue of Manuscripts in Indonesia languages in British Public Collection*. Oxford: The University Press.
- Rivai Yogi, 1953. *Cerita Rancak Dilabuh*. Karangan Datuk Paduko Alam. Disadur dari bahasa Minangkabau ke bahasa Indonesia, oleh -, Bukittinggi, H.H.S. Soeelman & Co., Percetakan "Islamijah".
- Ronkel, Ph.S. Van, 1899. "Der Kroon der Koningen", dlm *TBG*, 41 (1899), hlm 55-69.
- \_\_\_\_\_, 1908. "Catalogus der Maleische Handsochriften Ven het Koninklijk Institut Voor Taal, land en Volkendunde", dlm *BKI*, 60 (1908), hlm 181-248.
- \_\_\_\_\_, 1909. "Catalogus der Maleische Handschriften in het Museum van Bataviaasch Genootschap van Kunsten en Wetenschappen", dlm *Berh. BG*, 57 (1909), hlm 1-457.
- \_\_\_\_\_, 1921. "Meleische Literatuur van Verren Oorsprong", dlm *Mededeelingen der Koninklijk Akademie Van Wetenschappen Afd. Letterkunde*, Pt. 53, ser. A. No. 7, Amsterdam.
- \_\_\_\_\_, 1966. "Five-line songs in the *Sejarah Melayu*", dlm *BKI*, 122 (1966), hlm 455-457.
- Rosmera, 1965. *Kaji dan Sari*. Singapura: Malaya Publishing House.
- Roorda, Van Eysinga, P.P. de, 1827. *De Kroon Aller Koningen Van Djohor Naar Een Oud Maleische Handschrift Vertaald*. Batavia.
- \_\_\_\_\_, 1899. "Tajus-Salatin Naar een Oud Maleische Handschrift", dlm *TBG*, 41 (1899), hlm 55-69.
- Rubinstein, Carol, 1975. "Poems of Indigenous Peoples of Sarawak: Some of the Songs and Chants", dlm *Sarawak Museum Journal*.
- Ryan, N.J., 1961. *The Cultural Background of the peoples of Malaya*. Kuala Lumpur: Longmans of Malaysia.
- Rypka, Jan, 1968. *History of Iranian Literature*. Dordrecht, D: Reidel Publishing Co.

## BIBLIOGRAFI

- Shellabear, W.G., 1975. *Sejarah Melayu* (peny). Kuala Lumpur: Penerbitan Fajar Bakti Sdn. Bhd.
- Shipley, Joseph T., 1970. *Dictionary of World Literary Terms*. London: George Allen & Unwin.
- Simorankir Simandjuntak, B. 1965. *Kesusasteraan Indonesia* (Jil I). Jakarta: P.T. Pembangunan.
- Simpson, Louis, 1968. *An Introduction to Poetry*. London: Macmillan.
- Singaravelu, S. 1970. "Invocations to Nataraja in the South East Asian Shadow-play with special Reference to the Kelantan Shadow-play", dlm *Journal of Siam Society*, 58, ii (1970), hlm 45-54.
- Sjamsuddin Sutan Rajo Endah, tl. *Kaba Cindua Mato dan Bundo Kandung*. Cetakan ketiga, Bukittinggi: Penerbit C.V. Pustaka Indonesia.
- Shaw, William, 1976. *Aspects of Malaysian Magic*. Kuala Lumpur: Muzium Negara.
- Skeat, W.W., 1967. *Malay Magic - Being an Introduction to the Folklore and Popular Religion of the Malay Peninsula*. New York: Dover Publication Inc.
- Skinner, C., 1963. *Syair Perang Mengkasar* (The Rhymed Chronicle of the Macassar War, by Entjik Amin VKI, 40).
- Slametmuljana. R.B., 1953. *Bimbingan Seni Sastera*. (Cetakan kedua). Groningen-Jakarta.
- \_\_\_\_\_, 1954. *Poezie in Indonesia, Een Literaire en Taalkundige Studie*. Leuven Bibliotheque du Museum.
- \_\_\_\_\_, 1954. *Peristiwa Bahasa dan Sastera*. Kuala Lumpur: Oxford University Press.
- Soesatyo Darmawi, 1963. *Pengantar Puisi Jawa*. Jakarta: balai Pustaka.
- Spat C., 1920. *Bunga Rampai*. Breda. Koninklijk Militer Akademi.
- Sri Mintano, 1975. *Kajian Puisi Melayu*. Kuala Lumpur: Pustaka Pujangga.
- Strong, L.A.G. 1971. "Objection to Poetry", dlm *Poems and Perspectives* (ed Ross. Robert H., dan Stafford, William E.). Illinois: Scott, Foresman & Co.
- Sturrock, A.J., 1972. "Syair Kampung Gelam Terbakar", Abdullah bin Abdul Kadir, dlm *JMBRAS*, 45, i (1972), hlm 21-56.
- Stutterheim, W.F., 1936. "A Malay Syair in Old Sumatran Characters of 1380 AD", dlm *Acta Orientalia*, 14 (1936), hlm 268-279.
- Sulaiman bin Mohd. Nor (Munsyi Sulaiman), 1970. *Kitab Gemala Hikmat*. Singapura: Sidang Methodist.
- Sutan Takdir Alisjahbana, 1971. *Puisi Lama*. Petaling Jaya: Zaman Baru Ltd.
- Sutjipto Wirjosuparto, 1971. "The Significance of the Kakawin Poetry in Old Javanese Civilization", dlm *Manusia Indonesia*, 4, i, ii (1971), hlm 262-274.
- Sweeney, P.L. Amin, 1971. "Some Observations on the Malay Syair", dlm *JMBRAS*, 44, ii (1971), hlm 52-70.
- \_\_\_\_\_, 1973. "Professional Malay Story-Telling-Part One: Some

## BIBLIOGRAFI

- Questions of Style and Presentation", dlm *JMBRAS*, 46 (1973), hlm 1–53.
- Syair Nabi Allah Yusuf atau Kejayaan Taat*. (Tiada penerbit, tiada tarikh).
- Syair Nazam Dua Puluh Lima Rasul dan Nyanyi Siti Fatimah dan Nasihat kepada Laki-laki dan Perempuan*. tt. Disusun oleh Babu bin Dzaman Shah. Singapura: Dar al-Tibaati al-Masiriyati al-Kurba.
- Syed Abdul Majid, 1910. *The Ruba'iyat of Hafis*. London: John Murray.
- Syed Abdullah bin Hamid al-Edrus, 1960. *Persuratan Melayu II: Puisi*. Singapura: Qalam Press.
- Syed Muhammad bin Syed Zainal Abidin al-Idrus, 1931. *Kitab Kanz al-'Ula*. Kuala Terengganu: Matba'at al-Ahliah.
- \_\_\_\_\_, 1939. *Jawahir al-Sanniyah*. Singapura: Jawi Press.
- Syed Naquib al-Attas, 1968. *The Origin of the Malay Syair*. Kuala Lumpur: Dewan Bahasa dan Pustaka.
- \_\_\_\_\_, 1969. *Preliminary Statement on a General Theory of the Islamization of the Malay-Indonesian Archipelago*. Kuala Lumpur: Dewan Bahasa dan Pustaka.
- \_\_\_\_\_, 1970. *The Mysticism of Hamzah Fansuri*. Kuala Lumpur: University of Malaya Press.
- \_\_\_\_\_, 1971. *Concluding Postscript to the Origin of the Malay Syair*. Kuala Lumpur: Dewan Bahasa dan Pustaka.
- \_\_\_\_\_, 1972. *Islam dalam Sejarah dan Kebudayaan Melayu*. Kuala Lumpur: Universiti Kebangsaan Malaysia.
- Syed Syeikh al-Hadi, 1928. *Hikayat Setia Asyik kepada Maksyuknya atau Syafik Affendi dengan Faridah Hanom*. Pulau Pinang: Jelutong Press.
- Tan Chay Yan, 1910. *Buku Sa Li Chua dan Sha-ei Singapura Miniaga Gutta; Dengan Panton Menyanyi*. Singapura.
- Teeuw. A., 1952. *Taal en Versvouw*. Amsterdam.
- \_\_\_\_\_, 1955. "Review: Poezie in Indonesia by Slametmuljana", dlm *BKI*, III (1955), hlm 309–315.
- \_\_\_\_\_, 1961. *A Critical Survey of Studies on Malay and Bahasa Indonesia*. 's Gravenhage, Martinus Nijhoff.
- \_\_\_\_\_, 1966a. *Syair Ken Tambuhan*. Kuala Lumpur: Oxford University Press.
- \_\_\_\_\_, 1966b. "The Malay Syair: Problems of Origin and Tradition", dlm *BKI*, 122 (1966), hlm 429–446.
- Theodore de Barry, W., dan Embree, Ainslie T., 1075. *A Guide to Oriental Classics*. New York: Columbia University Press.
- Tuuk, H.N. Van., 1856. "Over Schrift en Uitspraak der Tobaasch als Eerst Hoofdstuk Eener Spraakunst", dlm *BKI*, 4, i (1856), hlm 1–54.
- Usman Awang, 1976. *Muzika Uda dan Dara*. Kuala Lumpur: Dewan Bahasa dan Pustaka.
- Voorhoeve. P., 1963. "List of Malay Manuscripts in the Library of Royal Asiatic Society London", dlm *JRAS*, hlm 58–82.
- \_\_\_\_\_, 1968. "The Origin of Malay Syair", dlm *BKI*, 124 (1968), hlm 277–278.

BIBLIOGRAFI

- \_\_\_\_\_, 1970. "The Author of the Syair Raden Menteri", dlm *BKI*, 126 (1970), hlm 259–260.
- Ward, P., 1975. *Indonesian Traditional Poetry* (Collected and introduced by). New York: The Orleander Press.
- Werndly, G.H., 1736. *Maleische Spraakunst de eige Schriften der Maleiers Opgemaakt*. Amsterdam.
- Wilkinson, R.J., 1901. *A Malay-English Dictionary*. Singapura: Kelly and Walsh.
- \_\_\_\_\_, 1906. *Malay Beliefs*. London: Luzac and Co.
- \_\_\_\_\_, 1907. *Papers on Malay Subject I: Malay Literature*. Kuala Lumpur.
- \_\_\_\_\_, 1932. "Some Malay Studies", dlm *JMBRAS*, 77 (1932), hlm 67–137.
- \_\_\_\_\_, dan Winstedt, R.O., 1961. *Pantun Melayu*. Singapura: Malaya Publishing House Ltd.
- Winstedt, R.O., 1917. "Malay Pantheistic Charm", dlm *JSBRAS*, 77 (1917), hlm 183–186.
- \_\_\_\_\_, 1922. "Malay Pantheistic Charm", dlm *JSBRAS*, 84 (1922), hlm 261–267.
- \_\_\_\_\_, 1923. "A Set of Alphabet Pantuns", dlm *JMBRAS*, i, ii (1923), hlm 308–311.
- \_\_\_\_\_, 1925. *Shaman, Saiva and Sufi: A Study of the Evolution of the Malay Magic*. London: Constable & Co. Ltd.
- \_\_\_\_\_, 1931. "A Jelebu Customary Saying", dlm *JMBRAS*, 9, i (1931), hlm 136.
- \_\_\_\_\_, 1927. "The Tale of Terung Pipit", dlm *JMBRAS*, 5, iii (1927), hlm 273–591.
- \_\_\_\_\_, 1947a. "Nature in Malay Literature and Folk Verse", dlm *JRAS*, (1947), hlm 27–33.
- \_\_\_\_\_, 1947b. "Origin of the Word Pantun", dlm *JMBRAS*, 21 (1947), hlm 40–42.
- \_\_\_\_\_, 1960. *A History of Classical Malay Literature*. Kuala Lumpur: Oxford University Press.
- \_\_\_\_\_, 1961. *The Malay Magician: Being Shaman, Saiva and Sufi*. London: Routledge and Kegan Paul.
- \_\_\_\_\_, dan Sturrock, A.J., 1908. *Hikayat Malim Dewa* (peny). Singapura: Methodist Publishing House.
- \_\_\_\_\_, dan Sturrock, A.J., 1957a. *Hikayat Malim Demam* (peny). Singapura: Malaya Publishing House.
- \_\_\_\_\_, 1957b. *Hikayat Awang Sulung Merah Muda*. Singapura: Malaya Publishing House.
- \_\_\_\_\_, dan Sturrock, A.J., 1970. *Cerita-cerita Jenaka*. Kuala Lumpur: Penerbit Fajar Bakti.
- Yahaya ismail, 1975. *Bimbingan Sastera Melayu Lama*. Kuala Lumpur: Utusan Melayu Sdn. Bhd.

#### BIBLIOGRAFI

- Zaharah Khalid, 1963. *Raja Donan*. Kuala Lumpur: Dewan Bahasa dan Pustaka.
- Zainal Abidin bin Ahmad (Za'ba), 1939. *Pelita Bahasa Melayu* (Penggal III) London: Macmillan.
- \_\_\_\_\_, 1962. *Ilmu Mengarang Melayu* (Cetakan kedua). Kuala Lumpur: Dewan Bahasa dan Pustaka.
- \_\_\_\_\_, 1964. *Kalung Bunga*. Kuala Lumpur: Dewan Bahasa dan Pustaka.
- \_\_\_\_\_, 1980. "The Malays and Religion". Cetakan semula dalam *Tamadun Islam di Malaysia*. Kuala Lumpur: Persatuan Sejarah Malaysia.
- Zakaria Hitam, 1966. *Anak Raja Hikayat dengan Burung Mat Canggal*. Kuala Lumpur: Dewan Bahasa dan Pustaka.
- Zuber Usman, 1970. *Suku Talang Mama*. Padang: Panitia Seminar Sejarah Minangkabau.
- \_\_\_\_\_, 1975. *Kesusasteraan Lama Indonesia* (Cetakan kelima). Melaka: Penerbitan Abbas Bandung.
- Zoetmulder, P.J., 1957. "Kawi dan Kakawin", dlm *BKI*, 113 (1959), hlm 50-69.



## INDEKS

- A. Teeuw (Teeuw), 8, 14, 16, 37, 41, 84, 118, 216, 220–21  
A.W. De Groot (De Groot), 14  
A.W. Ryder, 116  
Abdul Hamir Hj Abd. Halim, 492  
Abd. Latif Oyek, 381, 399  
Abd. Rahman Abdullah, 491, 509, 510–11  
Abd. Rahman bin Abd. Rashid, 411, 413  
Abd. Rahman Hj Mohammad, 438  
Abd. Rahman Jirim, 278  
Abd. Samad al-Palambani, 575  
Abdu-Karim al-Jili, 217  
Abdullah Mohd Yusuf, 547  
Abdullah Munsyi, 138  
Abdullah Siddik, 53, 426–27, 429–30, 433, 437, 439, 444  
Abu Bakar Mohd. Seh, 205  
Abu Ridlwan, 324  
Aceh, 35, 223, 226, 230–31, 254  
Achadiati Ikram, 113–14  
Achan bt Hj. Memek, 55  
Adat Perpatih, 55, 56  
Adat Temenggung, 55, 56  
Ahmad Balji, 152–53  
Ahmad bin Haji Abdul Rauf, 79, 293–94, 304  
Ahmad Kotot, 260–61  
Ajip Rosidi, 34  
al-Arabi, 229  
al-Hallaj, 217  
al-Iraqi, 229  
*al-Jawahir al-Saniyyah*, 296–97, 302–3  
al-Mutannabi, 76  
al-Rumi, 229  
al-Syed Jaafar al-Berzanji, 530  
Al-Syed Muhammad bin Syed Zainal Abidin al-Idrus (al-Syed Muhammad al-Idrus), 287, 289  
al-Syekh Muhammad al-Busiri, 76  
al-Syekh al-Nawawi al-Bantana, 530  
Allepo, 217  
*Algemene Versleer*, 14  
*Alhamdulillah*, 288  
Alisjahbana, 320, 331  
aliterasi, 3, 23, 29, 31, 35  
aliterasi dalam bentuk sejajar (*parallistische aliteratie*), 25  
Allah Sallalah, 536  
Alwi Hj Mohd Salleh, 521  
Ambas Mahkota, 408, 410  
Amir Hamzah, 335  
anasora (*anafoor*), 25–28, 35  
“Anak Si Gapa-Gapa”, 422  
“Anak Maharaja Cahaya”, 508  
*anapest (anapestic)*, 15  
andai-andai (*andai-andai*), 42, 89, 107–8  
*Anding Sidang Naindong*, 86  
*Angan-angan dengan Gurindam*, 326  
*Anggun Nan Tungga Magek Jabang*, 403, 407, 410

- Angkatan Sasterawan 50 (ASAS 50), 13  
 Anglo-Saxon, 367  
*Angreni (Syair Angreni)*, 243–44  
 Antologi Syair Simbolik, 252  
*'Aqaid al-iman'*, 304–5  
 Arab, 11, 14–16, 21, 40, 41, 70, 74, 76, 77, 78–82, 85, 108, 200, 204–5, 209–10, 212–14, 216, 219, 221–22, 224–25, 229–30, 249, 258, 274–76, 282–83, 526, 528–30, 535, 537–39, 545–46, 548, 551–52  
 Arab-Parsi, 10–12, 23, 81–84, 95, 210, 212–13, 220–22, 224, 228–29, 283, 369  
 Arberry, 16  
 Arenawati, 83  
 Ariffin Nur, 65  
 Asia Barat, 213  
 Asia Tenggara, 215  
 asonansi dalam bentuk sejarar (*parallelistische assonantie*), 25  
 Attar, 215, 217  
 Austronesia, 22, 23  
 Awang Batil, 422  
 Awang bin Ahmad, 489, 519  
 Awang bin Long, 508  
 Awang bin Mat, 31, 68, 485  
 "Awang Si Jambul Lebat", 190  
 "Ayam Didik", 228  
 Aynu'l-Qudatul-Humadani, 217  
 "Ayo Seke", 529
- B.O. Bijleveld (Bijleveld), 24, 25, 27, 28, 30, 32–35  
 Baba bin Mahat, 493  
*Bacindai Aluih*, 50, 403  
 bagih, 516–17, 524  
*Bah Singapura*, 246  
 Baharun Ahmad, 257  
 bahasa berirama (*rhythymical verse*), 38, 48, 52, 56–59, 67, 89, 99–103, 323, 367–69, 371, 391  
*Bahasa Berirama-pidato memper-silakan makan di Gunung Pasir*, 57  
 'bahasa daun', 132  
 'bahasa lambang', 132  
 Balai Pustaka, 110, 161  
 Banjar, 88  
 'Bapa Puisi Parsi', 215  
 Barat, 11–14, 140, 144, 230, 325, 552  
 Basemah, 107  
 Batak, 9, 35, 42, 43, 85, 88, 107, 109, 115–16, 223  
*Batu Belah Batu Bertangkup*, 243  
 Batu Pahat, 165–66, 201, 280, 492, 547  
 bayt, 11, 39, 369  
 beduan, 119  
 Belanda, 15, 134, 154, 209, 228, 246  
 Beowulf, 367  
*Berjeung*, 42, 63, 64  
 berlotah, 192, 195  
 bersandoi, 195–96  
 berzanji, 39, 40, 74, 75, 95, 104  
*Berzanji Arab-Melayu*, 530  
 Bhama, 41  
 Bhatti, 22  
*Bhattikawya*, 22  
 bidalan, 65, 66, 93, 101, 335  
*Bidasari (Syair Bidasari)*, 243–44  
 Bisaya, 106–7  
 Bokhari al-Jauhari, 12, 23, 82, 84, 89, 283–84  
 bongai, 59, 119, 143, 151, 190, 203, 228, 397  
 Braasem, 35, 41  
 Brandstetter, 105, 107  
 budaya rakyat (*folklore*), 4  
 Buddha, 482, 504  
*budu landai*, 197–98  
 Bugis, 33, 43, 85, 112  
*bujang jauh*, 197  
*Buku Sa Li Chua*, 263  
*Bundo Kandung*, 419  
 Buyung bin Idris, 405, 407

## INDEKS

- C. Hooykaas (Hooykaas), 47, 48, 160, 212, 225, 242, 248, 252, 335, 380, 382  
*Caldecotte*, 56  
*canggung*, 119, 143, 190, 203, 228, 333  
*cemperai*, 197  
“Cerita Sultan Perak Melawat Jajahan Takluknya”, 258  
*Cerita Sulung Jawa*, 403, 411, 413, 420  
Chauvin, 249  
“Cik Embung”, 422  
Cina, 119–22, 132, 134–35, 247, 263, 551  
*Cindua Mato*, 403–5, 407, 409, 418–19  
“Cinta-mani”, 504  
Cranmer Bying, 120  
‘*cryptic jargon*’, 110  
“Customary Songs and Sayings”, 56  
Cyril Skinner (Skinner), 246–47
- dabus, 39, 40, 72–74, 95, 104, 205, 275  
Dada Meuraxa, 369  
*daidai*, 107  
*Dag Register*, 246  
*Damar Wulan*, 243  
*Dandan Setia*, 243  
Danzinger, 23  
“Datangnya Cinta” (*The Coming of Love*), 162  
Daud bin Ibrahim, 278  
Daud Hj. Taib, 19  
Davis, 41  
Dayak, 107  
De Groot, 15  
*Di Mana Kesenangan*, 235  
dikir (zikir), 5, 6, 19, 32, 38, 40, 42, 68, 70, 71, 73, 74, 76, 91, 95, 98, 104, 190, 202, 205, 207, 221, 273, 283, 305, 307, 333, 369, 526, 529, 534, 539, 542–43, 545–50
- Dikir Barat* (dikir barat), 69, 95, 119, 202  
*Dikir Laba*, 68  
*Dikir Nabi Allah*, 68, 528, 595  
*dindin* (*Lagu Dindin*), 197–98  
Doidatsu Jepun, 122  
donak-danai, 151, 197, 397  
dondang sayang, 143, 190, 197, 199, 203, 207, 228, 333  
*Dondang Siti Fatimah*, 266, 270  
Doorenbos, 216, 255, 535  
Drewes, 212  
*Dunia*, 82  
Dussek (O.T. Dussek), 67, 344–47, 352, 359
- Elizabeth Drew, 8  
Emak Si Randang, 338–39, 341  
Encyclopaedia van Nederlansch-Indie, 212  
*ende-ende* (ende-ende), 108–9, 117  
endoi, 39, 70, 71, 95, 98, 264, 266–67, 270, 283, 528  
epifora (epipoor), 25, 26, 28  
Eropah, 15, 16, 209, 362  
*eurem*, 110
- F.G. Hubbard, 25  
*Fasul'l-Hikam*, 218  
Fatimah bt Lembing (Fatimah Lembing), 131, 144, 172–73, 175–76, 307, 397  
Frye, 2  
Fusus, 218
- G. Emeis, 47  
Gabenor Jeneral Belanda, 247  
Gabriel Altmann (Altmann), 23, 126–30, 144  
Gaelic, 369  
Gazali Dunia, 50, 52, 56, 285, 383–84  
geguritan, 42, 89, 107–8  
Gamala Hikmat, 67  
ghazal, 11, 23, 39, 79, 82–84, 95,

## INDEKS

- 214–15, 217, 229, 283, 369  
Grunebaum, 76  
“Gubang Panjang” (*gubang panjang*), 59, 156, 197, 397  
“Gubang Pendek” (*gubang pendek*), 156, 197  
gurindam, 5, 11, 16, 17, 27, 32, 38, 44–46, 48, 58, 66, 67, 88–95, 99, 100, 102, 117, 221, 223, 310, 312–21, 323, 325–27, 332–35, 343, 351, 353–54, 369, 413, 423, 425–26, 433, 440, 459, 550–51, 553  
gurindam adat, 99, 101  
“Gurindam Dua Belas”, 45, 48, 310, 312, 316, 318–21, 327  
guritan, 108  
“Gusti Adat Rejang”, 56, 63, 64  
  
Habsah bt Mat, 490  
hadrah, 39, 40, 72, 74, 95, 98, 104, 273  
*Hadrah Perlis*, 72  
Haidari, 216  
Hajah Esah bt Ahmad, 515–16  
Hajah Maimunah Hj Ramli, 308  
Hajah Teh Mariatul Qibtiah, 309  
Haji Awang Mahmud, 19  
Haji Ghafun, 532  
Haji Hussin bin Abdullah, 506  
Haji Jamaluddin Hashim, 530–31  
Haji Mohd. Wajib bin Abdul Rahman, 62, 233, 281–82, 560, 577  
Haji Mohd. Yunus bin Daud, 523  
Haji Omar Ismail (Tuan Haji Omar), 20, 69, 196, 265, 511, 533  
hamdolok, 190, 200  
Hamid Jabar, 106, 148, 181, 185  
Hamilton, 145–47  
Hamka, 140–42, 182, 185, 284–85  
Hamsiah Abd. Hamid, 389  
Hamzah Fansuri (Hamzah), 21, 81, 210–11, 216–22, 224, 226, 229–31, 254, 535, 539  
Hang Li Po, 119  
Hans Overbeck (Overbeck); 40, 61, 64, 116, 120–22, 132, 249–50, 259  
“Harapan yang Besar”, 324, 332, 334  
*Hari Kebangsaan*, 274  
Harmsen, 41, 107, 178  
Harun Mat Piah, 150, 190, 245, 364–65, 484–85, 507, 527  
Hashim bin Mat, 346, 525  
Hasjmi, 81, 82  
Hassan Ahmad, 44, 234, 236, 239, 262  
“Hati Muda” (*Wilful Youth*), 162  
Hava, 77, 283  
Hebrew, 16  
Helfrich, 107  
Herman bin Uda Tasir, 279  
Highet, 367  
*Hikayat Alfu Laila wa Lailah*, 324  
*Hikayat Anggun Cik Tunggal*, 57, 391  
*Hikayat Awang Sulung Merah Muda*, 57, 391  
*Hikayat Bongsu Pinang Peribut*, 392  
*Hikayat Dewa Asmara Jaya*, 364  
*Hikayat Hang Tuah*, 117  
*Hikayat Malim Deman*, 57, 314–15, 391  
*Hikayat Malim Dewa*, 391  
*Hikayat Misa Sususpan*, 364  
*Hikayat Percintaan Kasih Kemudahan*, 260  
*Hikayat Perjumpaan Asyik*, 260  
*Hikayat Raja-Raja Pasai*, 367, 370  
*Hikayat Selindung Bulan Kedah Tua*, 537  
*Hikayat Seri Rama*, 392  
*Hikayat Setia Asyik kepada Maksyuknya*, 260  
*Hikayat Sulung Jawa*, 537  
*Hikayat Terung Pipit*, 413, 537  
Hill, 18

## INDEKS

- Hindu, 117, 140, 480-82, 486, 504, 552  
Hindu-Buddha, 481  
Hj. Awang bin Muhammad (Awang bin Muhammad), 291, 302, 308  
Hj. Ibrahim Abdullah, 156  
Hj. Jamaludin Hashim, 40, 75, 540-41  
Hj. Muhammad Idris, 293  
Hj. Salleh Hj Awang, 289  
Hollander (J.J. De Hollander), 11, 14  
'homoioteleuton', 32  
Hose, 65, 147, 346, 464-66  
Hurufi Naimi, 217  
Husin bin Ahmad, 518  
Hussin bin Long, 523
- Ibnul-Arabi, 217, 222  
Ibrahim Baba, 188  
Ibrahim Saad, 49  
Idris Abd. Manap, 169  
Ignace Goldziher (Goldziher), 212-14  
*Ikat-ikatan Dua Belas Puji*, 239, 241  
*Ilmu Mengarang Melayu*, 286, 315  
Imur'ulqais, 76  
India, 10-12, 22, 116-18, 122, 132, 248-49, 276, 334, 551-52  
India-Amerika, 122  
Indie, 122  
Indonesia, 8, 12, 13, 23, 116-18, 221, 235, 263, 325  
Iraqi, 217-19, 222  
Inggeris, 15, 57, 121, 209, 230, 369  
Inon Shaharuddin, 346, 359  
Islam, 10, 84, 117, 140-41, 155, 213, 215-16, 248, 252-53, 266, 280, 284, 294, 481-82, 485, 499, 504, 508, 540  
Ismail Hasan, 226, 411-12
- Jaafar bin Ngah Ibrahim, 421
- Jami, 217-19, 229  
Jamilah Hj Ahmad, 61, 411, 413-14  
*Jampi doa sepuluh*, 509  
*Jaran Temasa*, 243  
Jaspan, 56  
*Javaansche Zamenspraken*, 107  
Jawa, 8, 24, 33-35, 41-43, 85, 88, 107, 112, 114, 117-18, 122, 136, 212, 223, 250, 336, 362-65, 551  
Jawa Kuno, 21-23, 41, 105  
Jepun, 122, 263  
Jerman, 15, 122, 402  
Jiwa bt Hj Omar, 493  
John Crawfurd (Crawfurd), 316  
John T. Platten, 478  
Johns (A.H. Johns), 212, 230, 400, 403, 409, 415-19, 404  
Johnson, 23  
Johor, 84, 190, 200, 204, 267, 278, 493, 547  
"Jubang Linggang", 403, 411-12, 414, 420, 422  
Jusoh bin Deraman, 205
- K.C. Dutt, 116  
K. Terengganu (Kuala Terengganu), 192, 205, 291, 307  
kaba, 60, 102, 400, 403-4, 410, 415, 422, 453  
"Kaba Nan Gombang", 403-5  
kakawin, 22, 23, 41, 42, 118  
Kakawin Ramayana Jawa Kuno, 22  
Kaluh bin Alimi, 513  
*Kamus Dewan*, 478, 528  
"Kanz al-'Ulā", 291, 300  
"Karangan-karangan berangkap atau Puisi, Gurindam, Seloka dan Sajak", 315  
"kata-kata adat" (kata adat), 55, 95, 101  
"kawya", 22  
*Kebajikan*, 238  
*Kebangsaan Melayu*, 262

## INDEKS

- Kedah, 71, 117, 190, 231, 267, 276–78, 283  
*Kehilangan Adat Melayu*, 325, 332  
Kelana Brahman, 364  
Kelantan, 119, 180, 190, 202, 421–22, 484, 489–90, 494, 508, 516, 549  
*Ken Tambuhan*, 243  
“Keramat Teluk Pulai”, 422  
Kerinci, 85  
“Ketika Rejang”, 61, 64  
*Kitab al-Jawahir al-Saniyya*, 308  
*Kisah Asal-Usul Boria*, 277  
*Kitab Berzanji*, 40, 74  
*Kitab Kanz al-'Ula*, 287, 289, 292–93, 299, 307–8  
*Kitab Majmu'a Maulud Syarif al-Anam*, 530  
*Kitab Tajul-Muluk*, 285  
*Kitab Tanbih al-Kusla*, 306  
‘kit’ah’ (kit’ah), 11, 23, 39, 79, 82–84, 95, 217, 224, 283, 369  
Kompeni Belanda, 246  
Koryo Yakahasi, 263  
kosmogoni, 11  
*Kumbang Mengindera*, 243

## INDEKS

- Maskinah bt Mohd. Dom, 273  
masnawi, 11, 23, 39, 79, 82, 83, 95,  
215, 217, 224, 229, 283, 369  
Maxwell, 154, 228  
Melaka, 117, 119, 131, 144, 152,  
172–73, 175–76, 179, 184,  
187–88, 190, 197, 199, 200, 252,  
264–65, 267, 275, 283, 293–94  
306–7, 309, 363, 397, 424, 429,  
442, 493  
Melayu, 1–16, 20, 22–26, 29, 31, 33,  
36, 37, 39–43, 51, 57, 64, 70,  
73, 74, 76, 80–82, 84, 85, 88, 89,  
91, 95, 97, 102, 105–12, 114–24,  
126, 132–33, 136, 140–41, 147,  
167, 179–81, 184, 188, 200, 204,  
206–13, 215–16, 219–31, 233,  
235, 241–43, 249–51, 258, 262,  
265, 274–76, 282–84, 287,  
294–95, 299, 310, 313–16, 319,  
321, 323–27, 334, 337–38,  
341–42, 358, 360, 362–63,  
365–70, 399–401, 403, 410,  
414–15, 420, 423, 443, 467–70,  
478–82, 486, 489, 501–4, 507,  
518, 525–26, 528–32, 537–39,  
545–46, 648–55  
Melayu – Indonesia, 210, 216, 219,  
224, 231  
Melayu – Polynesia, 43  
Melayu Tengah (*Middle Malay*),  
107  
Melikin Hj. Kajai, 87  
“Memanggil Semangat”, 506  
“menitik Inai”, 264, 275  
Minangkabau, 33, 43, 55, 59, 60,  
89, 102, 106, 108, 180, 223, 339,  
400, 403, 410–11, 415, 419,  
422–24, 429–30, 442–44, 527, 552  
  
Minye Tujuh, 226  
*Misa Melayu*, 258  
Mishah bt Hamid, 280  
Mohd Ali Hitam, 182–83  
Mohd. Din Ali (Mohd. Din bin Ali),  
18, 28, 227, 424, 427–28, 439,  
443–44, 448–50, 454–55  
Mohd. Ghouse Nasaruddin, 73  
Mohd. Nasir Hassan, 529  
Mohd. Noh bin Ali, 505  
Mohd. Nor bin Nonik, 499  
Mohd. Salleh bin Ngah Jaafar, 206  
Mohd. Taib Osman, 18, 27, 31, 39,  
45, 46, 48, 57, 58, 70, 71, 86, 90,  
112, 138, 149–50, 162, 165, 181,  
183, 190, 240, 257–58, 315,  
350–51, 371–72, 374, 376, 380,  
389, 414, 431–32, 465, 526–27  
Mohd. Zain Talib, 192  
Mokhtar Hj. Jaafar, 75  
Moorhead, 479  
“mu’allaqat”, 76  
“Muda Lingah”, 190  
Muda Mat Zain, 192  
Muhammad Abdul Jalil, 66  
Muhammad Haji Salleh, 13, 144  
Muhyi’l Din ibnu'l-Arabi (Ibnu'l-  
Arabi), 217–19  
*Mukadimah*, 289  
Munsyi Sulaiman, 67, 351–52  
Musa bin Jalil, 73  
  
Nainun bt Hassan, 77, 271–72  
Naning, 429  
*Nasib*, 214  
“Nasihat Kepada Anak”, 256  
nazam, 6, 11, 19, 20, 31, 32, 39, 77,  
79, 81, 84, 89, 91, 92, 95, 98, 209,  
221, 271–72, 282–88, 291,  
293–95, 298–300, 302, 305–10,  
327, 369, 528, 532–34, 538–39,  
550, 553, 574  
*Nazam al-Jawahir al-Saniyyah*, 288  
*Nazam al-Ula*, 291  
*Nazam Arzal-an-Nas*, 293  
*Nazam Kanz al-Ula*, 295, 297  
*Nazam Membuai Anak Perempuan*,  
77  
*Nazam Nasihat*, 77  
Nazam Tanbih al-Kusla, 299

## INDEKS

- 'Nazam 20', 304  
Negeri-negeri Selat (Negeri Selat),  
119  
Negeri Sembilan, 55, 59, 71, 117,  
119, 148, 151, 156, 158, 183,  
189–90, 195, 197, 229, 267, 283,  
397, 422–24, 429, 437, 440–44,  
447, 453, 508, 511, 532, 546–47,  
557, 579  
Netscher, 17, 312–13, 319, 322, 330  
Nicholson, 16, 213–14  
Nordin Selat, 26, 427, 438, 446–47,  
451  
Nusantara, 9, 16, 22, 29, 33–36, 41,  
43, 89, 106–8, 110, 112, 114, 118,  
122, 132, 222–24, 230–31, 246,  
248, 282, 315, 362, 423, 443, 479  
"Nyanyian Pelanduk", 201  
nyawer, 36, 42  
  
*Octavo*, 12  
Omar Khayyam, 25  
  
P.L. Amin Sweeney (Sweeney,  
Amin Sweeney), 220–21, 226,  
230, 369–401, 410, 421  
Pahang, 40, 70, 189–90, 193, 195,  
204–5, 267, 271, 283, 308, 547  
"Pak Belalang", 363  
Pak Da Mat Zain, 483  
"Pak Kaduk", 312, 338, 342  
"Pak Pandir", 312, 342  
*Pakaian Malim Dewa*, 373  
*Paksi Dewata*, 250  
Pampanga, 105, 108  
*Panji Semerang*, 243  
pantun, 6, 10, 16, 17, 20, 21, 23,  
26–32, 34, 35, 37, 38, 40, 43, 49,  
50, 52, 64, 66, 74, 85, 88–91,  
93–95, 97, 100, 103–12, 114,  
116–19, 121–23, 125–26, 128,  
130, 132, 136, 138–39, 141,  
143–58, 160–64, 167, 169–70,  
175, 177, 179, 181–85, 188–93,  
195–96, 199–209, 212, 221,  
223–26, 228, 242, 276, 287, 299,  
310, 315, 320, 327, 333, 335–36,  
343, 346–47, 353, 369, 374–75,  
404–5, 409–10, 413–14, 424, 433,  
436–38, 440, 442, 459, 464–68,  
492, 537, 550–51, 553  
"Pantun Adat", 101, 186–87  
*Pantun Alif-Ba-Ta: Perak*, 571  
"Pantun Ayam Sabungan",  
187–88  
"Pantun Cik Busu Pandai Mem-  
bilang Malam", 156, 562  
*Pantun dua baris dan pantun-  
pantun yang mudah dalam dialek  
Banjar*, 85  
"Pantun Harimau", 187  
"pantun ibarat", 50, 97  
"Pantun Intan", 187  
"Pantun Laut", 186  
"Pantun Mak Limah", 187  
*Pantun Melayu*, 43, 106–7, 126,  
131, 134, 142, 148–49, 161,  
167–74, 176, 178, 180–81,  
184–85  
"Pantun Puji-pujian", 186  
"Pantun Rejang", 61, 155, 158, 280  
*Pantun Rejang: Rejang Sindir Ilmu  
Perak*, 557  
"Pantun Si Anak Dara", 187  
pantun seloka, 38, 98, 100, 160,  
225, 467  
"pantun setalibun", 51  
*Pantun Si Bongsu Pandai Mem-  
bilang Malam (versi Negeri  
Sembilan)*, 560  
Pantun Suku Banjar, 86  
"Pantun Sunda", 105  
"Pantun 30", 156  
*Pantun yang dinyanyikan dalam  
"andai-andai" Suku Brunei di  
Sabah*, 86  
paparikan, 34, 89  
Parsi, 11, 80, 81, 85, 122, 209–10,  
215–16, 219, 221, 224, 229,  
248–49, 276, 284, 552

## INDEKS

- Pawang Mat bin Andak, 28  
"Pelangkah", 504  
*Pelayaran Sultan Iskandar*, 246  
*Pemanis Suara*, 68  
"Penderas", 504  
penglipur lara, 57, 58, 60, 61, 102  
pepatah, 65, 66, 93, 101  
Perak, 71, 119, 159, 180, 189–90,  
195, 204–5, 233, 267, 278, 283,  
308–9, 397, 421  
Perancis, 15, 122  
*Perang Banjarmasin*, 246  
*Perang Johor*, 246  
*Perang Perak*, 246  
*Perang Turki dan Rusia*, 246  
Perbilangan, 38, 52, 65, 93, 95, 99,  
101–2  
Perbilangan adat, 38, 52, 53, 90, 95,  
99, 101–2  
Perbilangan Adat Perpatih, 317  
peribahasa berangkap (peribahasa  
berirama), 27, 32, 38, 48, 49,  
64–66, 90, 91, 93, 95, 100–1, 407,  
423, 440, 459–60, 462, 465  
Perlis, 68, 119, 190, 196–97, 203,  
226, 411–12, 422, 485, 490  
permainan balai, 193  
permainan beduan, 196  
Permainan bongai, 197  
*petasih* (*Lagu Petasih*, "Petasih"),  
151, 197, 228  
Pijnappel, 138, 140, 142  
*Poezie in Indonesia*, 23  
Polynesia – Austronesia, 105  
Prampolini, 122, 132  
Preminger, 334  
prosa berirama (prosa lirik, *lyric  
prose, rhythmical prose*), 5, 6, 10,  
36, 38, 58, 60, 61, 66, 85, 88, 89,  
91, 94, 95, 102, 223, 225, 227,  
343, 366, 370, 397, 399, 400, 402,  
439, 453, 488–89, 491, 550–51  
*Psalm*, 16  
Puisi kelompok kata (*woord-  
groepvers*), 16  
'puisi lisan' (*oral poetry*), 4, 5  
Puisi perkataan (*woordvers*), 16  
'puisi rakyat' (*folk poetry*), 4  
*Puisi seperti talibun (Sarawak)*, 86  
Puisi suku kata (*isosyllabic*), 15  
*Puisi tekanan (herfingsvers)*, 15  
puisi-puisi sukuhan, 39  
Pujangga Baru, 12, 235  
Pulau Pinang (P. Pinang), 119, 180,  
276, 278  
"Pungguk Rindukan Bulan"  
(*Unrequited Love*), 162  
*Puteri Bunga Kamar*, 243  
*Puteri Gunung Ledang*, 314  
*Puteri Handalan*, 243  
*Puteri Lindung Bulan Kedah Tua*,  
225, 403, 411, 420, 537  
Pyan Hussayn, 327  
Qa'ani, 215  
qasidah, 39–41, 76, 95, 104,  
214–15, 217, 221, 224–25, 229,  
530, 535, 537, 539  
*Qasidah al-Burdah*, 76  
*Qasidah Bariat*, 76  
quatrains, 12  
R. Hoesein Djajadiningrat (Djaja  
diningrat), 14, 107–10, 113, 117  
Raja Ali Haji, 45, 48, 241, 256, 258,  
310, 312–13, 316, 320–21, 327  
Raja Chulan, 258  
119, 225, 314–15, 484  
Raja Iskandar, 251  
"Raja Haji", 154, 228  
"Raja Muda", 190  
"Raja Muda dan Puteri Bungsu",  
516  
Rakaman "Berendoi", 72  
Rakaman dari Kangar 1978, 203–4  
Rakaman dari Mukim Kuda Jem-  
pul, 186  
Rakaman daripada Kumpulan  
Dabus, 276  
Rakaman daripada Kumpulan

## INDEKS

- Hadrah Rakaman (Hadrah), 274–75  
Rakaman di Ulu Dungun dan Ulu Tembeling 1977, 194  
Rakaman permainan balai di Mukim Teresat, 193  
Rakaman Permainan Beduan, Perlis 1978, 44, 197  
Rakaman permainan bongai, 177, 184  
Rakaman Permainan Hadrah, Kedah 1976, 44  
Rakaman Permainan Hamdolok, 201  
Rakaman Teromba Adat, 55  
*Ramayana*, 116, 118, 334  
*Rambun Pamenan*, 403, 419  
*Rancak Dilabueh*, 403, 408–9, 415, 418–19  
Randon bt Sinha, 166  
*Ratu Juwita*, 243  
Rawa, 43, 85  
Razali Hj. Ibrahim, 68  
rejang, 38, 40, 61, 63, 64, 95, 97, 280  
“Rejang Ka-Ga-Nga”, 63  
“rejang ketika”, 61  
*Rejang Si Padi Emping*, 62, 280  
*Rejang Sindir Ilmu*, 62, 155  
*Rejang Tujuh Hari*, 281  
“*Rejang 30 Hari*”, 155  
“Rentak Kuda”, 83  
*Residen de Brauw*, 246  
Rivai Yogi, 416–18  
rodat, 119, 190, 24, 228  
Rokiah Arifin, 202  
Rokiah Hj. Yahya, 166–67  
Romawi, 362  
Rosmera, 235  
ruba'i, 11, 39, 79, 81, 82, 84, 95, 98, 215–19, 222, 224, 229, 283, 369  
Rubinstein, 41  
Rudaki, 215  
Rumi, 215  
**S.** Slametmuljana (Slametmuljana), 23, 34  
*Sabai Nan Aluih*, 58, 60, 403, 419  
Sahut bin Jantan, 520  
Saiva, 504  
Sakuntala, 116, 118  
Salleh Abd. Rahman, 69, 202–3  
Salleh bin Ngah Jaafar, 159  
“Sambutan Kemerdekaan”, 264  
“Sangga Bunuh”, 504–5  
“Sangga Mara”, 504  
Sanskrit, 11, 14–16, 21–23, 41, 107, 118, 211, 258, 334, 338, 478, 551  
Sarah bt Sihar, 166  
*Schouw Santvoort*, 246  
*Sejarah Melayu*, 21, 80, 116–17, 119, 225, 314–15, 484  
“Seladang Cantik”, 422  
*Selamat Bersanding*, 279  
selampit, 421–22  
Selangor, 71, 190, 204, 241, 267, 273, 276, 283, 405, 407, 422  
seloka, 17, 38, 44–49, 89–95, 97–100, 117–18, 221, 223, 310, 312, 321, 327, 334–39, 341–43, 353–54, 369, 459, 550, 551, 553  
“seloka melerat”, 46  
semukur (*asymmetrical*), 124, 144  
Senyum (Puan Senyum), 151, 174  
serima (*monorthyme*), 92, 214, 225–26, 238, 530, 535  
sesomba, 18, 27, 36, 38, 56, 58, 59, 61, 91, 94, 95, 102, 117, 190, 221, 223, 315, 319, 323, 327, 343, 351, 366, 369, 371, 391, 394–95, 399, 402, 410, 413–14, 488, 550  
*Sesomba bersenda guruau*, *Minang-kabau*, 59  
Shah Ni'matullah, 217  
Shaman, 504  
Sham-i Tabaris, 217  
Shellabear, 21, 225, 314  
Shi King, 121  
“Si Awang Lebih”, 504, 521  
*Si Lindung Delima*, 243  
*Si Manja Ari*, 403  
“Si Palit Gila”, 504  
*Si Tanggang*, 134

## INDEKS

- Si Ummut Muda*, 403  
*Silsilah Melayu dan Bugis*, 258  
Simorangkir Simandjuntak (Simorangkir, Simandjuntak), 12, 39, 47, 49, 54, 56–58, 60, 160, 283–84, 334, 336, 464, 466–67  
simplok (*symplok*), 25, 26, 28  
*Singapura Terbakar*, 246  
Siti Zubaidah, 243  
Sjamsuddin Sutan Radjo Endah, 404, 407, 410, 420  
Skeat (W.W. Skeat), 26, 29–31, 394, 443, 479, 491, 512, 517, 569  
Skinner, 30  
Soesaty Darnawi, 41  
Sturrock, 363, 374, 378, 383–86, 388–89, 393  
Styled Hsing, 122  
*Suara Zaman: Syair dan Pantun Pada Masa Perang Ini*, 263  
Suhaimi Hj. Muhammad, 327  
Sulaiman Muhammad Nur, 348, 351–53, 356–58  
*Sultan Abu Bakar*, 246  
*Sultan Mahmud Syah*, 314  
*Sultan Mansur*, 246  
Sultan Mansur bin Sultan Johor Alamsyah, 285  
Sultan Mansur Syah, 119  
Sultan Maulana, 246  
*Sulung Jawa*, 60, 225  
Suma Oriental, 363  
Sumatera, 42, 64, 370  
Sunda, 24, 33, 34, 36, 42, 85, 108, 110, 112, 118, 223  
Supaat bin Hassan, 88  
“Surat Nasi”, 264, 278  
suswalan, 34, 42, 89  
Sutan Takdir Alisjahbana (Alisjahbana), 21, 39, 45, 48, 54, 55, 57, 58, 78, 82, 83  
Sutjipto Wirjosuparto, 22, 118  
*Syafik Affendi dengan Faridah Hanum*, 260  
Syaikh Sadru'l-Din al-Qanawi, 218  
syair (shi'r), 5, 6, 11, 16, 17, 20, 23, 30–32, 37, 38, 43, 44, 46, 47, 49, 50, 64, 66, 67, 71, 74, 77, 81, 82, 85, 88, 90–92, 95, 98, 100, 104, 145, 153, 155, 160, 209–13, 215–33, 235–39, 241–58, 260, 262–66, 271, 276–77, 280, 282, 285, 287, 299, 308, 310, 313, 315–16, 327, 333, 335–36, 349, 353, 369, 374, 397, 442, 530–31, 534, 537–38, 550–51, 553, 574  
*Syair Abdassaman*, 248  
*Syair Adham*, 248  
*Syair al-Salat*, 253  
*Syair Alam Tasawuf*, 253  
*Syair Amanat*, 256  
*Syair Anbia*, 248  
*Syair Bangkahulu*, 246  
*Syair Bayan Budiman*, 250  
*Syair Buah-buahan*, 250  
*Syair Bunga Air Mawar*, 250  
*Syair Bunga Melur Cempaka Gading*, 250  
*Syair Bunga Rampai*, 258  
*Syair Burung*, 252  
*Syair Burung Budiman*, 252  
*Syair Burung Pungguk*, 250–51  
*Syair Chaya Kebenaran*, 263  
*Syair Cermin Islam*, 253  
*Syair Cetera di dalam Kubur*, 253  
*Syair Cinta Berahi*, 244, 250  
*Syair Dagang*, 254  
*Syair Himop*, 247  
*Syair Hukum Tajwid*, 254  
*Syair Ibadat*, 253  
*Syair Ikan Baharu*, 250  
*Syair Ikan Tembera*, 250  
*Syair Ikan Terubuk Berahikan Puyu-puyu*, 250–51  
*Syair Injil*, 253  
*Syair Islam*, 253  
*Syair Jentayu dan Syair Tawon*, 250  
“*Syair Kampung Behrang Ulu*”, 264

- Syair Ken Tambuhan*, 116  
 "Syair Keramat Teluk Rubiah", 264  
*Syair Kiamat*, 253  
 "Syair Kisah Perang Rokan", 264, 577  
*Syair Kompeni Welanda Berperang dengan Cina*, 247  
*Syair Kumbang dan Melati*, 250  
*Syair Kenang-kenangan Yapsai Taman Penghiburan*, 256–57  
*Syair Kili Buku Bemban*, 263  
*Syair Kumkuma*, 250  
*Syair Makrifat Allah*, 253  
*Syair Maulud*, 272, 240–41  
*Syair Mekah dan Haj*, 253  
*Syair Mekah dan Madinah*, 254  
*Syair Moko-Moko*, 246  
*Syair Nabi Allah Adam*, 248  
*Syair Nabi Allah Ibrahim*, 248  
*Syair Nabi Allah Yusuf*, 248–49  
*Syair Nasihat*, 256  
*Syair Neraka*, 253  
*Syair Nur Muhammad*, 248  
*Syair Nuri*, 250  
*Syair Nyamuk dan Lalat*, 250  
*Syair Orang Berbuat Amal*, 253  
*Syair Orang Makan Madat*, 256  
*Syair Pelanduk Jenaka*, 250  
*Syair Pengajaran*, 256  
*Syair Perahu*, 21, 254, 535, 539  
*Syair Perang Mengkasar*, 246–47  
*Syair Perlembagaan Negeri Brunei*, 258  
*Syair Puteri Bunga Kamar*, 263  
*Syair Puteri Hijau*, 263  
*Syair Raja Siak*, 246  
 "Syair Raksi", 64, 258  
 "Syair Rejang", 40, 61, 98  
*Syair Rejang: Rejang Tujuh Hari Perak*, 575  
*Syair Rukun Haji*, 254  
*Syair Rukun Nikah*, 253  
*Syair Sang Kupu-kupu dengan Kembang dan Balang*, 250  
*Syair Si Banso Urai*, 263  
*Syair Si Burung Pingai*, 254  
*Syair Si Pahit Lidah*, 263  
*Syair Sidang Fakir*, 254  
*Syair Sifat Dua Puluh*, 253  
*Syair Singapura*, 263  
 "Syair Sultan Abdul Jalil Terbunuh", 258  
 "Syair Sungai Perak", 264  
*Syair Syarab al-Asyikin*, 254  
 "Syair Ta'bir Mimpi", 64, 258  
*Syair Unggas*, 252  
 Syed Muhammad bin Syed Zainal Abidin al-Idrus, 78, 293, 299, 301–4, 541  
 Syed Naquib al-Attas (Syed Naquib), 81, 210–11, 215–22, 227, 229–30  
 Syed Syeikh al-Hadi, 260  
*Taal en Versbouw*, 14  
 Tagalog, 33, 35, 105  
 Tahir bin Kotei (En. Tahir, Tahir), 148, 151–52, 177, 180, 182, 198–99, 399  
*Tajul-Muluk*, 287, 309  
*Tajus Salatin*, 11, 23, 82, 84, 283  
 Talang Mama, 223  
 talibun, 5, 6, 10, 17, 18, 27, 31, 32, 36, 38, 48, 50–52, 59, 61, 66, 67, 85, 88, 89, 91–95, 97, 101–4, 117, 190, 221, 223, 315, 319, 323, 327, 343, 351–52, 366, 369–71, 391, 394–95, 397, 399, 402, 410, 413–14, 433, 439–40, 488, 491, 538, 550–51, 553  
 "talibun adat", 51  
*Talibun: Lagu Gubang Panjang*, 579  
 "Talibun Persisir", 369, 375  
 tambo, 38, 52, 53, 56, 90, 95, 101, 424, 426, 429  
 tamsil, 65, 66, 101, 463  
 Tan Chay Yan, 263–64  
*Tanbih al-Kusila*, 293, 299, 302, 304

## INDEKS

- Tarafa, 76  
tarian balai, 192–93  
tarian canggung, 203  
tarian lotah, 195  
teka-teki (*jingling riddles*), 32, 38, 66, 67, 91, 92, 95, 99, 100, 103, 116–18, 223, 227, 310–11, 321, 353–57, 359–61, 363, 369, 465, 536, 550  
*Teka-teki Bersyair*, 66  
Teka-teki ‘Kain Sarung’, 66  
tembang, 35, 41, 42  
terasul, 38, 52, 55, 90, 95, 101, 424, 426  
“Terasul Adat Perpatih”, 55  
Terengganu, 119, 156–58, 189–90, 193–94, 204, 288–89, 293, 307, 422, 484, 516  
Ternate, 34  
teromba, 5, 10, 17, 18, 25–28, 32, 36, 38, 52, 54–56, 64, 89–95, 99, 101, 117, 184, 212, 223, 227–29, 319, 321, 327, 333, 368–71, 407, 423–26, 428, 430, 432–34, 437–38, 442–47, 449–50, 453–54, 456, 458–59, 462, 468, 488, 538, 550–51, 553, 557  
*Teromba dalam Istiadat Perkahwinan Negeri Sembilan*, 582  
terzina, 12  
Teuku Iskandar, 479, 526  
Th. Pigeaud, 8, 118, 212  
*The Book of Odes*, 120  
“The Climax in Malay Pantun”, 126  
*The Malays – A Cultural History*, 480  
*The Malay Magician: Being Shaman, Saiva and Sufi*, 480  
“The Malays and Religion”, 481  
timang seberang, 197  
Tome Pires, 363  
Torah, 16  
trochee (*trochaic*), 15  
Tuan Abdullah Tuan Muda, 494  
Tuk Engku Tuan Besar  
Terengganu, 287–88, 291  
Tumpang bin Mohamad, 179, 184, 187, 199, 200  
Tun Seri Lanang, 315  
tundalian, 108  
“Tuntutlah Ilmu”, 228  
*Ucapan Mencukur Rambut Budak Kecil*, 71  
Ujang Hj Rapal, 437, 440, 447  
ulit badang, 189–90, 192  
ulit mayang, 189–90, 192  
*Undakan Agung Udaya*, 243  
ungkapan-ungkapan pemerian (*descriptive passages*), 59, 61, 94, 102, 336, 370, 391, 400, 403, 551  
Untong Hj. Akil, 62  
upajati, 16  
Uways al-Qarani, 217  
V. Von Strauss (Strauss), 120  
Van der Tuuk, 117  
Van Hoevell, 41  
Van Imhoff, 247  
Van Opuijsen (Ophuijsen), 9, 109–10, 117, 132, 138–39, 142, 161  
Van Ronkel, 249  
Volksalmanak, 331  
Voorhoeve, 64  
Wan Ahmad Hj Wan Abd Rahman, 512, 520  
Wan Ali bin Wan Md. Nor, 489  
Wangsalan, 12, 42, 113, 117  
Ward (Philip Ward, P. Ward), 35, 36, 63  
*Warisan Puisi Melayu*, 465  
Wasf, 214  
wawangsalan, 110, 112, 117–18  
Weda, 47  
Wilkinson (R.J. Wilkinson), 9, 10, 27, 40, 51, 55, 61, 65, 109–10, 114–15, 126, 132–34, 143–44,

## INDEKS

- 146, 148, 160–62, 168, 170–72,  
174–77, 180, 182, 225, 227, 258,  
266, 316, 424  
Winstedt (R.O. Winstedt), 9, 10,  
17, 27, 45, 57, 58, 109–11,  
115–21, 125–26, 132–34, 138,  
140, 142–44, 148, 158–62, 168,  
170–77, 180, 182, 225, 227, 323,  
363, 366–71, 374, 378, 383–86,  
388–89, 393, 400, 402, 479, 480,  
501, 508  
Winter, 107  
Yunani, 14, 15, 362  
Za'ba, 1, 17, 32, 39, 40, 44–46, 48,  
53, 54, 58, 64, 65, 67, 80, 106,  
125, 138, 141, 172–73, 177–78,  
228, 232–34, 237–38, 285–87,  
294, 315–20, 323–26, 332, 335,  
337–38, 351, 353, 376, 400,  
424–26, 460–64, 467–68, 481–82,  
514  
Zaharah Khalid, 379, 386–88, 391  
Zaini bin Hj Khairuddin, 545  
Zakaria Hitam, 387–88  
Zaman Maju, 325, 332  
Zoetmulder, 41  
Zuber Usman (Zuber), 39, 41,  
50–52, 55, 57–59, 68, 112, 168,  
223, 227, 335, 337, 340, 369, 375,  
395  
Zuhair, 76

26 FEB. 1990